

ಲೂಕನು ಬರೆದ ಯೇಸುವಿನ ಸುವಾರ್ತೆ ಲೂಕನೆ ಲೀಖ್ಯೋತೆ ಯೇಸುನಿ ಅಲ್ಫಿ ಸಮಾಚಾರ್ ಮಾಲುಮ್ ಕರಾನು

ಲೂಕನೆ ಲೀಖ್ಯೋತೆ ಸುವಾರ್ತೆ ನವಿ ಒಪ್ಪಂದಾಮ ಛಾತೆ ಯೇಸುಕ್ರಿಸ್ತನು ಜಿವ್ವನಿಬಾರೇಮ ಲೀಖ್ತಿರುತೆ ಚಾರ್ ಪುಸ್ತಕ್‌ಮ ಆ ಪುಸ್ತಕಾಬಿ ಏಕ್ ಹುಯಿರ್ಟ್ವಸ್. ಆ ಹರೇಕ್ ಪುಸ್ತಕಾನಾಬಿ ಸುವಾರ್ತೆಕರಿ ಬೋಲಸ್. ಆನಿಮತ್ಲಬ್ 'ಅಲ್ಫಿ ಸಮಾಚಾರ್'.

ಆ ಅಖ್ಖು ಯೇಸುನಿ ಮರಣ್ಣಿ ಬಾದ್‌ಮ ಮತ್ತಾಯ, ಮಾರ್ಕ, ಲೂಕ ಅಜ್ಜು ಯೋಹಾನ ಇವ್ಣೇಥಿ ಲೀಖ್ತಿರ್ಟ್ವಸ್. ಲೂಕನೆ ಖಲಿ ಯೇಸುನಿ ಜಿವ್ವಾನಿ ಖೇಣಿನ ಎತ್ರೇಸ್ ಲೀಖಿರಾಖ್ಯೊಕೊಯ್ಚಿ ಕತೋಬಿ ಇನೆ ಯೇಸುನಿ ಮರಣ್ಣಿ ಅಜ್ಜು ಮರೀನ್ ಜಿವ್‌ಯೊತೆ ಇನ ಬಾದ್‌ಮ ಇನ ಶಿಷ್ಯರಾಖ್ಹಾರು ಕರೈತೆ ಥೋಡಿ ಸಮಾಚಾರ್ನ್ ಬಾರೇಮ ಲೀಖಿರಾಖ್ಯಸ್. ಯೋ ಪುಸ್ತಕಾನು ನಾಮ್ ಅಪೊಸ್ತಲರ್ಟ್ವ ಕಾಮ್‌ಅಖ್ಖು.

ಲೂಕನೆ ಲೀಖ್ಯೋತೆ ಸುವಾರ್ತೆ ಯೋಸ್ ವೇಳ್ತ ಲೀಖ್ತಿರುಸ್ಕರಿ ಬೋಲಾನು ಖಾಚ್ಚುಕೊಯ್ಚಿ ಕತೋಬಿ ಘಣೇಥಿ ಘಣು ಲೀಖಾಪಟ್‌ವಾಳು ಕ್ರಿಸ್ತಪೈದ ಹುಯಿನ್ 70 ವರಖ್ವನ್ ಬಾದ್‌ಮ ಲೀಖ್ತಿರು ಉಷೆಕರಿ ಮಾನಿಲೇಸ್.

ಲೀಖಾಪಟ್‌ವಾಳೊ ಲೂಕ ಏಕ್ ಪಂಡಿತ್ ಹುಯಿರ್ಟ್ವೊಥೊ. ಇನೆ ಲೀಖ್ಯೋತೆ ಪರಕ್ತ ಅಜ್ಜು ಲೀಖಾಪಟ್‌ನಿ ವಾತೆ ಯೋ ಏಕ್ ಲೀಖಾಪಟ್‌ವಾಳೊ ಹುಯಿರ್ಟ್ವೊಥೊಕರಿ ವತಾಳಿಲೇಸ್. ಲೂಕನೆ ಅಜ್ಜಾಬಿ ಯೇಸುನಿ ಜಿವ್ವನಿಬಾರೇಮ ಬರೋಬರ್‌ಥಿ ಲೀಖಾನ ಕೋಶಿಶ್ ಕರಿರಾಖ್ಯೋಸ್ ತದೆ ಚಾಲಿತೆಅಖ್ಖು ಚಾಲ್ಯುಕಿಮ್ಮಿ ತಿಮ್ಮಸ್

ಬೋಲಿರಾಖ್ಯೋಸ್ ಇನಖ್ವಾಜೆ ಫಡವಾಳನ ಅನೇಧಿ ಫಾಯಿದೊ ಹುವಾನಿಫೋಣಿ ಕರ್ರೊ.

ಯೋ ಯೆಹೂದ್ಯ ಹುಯಿರೊಡೊಕೊಯ್ನಿ ಕೊಲೊಸ್ನೆ 4:10-14 ಅಜ್ಜು ಯೆಹೂದ್ಯರ್‌ಕಾಹೆತೆ ಅದ್ಮಿವೋಬಿ ಮಾಲುಮ್ ಕರಿಲ್ಯವಾನಿ ಪರಕ್ ಇನೆ ಲೀಖಿರಾಖ್ಯೋಸ್. ಇನೆ ಯೆಹೂದ್ಯರ್‌ನಿ ಪದತ್ತಿನಿ ಬಾರೇಮ ಛೋಡಿ ಬೋಲಿರಾಖ್ಯೋತೆ ಇನ ದೇಖ್ತೊ ಅಪ್ಪುನ ಮಾಲುಮ್‌ಪಡಸ್ ಲೂಕ 1:4.

ಲೂಕನೆ ಲೀಖ್ಯೋತೆ ಸುವಾರ್ತೆ ಮತ್ತಾಯ ಅಜ್ಜು ಮಾರ್ಕನೆ ಲೀಖ್ಯೋತೆ ಸುವಾರ್ತೆನಿಫೋಣಿಸ್ ಛಾ, ಶನಕತೊ ಯೋ ಅಖ್ಖು ಎಕ್ಕ್‌ಪರಕ್ ಛೋಡಿ ಬೋಲಿರಾಖ್ಯೋಸ್. ಆ ತೀನ್ ಪುಸ್ತಕಮಾಬಿ ಲೂಕನೆ ಬ್ಯಾಪ್ತಿಸ್ತ ದ್ವವಾಳನಿ ಯೋಹಾನನಿ ಪೈದಾಖ್ವಾನಿ ಬಾರೇಮ ಬೋಲಿರಾಖ್ಯೋಸ್. ಲೂಕ 3:3, 11:4, 17:3-4, 23:34, 24:47 ಅಜ್ಜು ಪ್ರಾರ್ಥನೇನಿ ಬಾರೇಮ ಬೋಲಿರಾಖ್ಯೋಸ್. ಲೂಕ 3:21, 5:16, 6:12, 11:1-12, 22:32.

ಕಾಡಿದೇಖೊ

1. ಅದ್ಯಾಯ 1-4 ಲೂಕನೆ ಇನಿ ಸುವಾರ್ತೆನಿ ಪರಿಚಯ್ ಕರಿರಾಖ್ಯೋಸ್. ಅಜ್ಜು ಯೋ ಶನಖ್ವಾಜೆ ಲೀಖಿರಾಖ್ಯೋಸ್‌ಕರಿ ಬೋಲಾನು ಛೋಡಿ ವತಾಳಿರಾಖ್ಯೋಸ್. 1:1-4
2. ಇನಕೇಡೆಥು ಇನೆ ಯೇಸು ಪೈದಹುಯೊತೆ ಅಜ್ಜು ಯೋ ಸೇವೆನಖ್ವಾಜೆ ಕಿಮ್ ತಯಾರ್ ಹುಯೊಕರಿ ಬೋಲಾನು ಲೀಖಿರಾಖ್ಯೋಸ್. 1:5—4:13
3. ಉಬ್‌ರೊತೆ ಸುವಾರ್ತೆಮ ಹೈರೊತೆ ಘಣು ಮೋಟು ಭಾಗ್ ಹುಯಿರೊಡೊ. ಲೂಕನೆ ಯೇಸು ಕರ್ರೊತೆ ಕಾಮ್ಮಿಬಾರೇಮ ಬೋಲಿರಾಖ್ಯೋಸ್. ವಿಶೇಷ್‌ಧಿ ಕರ್ರೊತೆ ಕಾಮ್‌ಅಖ್ಖು ಅಜ್ಜು ಇನಿ ಬೋಧನೇನಿ ಬಾರೇಮ ಬೋಲಸ್. 4:14—21:38
4. ಖ್ವರ್ತಿಮ ಕಡೇಶೆನಿ ಬೇನಿ ಅಧ್ಯಾಯಮ. ಇನೆ ಯೇಸು ಕಿಮ್ ಮರ್ರೊತೆ, ಮಖ್ವಾಣ್ಣುಹುಯೊತೆ ಅಜ್ಜು ಮರಣ್‌ಧಿ ಕಿಮ್ ಆಯೊಕರಿ ಬೋಲಾನು ಇನೆ ಬೋಲಿರಾಖ್ಯೋಸ್. 22—24

1-2 ಪ್ಯಾರ್‌ನೊ ಥಿಯೊಫಿಲ, ಅಪ್ಪ ಇಚ್ಛೆಮ ಚಾಲಿರ್ದೀತೆ ಕಾಮ್‌ಅಖ್ವಾನ ಇನಿ ಬಾರೇಮ ಪಹಿಲೇಥು ಡೋಳೆಖ್ವು ದೇಖಿನ್, ದೇವ್ನಿ ಅಲ್ಫಿ ಖಬರ್‌ನ ಬೋಲಿದ್ಯವಾಳು ಅಪ್ಪುನ ಖ್ವಮ್‌ಜಾಡ್ಯಥೂತೆ ಇಮ್ಮಸ್, ಲೀಖಾನ ಕೈಯೆಕ್ಕಿ ಅದ್ವಿನೆ ಕೋಶಿಶ್ ಕರಿರಾಮ್ಮಸ್.

3 ಮೇಬಿ ಜಡ್‌ಥುಧರಿ ಮೂಳಿಲಗು ಅಲ್ಫಿನಿತರ ಪುಟ್ಟಿನ್, ಮಾಲುಮ್ ಕರಿರಾಖ್ಯೋಸ್ತೆ ಇನಾಖ್ವಾಜೆ, ಯೋ ಖ್ವಾರಸ್ಸ ಏಕಾಡಿಥು ಥಿಯೊಫಿಲ ಹುಯಿರ್ದೀತೆ ತುನ ಲೀಖಿನ್ ವತಾಳನು ಅಲ್ಫುಕರಿ ಮನ ಸೋಚ್ತಾಯು.

4 ಅನೇಥಿ ತುನ ಶಿಕಾಡ್ಯತೆ ಖ್ವಾರುಸ್ ಖ್ವಾಚುಕರಿ ತೂ ಮಾಲುಮ್ ಕರಿಲಿಶ್.

ಯೋಹಾನ ಪೈದಾ ಉಷೇತೆ ಬಾರೇಮ ಮಾಲುಮ್ ಪಡ್ಯತೆ

5 ಹೆರೋದ ಯೂದಾಯ ಮುಲಕ್‌ನೊ ರಾಜ್ ಹುಯಿರ್ದೀಥೋತೆ ಹಗಾಮ್ ಜಕರಿಯ ಕರಿ ಏಕ್ ಯಾಜಕ್ ಹಿಜ್ವಾ ಥೊ, ಯೋ ಅಬೀಯ ಯಾಜಕ್‌ನೊ ಖೂಮ್‌ವಾಳೊ ಹುಯಿರ್ದೀಥೊ. ಇನಿ ಬಾವಣ್ಣ ನಾಮ್ ಎಲಿಜಬೇತ್, ಯೋ ಆರೋನ್ನಿ ಕುಟುಂಬ್‌ವಾಳಿ ಹುಯಿರ್ದೀಥಿ.

6 ಇವ್ಣೆ ಭೇ ಜಣ ದೇವ್ನ ಡೋಳಾಮ ಅಲ್ಫ ಹುಯಿರ್ದೀಥ ಅಜು ಪ್ರಭುನಿ ಖ್ವಾರಿಸ್ ಖಾನುಲ್ ಅಜು ಹುಕುಮ್‌ನ ಪಾಡಿ ಚಾಲಿನ್, ಜರಾಬಿ ಗಲ್ತಿಕೊಂತೆ ಇಮ್ ಥಾ.

7 ಕತೋಬಿ ಎಲಿಜಬೇತ್ ವಾಂರ್ಚುಣಿ ಹುಯಿರ್ದೀಥೀತೆ ಇನಾಖ್ವಾಜೆ ಇವ್ಣುನ ಲಡ್ಕಾ ಕೋ ಥಾನಿ. ಎತ್ರೇಸ್ ಕಾಹೆತೆ ಇವ್ಣೆ ಭೇ ಜಣ ಬುಡಾ ಹುಯಿಗಾಥ.

8 ಅಮ್ ರ್ವಾವಾನಿ ವಖ್ವತ್‌ಮ, ಏಕ್ ದನ್ನೆ ಜಕರಿಯಾನಿ ಶಾಲ್‌ವಾಳಾನ ದೇವ್ನಿ ಮಂದಿರ್‌ಮ ಯಾಜಕ್ನು ಕಾಮ್ ಕರಾನಿ ವಖ್ವತ್ ಆವ್ತಾನ, ಜಕರಿಯ ದೇವ್ನ ಖ್ವಾಮ್ಣೆ ಯಾಜಕ್‌ನಿಸೇವೆ ಕರುಕರ್ತೊಥೊ.

9 ಯಾಜಕ್‌ಖ್ವಾರು ಮಳಿನ್, ಪ್ರಭುನಿ ಮಂದಿರ್‌ನ ಮಹಿ ಜೈನ್, ಥಪ್ಕಾರ್ ದೈವಾನಟೇಕೆ ಚೀಟಿ ನಾಖಿನ್ ಏಕ್ ಯಾಜಕ್‌ನ ಚೂಣ್‌ತೂಢು. ಇಮ್ ಕರಾಖ್ವತರ್ ಜಕರೀಯ ಚೂಣಾಯೊ.

10 ಥಪ್ಕಾರ್ ದೈವಾನಿ ವಖ್ವತ್‌ಮ ಭಾರ್ ಭರೈರ್ದ್ವಧೂತೆ ಅದ್ಮಿಖ್ವಾರು ದೇವ್ವ ಪ್ರಾರ್ಥನೆ ಕರುಕರ್ತುಢು.

11 ತದೆ ಪ್ರಭುನೊ ದೂತ ಥಪ್ಕಾರ್ ದೈವಾನಿ ಡಾಕ್ಟಿನ ಖಾವಿ ಬಾಙುಮ ಆಯಿ ಭೀರಿನ್, ಜಕರೀಯಾನ ದೆಖಾಯೊ.

12 ಜಕರೀಯಾನೆ ದೇವ್‌ನೊ ದೂತನ ದೇಖಿನ್ ಧರ್‌ಧರ್ ಕಾಪಿನ್, ಡರ್‌ಘಲಿದೊ.

13 ಕತೋಬಿ ದೇವ್‌ನೊ ದೂತನೆ ಇನ, “ಜಕರೀಯ, ಡರ್‌ನಕೊ! ದೇವ್ವ ತಾರಿ ಬಿಂತಿನ ಖ್ವಮ್‌ಜಿಲಿದೊ. ತಾರಿ ಬಾವಣ್ ಹುಯಿರ್ದ್ವೀತೆ ಎಲಿಜಬೇತ್ ತುನ ಏಕ್ ಪರ್ಖ್ವೊ ಲಡ್ಕಾನ ಜಣಿ ದಿಶೆ. ತೂ ಯೋ ಲಡ್ಕಾನ ಯೋಹಾನ ಕರಿ ನಾಮ್ ಮ್ಹೇಲ್ವು.

14 ಯೋ ಲಡ್ಕಾಡಿ ತುನ ಘಣು ಖ್ವುಶಿ ಅಙು ಶಂತೋಖ್ವೊ ಉಶೆ, ಎತ್ರೇಸ್ ಕಾಹೆತೆ ಯೋ ಪೈದಹುಯೊತೆ ಇನಾಟೇಕೆ ಕೈಯೆಕ್ಚಿ ಭಣು ಖ್ವುಶೀಕರ್‌ಶೆ!

15 ಪ್ರಭುನ ಡೋಳಾಮ ಯೋಹಾನ ಮಹಾನ್ ಅದ್ಮಿ ಹುಯಿರ್ದ್ವೀಶೆ. ಕಂದಾಯುಹುಯು ದ್ರಾಕ್ಷಿನು ರಖ್ವನ್ ರ್ವವೊ ನತರ್‌ಕಿ ಕೆಹೂಬಿ ನಿಶಾನುರಖ್ವನ್ ರ್ವವೊ ಯೋ ಪೀಶೆಸ್ ಕೊಯ್ಲಿ. ಪೈದಾಖ್ವೊಧೋಸ್ ಯೋ ಪವಿತ್ರಾತ್ಮಾ ಭರೈರ್ದ್ವೀಶೆ.

16 ಅಙು ಇಸ್ರಾಯೇಲ್‌ನ ಘಣ ಅದ್ಮಿನ ಇವ್ಣೊ ದೇವ್ ಹುಯಿರ್ದ್ವೀತೆ ಪ್ರಭುಭಣಿ ಫರಾವಾಶೆ.

17 ಯೋ ಪ್ರಭುನ ಅಗಾಡಿ ಜೈನ್, ಪ್ರವಾದಿ ಎಲೀಯನಿಫೋಣಿ ಮಹಿಮೆಮಾಬಿ ಶಕತ್‌ಮಾಬಿ ಭರೈನ್, ಬಾನ ದಿಲ್ನ ಲಡ್ಕಾವ್‌ಭಣಿ ಫರಾವಾಶೆ, ಅಙು ಮೊಂಡಿ* ಖ್ವಾರಾನ ನೀತಿನಿ ವಾಟ್‌ಭಣಿ ಫರಾವಾಶೆ. ಅಮ್ ಪ್ರಭುನ ಅಲ್ಫ ಅದ್ಮಿನ ತೈಯಾರ್ ಕರ್‌ಶೆ” ಕರಿ ಬೋಲ್ಯೊ.

* 1:17 1:17 ಕತೊ-ವಾತೆ ಖ್ವಮ್‌ಜಾಕೊಯ್ತೆ ಅದ್ಮಿಕರಿ.

18 ತದೆ ಜಕರೀಯಾನೆ ದೇವ್ನ ದೂತನ, “ತೂ ಬೋಲುಕರಾಸ್ತೆ ಉಷೆಕರಿ ಮೇ ಶನೇಥಿ ಮಾಲುಮ್‌ಕರು? ಶನಕತೊ ಮೇ ಬುಡೋ ಹುಯಿಗಯೊ, ಮಾರಿ ಬಾವಣ್‌ಬಿ ಬುಡಿಯಾ ಹುಯಿಗೈ” ಕರಿ ಬೋಲ್ಯೊ.

19 ಇಮ್ ಬೋಲಾಖ್ವತರ್ ದೇವ್‌ನೊ ದೂತನೆ, “ಮಾರು ನಾಮ್ ಗಬ್ರಿಯೇಲ್, ಮೇ ದೇವ್ನ ಖ್ವಾಪ್ಪೆ ಭೀರ್‌ವವಾಳೊ, ತಾರ ಜೋಡೆ ವಾತೆಬೋಲಿನ್, ಆ ಸುವಾರ್ತೆನ್ ತುನ ಖ್ವಮ್‌ಭಾಡನಖ್ವಾಜೆ ದೇವ್ನ ಮನ ಮೋಕ್ಲಿರಾಖ್ಯೊಸ್.

20 ಆ ಮಾರಿ ವಾತೆ ಬರೋಬರ್‌ನಿ ವಖ್ವತ್‌ಮ ಪೂರಲುಶೆ. ಕತೋಬಿ ತುನೆ ಆ ವಾತೇನ ನಂಬ್ಯೊಕೊಂತೆ ಇನಖ್ವಾಜೆ, ಆ ಖ್ವಾರು ಹುವಾನ ದನ್‌ತೋಡಿ ತೂ ವಾತೆ ಕೋಬೋಲಿಶ್‌ನೀತೆ, ಮುಕ್ಲೊ ಹುಯಿರ್ದೆಶ್” ಕರಿ ಜವಾಬ್ ದಿದೊ.

21 ಯೋಸ್ ವಖ್ವತ್‌ಮ ಜಕರೀಯಾನ ಖ್ವಾಜೆ ಭಾರ್ ಟಿವವ್‌ಕರ್ತುಫೂತೆ ಅದ್ಮಿಖ್ವಾರು, ಔಡಿ ಘಡಿಲಗೂ ಯೋ ಮಂದಿರ್‌ನ ಮಹಿ ಶನ ಛಾತೆ ಕರಿ ಬೋಲಿನ್ ಆಶ್ಚರ್ಯಖಾದು.

22 ಯೋ ಮಂದಿರ್‌ಮಾಥೊ ಭಾರ್‌ಆಯಿನ್, ಇವ್ನ್ ಜೋಡೆ ಏಕ್ ವಾತ್‌ಬಿ ಬೋಲ್ಯೊಕೊಂತೆ ದೇಖಿನ್, ಅನ ಮಂದಿರ್‌ಮ ಶಾತ್ತ್ರಿ ದರ್ಶನ್[†] ಹುಯು ಉಶೆ ಕರಿ ಮಾಲುಮ್ ಕರಿಲಿದು. ತಪ್‌ಥೊ ಜಕರೀಯ ಮುಕ್ಲೊಸ್ ರ್ಡ್ವಿನ್ ಹಾತ್‌ನೊ ಝಾಲೊಥೀಸ್ ಬೋಲಿವತಾಳ್‌ತೋಥೊ.

23 ಮಂದಿರ್‌ಮ ಇನಿ ಯಾಜಕ್‌ನಿ ಸೇವೆನೊ ದನ್‌ಖ್ವಾರೊ ಖತಮ್ ಹುವಾನ ಬಾದ್‌ಮ, ಜಕರೀಯ ಪಾಟ್ಲೊ ಇನ ಘರೆ ಚಲೆಗಯೊ.

24 ಥೋಡ ದನ್ನ ಬಾದ್‌ಮ ಇನಿ ಬಾಯ್ಕೊ ಎಲಿಜಬೇತ್ ಬೇಜೂನಿ ಹುಯಿನ್, ಪಾಚ್ ಮಹಿನಾತೋಡಿ ಘರ್‌ಥಿ ಭಾರ್ ಕೋ ನಿಕ್ಕಿನಿ.

25 ತದೆ ಎಲಿಜಬೇತ್‌ನೆ, “ಆ ಉಂಬರ್‌ಮ ಪ್ರಭುನೆ ಮಾರಪರ್ ಡೋಳಪಾಡಿ ದೇಖ್ಯೊ. ಅನೇಥಿ ಅದ್ಮಿಮ ಮನ ಥೂತೆ ಚಿಂಫಾವ್ಣಿನ ದೂರ್ ಕರೈ” ಕರಿ ಬೋಲಿ.

[†] 1:22 1:22 ದೇವ್‌ಥಿ ಶಾತ್‌ತೋಬಿ ದೆಖಾವನು

ಯೇಸು ಪೈದಾ ಹುವಾನಿ ಬಾರೇಮ ದೇವ್‌ನೊ ದೂತನೆ ಬೋಲಿವತಾಳ್ತೊತೆ

26 ಎಲಿಜಬೇತ್ ಟೊ ಮಹಿನಾನಿ ಬೇಜೂನಿ ಥೀತೆ ತದೆ, ದೇವ್ನೆ ಗಬ್ರಿಯೇಲ್ ಕರಿ ನಾಮ್ ದೂತನ ಗಲಿಲಾಯ ತಬರ್‌ಖಾನು ನಙ್ಗರೇತ್ ಕರಿ ಗಾಮ್‌ಥೀತೆ ಏಕ್ ಕವಾರಿಕನ ಮೋಕ್‌ಲ್ಯೊ

27 ಯೊ ಕವಾರಿನು ನಾಮ್ ಮರಿಯ. ದಾವೀದ್ ರಾಜಾನಿ ಪಿಳ್ಗಿವಾಳೊ ಹುಯಿರ್ದೊಡ್ಲೊತೆ ಯೋಸೇಫ್‌ನ ಜೋಡೆ ಇನಿ ಖುಗ್ಗೆ ಪಡಿರ್ದೊಡ್ಲಿ.

28 ಯೋ ದೇವ್‌ನೊ ದೂತನೆ ಮರಿಯನ, “ದೇವ್ನಿ ಆಶೀರ್ವಾದ್‌ವಾಳಿ, ತುನ ಸಮಾಧಾನ್ ಹುವಾದೆ! ಪ್ರಭು ದೇವ್ ತಾರ ಜೋಡೆ ಲ್ಹಾ!” ಕರಿ ಬೋಲ್ಯೊ

29 ದೇವ್‌ನು ದೂತರ್‌ನಿ ವಾತೇನ ಖ್ವಮ್‌ಜಿನ್ ಮರಿಯ ಘಬ್‌ರೈಗೈ ಅಜ್ಜು ಆ ವಾತೆನಿ ಮತ್‌ಲಬ್ ಶಾತ್ ಉಶೆ? ಕರಿ ಸೋಚಾಲಗಿ.

30 ತದೆ ದೇವ್‌ನೊ ದೂತನೆ ಇನ, “ಮರಿಯ ಡರ್‌ನಕೊ, ದೇವ್ನೆ ತಾರಪರ್ ಘಣಿ ಮೋಟಿ ವಾರ್‌ಖೊ ಕರಿರಾಖೊಸ್.

31 ಹಂದೇಕ್, ತೂ ಬೇಜೂನಿ ಹುಯಿನ್ ಏಕ್ ಪಖೊ ಲಡ್ಕಾನ ಜ್ಞಣಿಶ್, ಯೋ ಲಡ್ಕಾನ ಯೇಸು ಕರಿ ನಾಮ್ ಮ್ಹೇಲ್ಪು.

32 ಯೋ ಮೋಟೊ ಅದ್ವಿಹುಯಿನ್ ಪರಮಂಡಲ್‌ನೊ ದೇವ್‌ನೊ ಥಿಯೊ ಕರಿ ಬೋಲ್ಯೆಲಿಶೆ. ದೇವ್ ಹುಯಿರ್ದೊಡ್ಲೆ ಪ್ರಭು ಇನೊ ಗುರುಗುರಬ್‌ಲ್ಯೊ ಹುಯಿರೋತೆ ದಾವೀದ್‌ನಿ ಸಿಂಹಾಸನ್ನ ಇನ ದಿಶೆ.

33 ಅಜ್ಜು ಯೋ ಯಾಕೋಬ್‌ನಿ ಪಿಳ್ಗಿಪರ್ ಹರ್‌ಹಮೇಶಾನಖ್ವಾಜಿ ರಾಜ್‌ಕರ್‌ಶೆ. ಇನಿ ರಾಜ್ಯ ಖತಮಸ್ ಕೋ ಉಶೇನಿ”‡ ಕರಿ ಬೋಲ್ಯೊ.

34 ತದೆ ಮರಿಯನೆ, “ಆ ಕಿಮ್ ಉಶೆ? ಮೇ ಕವಾರಿನಿ” ಕರಿ ದೇವ್‌ನೊ ದೂತನ ಬೋಲಿ.

35 ತದೆ ದೇವ್‌ನೊ ದೂತನೆ ಮರಿಯನ, “ತಾರಪರ್ ಪವಿತ್ರಾತ್ಮ ಆವಾಶೆ ಅಜ್ಜು ದೇವ್ನಿ ಶಕತ್ ಆಯಿನ್ ತಾರಪರ್ ಡಪಾವಾಶೆ,

‡ 1:33 1:33 2 ಸಮುವೇಲ್ 7-12

ಅನಖ್ವಾಜೆಸ್ ಪೈದಾ ಉಷೇತೆ ಯೋ ಪವಿತ್ರ ಲಡ್ಕು ದೇವ್‌ನೊ ಛಿಯ್ತೊ ಕರಿ ಬೋಲೈಲಿಶೆ” ಕರಿ ಜವಾಬ್ ದಿದೊ.

36 ಎತ್ರೇಸ್ ಕಾಹೆತೆ ತಾರಿ ಖನ್ನೆವಾಳಿ ಹುಯಿರ್ದೀತೆ ಎಲಿಙಬೇತ್ ಛಾನಿ, ಯೋ ಬುಡಿಯಾ ಹುಯಿಗಿತೋಬಿ ಬೇಜೂನಿ ಛಾ. ಇನ ಪೇಟ್‌ಮ ಪರ್ಖೊ ಲಡ್ಕು ಛಾ, ವಾಂಝ್‌ಣಿ ಕರಿ ಬೋಲೈಲಿದಿಥೀತೆ ಇನ ಆ ಛೋನೆ ಮಹಿನೊ.

37 ಶನಕತೊ ದೇವ್ನ ಹಾತೆ ಹುವ್ವಾಕೊಂತೆ ಏಕ್‌ಬಿ ಕೊಯ್ನಿ” ಕರಿ ಬೋಲೊ.

38 ತದೆ ಮರಿಯನೆ, “ಮೇ ಪ್ರಭುನಿ ದಾಸಿ, ತುನೆ ಕಿಮ್ ಬೋಲೊಕಿ ಇಮ್ಮಸ್ ಮನ ಹುವಾದೆ” ಕರಿ ಬೋಲಿ. ಅನ ಬಾದ್‌ಮ ಯೋ ದೇವ್‌ನೊ ದೂತ ಇನಕಂಥೊ ಚಲೆಗಯೊ.

ಮರಿಯ ಎಲಿಙಬೇತ್‌ನ ಮಳಾನ ಗೈತೆ

39 ತದ್‌ನು-ತದ್ದೇಸ್ ಮರಿಯನೆ ಖ್ವಾರಿಲೀನ್, ಒಗ್ಗಿ-ಒಗ್ಗಿಸ್ ಪಹಾಡ್‌ನು ಮುಲಕ್‌ಭಣಿ ಥೂತೆ ಯುದಾಯ ತಬರ್‌ಖಾನು ಏಕ್ ಗಾಮ್‌ನ ಗೈ.

40 ಹಿಙ್ಜಾ ಜಕರಿಯಾನ ಘರ್‌ಮ ಜೈನ್ ಎಲಿಙಬೇತ್‌ನ ಖ್ವಲಾಮ್ ಕರಿ.

41 ಮರಿಯನೆ ಖ್ವಲಾಮ್ ಕರಿ ಬೋಲಿತೆ ಅವಾಙ್ ಎಲಿಙಬೇತ್ ಖ್ವಮಙ್‌ತಾನ, ಇನ ಪೇಟ್‌ಮಾನು ಲಡ್ಕು ಉಛ್‌ಳಿ ಪಡ್ಕು. ಅಙ್ಕು ಎಲಿಙಬೇತ್ ಪವಿತ್ರಾತ್ಮಧಿ ಭರೈಗಿ.

42 ಜೋರ್ ಅವಾಙ್‌ಧಿ ಚಿಕ್ರಿನ್ ಬೋಲಿಕಿ, “ಮರಿಯ, ದೇವ್ನೆ ತುನ ಬಿಜಿ ಖ್ವಾರಿ ತಯೇಡಾಥೀಬಿ ಭಾಖ್ತ್ ಆಶೀರ್ವಾದ್ ಕರಿರಾಖ್ಯೋಸ್. ತೊ ಪೈದಾ ಕರೀಶ್ಚಿ ಲಡ್ಕಾನ ದೇವ್ನೆ ಆಶೀರ್ವಾದ್ ಕರಿರಾಖ್ಯೋಸ್.

43 ಮಾರ ಪ್ರಭುನಿ ಆಯ ಮಾರಕನ ಆವಾಯೆತ್ರೆ ಭಾಗ್ಯ್ ಮನ ಕಿಙ್ಜಾಧಿ ಮಳಾಪೆ?

44 ಹಂದೇಕ್, ತೊ ಖ್ವಲಾಮ್ ಕರಿ ಬೋಲಿತೆ ಅವಾಙ್ ಮಾರ ಕಾನ್‌ಮ ಪಡ್‌ತಾಸ್‌ನ, ಮಾರ ಪೇಟ್‌ಮಾನು ಲಡ್ಕು ಖ್ವಶೀಧಿ ಉಛ್‌ಳಿ ರಹಿಗು.

45 ಪ್ರಭುನೆ ತುನ ಬೋಲ್ಯೋತೆ ವಾತೆ ಉಷೆಕರಿ ನಂಬಿತೆ ಇನಖ್ವಾಜೆ ತೂ ಧನ್ಯಹುಯಿರ್ದೋಸ್”!

ಮರಿಯನು ಸ್ತುತಿನು ಗೀದ್

46 ತದೆ ಮರಿಯನೆ,
“ಮಾರೊ ಜಾನ್ ಪ್ರಭುನ ಸ್ತುತಿ ಕರಾಸ್.

47 ದೇವ್ ಮನ ಬಚ್ಚಾಡವಾಳೊ ಹುಯಿರ್ದೋಸ್ತೆ ಇನಖ್ವಾಜೆ
ಮಾರು ಆತ್ಮಖ್ವುಶಿ ಛಾ.

48 ದೇವ್ನಿ ದಾಸಿ ಹುಯಿರ್ದೋತೆ ಮೇ, ಲ್ಹಾಯಕ್‌ಕೊಂತೆ
ಇಮ್‌ಥೀತೆ ತದೆ, ಇನೆ ಮನ ಯಾದ್ ಕರೊಸ್!
ಖ್ವಾಚಮಾಬಿ ಹಂಕೇಡು ತಮಾಮ್ ಅದ್ಮಿ ಮನ ದೇವ್ನಿ
ಆಶೀರ್ವಾದ್‌ವಾಳಿ ಕರಿ ಚಿಕರ್‌ಶೆ.

49 ಶನಕತೊ ಘಣಿ ಶಕತ್‌ವಾಳೊ ದೇವ್ ಮಾರಖ್ವಾಜೆ ಮಹಾನ್
ಕಾಮ್‌ಖ್ವಾರು ಕರಿರಾಖ್ವೋಸ್.
ಇನು ನಾಮ್ ಪವಿತ್ರ್ ಹುಯಿರ್ದೋಸ್.

50 ಕೋಣ್ ದೇವ್‌ಮ ಪೂರ ಮನ್‌ಥಿ ಡರಿನ್ ಚಾಲಸ್ಚಿ ಇವ್ಣಾಪರ್
ದೇವ್ ಮುಂಡಿಡು ಧರಿನ್ ಮುಂಡಿಲಗೂ ಗೋರ್ ಕರಾವಾಳೊ
ಹುಯಿರ್ದೋಸ್.

51 ದೇವ್ನೆ ಇನಿ ಭುಜ್ಞಾನಿ ಶಕತ್ ವತಾಳಿನ್,
ಹಂಕಾರ್ ಭರ್ತ್ಯಾ ದಿಲ್‌ವಾಳಾನ ಲಿಂಧೊಭಾಂಗ್ ಕರಿನಾಖ್ಯೊ.

52 ದೇವ್ನೆ ರಾಜಾವ್‌ನ ಸಿಂಹಾಸನ್‌ಪರ್‌ಡು ಧಕೇಲಿನ್,
ಶಾತ್ಪಿಕೊಂತೆ ಗರೀಬ್‌ನ ಉಪ್ಪರ್ ಲೈರಾಖ್ಯೊಸ್.

53 ಯೋ ಭುಕ್ಯಾವ್‌ನ ಮಿರ್ಘ್‌ವಾನ್ ಖಡಾಯೊ, ಕತೋಬಿ
ಧನ್-ದಾಲತ್‌ವಾಳಾನ ಖಾಲಿ ಹಾತೆ ಮೋಕ್ಲಿದೊ.

54 ದೇವ್ನೆ ಅಪ್ಪ ಗುರುಗುರಬ್‌ಲ್ಯನ ವಾಗ್ದಾನ್ ದಿದೊತೆ ಇಮ್ಮಸ್,
ಇನೊ ಸೇವಕ್ ಹುಯಿರ್ದೋತೆ ಇಸ್ರಾಯೇಲ್‌ನೊ ಹಾತ್
ಧರಿರಾಖ್ಯೋಸ್.

55 ಅಬ್ರಹಾಮ್‌ನಾಬಿ ಇನಿ ಪಿಳ್ಗಿವಾಳಾನ ಹರ್‌ಹಮೇಶ ಗೋರ್
ವತಾಳ್ಣು ಕರಿ ಯಾದ್ ಕರಿರಾಖ್ಯೋಸ್!” ಕರಿ ಬೋಲಿ.

56 ಮರಿಯ ತೀನ್ ಮಹಿನಾತೋಡಿ ಎಲಿಜಬೇತ್‌ನ ಜೋಡೆ ರ್ಡ್ವಿನ್ ಪಾಳಿ ಫರೀನ್ ಇನ ಘರೆ ಗೈ

ಬ್ಯಾಪ್ತಿಸ್ಮದ್ಯವಾಳೊ ಯೋಹಾನ ಪೈದಹುಯೊತೆ

57 ದನ್ ಭರಾವಾನ ಬಾದ್‌ಮ ಎಲಿಜಬೇತ್‌ನೆ ಏಕ್ ಪರ್ಖೊ ಲಡ್ಕು ಜಣಿ.

58 ತದೆ ಎಲಿಜಬೇತ್‌ನ ಅಶ್‌ಪಿಶ್‌ವಾಳು ಅಜ್ಜು ಮಾಯಮಾತ್ರಾವ್ನೆ ಪ್ರಭುನೆ ಇನಾಪರ್ ಘಣು ಗೋರ್ ಕರ್ರೊತೆ ಇನಿ ಬಾರೇಮ ಖ್ವಮ್‌ಜಿನ್, ಇನಜೋಡೆ ಮಳಿನ್ ಖ್ವಶಿ ಕರ್ರ್.

59 ಆಟ್ ರೋಜ್ ಹುವ್ವಾದೀನ್, ಯೋ ಲಡ್ಕಾನ ಖ್ವತ್ಸ್ ಕರನ್ ಕರಿ ಲಾಯು. ಇವ್ಣೆ ಯೋ ಲಡ್ಕಾನ ಜಕರೀಯಕರಿ ಬಾನೂಸ್ ನಾಮ್ ಮ್ಹೇಲ್ವು ಕರಿ ಥು.

60 ಕತೋಬಿ ಯೋ ಲಡ್ಕಾನಿ ಆಯ ಎಲಿಜಬೇತ್‌ನೆ, “ನಕೊ! ಯೋಹಾನ ಕರಿ ಮ್ಹೇಲ್ವು” ಕರಿ ಬೋಲಿ.

61 ಇಮ್ ಬೋಲಾಖ್ವತರ್ ಇವ್ಣೆ, “ಕತೋಬಿ ಅಮ್ಮು ನಾಮ್ ತಾರ ಮಾಯಮಾತ್ರಾಮ ಕಿನೂಸ್ ಕೊಯ್ನಿನಿ!” ಕರಿ ಇನ ಬೋಲ್ಯು.

62 ಬಾದ್‌ಮ ಇವ್ಣೆ ಯೋ ಲಡ್ಕಾನ ಬಾನ, ಹಾತ್‌ನೊ ಝಾಲೊ ಕರಿನ್, “ಆ ಲಡ್ಕಾನ ಕೆಹುನಾಮ್ ಮ್ಹೇಲ್ವು” ಕರಿ ಪುಣಾಯು.

63 ತದೆ ಜಕರೀಯಾನೆ ಏಕ್ ಲೀಖಾನು ಪಲ್ಲು ಮಂಗೈನ್ ಇನಾಪರ್, “ಇನು ನಾಮ್ ಯೋಹಾನ” ಕರಿ ಲೀಖ್ಲೊ ತದೆ ತಮಾಮ್ ಅದ್ವಿನ ಆಶ್ವರ್ಯ ಹುಯಿಗಯು.

64 ತದ್‌ನು-ತದ್ದೇಸ್ ಜಕರೀಯ ಪಾಳ್ತು ವಾತೆ ಬೋಲಾಲಗ್ಯೊ ಅಜ್ಜು ವಾತೆ ಬೋಲೊಹುಯಿನ್ ದೇವ್ನಿ ಸ್ತುತಿ ಕರಾಲಗ್ಯೊ.

65 ಅನ ಖ್ವಮ್‌ಜ್ಯಾತೆ ಅಶ್‌ಪಿಶ್‌ವಾಳ ಅದ್ವಿಮ ಡರ್ ಪೇಶಿಗೊ, ಅಜ್ಜು ಯೂದಾಯ ತಬರ್‌ಖಾನು ಪಹಾಡಿ ಮುಲಕ್ಕು ಖ್ವಾರಿ ಬಾಜುಮ ಆ ವಾತೆ ಪೈಲಿಗು.

66 ಖ್ವಮ್‌ಜ್ಯೂತೆ ಖ್ವಾರು ಅದ್ತಿ ಆಶ್ಚರ್ಯ ಹುಯಿನ್, “ಆ ಲಡ್ಕು ಖ್ವಾಪ್ಲೆಕಿಮ್ಮು ಉಶೇಕಿ?” ಕರಿ ಅನಿ ಬಾರೇಮ ಮನ್‌ಮ ಸೋಚಾಲಗ್ಕು, ಅಜ್ಜು ಪ್ರಭುನೊ ಹಾತ್ ಯೋ ಲಡ್ಕಾಪರ್ ಥೊ.

ಜಕರಿಯಾನೆ ಪ್ರವಾದ್‌ನೆ ಕರೈತೆ

67 ತದೆ ಯೋಹಾನ್ನೊ ಬಾ ಜಕರಿಯಾನೆ ಪವಿತ್ರಾತ್ಮಾ ಭರೈನ್ ಅಮ್ ಪ್ರವಾದ್‌ನೆ ಬೋಲ್ಯೊ:

68 “ಇಸ್ರಾಯೇಲ್‌ನೊ ದೇವ್ ಹುಯಿರೈತೆ ಪ್ರಭುನ ಧನ್ಯವಾದ್ ಹುವಾದೆ!
ಇನ ಅದ್ಮಿಕನ ಐನ್, ಇವ್ವಾಪರ್ ಗೋರ್‌ಕರೀನ್, ಇವ್ವುನ ಛುಟ್ಕಾರ್ ಕರಿರಾಖ್ಯೊಸ್;

69 ಇನೊ ಸೇವಕ್ ಹುಯಿರೈದ್ಲೋತೆ ದಾವೀದ್‌ನ ಖಾನ್‌ದಾನ್‌ಮಾಥು
ಅಪ್ಪಾಪ್ಲೆ ಘಣಿ ಶಕತ್‌ವಾಳೊ ಏಕ್ ರಕ್ಷಕನ ದೀರಾಖ್ಯೊಸ್.

70 ದೇವ್ ತದೇಸ್ ಇನು ಪವಿತ್ರ ಪ್ರವಾದಿ ಖ್ವಾರಾವ್‌ನ ಮ್ಹೋಡಾಡಿ ಬೋಲಾಯೊ ಥೋತೆ ಇಮ್ಮಸ್,

71 ಅಪ್ಪುನ ಕೋಣ್-ಕೋಣ್ ವಹೇರ್ ಕರುಕರ್ತುಫೂಕಿ ಇವ್ವ ಹಾತೇಡಿ ಛೋಡೈನ್,
ಅಪ್ಪ ದುಶ್‌ಮನ್‌ಧಿ ಅಪ್ಪುನ ಬಚ್ಚಾಡಿರಾಖ್ಯೊಸ್.

72 ದೇವ್ ಅಪ್ಪ ಗುರುಗುರಬ್‌ಲ್ಯನ ಗೋರ್‌ಖೈನ್,
ಪವಿತ್ರ ಒಪ್ಪಂದನ ಯಾದ್‌ಕರಿನ್,

73 ಅಪ್ಪೊ ಗಲ್‌ಥೊ ಹುಯಿರೈತೆ ಅಬ್ರಹಾಮ್‌ನ ಜಿಭಾನ್ ದೀರಾಖ್ಯೊಥೋತೆ ಇಮ್,

74 ಅಪ್ಪುನ ದುಶ್‌ಮನ್ನ ಹಾತೇಮ್ಮಿ ಛೋಡೈನ್,
ಡರ್‌ಕೊಂತೆ ಇಮ್ ಇನಿ ಸೇವೆ ಕರಾನಿಮತ್ ಅಪ್ಪುನ ಅಕ್ಲಾಶ್ ಬಣೈರಾಖ್ಯೊಸ್.

75 ಅನೇಡಿ ಅಪ್ಪೆ ಜಿವಿರ್ದವಾನ ದನ್‌ಖ್ವಾರೊ,

ಇನಖ್ವಾಪ್ಪೆ ಇಮಾನ್‌ದಾರ್ ಅಜ್ಜು ನೀತಿಥಿ ರಕ್ಷಣೆ ಕರಿ ಅಮ್ ಕರಿರಾಖ್ಯೋಸ್.

76 ಅಜ್ಜು ಜಕರಿಯಾನೆ, “ಮಾರು ಲಡ್ಕು, ತೂತೊ, ಪರಮಂಡಲ್‌ನೊ ದೇವ್‌ನೊ ಪ್ರವಾದಿ ಕರಿ ಬೋಲೈಲಿಶ್.

ತೂ ಪ್ರಭುನ ಅಗಾಡಿ ಜೈನ್,

ಇನಿ ವಾಟ್ಸಿ ಖ್ವಾರವಾಳೊ ಹುಯಿರಕ್ಷಿಶ್.

77 “ಪಾಪ್‌ಖ್ವಾರು ಮಾಪ್ ಹುವಾಧೀಸ್ ರಕ್ಷಣೆ ಮಳಾನು ಕರಿ,

ಇನ ಅದ್ಮಿನ ಬೋಲವಾಳೊ ಹುಯಿರಕ್ಷಿಶ್.

78 ಅಪ್ಪೊ ದೇವ್ ದಯಕರವಾಳೊ, ಇನಿ ಗೋರ್‌ಥಿ ಅಪ್ಪುನ ಭಾಗಳ್ ಫಾಟಿ.

ಅನೇಥಿ ಉಪ್ಪರ್‌ಥು ದನ್* ನಿಕ್ಕಿನ್, ಅಪ್ಪಕನ ಆವ್‌ಶೆ,

79 ಅಜ್ಜು ಅಂಧಾರಮಾಬಿ, ಮರಣ್ಣಿಲ್ಲಾಳಿಮ ರಕ್ಷವಾಳ ಖ್ವಾರಾನ

ಉಜಾಳು ದಿಶೆ,

ಅಪ್ಪುನ ಸಮಾಧಾನ್ನಿ ವಾಟ್ ವತಾಳಿನ್ ಚಲಾವ್‌ಷೆ” ಕರಿ ಬೋಲೈಲ್ಯೊ.

80 ಯೋ ಲಡ್ಕು ಮೋಟು ಹುಯಿನ್ ಆತ್ಮಮಾಬಿ ಅಜ್ಜು ಶಕತ್‌ಮಾಬಿ ಭಡ್ಕು, ಅಜ್ಜು ಇಸ್ರಾಯೇಲ್ ಅದ್ಮಿಯೇನ ಯೋಹಾನ ದೆಖಾವಾನ ದನ್‌ಲಗೊ ಉಜ್ಜಾಡಿ ಭಂಗಳ್‌ಮ ಥೊ.

2

ಯೇಸು ಪೈದಹುಯೊತೆ

(ಮತ್ತಾಯ 1:18-25)

1 ಯೋ ದನೂಮ ಕೈಸರ್ ಅಗಸ್ತ್ಯಸ್‌ನೆ* ರೋಮ್‌ನು ರಾಜ್‌ಭಾರ್ ಚಾಲುಕರಾಸ್ತೆ ಖ್ವಾರಾಸ್ ದೇಖ್‌ಮ ಅದ್ಮಿಖ್ವಾರಾನಿ ಗಣ್ತಿ ಹೋಣುಕರಿ ಹುಕುಮ್ ದಿದೊ.

* 1:78 1:78 ಭಾಂದ್ * 2:1 2:1 ಕೈಸರ್ ಅಗಸ್ತ್ಯಸ್ ಕತೊ-ಯೋ ವಖ್ತ್‌ಮ ರೋಮ್ ರಾಜ್‌ಭಾರ್ ಚಲಾವ್ ಕರ್ತೊಥೋತೆ ರಾಜ್.

2 ಆ ಪಹಿಲಿ ಬಾರ್ ಚಾಲಿತೆ ಅದ್ನಿ ಗಣ್ತಿ ಹುಯಿರ್ದ್ಲಾ. ಕುರೇನ್ಯ ಸಿರಿಯ ದೇಖ್ವೊನೊ ರಾಜ್ಯಪಾಲ್ ಹುಯಿರ್ದ್ಲಾಡೋತೆ ತದೆ ಆ ಚಾಲ್ಯಾತೆ.

3 ತಮಾಮ್ ಅದ್ನಿ ಇವ್ಣು-ಇವ್ಣು ನಾಮ್ ಲಿಖಾವನಖ್ವಾಜೆ ಇವ್ಣು-ಇವ್ಣು ಗಾಮೆ ಗಯು.

4 ಇನಖ್ವಾಜೇಸ್ ಯೋಸೇಫ್‌ಬಿ ಗಲಿಲಾಯನು ನಝರೆತ್ ಕರಿ ಗಾಮ್‌ಥು ನಿಕ್ಕಿನ್ ಯೂದಾಯ ತಬರ್‌ಖಾನು ಬೇತ್ಲೆಹೇಮ್ ಕರಿ ಗಾಮ್‌ನ ಗಯೊ. ಯೋಸೇಫ್ ದಾವೀದ್‌ನೊ ಖಾಂದಾನ್‌ವಾಳೊ ಹುಯಿರ್ದ್ಲಾಡೋತೆ ಇನಖ್ವಾಜೆ, ದಾವೀದ್‌ನು ಗಾಮ್ ಹುಯಿರ್ದ್ಲಾತೆ ಬೇತ್ಲೆಹೇಮ್‌ನ ಗಯೊ.

5 ಯೋಸೇಫ್‌ನಿ ಜೋಡ್ತು ಖ್ವಿಗ್ಗೆ ಪಡಿರ್ದ್ಲಾಡೆತೆ ಮರಿಯನಾಬಿ ಕೇಡೆ ಬಲೈಲಿನ್ ಇನು ನಾಮ್ ಲಿಖಾಡ್ಲೆಲ್ಯವಾನಖ್ವಾಜೆ ಗಯೊ. ತದೆ ಯೋ ಪೂರ ದನ್ನಿ ಬೇಜೂನಿ ಥಿ.

6 ಇವ್ಣೆ ಬೇತ್ಲೆಹೇಮ್‌ಡೂತೆ ತದೆ, ಮರಿಯನ ಲಡ್ಕು ಪೈದಾ ಹುವಾನಿ ವಖ್ವತ್ ಆಯಿ.

7 ತದೆ ಇನೆ ಇನು ಪಹಿಲೋಟು ಪಖ್ವೊ ಲಡ್ಕಾನ ಜಣಿನ್ ಲುಂಗ್ವಾಮ ಲಪೇಟಿನ್, ಛತ್ರಮ ರ್ವವಾನ ಝಗೊಕೊಂತೆ ದೇಖಿನ್, ಇನ ಗೋದ್‌ಡಿಮ ಖ್ವಿಡ್ಲೆ.

ಮೇಂಡ್ ಚರಾವವಾಳು ಅಜ್ಜು ದೇವ್ನು ದೂತರ್

8 ಯೋ ತಬರ್‌ಖಾಮ ಮೇಂಡ್ ಚರಾವವಾಳು ಥೋಡು ಜಣು, ಯೋ ರಾತ್ಮಪೇತರ್‌ಮ ಇವ್ಣ ಮೇಂಡಾವ್‌ನಿ ಮಂಧಾನ ದೇಕ್‌ಭಾಲ್ ಕರುಕರ್ತು.

9 ತದೆ ಪ್ರಭುನೊ ಏಕ್ ದೂತ ಐನ್, ಮೇಂಡ್ ಚರಾವವಾಳಾನ ಖ್ವಾಪ್ಣೆ ಭೀರ್ದೊ. ಪ್ರಭುನು ಉಞಾಖ್ವಾ ಇವ್ಣ ಅಶ್‌ಪಿಶ್ ಭರಾಯು. ಅನ ದೇಖಿನ್ ಇವ್ಣೆ ಡರ್‌ಥಿ ಘಬ್‌ರೈಗಯು.

10 ಕತೋಬಿ ದೇವ್‌ನೊ ದೂತನೆ ಇವ್ಣುನ, “ಡರೊ ನಕೊ! ಮೇ ತುಮಾರಖ್ವಾಜೆ ಅಲ್ಪಿಸಮಾಚಾರ್‌ನ ಲೈರಾಖ್ಯೊಸ್, ಅನೇಥಿ ತಮಾಮ್ ಅದ್ನಿನ್ ಘಣು ಖ್ವಿಶಿ ಉಶೆ.

11 ಯೋ ಶಾತ್‌ಕತೊ, ಆಜ್ಞೆ ದಾವೀದ್‌ನ ನಂಗರೊಮ ತುಮಾರಖ್ವಾಜೆ ಏಕ್ ರಕ್ಷಕ್ ಪೈದಾ ಹುಯಿರ್ಟ್ಲೊಸ್, ಯೋ ಕೋಣೆಕತೊ ಪ್ರಭು ಹುಯಿರ್ಟ್ಲೊತೆ ಕ್ರಿಸ್ತ.

12 ಯೋ ತುಮೂನ ಮಾಲುಮ್ ಪಡಾನ ಖ್ವಣೇದ್ ಶಾತ್‌ಕತೊ, ಲುಂಗ್ಡಾಥಿ ಲಪೇಟಿಹುಯು ಏಕ್ ಲಡ್ಕು, ಗೋದ್‌ಡಿಮ ಖ್ವತುರ್ಟ್ಲೊತೆ ತುಮೆ ದೇಕ್‌ಶು” ಕರಿ ಬೋಲ್ಯೊ.

13 ಯೋಸ್ ವಖ್ವತ್‌ಮ ಪರಲೋಕ್‌ಥು ದೇವ್ ದೂತರ್‌ನು ಮೋಟಿ ಝೂಂಡ್ ಆಯಿನ್, ಯೋ ಪಹಿಲು ದೇವ್ ದೂತನ ಜೋಡೆ ಮಳಿನ್, ದೇವ್ ಸ್ತುತಿ ಕರಲ್ಯು:

14 “ಲುಪ್ಪರ್‌ಲ್ಯಲೋಕ್‌ಮ† ದೇವ್ ಮಹಿಮೆ ಹುವಾದೆ, ಅಜು ಧರ್ತಿಪರ್ ದೇವ್ ಕೋಣ್ ಖ್ವಾಜ್‌ಸಿ ಇವ್ಣುನ ಶಾಂತಿ.

15 ದೇವ್‌ದೂತರ್ ಇವ್ಣಕಂಥು ಪಾಳ್ತು ಪರ್‌ಲೋಕ್ ಚಲ್ಯುಜಾವಾನ ಬಾದ್‌ಮ, ಮೇಂಡ್ ಚರಾವವಾಳು ಏಕ್‌ಥಿ ಏಕ್, “ಅಪ್ಲೆ ಹಮ್ಮೇಸ್ ಬೇತ್ಲೆಹೇಮ್‌ನ ಜೈನ್, ಪ್ರಭುನೆ, ಅಪ್ಪುನ ಮಾಲುಮ್ ಕರಾಯೋತೆ ಆ ಬಾರೇಮ, ಚಾಲ್ಯುತೆ ಇನ ದೇಖೆ” ಕರಿ ವಾತೆ ಬೋಲಿಲಿದು.

16 ತದೆ ಇವ್ಣೆ ಒಗ್ಗಿಸ್‌ಮ ಜೈನ್, ಮರಿಯನಾಬಿ ಯೋಸೇಫ್‌ನಾಬಿ ಅಜು ಗೋದ್‌ಡಿಮ ಖ್ವತೂಥೂತೆ ಲಡ್ಕಾನಾಬಿ ದೇಖ್ಲು.

17 ಮೇಂಡ್ ಚರಾವವಾಳನೆ ಲಡ್ಕಾನ ದೇಖಿನ್, ಇನಿ ಬಾರೇಮ ದೇವ್‌ನೊ ದೂತನೆ ಇವ್ಣುನ ಬೋಲ್ಯೊತೆ ವಾತೇನ ಇವ್ಣ ಖ್ವಾಮ್ಣೆ ಬೋಲ್ಯು.

18 ಇನ ಖ್ವಮ್‌ಜ್ಯೂತೆ ಖ್ವಾರಾಸ್‌ನೆ, ಮೇಂಡ್ ಚರಾವವಾಳು ಇವ್ಣುನ ಬೋಲ್ಯೂತೆ ವಾತೇನಖ್ವಾಜೆ ಆಶ್ಚರ್ಯಖಾದು.

19 ಕತೋಬಿ ಮರಿಯನೆ ಆ ಖ್ವಾರಿ ವಾತೇನ ಇನ ಮನ್‌ಮ ರಾಖಿನ್, ಇನಿ ಬಾರೇಮ ಸೋಚಾಲಗಿ.

20 ಮೇಂಡ್ ಚರಾವವಾಳು ಇವ್ಣೆ ದೇಖ್ಲುತೆ ಅಜು ಖ್ವಮ್‌ಜ್ಯೂತೆ ಯೋ ಖ್ವಾರಾನಖ್ವಾಜೆ, ದೇವ್ ಗೀದ್ ಬೋಲ್ತು ಅಜು ಸ್ತುತಿ

† 2:14 2:14 ದೇವ್ ರಪ್ತವಾನಿ ಝಗೊ.

ಕರ್ತುಹುಯಿನ್ ಪಾಠುಫರಿ ಚಲೂಗಯು. ದೇವ್‌ನೊ ದೂತನೆ ಇವ್ವುನ ಬೋಲೊಡೊತೆ ಇಮ್ಮಸ್ ಖ್ವಾರು ಚಾಲಿರೊಡ್ತು.

ಯೇಸುನ ನಾಮ್ ಮ್ಹೇಲ್ಯಾತೆ

21 ಆಟ್ ದನ್ ಹುವಾದೀನ್, ಯೋ ಲಡ್ಕಾನ ಖ್ವತ್ತ್ ಕರಾನಿ ವಖ್ವತ್ ಆಯಿ. ತದೆ ಇನ ಯೇಸು ಕರಿ ನಾಮ್ ಮ್ಹೇಲ್ಯಾ ಯೋ ಬೇಜೂನಿ ಹುವಾನ ಅಗಾಡಿಸ್ ದೇವ್‌ನೊ ದೂತನೆ ಆಸ್ ನಾಮ್ ಮ್ಹೇಲ್ಯಾ ಕರಿ ಬೋಲೊಡೊ.

ಯೇಸುನ ಯೆರೂಸಲೇಮ್‌ನಿ ಮಂದಿರ್‌ಮ ಲಾಯುತೆ

22 ಪಾಕ್ ಹುವಾನಿ ಬಾರೇಮ ಮೋಶೇನು ಧರ್ಮಶಾಸ್ತ್ರಮ ಹುಕುಮ್ ದೆವೈರ್ಟಿಸ್‌ತೆ ಇಮ್ ಕರಾನ, ಯೋಸೇಫ್‌ನಾಬಿ ಮರಿಯನ ಯೋ ವಖ್ವತ್ ಆಯಿ. ಇನಖ್ವಾಜೆ ಇವ್ಣೆ ಯೋ ಲಡ್ಕಾನ ದೇವ್ ಕರಿ ಸಮರ್ಪಣ್ ಕರಾನ ಯೆರೂಸಲೇಮ್‌ನು ಮಂದಿರ್‌ಮ ಲೀನ್ ಗಯ.

23 ಶನಕತೊ ಪ್ರಭುನಿ ಧರ್ಮಶಾಸ್ತ್ರಮ ಲೀಖೈರೊಡ್ತೆ ಇಮ್, ಪಹಿಲೋಟು ಪರ್ಖೊ ಲಡ್ಕಾನ ದೇವ್ ಕರಿ ಸಮರ್ಪಣ್ ಕರ್ನ್.

24 ಎತ್ರೇಸ್ ಕಾಹೆತೆ ಇವ್ಣೆ ಪ್ರಭುನ, ಧರ್ಮಶಾಸ್ತ್ರಮ ಲೀಖೈರೊಡ್ತೆ ಇಮ್, ಏಕ್ ಜೋಡು ಥೋಳ್‌ನ ನಾತೊ ಬೇ ಪರ್ಯಾವಾನು ಚೆಲ್ವಾನ ಬಲಿ ದೇವ್ತು.

25 ಯೋ ಹಗಾಮ್ ಯೆರೂಸಲೇಮ್ ಸಿಮೆಯೋನ್ ಕರಿ ಏಕ್‌ಜಣೊ ಥೊ. ಯೋ ಏಕ್ ನೀತಿವಾಳೊ ಅಜ್ಜು ದೇವ್‌ಥಿ ಡರವಾಳೊ ಅದ್ಮಿ ಹುಯಿರೊಡೊ, ಇಸ್ರಾಯೇಲ್ ಅದ್ಮಿಯೇನ ಸಮಾಧಾನ್ ಕರಾವಾಳೊ ಕದೆ ಆವಾಶೆಕರಿ ಟಿವವ್‌ಕರ್‌ತೊಡೊ. ಅಜ್ಜು ಪವಿತ್ರಾತ್ಮ ಇನಿ ಜೋಡೆ ಥೊ.

26 ಅತ್ರೇಸ್ ಕಾಹೆತೆ ಪ್ರಭು ಮೋಕಲ್‌ಶೇತೆ ಕ್ರಿಸ್ತನ ದೇಖಾತೋಡಿ, ತೂ ಮರಿಶ್ ಕೊಯ್ನಿ ಕರಿ ಪವಿತ್ರಾತ್ಮನೆ ಇನ ಬೋಲಿರಾಖೊಡೊ.

27 ಪವಿತ್ರಾತ್ಮಧಿ ಸಿಮೆಯೋನ್ ಮಂದಿರ್‌ಮ ಗಯೊ, ತದೆ ಯೋಸೇಫ್‌ಬಿ ಮರಿಯನೆ ಲಡ್ಕು ಯೇಸುನ ಧರ್ಮಶಾಸ್ತ್ರನಿ ಪದತ್ತಿಫೋಣಿ ಕರ್ನ್ ಕರಿ ಮಂದಿರ್‌ನ ಮಹಿ ಲೀನ್‌ಆಯ.

28 ಸಿಮಿಯೋನ್ನ ಯೋ ಲಡ್ಕಾನ ಹಾತ್‌ಮ ಪಾಡೀನ್, ದೇವ್ವ
ಧನ್ಯವಾದ್ ಕರ್ತೊಹುಯಿನ್,

29 “ಪ್ರಭು, ತಾರಿ ವಾತೆ ಘಾಲಿಗಿ,

ಹಮ್ಮೆ ಸಮಾಧಾನ್‌ಥಿ ಭಾವಾನ ತಾರೊ ಸೇವಕ್‌ನ ಹುಕುಮ್
ಹುವಾದೆ.

30 ಶನಕತೊ, ಖ್ಹುಡ್ ಮಾರ ಡೋಳೆಖ್ಹು ತುನೆ ದಿದೋತೆ ರಕ್ಷಣೆನ
ದೇಖಿಲಿದೊ,

31 ಖ್ಹಾರ್ ಅದ್ವಿವೋನ ದೇಖಾನಿಘೋಣಿ ಇನ ದೀರಾಖ್ಯೊಸ್.

32 ಯೋ ಪರೈ ಭಾತ್‌ವಾಳ ಅದ್ವಿನ ತಾರಿ ಮರ್ಜಿ ವತಾಳವಾಳೊ
ಉಜಾಳು ಹುಯಿರ್ದೊಸ್

ಅಜ್ಜು ತಾರು ಇಸ್ರಾಯೇಲ್ ಅದ್ವಿವೋನ ಮಹಿಮೆ ಉಶೆ.

33 ಸಿಮಿಯೋನ್ನ ಯೋ ಲಡ್ಕಾನಿ ಬಾರೇಮ ಬೋಲ್ಯೋತೆ ವಾತೇನ
ಖ್ಹಮ್‌ಜಿನ್, ಇನ ಆಯ-ಬಾನೆ ಆಶ್ಚರ್ಯಖಾದು.

34 ಸಿಮಿಯೋನ್ನ ಇವ್ವುನ ಆಶೀರ್ವಾದ್ ಕರೀನ್, ಇನಿ ಆಯ
ಮರಿಯನ, “ಆ ಲಡ್ಕಾಧಿ ಇಸ್ರಾಯೇಲ್ ದೇಖ್ವೊಮ ಕೈಯೆಕ್ಲಿ ಜಣು
ಪಡಿಜಾಶೆ ಅಜ್ಜು ಕೈಯೆಕ್ಲಿ ಉಟ್‌ಶೆ. ಕೈಯೆಕ್ಲಿ ಜಣು ಅನಿ ವಿರೋದ್
ವಾತೆ ಬೋಲ್‌ಶೇತೇಸ್, ಆ ದೇವ್‌ಥಿ ಆಯೋತೆ ಕರಿ ಬೋಲಾನು
ಖ್ಹಣೇದ್ ಹುಯಿರ್ದೊಸ್.

35 ಅಮ್ ಘಣ ಅದ್ವಿನಿ ದಿಲ್ಲಿ ವಾತೆಖ್ಹಾರಿ ಭಾರ್ ನಿಕಳಾಶೆ. ಅಜ್ಜು
ತಾರ ದಿಲ್ವ ತಲ್ವಾರ್ ಭೋಕಾವನಿಮತ್ ದುಖ್ ಉಶೆ” ಕರಿ ಬೋಲ್ಯೊ.

36 ಆಸ್‌ಕಾಹೆತೆ ಅಸೇರನೊ ಖೂಮ್‌ವಾಳೊ ಫನುವೇಲನಿ ಛೋರಿ
ಅನ್ನಕರಿ ಏಕ್ ಜಣಿ ಪ್ರವಾದ್‌ನೆ ಕರಾವಾಳಿ ಥೀ. ಯೋ ವ್ಯಹಾ ಹುಯಿನ್
ಖ್ಹಾತ್ ವರಖ್ವೊ ಬಾವಿನ ಜೋಡೆ ಬಚಿನ್ ಅಜ್ಜು ಯೋ ಘಣಿ ಬುಡಿಯಾ
ಹುಯಿರ್ದೊಸ್.

37 ತದೆ ಇನ ಚಾರ್ ಉಪ್ಪರ್ ಚಾರಿಖ್ವೊ ವರಖ್ವೊ ಹುಯಿರ್ದೊಡ್
ಅಜ್ಜು ಯೋ ಮುಂಡಚ್ಚಿ ಹುಯಿರ್ದೊಡ್. ಯೋ ದೇವ್ವಿ ಮಂದಿರನ್
ಕದೇಬಿ ಮ್ಹೇಲಿನ್ ಕೋ ಭಾತಿಥಿಂತೆ, ಉಪವಾಸ್ ಅಜ್ಜು ಪ್ರಾರ್ಥನೆ
ಕರ್ತಿಹುಯಿನ್, ರಾತ್-ದನ್ ದೇವ್ವಿ ಆರಾದನೆ ಕರ್ತಿ ರ್ದೊಡ್.

38 ಯೋಸ್ ವಖ್ವತ್‌ಮ, ಅನ್ನ ಯೋ ಲಡ್ಕಾನ ಆಯ-ಬಾಕನ ಅಯಿನ್, ದೇವ್ವ ಧನ್ಯವಾದ್‌ಕರಿ ಕರಿ ಅಜ್ಜು ಯೆರೂಸಲೇಮ್‌ನಿ ಛುಟ್ಕಾರ್‌ನಿ ಬಾರೇಮ ಟಿವವ್‌ಕರ್ತುಫ್‌ಥೂತೆ ಖ್ವಾರಾವ್‌ನ, ಯೋ ಲಡ್ಕಾನಿ ಬಾರೇಮ ಬೋಲಿ.

ನಜರೇತ್‌ನ ಪಾಲ್ಟು ಫರಿನ್ ಗಯೊತೆ

39 ಇವ್ಣೆ ಧರ್ಮಶಾಸ್ತ್ರಮ ಪ್ರಭುನೆ ಬೋಲಿರಾಖ್ಕುತೆ ಖ್ವಾರುಸ್ ಕಾಮ್ ಕರಾನ ಬಾದ್‌ಮ, ಯೋಸೇಫ ಅಜ್ಜು ಮರಿಯ ಪಾಲ್ಟುಫರಿ ಗಲಿಲಾಯ ತಬರ್‌ಖಾನು ನಜರೇತ್ ಕರಿ ಗಾಮ್‌ನ ಗಯು.

40 ಯೋ ಲಡ್ಕು ಮೋಟು ಹುಯಿನ್, ಶಕತ್‌ಮಾಬಿ ಅಜ್ಜು ಗ್ಯಾನ್‌ಮಾಬಿ ಭರಾಯು. ದೇವ್ವಿ ದಯಾ ಇನ ಉಪ್ಪರ್ ಥೂ.

ಭಾರ ವರಖ್ವೊನೊ ಯೇಸು ಮಂದಿರ್‌ಮ ಗಯೊತೆ

41 ಹರೇಕ್ ವರಖ್ವೊಬಿ ಯೇಸುನ ಆಯ-ಬಾ ಪಸ್ಕ ಪೂಜಾನಖ್ವಾಜೆ ಯೆರೂಸಲೇಮ್ ಜಾತೂಥೂ. 42 ಯೇಸುನ ಭಾರ ವರಖ್ವೊ ಹುವ್ವಾದೀನ್, ಇವ್ಣೆ ಜಾತೂಥೂತೆ ಇಮ್ಮಸ್, ಪಸ್ಕ ಪೂಜಾನಖ್ವಾಜೆ ಯೆರೂಸಲೇಮ್‌ನ ಗಯು.

43 ಇವ್ಣೆ ಪೂಜಾನೊ ದನ್‌ಖ್ವಾರು ಖಿತಮ್ ಕರೀನ್ ಪಾಲ್ಟುಫರಿನ್ ಆವಾನಿ ವಖ್ವತ್‌ಮ ಛೋಕ್ರುಯೇಸು ಯೆರೂಸಲೇಮ್‌ನ್ ರಹಿಗು. ಇನ ಆಯ-ಬಾನ ಅನಿ ಬಾರೇಮ ಮಾಲುಮ್ ಕೋ ಥೂನಿ.

44 ಯೋಸೇಫ್‌ಬಿ ಮರಿಯ ಯೇಸು ಝೂಂಡ್‌ಮಾಸ್ ಉಷೆಕರಿ ಸೋಚಿನ್, ಏಕ್ ರೋಜ್‌ನಿ ಚಾಲ್ ಎವ್ವಿ ಚಾಲ್‌ನಿ ಬಾದ್‌ಮ, ಇವ್ಣೆ ಮಾಯಮಾತ್ರಕನಾಬಿ, ರ್ವಾಳು ಖ್ವಾರಾಕನಾಬಿ ಜೈನ್ ಥೂಂಡ್ಕು.

45 ಕತೋಬಿ ಕಿಜ್ಲಾಬಿ ಮಳ್ಳೊಕೊಂತೆ ಇನಖ್ವಾಜೆ, ಯೇಸುನ ಥೂಂಡ್‌ತುಹುಯಿನ್ ಯೆರೂಸಲೇಮ್‌ನ ಪಾಲ್ಟು ಗಯು.

46 ತೀನ್ನೆ ರೋಜ್‌ಮ ಯೇಸುನ ಮಂದಿರ್‌ಮ ದೇಖ್ಕು, ಯೋ ಯೆಹೂದ್ಯರ್‌ನ ಬೋಧನೆ ಕರಾವಾಳಾನ ಜೋಡ್ಡ ಬೇಶಿನ್, ಇವ್ಣೆ ಬೋಲಾತೆ ಖ್ವಮಜ್‌ತೊಹುಯಿನ್, ಅಜ್ಜು ಪಾಲ್ಟು ಫರೈನ್ ಸವಾಲ್ ಕರುಕರ್ತೊಥೊ.

47 ಯೇಸುನಿ ವಾತೇನ ಖ್ವಮ್‌ಜಾವಾಳು ಖ್ವಾರು, ಯೋ ಸೋಚಿ ಪರ್ವಿನ್ ಗ್ಯಾನ್‌ಥಿ ಜವಾಬ್ ದೇಯಿತಿ ದೇಖಿನ್ ಆಶ್ಚರ್ಯವಾದು.

48 ಯೇಸುನ ಆಯ-ಬಾನೆ ಇನ ಹಿಞ್ಜಾ ದೇಖಿನ್ ಮ್ಹೊಡಾಪರ್ ಹಾತ್ ಜೋಡಿಲಿದು. ತದೆ ಇನಿ ಆಯಾನೆ, “ಮಾರ ಥಿಯ್ಯಾ, ತುನೆ ಹಮೂನ ಶನ ಅಮ್ ಕರ್ರೊ? ದೇಕ್, ತಾರೊ ಬಾಬಿ ಮೇ ಘಬ್‌ರೈನ್, ಡೂಂಡಿನ್ ಆಯಾನಿ” ಕರಿ ಬೋಲಿ.

49 ತದೆ ಯೇಸುನೆ ಇವ್ಣುನ, “ತುಮೆ ಮನ ಶನ ಡೂಂಡ್‌ಣು ಥು? ಮೇ ಮಾರ ಬಾನ ಘರ್ಮ ರ್ವಣು ಕರಿ ತುಮೂನ ಮಾಲುಮ್ ಕೊಯ್ವಿಶಿ ಶು? ಕರಿ ಜವಾಬ್ ದಿದೊ.

50 ಕತೋಬಿ ಇನೆ ಬೋಲ್ಯೋತೆ ಜವಾಬ್‌ನ ಇವ್ಣೆ ಮಾಲುಮ್ ಕರ್ರೊಯ್ವಿ.

51 ಬಾದಾಮ್ ಯೇಸು ಇವ್ಣ ಜೋಡೆ ನಙರೇತನ ಗಾಮ್‌ನ ಏನ್, ಹಿಞ್ಜಾ ಇವ್ಣಿ ವಾತೆನ ಖ್ವಮ್‌ಜಿನ್ ಥೊ. ಕತೋಬಿ ಇನಿ ಆಯ ಆ ಖ್ವಾರಿ ವಾತೇನ ಇನ ಮನ್‌ಮ ರಾಖಿರಾಖಿಥಿ.

52 ಯೇಸು ಗ್ಯಾನ್‌ಮಾಬಿ ಅಙ್ಕು ಆಂಗ್‌ತನ್ನಿ ಶಕತ್‌ಮಾಬಿ ಭಡ್ಲೊ ಆಯೊ. ಅತ್ರೇಸ್ ಕಾಹೆತೆ ದೇವ್ನಿ ಅಙ್ಕು ಅದ್ವಿನಿ ದಯಾ ಇನ ಉಪ್ಪರ್ ಭಾಖ್ತು ಹೋತು ಆಯು.

3

ಬ್ಯಾಪ್ತಿಸ್ತ ದೈವಾಳೊ ಯೋಹಾನನೆ ಬೋಲಿವತಾಳ್ವೋತೆ

(ಮತ್ತಾಯ 3:1-12; ಮಾರ್ಕ 1:1-18; ಯೋಹಾನ 1:19-28)

1 ತಿಬೇರಿಯಸ್ ಕೈಸರ್* ಅಧಿಕಾರ್ ಚಲಾವ್ ಕರ್ತೊಥೋತೆ ಪಂಥಾನೆ ವರಖ್ತುಮ್, ಪೊಂತ್ಯ ಪಿಲಾತ ಯೂದಾಯ ತಬರ್‌ಖಾನೊ ರಾಜ್ಯಪಾಲ್ ಹುಯಿರ್ರೊಥೊ, ಹೆರೋದ ಗಲಿಲಾಯ ತಬರ್‌ಖಾನ ಚಲಾವವಾಳೊ ಹುಯಿರೋಥೊ ಅಙ್ಕು ಇನೊ ನ್ಹಾನೊ ಬೈ ಫಿಲಿಪ್ಪ ಇತುರಾಯ ಅಙ್ಕು ತ್ರಕೋನಿತಿ ಕರಿ ಮುಲಕ್ಚ ಚಲಾವ್‌ಕರ್ತೊಥೊ. ಲೂಸನ್ಯ ಅಬಿಲೇನೆ ಮುಲಕ್ಚ ಚಲಾವ್‌ಕರ್ತೊಥೋತೆ ವಖ್ತುಮ್,

* 3:1 3:1 ಚಕರ್‌ವರ್ತಿ

ಅಬ್ರಹಾಮ್‌ನಿ ಪಿಳ್ಳಿವಾಳ ಕರಿ ತುಮಾರು ತುಮೇಸ್ ಬಡೈ ನಕೊ ಮಾರಿಲೆವೊ. ಮೇ ಬೋಲುಸ್ಕಿ, ದೇವ್ ಅಬ್ರಹಾಮ್‌ನಖ್ತಾಜೆ ಆ ಬಂಡೇವ್‌ಧಿಬಿ ಲಡ್ಕಾವ್ಣ ಉಬ್‌ಭಾವ್‌ಶೆ ಕರಿ ತುಮೂನ ಬೋಲುಸ್

9 ಹಮ್ಕೆಸ್ ಕತ್ರಾನಟೇಕೆ ಝಾಡಾವ್‌ನಿ ಜಡ್‌ಪರ್ ಕುರ್‌ಡ್ಡಿ ಮ್ಹೇಲ್ಯೆರ್‌ಡ್ಲೆಸ್. ಅಚ್ಚು ಪಂಡು ದೇಯಿಕೊಂತೆ ಹರೇಕ್ ಝಾಡಾವ್‌ನ ಕತ್ರಿನ್ ಆಗ್‌ಮ ನಾಕ್‌ಶೆ” ಕರಿ ಬೋಲ್ಯೊ.

10 ತದೆ ಯೋ ಅದ್ವಿಖ್ತಾರು, “ಇಮ್ ಕತೊ, ಹಮೆ ಶಾತ್ ಕರ್ನ್?” ಕರಿ ಪುಲ್ಲಾಯು.

11 ತದೆ ಯೋಹಾನನೆ, “ತುಮಾರಾಮ ಕಿನಾಕನ ಬೇ ಕುಡ್‌ತಾ ಲ್ಹಾಕಿ ಇವ್ಚೆ ಕೊಯ್ತೆ ಅದ್ವಿನ ದೈವಾದೆ; ಖಾಣು ರ್ಹವಾಳು ವಾಟಿಪಾಡಿ ದೇವ್ಚು” ಕರಿ ಜವಾಬ್ ದಿದೊ.

12 ಶುಂಕ ವಶೂಲ್ ಕರಾವಾಳು ಥೋಡು ಭಣು ಬ್ಯಾಪ್ತಿಸ್ಮ ಕರಿಲೇವ್ಣುಕರಿ ಆಯಿನ್, “ಗುರು, ಹಮೆ ಶಾತ್ ಕರ್ನ್?” ಕರಿ ಇನ ಪುಲ್ಲಾಯು.

13 ತದೆ ಯೋಹಾನನೆ ಇವ್ಚುನ, “ತುಮೂನ ಬೋಲಿರಾಖ್ತೆ ಇನೇಧಿ ಜಾಖ್ತತ್, ತುಮೆ ವಶೂಲ್ ನಕೊ ಕರೊ” ಕರಿ ಬೋಲ್ಯೊ.

14 ತದೆ ಥೋಡು ಭಣು ಶಿಪಾಯಿಖ್ತಾರುಬಿ ಆಯಿನ್, “ಹಮೆ ಶಾತ್ ಕರ್ನ್?” ಕರಿ ಬೋಲಾಖ್ತರ್,

ಇನೆ, “ಕಿನಾಪರ್‌ಬಿ ಜುಲಮ್ಚಸ್ಕಿ ಕರಿನ್ ಪೈಶಾ ಛಿನಾವಾನು ರ್ಹವೊ, ಕಿನಾಪರ್‌ಬಿ ಜ್ಞೂಟು ಇಂಜಾಮ್ ಲಗಾಡನು ರ್ಹವೊ ನಕೊ ಕರೊ. ತುಮೂನ ಮಳಾತೆ ಶಂಬಳಾಮ ಖ್ವಶೀಧಿ ರ್ಹವೊ” ಕರಿ ಬೋಲ್ಯೊ.

15 ಅಮ್ ರ್ಹವಾನಿ ವಖ್ತಮ್, ಇಸ್ರಾಯೇಲ್‌ನು ಅದ್ವಿಖ್ತಾರು ಕ್ರಿಸ್ತ ಆವ್‌ಶೆಕರಿ ಜುಪೀರ್‌ಘೊತೆ ಇನಖ್ತಾಜೆ, ಯೋಹಾನ್ನಿ ಬಾರೇಮ ಆಶ್ಚರ್ಯ್‌ಖೈನ್, “ಆಸ್ ಕ್ರಿಸ್ತ ಹುಯಿರ್‌ಘೊಸ್ಕಿ ಶುಕಿ” ಕರಿ ಇವ್ಚು ಮನ್‌ಮ ಖ್ವಯಾಲ್ ಕರ್ಲಿದು.

16 ತದೆ ಯೋಹಾನನೆ ಇವ್ಚುನ, “ಮೇತೊ ತುಮೂನ ಪಾಣಿಧಿ ಬ್ಯಾಪ್ತಿಸ್ಮ ದೆವ್‌ಕರೂಸ್; ಕತೋಬಿ ಮಾರೇಧಿಬಿ ಶಕತ್‌ವಾಳೊ

ವಳ್ಳಾವಸ್, ಇನಿ ಖೋಖ್ವೊಡಾನಿ ಡೋರಿ ಫೋಡಾನಾಬಿ ಮೇ ಲ್ವಾಯೇಕ್‌ಕೊಯ್ನಿ. ಯೋ ತುಮೂನ ಪವಿತ್ರಾತ್ಮದಿಬಿ ಅಗ್‌ಥೀಬಿ ಬ್ಯಾಪ್ತಿಸ್ಮದಿಶೆ.

17 ಇನ ಹಾತ್‌ಮ ಖ್ವುಪ್‌ಡು ಧರಿರಾಖ್ಯೋಸ್, ಇನ ಖಳಾಮಾನು ಘವ್‌ನಿ ರಾಶ್‌ನ ತೂರಿನ್, ಅಲ್ಫ ಕರೀನ್, ಘವ್‌ನ ಕಣ್ಣಿಮ ಭರಿಲಿಶೆ, ಕತೋಬಿ ಪೊಟ್ವಾನ ಉಝಾವಕೊಂತೆ ಆಗ್‌ಮ ಬಾಳಿನಾಕ್‌ಜೆ” ಕರಿ ಜವಾಬ್ ದಿದೊ.

18 ಯೋಹಾನನೆ ಬಿಜೂಬಿ ಘಣಿ ತರಿಕಾಧಿ ಅದ್ಮಿ ಖ್ವಾರಾನ ಅಲ್ಫಿ ಖಬರ್‌ನ ಬೋಲಿದೇತೊಹುಯಿನ್, ತುಮಾರಿ ಸೋಚ್ಚ† ಬದ್‌ಲೈಲೇವ್ಣುಕರಿ ಇವ್ಣುನ ಖ್ವಮ್‌ಜಾಡ್‌ತೊಡೊ.

19 ರಾಜ್ಯಪಾಲ್ ಹುಯಿರ್ದೊತೆ ಹೆರೋದನೆ ಇನಿ ಬೈನಿ ಬಾವಣ್ ಹುಯಿರ್ದೊತೆ ಹೆರೋದ್ಯನ ಕರಿಲಿದೊಡೊತೆ ಅಜು ಇನೆ ಕರ್ದೊಡೊತೆ ಬಿಜಾಖ್ವಾರ ಖರಾಬ್ ಕಾಮ್‌ಟೇಕೆ ಯೋಹಾನನೆ ಇನ ಬರಾಬರ್ದಿ ಗುರ್‌ಕಾಯೊ.

20 ಇನಖ್ವಾಜೆ ಹೆರೋದನೆ ಯೋಹಾನ್ನ್ ಧರೈನ್ ಜೇಲ್‌ಮ ಕೋಂಡಿ ಘಲಾಯೊ, ಅನೇಥಿ ಇನು ಖರಾಬ್ ಕಾಮ್ ಬಿಜೂಬಿ ಜಾಖ್ವತ್ ಹುಯು.

ಯೇಸು ಬ್ಯಾಪ್ತಿಸ್ಮ ಕರೈಲಿದೋತೆ

(ಮತ್ತಾಯ 3:13-17; ಮಾರ್ಕ 1:9-11; ಯೋಹಾನ 1:32-34)

21 ಅದ್ಮಿಖ್ವಾರು ಬ್ಯಾಪ್ತಿಸ್ಮ ಕರೈಲ್ಯವಾನ ಬಾದ್‌ಮ, ಯೇಸುಬಿ ಬ್ಯಾಪ್ತಿಸ್ಮ ಕರೈಲಿದೊ. ಯೋ ಪ್ರಾರ್ಥನೆ ಕರುಕರಾನಿ ವಖ್ವತ್‌ಮ, ಸೊರ್ಗ ನಿಕ್‌ಳ್ಳು

22 ಅಜು ಪವಿತ್ರಾತ್ಮ ಶರೀರ್‌ನಿ ರೂಪ್‌ಹುಯಿನ್ ಪರ್ರಾವಾನಿಫೋಣಿ ಇನಾಪರ್ ಉತ್‌ರ್ದ್ಯ ತದೆ ಪರಲೋಕ್‌ಮಾಡು, “ತೂ ಮಾರೊ ಲಾಡ್‌ನೊ ಛಿಯೊ ತಾರೇಥಿ ಮೇ ಘಣು ಖ್ವುಶಿ ಛೊ” ಕರಿ ಏಕ್ ಆವಾಝ್ ಆಯು.

† 3:18 3:18 ಕತೊ ಜಿಂದ್‌ಗೀನ, ಜಿವಾನಿ ತರಿಕಾನ ಕರಿ ಮತ್‌ಲಬ್.

ಯೇಸು ಕ್ರಿಸ್ತನಿ ಗುರುಗುರಬ್‌ಲ್ಯಾನಿ ಪಟ್ಟಿ

(ಮತ್ತಾಯ 1:1-17)

23 ಯೇಸು ಸೇವೆ ಕರಾನ ಶುರುಕರ್ಯ್ತೆ ತದೆ, ಯೋ ಡೋಡಿಖ್ತ್ ವರಖ್ವೊನೊ ಥೊ. ಅದ್ವಿನ ಡೋಳಾಮ ಯೇಸು ಯೋಸೇಫನೊ ಛಿಯ್ತೊ ಯೋಸೇಫ ಹೇಲಿನೊ ಛಿಯ್ತೊ

24 ಹೇಲಿ ಮತ್ತಾತನೊ ಛಿಯ್ತೊ ಮತ್ತಾತಿ ಲೇವಿನೊ ಛಿಯ್ತೊ ಲೇವಿ ಮೆಲ್ಕಿನೊ ಛಿಯ್ತೊ ಮೆಲ್ಕಿ ಯನ್ನಾಯನೊ ಛಿಯ್ತೊ ಯನ್ನಾಯ ಯೋಸೇಫನೊ ಛಿಯ್ತೊ

25 ಯೋಸೇಫ ಮತ್ತಥಿನೊ ಛಿಯ್ತೊ ಮತ್ತಥಿ ಆಮೋಸನೊ ಛಿಯ್ತೊ ಆಮೋಸ ನಹೂಮನೊ ಛಿಯ್ತೊ ನಹೂಮ ಎಸ್ಲಿನೊ ಛಿಯ್ತೊ ಎಸ್ಲಿ ನಗ್ಗಾಯನೊ ಛಿಯ್ತೊ

26 ನಗ್ಗಾಯ ಮಹಾಥನೊ ಛಿಯ್ತೊ ಮಹಾಥ ಮತ್ತಾಥಿನೊ ಛಿಯ್ತೊ ಮತ್ತಾಥಿಯ ಶಿಮಿನೊ ಛಿಯ್ತೊ ಶಿಮಿ ಯೋಸೇಖನೊ ಛಿಯ್ತೊ ಯೋಸೇಖ ಯೂದಾನೊ ಛಿಯ್ತೊ

27 ಯೂದ ಯೋಹಾನನೊ ಛಿಯ್ತೊ ಯೋಹಾನ ರೇಸನೊ ಛಿಯ್ತೊ ರೇಸ್ ಜೆರುಬ್ಬಾಬೇಲ್‌ನೊ ಛಿಯ್ತೊ ಜೆರುಬ್ಬಾಬೇಲ್ ಸಲಾಥಿಯೇಲ್‌ನೊ ಛಿಯ್ತೊ ಸಲಾಥಿಯೇಲ್ ನೇರಿನೊ ಛಿಯ್ತೊ

28 ನೇರಿ ಮೆಲ್ಕಿನೊ ಛಿಯ್ತೊ ಮೆಲ್ಕಿ ಅದ್ದಿನೊ ಛಿಯ್ತೊ ಅದ್ದಿ ಕೋಸಾಮನೊ ಛಿಯ್ತೊ ಕೋಸಾಮ ಎಲ್ಮದಾಮನೊ ಛಿಯ್ತೊ ಎಲ್ಮದಾಮ ಏರ್‌ನೊ ಛಿಯ್ತೊ

29 ಏರ್ ಯೆಹೋಶುವನೊ ಛಿಯ್ತೊ ಯೆಹೋಶುವ ಎಲಿಯೇಜರನೊ ಛಿಯ್ತೊ ಎಲಿಯೇಜರ್ ಯೋರೈಮನ್ನೊ ಛಿಯ್ತೊ ಯೋರೈಮನ್ ಮತ್ತಾತಿನೊ ಛಿಯ್ತೊ ಮತ್ತಾತಿ ಲೇವಿನೊ ಛಿಯ್ತೊ

30 ಲೇವಿ ಸಿಮೆಯೋನ್ನೊ ಛಿಯ್ತೊ ಸಿಮಿಯೋನ್ ಯೂದಾನೊ ಛಿಯ್ತೊ ಯೂದ ಯೋಸೇಫನೊ ಛಿಯ್ತೊ ಯೋಸೇಫ ಯೋನಾಮನೊ ಛಿಯ್ತೊ ಯೋನಾಮ ಎಲಿಯಕೀಮನೊ ಛಿಯ್ತೊ

31 ಎಲಿಯಕೀಮ್ ಮೆಲೆಯಾನ್ನೊ ಛಿಯ್ತೊ ಮೆಲೆಯಾನ್

ಮೆನ್ನಾನ್ನೊ ಛಿಯ್ಯೊ ಮೆನ್ನಾನ್ ಮತ್ತಾಥನ್ನೊ ಛಿಯ್ಯೊ ಮತ್ತಾಥ
ನಾತಾನ್ನೊ ಛಿಯ್ಯೊ ನಾತಾನ್ ದಾವೀದನೊ ಛಿಯ್ಯೊ

32 ದಾವೀದ ಇಷಯನೊ ಛಿಯ್ಯೊ ಇಷಯ ಓಬೇದನೊ ಛಿಯ್ಯೊ
ಓಬೇದ ಬೋವಜನೊ ಛಿಯ್ಯೊ ಬೋವಜ ಸಲ್ಮೋನ್ನೊ ಛಿಯ್ಯೊ
ಸಲ್ಮೋನ್ ನಹಸ್ಸೋನ್ನೊ ಛಿಯ್ಯೊ

33 ನಹಸ್ಸೋನ ಅಮ್ಮಿನಾದಾಬನೊ ಛಿಯ್ಯೊ ಅಮ್ಮಿನಾದಾಬ
ಅದ್ಮಿನ್‌ನೊ ಛಿಯ್ಯೊ ಅದ್ಮಿನ್ ಅರ್‌ನೈನ್ನೊ ಛಿಯ್ಯೊ ಅರ್‌ನೈನ್
ಎಸ್ತೋನ್‌ನೊ ಛಿಯ್ಯೊ ಎಸ್ತೋನ್ ಪೆರೆಸನೊ ಛಿಯ್ಯೊ ಪೆರೆಸ
ಯೂದಾನೊ ಛಿಯ್ಯೊ

34 ಯೂದ ಯಾಕೋಬನೊ ಛಿಯ್ಯೊ ಯಾಕೋಬ ಇಸಾಕನೊ
ಛಿಯ್ಯೊ ಇಸಾಕ್ ಅಬ್ರಹಾಮನೊ ಛಿಯ್ಯೊ ಅಬ್ರಹಾಮ್ ತೆರಹನೊ
ಛಿಯ್ಯೊ ತೆರಹ ನಾಹೋರನೊ ಛಿಯ್ಯೊ

35 ನಾಹೋರ ಸೆರೂಗನೊ ಛಿಯ್ಯೊ ಸೆರೂಗ ರೆಗೂವನೊ ಛಿಯ್ಯೊ
ರೆಗೂವ ಪೆಲೆಗನೊ ಛಿಯ್ಯೊ ಪೆಲೆಗ ಹೆಬೇರನೊ ಛಿಯ್ಯೊ ಹೆಬೇರ
ಸಾಲನೊ ಛಿಯ್ಯೊ

36 ಸಾಲ ಕಾಯಿನ್ನೊ ಛಿಯ್ಯೊ ಕಾಯಿನ್ ಅರ್‌ಫಾಕ್ಷದನ್ನೊ ಛಿಯ್ಯೊ
ಅರ್‌ಫಾಕ್ಷದನ್ ಶೇಮ್‌ನೊ ಛಿಯ್ಯೊ ಶೇಮ್ ನೋಹಾನೊ ಛಿಯ್ಯೊ
ನೋಹ ಲಾಮೆಕನೊ ಛಿಯ್ಯೊ

37 ಲಾಮೆಕ ಮತೂಷಲನೊ ಛಿಯ್ಯೊ ಮತೂಷಲ ಹನೋಕನೊ
ಛಿಯ್ಯೊ ಹನೋಕ ಯೆರೆದ್‌ನೊ ಛಿಯ್ಯೊ ಯೆರೆದ್ ಮಹಲಲೇಲ್‌ನೊ
ಛಿಯ್ಯೊ ಮಹಲಲೇಲ್ ಕಾಯಿನ್ನೊ ಛಿಯ್ಯೊ

38 ಕಾಯಿನ ಎನೋಷನೊ ಛಿಯ್ಯೊ ಎನೋಷ ಸೇತನೊ ಛಿಯ್ಯೊ
ಸೇತ್ ಆದಾಮನೊ ಛಿಯ್ಯೊ ಅದಾಮ್ ದೇವ್‌ನೊ ಛಿಯ್ಯೊ

4

ಶೈತಾನ್ನೆ ಯೇಸುನ ಪಾಪ್‌ಮ ಪಖ್ತಾವಾನ ದೇಖ್ಚೊತೆ
(ಮತ್ತಾಯ 4:1-11; ಮಾರ್ಕ 1:12-13)

1 ಯೇಸು ಪವಿತ್ರಾತ್ಮಾಧಿ ಭರೈನ್, ಯೊರ್ದನ್ ನದ್ವಿಧು ಪಾಫೊಫರಿನ್ ಆಯೊ. ತದೆ ದೇವ್‌ನು ಆತ್ಮಾನೆ ಇನ ಉಜ್ಜಾಡಿ ಝಗೋಮ ಚಲಾಯೊ.

2 ಹಿಜ್ಜಾ ಶೈತಾನ್‌ಧಿ ಯೇಸು ಭಾಳಿಖ್ವ ರೋಜ್ ಶೋದನೆಮ ಪಡ್ಯೊ. ಇನ ಪಾಪ್‌ಮ ಪಖ್ವಾವಾನ ಕರೈಲ್ಯೊ; ಯೋ ದನೂಮ ಯೇಸುನೆ ಶಾತ್ತ್ವಿ ಕೋ ಖಾದೋನಿ, ಇನಖ್ವಾಜೆ ಯೋ ಖ್ವಾರ ದನ್ ಖತಮ್ ಹುವಾನ ಬಾದ್‌ಮ ಇನ ಭುಕ್‌ಲಾಗ್ಸು.

3 ತದೆ ಶೈತಾನ್ನೆ ಯೇಸುನ, “ತೂ ದೇವ್‌ನೊ ಛಿಯ್ಯೊ ಉಶೇತೊ, ಆ ಬಂಡಾನ ರೋಟೊ ಹುವಾನಿಫೊಣಿ ಹುಕುಮ್ ದೇ” ಕರಿ ಬೋಲ್ಯೊ.

4 ಕತೋಬಿ ಯೇಸುನೆ, “ಅದ್ಮಿ ಖಲಿ ರೋಟೊ ಖಾವಾಥೀಸ್ ಕೋ ಬಘಾನಿ, ಕರಿ ಲೀಖೈರೈಲ್ಯೊ”* ಕರಿ ಜವಾಬ್ ದಿದೊ.

5 ಅಜ್ಜು ಶೈತಾನ್ನೆ ಯೇಸುನ ಉಪ್ಪರ್ ಬುಲೈಲಿಜೈನ್, ಎಕ್ಕ್‌ಸ್ ಘಡೀಮ ಜಗತ್‌ನು ಖ್ವಾರಸ್ ರಾಜ್ಜನ ವತಾಳಿನ್,

6 “ಮೇ ತುನ ಅನಿ ಖ್ವಾರಿನ್ ಅದಿಕಾರ್‌ನಾಬಿ, ಶನ್‌ಗಾರ್‌ನಾಬಿ ತುನ ದೆವುಸ್” ಕರಿ ಶೈತಾನ್ನೆ ಇನ ಬೋಲ್ಯೊ, “ಆ ಖ್ವಾರು ಮಾರ ಹಾತ್‌ಮ ಛಾ, ಮೇ ಕಿನ ಹೋಣುಕತೋಬಿ ಆ ದಿಯೈಜ್ಜಾಯ್”.

7 ತೂ ಮನ ಆಡ್‌ಪಡೀನ್ ಆರಾದನೆ† ಕರೈಲ್ಯೊತೊ, ಆಖ್ವಾರು ತಾರು ಉಶೆ” ಕರಿ ಬೋಲ್ಯೊ.

8 ತದೆ ಯೇಸುನೆ, “ತಾರೊ ದೇವ್ ಹುಯಿರೈಲ್ವೆತೆ ಪ್ರಭುನ ಎಕ್ಕ್‌ಸ್ ಜಞಾನ ಆರಾದನೆ ಕರೈಲ್ಯೊ ಅಜ್ಜು ಸೇವೆ ಕರೈಲ್ಯೊ ಕರಿ ಲೀಖೈರೈಲ್ಯೊ”‡ ಕರಿ ಜವಾಬ್ ದಿದೊ.

9 ಅನ ಬಾದ್‌ಮ ಶೈತಾನ್ನೆ ಯೇಸುನ ಯೆರೂಸಲೇಮ್‌ನ ಬುಲೈಲಿಜೈನ್ ಮಂದಿರ್‌ನ ಉಪ್ಪರ್‌ಲಿ ಟೇಕ್‌ಡಿನ್ ಝಗೋಪರ್ ಭೀರಾಖಿನ್, “ತೂ ದೇವ್‌ನೊ ಛಿಯ್ಯೊ ಉಶೇತೊ ಹಜ್ಜಾಫೊ ಹೇಟ್ ಕೂದ್,

10 ‘ದೇವ್ ತುನ ಬಘಾಡಾನಟೇಕೆ ಇನ ದೂತರ್‌ನ ಹುಕುಮ್ ದಿಶೆ,

* 4:4 4:4 ಧರ್ಮಪದೇಶ ಕಾಂಡ 8.3 † 4:7 4:7 ತೂ ಮಾರ ಗೋಡಾಪರ್ ಪಡ್ಯೊತೊ ಕರೀಬಿ ಹುವಾಸ್. ‡ 4:8 4:8 ಧರ್ಮಪದೇಶ ಕಾಂಡ 6.13

11 ತಾರ ಗೋಡೊ ಬಂಡಾನ ಲೋಕರ್ ನಾಲಗ್ಗುತೆ ತಿಮ್ ಯೋ ತುನ ಹಾತ್‌ಮ ಪಾಡಿಲಿಶೆ. ಕರೀಬಿ ಪವಿತ್ರ ದಪ್ತರ್‌ಮ ಲೀಖೈರ್ದ್ವಾಸ್‌ನಿ”[§] ಕರಿ ಬೋಲ್ಯೊ.

12 ಕತೋಬಿ ಯೇಸುನೆ, “ತಾರೊ ದೇವ್ ಹುಯಿರ್ದ್ವಾತೆ ಪ್ರಭುನ ತರೀಪ್‌ಶ ನಾ ಕರ್ನ್ ಕರೀಬಿ ಲೀಖೈರ್ದ್ವಾಸ್‌ನಿ”^{*} ಕರಿ ಜವಾಬ್ ದಿದೊ.

13 ಶೈತಾನ್ ಯೇಸುನ ಖ್ವಾರಿ ತರ್ವ್ವಾನು ಶೋದನೆ ಕರಾನ ಬಾದ್‌ಮ, ಥೋಡಿ ವಖ್ತನ್‌ಖ್ವಾಜೆ ಇನ ಮ್ಹಂದಿನ್ ಚಲೆಗಯೊ.

ಯೇಸು ಗಲಿಲಾಯಮ ಇನಿ ಸೇವೆ ಶುರುಕರ್ಯೊತೆ
(ಮತ್ತಾಯ 4:12-17; ಮಾರ್ಕ 1:14-15)

14 ಅನ ಬಾದ್‌ಮ ಯೇಸು ಪವಿತ್ರಾತ್ಮನಿ ಶಕತ್‌ಧಿ ಭರ್ಯೆನ್, ಪಾಲ್ಟೊಫರಿ ಗಲಿಲಾಯ ತಬರ್‌ಖಾನ ಗಯೊ. ಯೋ ತಬರ್‌ಖಾನು ಖ್ವಾರಿ ಬಾಜುಮ ಯೇಸುನಿ ಬಾರೇಮಾನು ಖಬರ್ ಫೈಲಿಗಯು.

15 ಯೇಸು ಸಬೆ ಭರಾವಾನು ಮಂದಿರ್‌ಮ[†] ಖ್ವಾರು ಅಲ್ಟಿ ಖಬರ್‌ನ ಬೋಲಿದೆವಾಲಗ್ಯೊ, ಖ್ವಾರುಸ್ ಅದ್ವಿ ಇನ ಖ್ವರಾಯು.

ನಜರೇತ್‌ವಾಳು ಯೇಸುನ ಝಿಟ್ಕಾರ್ಯತೆ
(ಮತ್ತಾಯ 13:53-58; ಮಾರ್ಕ 6:1-6)

16 ಯೇಸು ಯೋ ಪಳ್ಯೊತೆ ಗಾಮ್ ಹುಯಿರ್ದ್ವಾತೆ ನಜರೇತ್‌ನ ಆಯೊ. ಯೋ ಕರ್ತೊಥೋತೆ ಇಮ್ಮಸ್, ಸಬ್ಬತ್ ದನ್ಮ ಸಬೆ ಭರಾವಾನು ಮಂದಿರ್‌ಮ ಜೈನ್, ಪಡಾನಖ್ವಾಜೆ ಉರಿ ಭಿಯೊ.

17 ತದೆ ಯೆಶಾಯ ಕರಿ ಪ್ರವಾದಿನು ದಪ್ತರ್‌ನಿ ಪುಂಗ್‌ಳೀನ ಯೇಸುನ ಹಾತ್‌ಮ ದಿದು. ಇನೆ ಯೋ ಪುಂಗ್‌ಳೀನ ಛೋಡಿನ್, ಲೀಖೈರ್ದ್ವಾತೆ ಝುಗೋನ ದೇಖಿನ್ ಪಡ್ಯೊ, ಯೋ ವಾತೆ ಶಾತ್‌ಕತೊ,

18 ಪ್ರಭುನು ಆತ್ಮ ಮಾರಪರ್ ಛಾ,

§ 4:11 4:11 ಕೀರ್ತನೆ 91:12 * 4:12 4:12 ಧರ್ಮೋಪದೇಶ ಕಾಂಡ 6:16

† 4:15 4:15 ಯೆಹೂದ್ಯರ್‌ನು ಅದ್ವಿಖ್ವಾರು ಆರಾದನೆ ಕರಾನ ಎಕ್ವು ಹೋತುಥೂತೆ ಝುಗೊ.

ಗರೀಬ್‌ನ ಸುವಾರ್ತೆ ಬೋಲಾನಟೀಕೆ ದೇವ್ವೆ ಮನ ಅಬಿಷೇಕ್
 ಕರಿರಾಖ್ಯೋಸ್,
 ಧರೈಗೂತೆ ಅದ್ಮಿನ, “ತುಮೆ ಛುಟಿಗಯ ಕರಿ
 ಅಜ್ಜು ಕಾಣಾವ್ವ, ತುಮುನ ಡೋಳ ದೆಖಾವ್‌ಶೆ’ ಕರಿ
 ಬೋಲಾನಟೀಕೆ,
 ಅಜ್ಜು ಖ್ವತಾವ್ಣಿಮ ಛಾತೆ ಇವ್ಣುನ ಛೋಡಾವನಟೀಕೆ,
 19 ಪ್ರಭುನೆ ಇನ ಅದ್ಮಿನ ಬಫಾಡಾನಖ್ವಾಜೆ ನೇಮ್‌ಶಾಯೋತೆ,
 ವಖ್ವತ್ ಐಗೈ ಕರಿ ಪ್ರಚಾರ್ ಕರಾನಟೀಕೆ ದೇವ್ವೆ ಮನ ಬೋಲಿ
 ಮೋಕ್ಲಿರಾಖ್ಯೋಸ್” ಕರಿ

20 ಪಡಾನ ಬಾದಾಮ್, ಯೋ ಪುಂಗ್‌ಳಿನ ಲಪೇಟೆನ್ ಸಬೆ
 ಭರಾವಾನು ಮಂದಿರ್‌ನ ಸೇವಕ್‌ನ ಹಾತ್‌ಮ ದೀನ್ ಬೇಶಿಗಯೊ.
 ಹಿಞ್ಲಾಧೂತೆ ತಮಾಮ್ ಅದ್ಮಿನಿ ನಞ್‌ರ್ ಯೇಸುಪರ್ ಥೂ.

21 ತದೆ ಯೇಸುನೆ ಇವ್ಣುನ, “ಮೇ ಹಮೈ ಪಡ್ಯೋತೆ ವಚನ್ನ ತುಮೆ
 ಖ್ವಮ್‌ಜೂಕರ್ತಧಾತೆ ತದ್ದೇಸ್ ಯೋ ಪೂರಹುಯು” ಕರಿ ಬೋಲ್ಯೊ.

22 ತಮಾಮ್ ಅದ್ಮಿ ಇನ ಖ್ವರಾವಲಗ್ಯು ಅಜ್ಜು ಇನ ಮ್ಹೋಡಾವಾಟೆ
 ನಿಕ್ಕಾತೆ ವಾಖ್ವಾನ್‌ನಿ ವಾತೆನ ಖ್ವಮ್‌ಜೆನ್ ಆಶ್ವರ್ಯ್‌ಖೈನ್, “ಆ
 ಯೋಸೇಫ್‌ನೊ ಛಿಯ್ಯೊ ಕಾಹೆಕಿ ಶು? ಕರಿ ವಾತೆ ಬೋಲಿಲಿದು.

23 ತದೆ ಇನೆ ಇವ್ಣುನ, “ತುಮೇತೊ, ವೈದ್ಯಃ ತಾರು ತೂ ಅಛ್ಣು ಕರಿಲೆ’
 ಕರಿ ಛಾತೆ ಮತ್ಲಬ್‌ನ ಬೋಲ್‌ಶು ಕರಿ ಮನ ಅಛ್ಣಿನಿತರ ಮಾಲುಮ್,
 ಅಜ್ಜು ಕಪೆರ್ನಾಮ್ಮ ತುಮೆ ಖ್ವಮ್‌ಜ್ಯಾತೆ ಯೋಸ್, ಕಾಮ್ ಆ ತಾರ
 ಶೊಂತ್ ಗಾಮ್‌ಬಿ ಕರ್ ಕರಿ ಮನ ಬೋಲ್‌ಶು,

24 ಕತೋಬಿ ಮೇ ತುಮುನ ಖ್ವಾಚ ಬೋಲುಸ್ಕಿ, ಖೆವ ಪ್ರವಾದಿನಾಬಿ
 ಶೊಂತ್ ಗಾಮ್‌ವಾಳು ಮಾನಕೊಯ್ನಿ.

25 ಮಾರಿ ವಾತೇನ ಖ್ವಮ್‌ಜೊ: ಎಲೀಯನ ಹಗಾಮ್‌ತೀನ್ ವರಖ್ವೊ
 ಲೊ ಮಹಿನ ಆಬ್‌ಥು ಪಾಣಿ ಕೋ ವರ್‌ಶ್ಯೋನಿ, ತದೆ ದೇಖ್‌ನಿ ಖ್ವಾರಿಸ್

ಬಾಙ್ಗುಮ ಕಾಳ್ತುಕಾಳ್ ಹುಯು, ಅಙ್ಗು ಯೋ ವಖ್ವತ್‌ಮ ಇಸ್ರಾಯೇಲ್ ದೇಖ್ವಾಮ ಕೆತ್ರಿಸ್ತಿ ಮುಂಡಚ್ಚಿ ತಯೇಡ ಥೀತೆ ಖ್ವಾಚಸ್.

26 ಕತೋಬಿ ದೇವ್ಣೆ ಇವ್ಣಾಮ ಏಕ್‌ಭಣಾನಬಿ, ಎಲೀಯನ ಬೋಲಿ ಮೋಕ್‌ಲ್ಯೊಕೊಂತೆ, ಸೀದೋನ್ ದೇಖ್ವಾನು ಸರೆಪ್ತ ಕರಿ ಗಾಮ್ ಥೀತೆ ಏಕ್ ಮುಂಡಚ್ಚಿನ ಘರೆ ಮೋಕ್‌ಲ್ಯೊ.

27 ಅಙ್ಗು ಎಲೀಷ ಕರಿ ಪ್ರವಾದಿನ ಹಗಾಮ್ ಇಸ್ರಾಯೇಲ್ ಅದ್ಮಿಮ ಕೆತ್ರುಕ್ಚಿ ಜಣಾನ ಖೋಡ್ ಲಾಗಿರೊಡ್ತು. ಕತೋಬಿ ಇವ್ಣಾಮ ಏಕ್ ಭಣಾನಾಬಿ ಅಲ್ಫು ಕೋ ಹುಯೂನಿತೆ ಸಿರಿಯ ದೇಖ್ವಾನೊ ನಾಮಾನ್ ಕರಿ ಎಕ್ವಸ್ ಭಣಾನ ಅಲ್ಫು ಹುಯು” ಕರಿ ಬೋಲ್ಯೊ.

28 ಆ ವಾತೇನ ಖ್ವಮ್‌ಜಿನ್ ಸಬೆ ಭರಾವಾನು ಮಂದಿರ್‌ಮ ಥೂತೆ ತಮಾಮ್ ಅದ್ಮಿಘಣು ಇರಾದೊ ಖೈನ್,

29 ಉರಿ ಭೀರಿನ್, ಯೇಸುನ ಗಾಮ್‌ಥು ಭಾರ್ ಧಕೇಲಿದಿದು. ಅಙ್ಗು ಇವ್ಣೆ ಯೇಸುನ ಇವ್ಣು ಗಾಮ್ ಭಂದೈರೊಡ್ತೊತೆ ಪಹಾಡ್‌ನು ಕಥಾರ್‌ಪರ್ ಲೀ ಜೈನ್ ಹಿಜ್ಜಾಡ್ ಹೇಟ್ ಧಕೇಲಿದೇವ್ಣು ಕರಿ ಥೂ.

30 ಕತೋಬಿ ಯೇಸು ಇವ್ಣು ಇಚ್ಛೆಮಾಕರಿ ನಿಕ್ಕಿನ್ ಚಲೆಗಯೊ.

ಭೂತ್ ಧರಿರಾಖ್ಯಾಥೂತೆ ಏಕ್ ಅದ್ಮಿನಿ ಬಾರೇಮ

(ಮಾರ್ಕ 1:21-28)

31 ಬಾದ್‌ಮ ಯೇಸು ಗಲಿಲಾಯ್ ತಬರ್‌ಖಾನು ಕಪೆರ್ನೊಮ್ ಕರಿ ಗಾಮ್‌ನ ಗಯೊ. ಹಿಜ್ಜಾ ಸಬ್ಬತ್ ದನ್ನೆ ಇವ್ಣುನ ವಚನ್ ಬೋಲಿದಿದೊ.

32 ಇನೆ ಅದಿಕಾರ್‌ಥಿ ವಚನ್ ಬೋಲ್ಯೊತೆ ದೇಖಿನ್, ಇವ್ಣೆ ಘಣು ಆಶ್ಚರ್ಯಖಾದು.

33 ಯೋ ಸಬೆ ಭರಾವಾನು ಮಂದಿರ್‌ಮ ಭೂತ್ ಧರಿರಾಖ್ಯಾಥೂತೆ ಏಕ್ ಅದ್ಮಿಥೂ. ಯೋ ಜೋರ್ ಆವಾಙ್‌ಥಿ ಚಿಕ್ರಿನ್,

34 “ನಙ್ಗರೇತ್‌ನೊ ಯೇಸು ಹಮಾರೇಥಿ ತುನ ಶಾತ್ ಛಾ? ಹಮೂನ ಬರ್ಬಾತ್ ಕರಾನ ಹಜ್ಜಾ ಐರೊಡ್ತಿಸ್ತಿ ಶು? ತೂ ಕೋಣ್ ಕರಿ ಮನ ಮಾಲುಮ್. ತೂ ದೇವ್‌ಥಿ ಬೋಲಿಮೋಕ್‌ಲ್ಯೊ ಹುಯೊ ಪರಿಶುದ್ಧ ಹುಯಿರೊಡ್ತಿಸ್! ಕರಿ ಬೋಲ್ಯು.

35 ತದೆ ಯೇಸುನೆ ಯೋ ಭೂತನ ಗುರ್‌ಕೈನ್, “ಖ್ಲೊಪ್‌ರೈ! ಅನ ಮ್ಹೊಂದಿನ್ ಭಾರ್‌ನಿಕಳ್” ಕರಿ ಬೋಲ್ಯೊ. ಯೋ ಭೂತನೆ ಯೋ ಅದ್ವಿನ ಇವ್ಣ ಖ್ಲಾಪ್ಣೆ ಹೇಟ್ ರಡ್‌ಕೈನ್, ಇನ ಶನೂಸ್ ಟೆಚ್‌ಕೊ ದಿದುಕೊಂತೆ ಮ್ಹೊಂದಿನ್ ಚಲಿಗಯು.

36 ಅನ ದೇಖಿನ್ ಅದ್ವಿಖ್ಲಾರು ಆಶ್ಚರ್ಯಪ್ಪಿನ್, “ಆ ಕಿಮ್ಮಿ ವಾತೆ? ಆ ಅದಿಕಾರ್‌ಥಿ ಅಜ್ಜು ಶಕತ್‌ಥಿ ಭೂತಅಖ್ವಾನಬಿ ಹುಕುಮ್ ದೇಸ್‌ನಿ, ಇವ್ಣೇಬಿ ಭಾರ್ ನಿಕ್ಕಿಜಾಸ್‌ನಿ! ಕರಿ ಏಕ್‌ಥಿ ಏಕ್ ವಾತೆ ಬೋಲಿಲಿದು.

37 ಅಜ್ಜು ಯೇಸುನಿ ಬಾರೇಮನಿ ಖಬರ್ ಯೋ ತಬರ್‌ಖಾನು ಖ್ಲಾರಿ ಬಾಜುಮ ಪೈಲಿಗಯು.

ಯೇಸುನೆ ಘಣ ಅದ್ವಿನೊ ರೋಗ್ ಅಲ್ಪು ಕರೈತೆ

(ಮತ್ತಾಯ 8:14-17; ಮಾರ್ಕ 1:29-34)

38 ಯೇಸು ಸಬಾಮಂದಿರ್‌ಥ ನಿಕ್ಕಿನ್ ಸೀಮೋನ್ನ ಘರ್‌ಕನ ಗಯೊ. ಹಿಜ್ಜಾ ಸೀಮೋನನಿ ಖ್ಲಾಖ್ಲಾ ಜಾಖ್ಲತ್ ತಾವ್ ಚಡೀನ್ ತಲ್‌ಮುಕರ್ತಿಥಿ, ಇನಿ ಬಾರೇಮ ಇವ್ಣೆ ಯೇಸುನ ಬೋಲ್ಯು.

39 ತದೆ ಯೇಸುನೆ ಇನಾಕನ ಜೈನ್ ಭೀರಿನ್, ಇನ ಮ್ಹೊಂದಿನ್ ಜಾವಾನಿ ಘೋಣಿ ಯೋ ತಾವ್‌ನ ಹುಕುಮ್ ದೇತಾಖ್ತರ್, ತಾವ್ ಉತ್ರಿಗಯೊ. ತದ್‌ನು ತದ್ದೇಸ್ ಯೋ ಉರೀನ್ ಇವ್ಣಿ ಸೇವಾ-ಚಾಕ್ರಿ ಕರಿ.

40 ದನ್ ಡುಬಾನ ಬಾದ್‌ಮ ಥರಥರಾನು ರೋಗ್‌ವಾಳು ಥೂತೆ ತಮಾಮ್ ಘರ್‌ವಾಳು, ಜಾನ್ವ ಅಲ್ಪುಕೊಂತೆ ಅದ್ವಿನಖ್ಲಾರು ಯೇಸುಕನ ಬುಲೈಲಾಯು. ಹರೇಕ್ ರೋಗ್‌ವಾಳಪರ್ ಯೇಸುನೆ ಹಾತ್ ಮ್ಹೊಲಿನ್ ಇವ್ಣುನ ಅಲ್ಪು ಕರೈತೆ.

41 ಭೂತಖ್ಲಾರು ಜಿನುಕು, “ತೂ ದೇವ್‌ನೊ ಛಿಯ್ಯೊ” ಕರಿ ಬಳೆಳ್ವಾಟ್ ಮ್ಹೊಲ್ತುಹುಯಿನ್, ಕೈಯೆಕ್ಕಿ ಅದ್ವಿನ ಮಹಿತು ನಿಕ್ಕಿಗಯು.

ಯೋ ಕ್ರಿಸ್ತ ಕರಿ ಭೂತ ಖ್ಲಾರಾನ ಮಾಲುಮ್‌ಥೂತೆ ಇನಟೀಕೆ, ಯೇಸುನೆ ಇವ್ಣುನ ವಾತೆ ನಾ ಬೋಲ್‌ನು ಕರಿ ಹುಕುಮ್ ದಿದೊ.

ಸಬೆ ಭರಾವನು ಮಂದಿರಮ ಯೇಸು ವಚನ್
ಬೋಲಿವತಾಳ್ಯೊತೆ

(ಮಾರ್ಕ 1:35-39)

⁴² ವ್ಹಾಣ್‌ಖತ್ತೆ ಯೇಸು ಘರ್‌ನ ಮ್ಹೇಲಿನ್ ಉಜ್ಜಾಡಿ ಝಗೋನ
ಗಯೊ. ಅದ್ವಿಖ್ಹಾರು ಯೇಸುನ ಥೂಂಡ್‌ತುಹುಯಿನ್, ಯೊ ಥೋತೆ
ಝಗೋಕನ ಆಯಿನ್, ಇವ್ಣುನ ಮ್ಹಂದಿನ್ ನಾ ಜಾವ್ಣುತೆ ಇಮ್ ಇನ
ಭೀರಾಖಾನ ದೇಖ್.

⁴³ ಕತೋಬಿ ಯೇಸುನೆ ಇವ್ಣುನ, “ಮೇ ಬಿಜ್‌ಖ್ಹಾರ್ ಗಾಮ್‌ಬಿ ದೇವ್ನಿ
ರಾಜ್ಯನಿ ದೇವ್ನಿ ಅಲ್ಹಿ ಖಬರ್‌ನ ಬೋಲ್‌ನು, ಅನಖ್ಹಾಜೆಸ್ ದೇವ್ನಿ ಮನ
ಮೋಕ್ಲಿರಾಖ್ಯೊಸ್ತೆ” ಕರಿ ಬೋಲ್ಯೊ.

⁴⁴ ಅನ ಬಾದ್‌ಮ ಯೇಸುನೆ ಯೂದಾಯ ದೇಖ್‌ನು ಸಬೆ
ಭರಾವಾನು ಮಂದಿರಮ ಖ್ಹಾರು ಅಲ್ಹಿ ಖಬರ್‌ನ ಬೋಲ್ತೊಹುಯಿನ್
ನಿಕ್‌ಳ್ಯೊ.

5

ಯೇಸುನೆ ಪಹಿಲ ಶಿಷ್ಯರ್‌ನ ಬುಲಾಯೋತೆ

(ಮತ್ತಾಯ 4:18-22; ಮಾರ್ಕ 1:16-20)

¹ ಏಕ್ ದನ್ನೆ ಯೇಸು ಗೆನೆಸರೇತ್ ದರ್ರ್ಯಾವ್‌ನ ಕನಾರಿಕನ
ಭೀಯೋಥೊ. ತದೆ ಅದ್ವಿಖ್ಹಾರು ದೇವ್ನಿ ವಚನ್ ಖ್ಹಮ್‌ಜಾನಖ್ಹಾಜೆ
ಧಕೇಲ-ಧಕೇಲಿ ಹೋತುಹುಯಿನ್, ಇನ ಅಶ್‌ಪಿಶ್ ಆಯಿನ್
ಭರಾಯು.

² ತದೆ ದರ್ರ್ಯಾವ್‌ನಿ ಕನಾರಿಕನ ಭೀರಿಥೀತೆ ಬೇ ಡೋಣ್ಣಾಯೇಸುನೆ
ದೇಖ್ಯೊ ಮಾಳ್ಣು ಖ್ಹಾವಾಳು ಖ್ಹಾರು ಡೋಣ್‌ಮಾಥು ಭಾರ್ ಆಯಿನ್,
ಇವ್ಣು-ಇವ್ಣು ಜಾಳು ಥೊವ್‌ಕರ್ತೊ.

³ ಯೋ ಡೋಣೆಮಾಥು ಸೀಮೋನ್ನಿ ಏಕ್ ಡೋಣ್‌ಮ ಯೇಸು
ಚ್ಛಡೀನ್, ಕನಾರೆಕಂಥು ಜರದೂರ್ ಡೋಣ್ಣಾ ಧಕೇಲ್ ಕರಿ ಇನ
ಬೋಲಿಲಿದೊ. ಬಾದ್‌ಮ ಡೋಣ್‌ಮ ಬೇಶಿನ್, ಯೋ ಅದ್ವಿನಿ
ಭೀಡೊಣ ವಚನ್ನ ಬೋಲಿದಿದೊ.

4 ವಚನ್ ಬೋಲಿದ್ಯವಾನ ಬಾದ್‌ಮ ಯೇಸುನೆ ಸೀಮೋನ್ನ್, “ಗಧಾರ್ ಪಾಣಿನಿ ಝಗೋಮ ಡೋಣ್ಣಾ ಚಲೈನ್, ಮಾಲ್ಲ್ಯ ಧರಾನ ಖ್ವಾಜೆ ತುಮಾರು ಭಾಳು ನಾಖೊ” ಕರಿ ಬೋಲ್ಯೊ.

5 ತದೆ ಸೀಮೋನ್ನ್, “ಗುರು, ಹಮೆ ರಾತ್ ಅಖ್ಲು ಮ್ಹಿನತ್ ಕರ್ಯಾತೋಬಿ, ಏಕ್ ಮಾಲ್ಲ್ಯಬಿ ಕೋಮಳ್ಳುನಿ, ಕತೋಬಿ ತಾರಿ ವಾತ್‌ಪರ್, ಮೇ ಭಾಳು ನಾಖುಸ್” ಕರಿ ಬೋಲ್ಯೊ.

6 ತದೆ ಇವ್ಣೆ ಭಾಳಾವ್‌ನ ನಾಖ್ಲು. ತದೆ ಮಾಲ್ಹೊಲಾನಿ ಗುಡ್ಡಾರಾಶೆ ಭಾಳಾವ್‌ಮ ಖ್ವಪ್‌ಡ್ಲ್ಯ. ಅನೇಥಿ ಇವ್ಣು ಭಾಳು ಫಾಟಾನ ಐಲಾಗ್ಲೊಡ್ಲ.

7 ತದೆ ಇವ್ಣೆ ಬಿಜಿ ಡೋಣ್‌ಮ ಥೂತೆ ಇವ್ಣು ಜೋಡೆವಾಳನ ಹಾತ್‌ನೊ ಝಾಲೊ ಕರೀನ್, ಮದತ್‌ಖ್ವಾಜೆ ಬುಲಾಯು. ಇವ್ಣೆ ಆಯಿನ್ ಭೇ ಡೋಣ್‌ಮ ಮಾಲ್ಲ್ಯ ಭರಾಖ್ತರ್, ಯೋ ಡೋಣೆ ಡುಬಾನಿಘೋಣಿ ಹುವ್ವಾಲಗ್ಲೊಡ್ಲ.

8 ಅನ ದೇಖಿನ್ ಸೀಮೋನ್ ಪೇತ್ರನೆ ಯೇಸುನ ಗುಡ್‌ಘಪರ್ ಪಡೀನ್, “ಪ್ರಭು ಮನ ಮ್ಹಂದಿನ್ ಜಾ! ಮೇ ಪಾಪಿ ಅದ್ಲಿ ಹುಯಿರಲ್ಯೊಸ್!” ಕರಿ ಬೋಲ್ಯೊ.

9 ಸೀಮೋನ್ನಾಬಿ ಇನ ಜೋಡ್ಲ ಥೂತೆ ಬಿಜಿ ಖ್ವಾರಾನಾಬಿ, ಇವ್ಣೆ ಧರ್ಯಾತೆ ಮಾಲ್ಹೊಲಾವ್ನ್ ದೇಖಿನ್ ಆಶ್ಚರ್ಯ ಹುಯು.

10 ಸೀಮೋನ್ನ್ ಜೋಡ್‌ವಾಳ ಹುಯಿರಲ್ಯಾತೆ ಜೆಬೆದಾಯನ ಛಿಯ್ಯಾಕೋಬ ಅಜ್ಜು ಯೋಹಾನನೆಬಿ ಇಮ್ಮುಸ್ ಆಶ್ಚರ್ಯಖಾದು. ತದೆ ಯೇಸುನೆ ಸೀಮೋನ್ನ್, “ಡರ್‌ನಕೊ, ಆಜ್ಞೆ ತೂ ಅದ್ಲಿನ ಖ್ವಾವಾನು ಕಾಮ್ ಕರೀಶ್!” ಕರಿ ಬೋಲ್ಯೊ.

11 ಇವ್ಣೆ ಇವ್ಣು ಡೋಣೇನ ಕನಾರಿಕನ ಲಯಿನ್, ತಮಾಮ್ ರಾಲ್ಹಾನ ಮ್ಹಂದಿನ್, ಯೇಸುನ ಕೇಡೆ ಗಯ.

ಯೇಸುನೆ ಏಕ್ ಅದ್ಲಿನ ಅಲ್ಹು ಕರ್ಯಾತೆ

(ಮತ್ತಾಯ 8:1-4; ಮಾರ್ಕ 1:40-45)

12 ಏಕ್ ದನ್ನೆ ಯೇಸು ಏಕ್ ಗಾಮ್ಲ ಥೊ. ಹಿಜ್ಜಾಸ್ ಆಂಗ್‌ತನ್ ಅಖ್ಲುಸ್ ಖೋಡ್ ಲಾಗಿಹುಯು ಏಕ್ ಅದ್ಲಿ ಥೊ. ಯೋ ಯೇಸುನ

ದೇಖಿನ್, ಇನಖ್ವಾಪ್ಪೆ ಆಡು ಪಡೀನ್, “ಪ್ರಭು, ತೂ ಮನ್ ಕರಯ್ತೊತೊ ಮನ ಶುದ್ಧಿ ಕರೆಜಾಯ್! ಕರಿ ಗಿಂಗೈಲಿದೊ.

13 ಯೇಸುನೆ ಇನೊ ಹಾತ್ವ ಭಡೈನ್, ಇನ ಛೀಮಿನ್, “ಮನ ಮನ್ ಲ್ಲಾ, ಶುದ್ಧಿ ಹೂ” ಕರಿ ಬೋಲ್ಯೊ ತದ್‌ನು ತದ್ವೇಸ್ ಯೋ ಅದ್ಮಿನೊ ಖೋಡ್ ಖ್ವಾರ್ಡು ನಿಕ್ಕಿಗಯ್.

14 ತದೆ ಯೇಸುನೆ ಇನ, “ತೂ ಕಿನಾಬಿ ನಕೊ ಬೋಲಿಶ್, ಕತೋಬಿ ಯಾಜಕಕನ ಜೈನ್ ತಾರು ಆಂಗ್‌ತನ್ನ ವತಾಳ್, ಮೋಶೇನೆ ಹುಕುಮ್ ದೀರಾಖ್ಯೊತೆ ಕಾಣ್ಕೆದೀನ್ ತಾರಿ ಅಶ್ವಾನ್‌ಧಾನ್ನ್ ಚಲಾವ್, ಅದ್ಮಿನ ಆ ಸಾಕ್ಷಿ ಹುಯಿರ್ಲ್ವಾದೆ” ಕರಿ ಹುಕುಮ್ ದಿದೊ.

15 ತೋಬಿ ಯೇಸುನಿ ಬಾರೇಮ ಅಞೂಬಿ ಭಾಖ್ವತ್ ಪೈಲೈಗಯ್, ಅದ್ಮಿಖ್ವಾರು ಇನಿ ವಚನ್ ಖ್ವಮ್‌ಜಾನಖ್ವಾಜೆ ಅಞು ಇವ್ವು-ಇವ್ವುರೋಗ್ ಅಲ್ಪು ಕರೈಲ್ಯವಾನಟೇಕೆ, ಝೂಂಡೆ-ಝೂಂಡೆ ಹುಯಿನ್ ಇನಾಕನ ಆಯ್.

16 ಕತೋಬಿ ಯೇಸುತೊ ಉಜ್ವಾಡಿ ಝೂಗೋಮ ಜೈನ್, ಪ್ರಾರ್ಥನೆ ಕರುಕರ್ತೊಫೊ.

ಯೇಸುನೆ ಲಕ್‌ವೊ ಮಾರಿರಾಖ್ಯುಡೊತೆ ಏಕ್ ಅದ್ಮಿನ ಅಲ್ಪು ಕರಯ್ತೆ

(ಮತ್ತಾಯ 9:1-8; ಮಾರ್ಕ 2:1-12)

17 ಏಕ್ ದನ್ನೆ ಯೇಸು ವಚನ್ ಬೋಲಿ ದೆವ್‌ಕರ್ತೋಫೊ. ಗಲಿಲಾಯ ಅಞು ಯೂದಾಯ ತಬರ್‌ಖಾನು ತಮಾಮ್ ಗಾಮ್‌ಥು ಅಞು ಯೆರೂಸಲೇಮ್‌ಥು ಆಯುಹುಯು ಫರಿಸಾಯರ್‌ಬಿ, ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯೆ ಹಿಞ್ವಾ ಬೆರೂಫು. ರೋಗ್-ರಾಯೊ ಅಲ್ಪು ಕರಾನವಾಖ್ವೆತೆ ಪ್ರಭುನಿ ಶಕತ್ ಯೇಸುಮ ಥೀ.

18 ತದೆ ಥೋಡ ಪರ್ಖ್ವಾವ್‌ನೆ ಏಕ್‌ಜಣೊ ಲಕ್‌ವೊ ಮಾರ್ಲ್ಯಹುಯಾನ ಬಿಲ್ವಾಪ್ಪಿಪರ್ ಪಾಡಿಲಿನ್ ಆಯ್. ಕತೋಬಿ ಇನಮಹಿ ಲೀಜೈನ್, ಯೇಸುನ ಖ್ವಾಪ್ಪೆ ಮ್ಹೇಲ್ವುಕರಿ ಕರಯ್ತೋಬಿ,

19 ಅದ್ದಿನಿ ಭೀಡ್ ಥೀತೆ ಇನಾಖ್ವಾಜೆ, ಇನಮಹಿ ಲೀಜಾವಾನ ವಾಟ್‌ಕೊಂತೆ ದೇಖಿನ್, ಇನ ಪಾಡಿಲಿನ್ ಲ್ಲತ್‌ನ ಉಪ್ಪರ್ ಜೈನ್, ಲ್ಲತ್‌ನ ಕಾಡಿನ್, ಇನ ಬಿಲ್ಲಾವ್ಣಿ ಖ್ವಮೇದ್ ಯೇಸುನ ಖ್ವಾಪ್ಣೆ ಉತಾರ್ಚ್.

20 ಯೇಸುನೆ ಇವ್ಣಿ ವಿಶ್ವಾಸ್‌ನ ದೇಖಿನ್, ಯೋ ಲಕ್‌ವೊ ಮಾರಿರಾಖವಾಳನ, “ದೇಕ್‌ಲಾ ದೋಸ್, ತಾರು ಪಾಪ್‌ಖ್ವಾರ್ ಮಾರ್ಪ್ ಹುಯಿಗಯ್” ಕರಿ ಬೋಲ್ಯೊ.

21 ತದೆ ಮೋಶೇನು ವಚನ್ ಶಿಕಾಡವಾಳು ಶಾಸ್ತ್ರಿಯೆ ಅಜ್ಜು ಫರಿಸಾಯರ್ ಖ್ವಾರ್ ಇವ್ಣ-ಇವ್ಣಾಮಸ್, “ಆ ಅದ್ವಿ ಕೋಣ್ ಉಶೆ, ದೇವ್ ವರೋದ್ ವಾತೆ ಬೋಲಾಸ್ತೆ? ದೇವ್ ಮ್ಹೇಲಿನ್ ಬಿಜ್ಜು ಕಿನೇಥಿ ಪಾಪ್‌ಖ್ವಾರ್ ಮಾರ್ಪ್ ಕರಾನ ಹುವಾನು? ಕರಿ ಸೋಚಾಲ್ಯೊ.

22 ಕತೋಬಿ ಯೇಸುನೆ ಇವ್ಣೆ ಇಮ್ ಸೋಚುಕರಾತೆ ಮಾಲುಮ್ ಕರೀಲಿನ್ ಇವ್ಣನ, “ತುಮೆ ತುಮಾರ ಮನ್‌ಮ ಅಮ್ ಶನ ಸೋಚೋಸ್ತೆ?

23 ಕೆಹು ಶುಲ್ಕ? ತಾರು ಪಾಪ್‌ಖ್ವಾರ್ ಮಾರ್ಪ್ ಹುಯಿಗು ಕರಿ ಬೋಲಾನುಕಿ? ಉರಿ ಚಾಲ್ ಕರಿ ಬೋಲಾನು?

24 ಕತೋಬಿ ಜಮೀನ್‌ಪರ್ ಪಾಪ್‌ಖ್ವಾರ್ ಮಾರ್ಪ್ ಕರಾನ ಅದ್ವಿನೊ ಥಿಯ್ಯಾನ ಅದಿಕಾರ್ ಲ್ಹಾ ಕರಿ ಬೋಲಾನು ತುಮೂನ ಮಾಲುಮ್ ಪಡ್ಚು ಕರಿ ಬೋಲಿನ್ ಯೋ ಲಕ್‌ವೊ ಮಾರಿರಾಖವಾಳ ಭಣಿ ದೇಖಿನ್, ‘ಉಟ್ ತಾರಿ ಬಿಲ್ಲಾವ್ಣಿನ ಪಳ್ಳಿನ್ ಘರೆ ಜ್ಞಾ ಕರಿ ತುನ ಬೋಲುಸ್’ ಕರಿ ಬೋಲ್ಯೊ.

25 ಇಮ್ ಬೋಲ್ವಾಸ್‌ನ ಯೋ ಇವ್ಣ ಖ್ವಾಪ್ಣೆಸ್ ಉರಿನ್, ಯೋ ಖ್ವತೊಥೋತೆ ಬಿಲ್ಲಾವ್ಣಿನ ಪಳ್ಳಿನ್, ದೇವ್ ಖ್ವರಾವ್‌ತೊ ಹುಯಿನ್, ಘರೆ ಗಯೊ.

26 ದೇಖ್ಯಾತೆ ತಮಾಮ್ ಅದ್ವಿನೆ ಘಣು ಆಶ್ಚರ್ಯಖಾದು! ಅಜ್ಜು ಡರ್‌ಥಿ ಭರೈನ್ ದೇವ್ ಖ್ವರಾಯು, ಅಜ್ಜು ಬೋಲ್ಯಾಕಿ, “ಆಜ್ ಹಮೆ ಆಶ್ಚರ್ಯನು ಬಾರೇಮ ದೇಖ್!”

ಯೇಸುನೆ ಲೇವಿನ ಬುಲಾಯೋತೆ
(ಮತ್ತಾಯ 9:9-17; ಮಾರ್ಕ 2:13-17)

27 ಅನ ಬಾದಾಮ, ಯೇಸು ಹಿಜ್ಜಾಥೊ ಬಹರ್ ಜೈನ್, ಶುಂಕ ಮಾಂಗಾನಿ ಝಗೋಪರ್ ಬೆರೊಥೋತೆ ಏಕ್ ಜಣಾನ ದೇಖ್ಚೊ. ಇನು ನಾಮ್ ಲೇವಿ. ಯೇಸುನೆ ಇನ, “ಮಾರ ಪೀಲೆ ಆವ್” ಕರಿ ಬುಲಾಯೊ.

28 ಇನೆ ಉಠೀನ್, ಖ್ವಾರುಸ್ ಮ್ಹಂದಿನ್, ಯೇಸುನ ಪೀಲೆ ಗಯೊ.

29 ಬಾದಾಮ ಲೇವಿನೆ ಇನ ಘರಮ ಯೇಸುನಖ್ವಾಜಿ, ಏಕ್ ಮೋಟಿ ಮಿಝ್ವಾನ್ ಪಿಕಾಯೊ. ಹಿಜ್ಜಾ ಶುಂಕ ವಶೂಲ್ ಕರಾವಾಳು ಅಜ್ಜು ಬಿಜ್ಜು ಅದ್ವಿಖ್ವಾರು ಝೂಂಡ್ ಭರೈನ್ ಇವ್ಣ ಜೋಡೆ ಖಾಣನ ಬೆರೊಥು.

30 ಅನ ದೇಖಿನ್, ಫರಿಸಾಯರ್ ಅಜ್ಜು ಇವ್ಣಿ ಝೂಂಡ್‌ನ ಮಳಿಹುಯು ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿ ಖ್ವಾರು ಯೇಸುನ ಶಿಷ್ಯರ್‌ಪರ್ ಮಶ್ಲಾ ಮಾರ್‌ತುಹುಯಿನ್, “ತುಮೆ ಶುಂಕ ಮಾಂಗವಾಳನ ಅಜ್ಜು ಪಾಪಿ ಖ್ವಾರಾನ ಜೋಡೆ ಶನ ಖಾಣುಖಾಸ್ತೆ?” ಕರಿ ಬೋಲ್ಚು.

31 ಅನ ಖ್ವಮ್‌ಜಿನ್ ಯೇಸುನೆ ಇವ್ಣನ, “ಅಲ್ಪ್ಪರತ್ವಾಳನ ವೈದ್ಯನಿ ಜರೂರತ್ ಕೋ ಪಡಾನಿ, ಕತೋಬಿ ರೋಗ್‌ರಾಯಮ ರತ್ವಾಳನ ವೈದ್ಯಹೋಣು ಪಡಾಸ್” ಕರಿ ಬೋಲ್ಚೊ.

32 ದೇವ್‌ಭಣಿ* ಫರೊ ಕರಿ, ನೀತಿವಾಳ ಅದ್ಮಿಯೇನ ಬುಲಾವನ ಕಾಹೆ, ಪಾಪಿ ಖ್ವಾರಾನ ಬುಲಾವನ ಆಯೋತೆ” ಕರಿ ಜವಾಬ್ ದಿದೊ.

ಉಪವಾಸ್‌ನಿ ಬಾರೇಮ ಪುಲ್ಲಾಯೂತೆ
(ಮತ್ತಾಯ 9:14-17; ಮಾರ್ಕ 2:18-22)

33 ಥೋಡು ಅದ್ಮಿ ಯೇಸುನ, “ಯೋಹಾನನು ಶಿಷ್ಯರ್ ಖ್ವಾರು ಘಡಿಕೇಡೆ ಉಪವಾಸ್ ರಕ್ಲೆಸ್ ಅಜ್ಜು ಬಿಂತಿನಿ ಪ್ರಾರ್ಥನೆ ಕರ್ತು ರಕ್ಲೆಸ್, ಇಮ್ಮಸ್ ಫರಿಸಾಯರ್‌ನು ಶಿಷ್ಯರ್‌ಬಿ ಉಪವಾಸ್ ಕರಾಸ್, ಕತೋಬಿ ತಾರು ಶಿಷ್ಯರ್ ಕದೇಬಿ ಖಾವಣ್‌ಪಿವಾಣ್ ಕರ್ತು ರಕ್ಲೆಸ್‌ನಿ” ಕರಿ ಬೋಲ್ಚು.

* 5:32 5:32 ಪಾಪ್‌ಖ್ವಾರು ಮ್ಹೇಲಿನ್ ದೇವ್‌ಭಣಿ ಫರೊ ಕರಿ ಮತ್‌ಲಬ್,

34 ತದೆ ಯೇಸುನೆ ಇವ್ವುನ, “ವೃಹಾನ ಛತ್ಮ ಅದ್ವಿನ ಜೋಡೆ ನೌಶೊ ರ್ವವಾನಿ ವಖ್ವತ್ಮ ಇವ್ವುನ ಉಪವಾಸ್ ಕರಾವಾನ ತುಮಾರೇಥಿ ಉಶೇಕಿ ಶು? ಕೊಯ್ವಿ!

35 ಕತೋಬಿ ನೌಶೊನ ಇವ್ವಾಕಂಥು ದೂರ್ ಲೀಜಾವಾನ ದನ್ ಆವ್‌ಶೆ, ತದೆ ಇವ್ವೆ ಉಪವಾಸ್ ಕರ್ಶೆ” ಕರಿ ಜುವಾಬ್‌ದಿದೊ.

36 ಯೇಸುನೆ ಇವ್ವುನ ಏಕ್ ಮತ್ಲಬ್‌ನಿ ಖೇಣಿನ ಬೋಲೊ: ಯೋ ಶಾತ್‌ಕತೊ, ಕೋಣ್‌ಬಿ ನವು ಲುಂಗ್ಡಾನು ಏಕ್ ಥಿಗ್‌ಳಾನ ಫಾಡಿನ್, ಫಾಟಿಹುಯು ಜೂನ ಲುಂಗ್ಡಾಕೇಡೆ ಲಗಾಡಿನ್ ಶಿವಾಕೊಯ್ವಿ. ಇಮ್ ಶಿವ್ಯತೊ, ಯೋ ನವು ಲುಂಗ್ಡಾನ ಫಾಡಿನ್ ಖರಾಬ್ ಕರಾದಾಖ್ಲಲ್, ಎತ್ರೇಸ್ ಕಾಹೆತೆ ನವ ಲುಂಗ್ಡಾನು ಥಿಗ್‌ಳು, ಯೋ ಜೂನ ಲುಂಗ್ಡಾಪರ್ ಖಾಜ್‌ಕೊಯ್ವಿ.

37 ಕೋಣ್‌ಬಿ ಜೂನಿ ಚಾಂಬ್ಡಾನಿ ತಿತ್ತಿಯೇಮ ನವು ದ್ರಾಕ್ಷಿನು ರಖ್ವನ್ ಭರಿನ್ ಮ್ಹೇಲಾಕೊಯ್ವಿ. ಶನಕತೊ ಯೋ ನವು ದ್ರಾಕ್ಷಿನು ರಖ್ವ್ ಜೂನು ಚಾಂಬ್ಡಾನಿ ತಿತ್ತಿಯೇನ ಪೋಡಿನ್ ಭಾರ್ ರಂಚ್ಚೆಜಾವಾನು ಕಾಹೆತೆ, ತಿತ್ತಿಯೇಬಿ ಖರಾಬ್ ಹುಯಿಜಾಸ್.

38 ಇನಖ್ವಾಜೇಸ್ ನವು ದ್ರಾಕ್ಷಿನು ರಖ್ವನ್ ನವಿ ಚಾಂಬ್ಡಾನಿ ತಿತ್ತಿಯೇಮ ಭರಿ ಮ್ಹೇಲಾಸ್!

39 ಜೂನು ದ್ರಾಕ್ಷಿನು ರಖ್ವ್‌ಪೀದುಹುಯು ಅದ್ಮಿ ನವು ದ್ರಾಕ್ಷಿನು ರಖ್ವ್ ಹೋಣು ಕರಿ ಬೋಲಾಕೊಯ್ವಿ. ಯೋ ಜೂನು ದ್ರಾಕ್ಷಿನು ರಖ್ವ್‌ನಾಸ್ ಅಲ್ಫುಕರಿ ಬೋಲಾಸ್.

6

ಸಬ್ಬತ್ ದನ್ನಿ ಬಾರೇಮ ಪುಲ್ಲಾಯೊತೆ

(ಮತ್ತಾಯ 12:1-8; ಮಾರ್ಕ 2:23-28)

1 ಸಬ್ಬತ್ ದನ್ಮಯೇಸು ಅನಾಜ್ ಪಿಕಿಹುಯು ಖೇತರ್‌ಮಾಕರಿ ಚಾಲಿ ಬಳಿಜಾತೊಥೊ. ತದೆ ಇನ ಶಿಷ್ಯರ್‌ನೆ ಬುಟ್ಟಾ ತೋಡಿನ್, ಹಾತ್‌ಮ ಮಖ್ವೊಳಿನ್ ಖಾವಾಲಗ್ಯಾಥ.

2 ಅನ ದೇಖಿನ್ ಫರಿಸಾಯರ್‌ವಾಳು ಥೋಡು ಜಣು, “ಧರ್ಮಶಾಸ್ತ್ರ* ಸಬ್ಬತ್ ದನ್ತ ಕರ್ನುನಾತೆ ಕಾಮ್ನ ತುಮೆ ಶನ ಕರೋಸ್ತೆ?” ಕರಿ ಪುಲಾವಖ್ತರ್,

3 ಯೇಸುನೆ ಇವ್ಣುನ, “ದಾವೀದ್‌ನಾಬಿ† ಇನ ಜೋಡ್ಕ ರ್ವಾವಾಳನ ಭುಕ್ ಲಾಗಾನಿ ವಖ್ತಮ, ದಾವೀದ್‌ನೆ ಶಾತ್ ಕರ್ರೊ ಕರಿ ತುಮೆ ಪಡ್ಯಾಕೊಯ್ತಿಕಿಶು?

4 ಇನೆ ದೇವ್ನ ಘರಮ ಜೈನ್, ಅಪ್ಪಿ ಖಾನುಲ್‌ಮ ಯಾಜಕವ್ ಮ್ಹಂದಿನ್ ಕೋಣಾಬಿ ನಾ ಖಾಣುತೆ, ದೇವ್ನ ಖ್ವಾಮ್ ಮ್ಹೇಲಾತೆ ರೋಟಾನ ಪಾಡಿಖೈನ್, ಇನ ಜೋಡ್ಕ ರ್ವಾವಾಳನಾಬಿ ದಿದೋನಿ” ಕರಿ ಜವಾಬ್ ದಿದೊ.

5 ಅಜು ಯೇಸುನೆ, “ಅದ್ಮಿನೊ ಛಿಯೊ ಸಬ್ಬತ್‡ ದನ್ ಪ್ರಭು ಹುಯಿರ್ರೊಸ್” ಕರಿ ಬೋಲ್ಯೊ.

ಯೇಸುನೆ ಹಾತ್ ಝೂಟೊ ಪಡ್ಯಹುಯು ಏಕ್ ಅದ್ಮಿನ ಅಟ್ಟು ಕರ್ರೊತೆ

(ಮತ್ತಾಯ 12:9-14; ಮಾರ್ಕ 3:1-6)

6 ಬಿಜೇಕ್ ಸಬ್ಬತ್ ದನ್ ಯೇಸು ಸಬೆ ಭರಾವಾನು ಮಂದಿರಮ ಜೈನ್, ವಚನ್ ಬೋಲಿ ದೆವ್‌ಕರ್ತೊಥೊ. ಖಾವೊ ಹಾತ್ ಝೂಟೊ ಪಡ್ಯಹುಯೊ ಏಕ್ ಇಣೊ ಹಿಜ್ಜಾಥೊ.

7 ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯೆ ಅಜು ಫರಿಸಾಯರ್‌ವಾಳು ಯೇಸುಪರ್ ಗಲ್ಲಿ ಲಗಾಡನಖ್ವಾಜೆ ಶಾತ್‌ತೋಬಿ ಮಳಾದೆ ಕರಿ, ಯೇಸು ಸಬ್ಬತ್ ದನ್ತ ಅಟ್ಟು ಕರಾಸ್ಕಿ ಶುಕಿ ಕರಿ ಇಪೀನ್ ದೇಖುಕರ್ತುಧು.

8 ಕತೋಬಿ ಯೇಸುನೆ ಇವ್ಣಿ ಸೋಚ್ಚ ಮಾಲುಮ್ ಕರಿಲೀನ್, ಹಾತ್ ಝೂಟೊ ಪಡ್ಯಹುಯೊ ಯೋ ಅದ್ಮಿನ, “ಉರೀನ್, ಇಚ್‌ಮ ಐನ್ ಭೀರೆ” ಕರಿ ಬೋಲ್ಯೊ ಯೋ ಅದ್ಮಿಉರೀನ್ ಹಿಜ್ಜಾಭೀರಿಗಯು.

* 6:2 6:2 ಧರ್ಮಪದೇಶಕಾಂಡ 23.25 † 6:3 6:3 1ನು ಸಮುವೇಲ್ 21.1-6

‡ 6:5 6:5 ಕತೊ-ಅರಾಮ್‌ನೊ ದನ್

9 ತದೆ ಯೇಸುನೆ ಇವ್ವುನ, “ತುಮುನ ಏಕ್ ವಾತ್ ಪುಲ್ಲಾವಾಸ್: ಸಬ್ಬತ್ ದನ್ಮಖಿವು ಕರ್ನುಕರಿ ಅಪ್ಪಿ ಖಾನುಲ್ಮ ಛಾ? ಅಟ್ಟುಕರಾನುಕಿ ಖರಾಬ್ಕರಾನು? ಜಾನ್ ಬಫಾಡಾನುಕಿ, ಜಾನ್ ಕಾಡಾನು?

10 ಅಜ್ಜು ಯೇಸುನೆ ಅಶ್‌ಪಿಶ್ ಧೂತೆ ಖ್ವಾರಾವ್‌ನ ದೇಖಿನ್ ಯೋ ಅದ್ವಿನ, “ತಾರೊ ಹಾತ್ ಖ್ವಾಮ್ಪೆ ಕರ್” ಕರಿ ಬೋಲ್ಯೊ ಇನೆ ಇಮ್ಮಸ್ ಕರಲ್ಯೊ ತದೆ ಇನೊ ಹಾತ್ ಅಟ್ಟುಹುಯಿಗಯು.

11 ಕತೋಬಿ ಪರಿಸಾಯರಾಬಿ ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯೆ ಖೀಜ್ ಖೈನ್, “ಆ ಯೇಸುನ ಅಪ್ಪೆ ಶಾತ್ ಕರಿಯೆ?” ಕರಿ ಇವ್ವ-ಇವ್ವಾಮ ವಾತೆ ಬೋಲಾಲಗ್ಲು.

ಯೇಸುನೆ ಭಾರಜಣ ಅಪೊಸ್ತಲರ್ನ್ ಚೂಣ್ಯೊತೆ
(ಮತ್ತಾಯ 10:1-4; ಮಾರ್ಕ 3:13-19)

12 ಬಾದ್‌ಮ ಏಕ್ ದನ್ನೆ ಯೇಸು ಪ್ರಾರ್ಥನೆ ಕರಾನಖ್ವಾಜೆ ಪಹಡ್‌ಪರ್ ಜೈನ್, ಹಿಡಿ ರಾತ್ ಯೋ ದೇವ್ ಪ್ರಾರ್ಥನೆ ಕರಾಮಸ್ ಕಾಡ್ಲೊ.

13 ವ್ಹಾಣು ಹುವಾನ ಬಾದ್‌ಮ, ಇನ ಶಿಷ್ಯರ್‌ನ ಖನ್ನೆ ಬುಲೈನ್, ಇವ್ವಾಮ ಭಾರ ಜಣಾನ ಚೂಣಿನ್ ಇವ್ವುನ ಅಪೊಸ್ತಲರ್'ನಿ ಕರಿ ನಾಮ್ ಮ್ಹೇಲ್ಯೊ.

14 ಇವ್ವೆ ಕೋಣ್-ಕೋಣ್‌ಕತೊ, ಯೇಸುನೆ ಪೇತ್ರ ಕರಿ ನಾಮ್ ಮ್ಹೇಲ್ಯೊತೆ ಸೀಮೋನ, ಇನೊ ನ್ಹಾನೊ ಭೈ ಅಂದ್ರೆಯ, ಯಾಕೋಬ ಅಜ್ಜು ಯೋಹಾನ, ಫಿಲಿಪ್ಪ ಬಾರ್ತೊಲೊಮಾಯ,

15 ಮತ್ತಾಯ, ತೋಮ, ಅಲ್ಫಾಯನೊ ಥಿಯೊ ಯಾಕೋಬ, ಅಜ್ಜು ಸೀಮೋನ (ದೇಖ್‌ನ್‌ವ್ಯಾರ್ ಕರಾವಾಳೊ ಕರಿ ಬೋಲ್ಯೆಲಿದೋತೆ),

16 ಯಾಕೋಬನೊ ಥಿಯೊ ಯೂದ, ಯೇಸುನ ಧೋಕೇಥಿ ಧರಿದ್ರಾವಾಳೊ ಇಸ್ಕರಿಯೋತ ಯೂದ ಅವ್ವೇಸ್.

§ 6:13 6:13 ಅಪೊಸ್ತಲರ್ ಕತೊ ಹಕ್ ದೀನ್ ಬೋಲಿ ಮೋಕ್ಲಿಹುಯು ಅದ್ವಿ

ಯೇಸುನೆ ವಚನ್ ಬೋಲಿದಿದೋತೆ ಅಜ್ಜು ಅಲ್ಫು ಕರ್ರೊತೆ
(ಮತ್ತಾಯ 4:23-25)

17 ಆನ ಬಾದಾಮ ಯೇಸುನೆ ಇನ ಅಪೊಸ್ತಲರ್ನ್ ಜೋಡೆ ಪಹಾಡ್ ಉತ್ರಿ ಹೇಟ್ ಆಯಿನ್, ಇನ ಬಿಞಾಖಾರ್ ಶಿಷ್ಯರಾನಿ ಮೋಟಿ ಝೂಂಡ್‌ನ ಜೋಡೆ ಶದ್ದರ್ ಜಮೀನ್‌ಪರ್ ಭೀರಿಗಯೊ. ಯೂದಾಯ ತಬರ್‌ಖಾಥು, ಯೆರೂಸಲೇಮ್ ಖ್ವಯೇರ್‌ಭಣಿಥುಬಿ, ದರ್ರಾವ್‌ನ ಖನ್ನೆ ಛಾತೆ ತೂರ್ ಅಜ್ಜು ಸೀದೋನ್ ಖ್ವಯೇರ್‌ಥು ಆಯುಹುಯು ಅದ್ಮಿನಿ ಮೋಟಿ ಭೀಡ್ ಹಿಜ್ಜಾ ಥೂ.

18 ಯೇಸು ಬೋಲಾತೆ ವಚನ್ನ ಖ್ವಮ್‌ಜಾನ, ಅಜ್ಜು ರೋಗ್-ರಾಯೊ ಅಲ್ಫು ಕರೈಲ್ಯವಾನಟೇಕೆ ಯೋ ಅದ್ಮಿಖಾರು ಐರ್ಲ್ಲ್ಯು. ಭೂತ್ ಧರಿರಾಖ್ಯುಹುಯು ಅದ್ಮಿಖಾರುಬಿ ಆಯು, ಇವ್ವಾಮಬಿ ಅಲ್ಫುಹುಯು.

19 ಅದ್ಮಿಖಾರು ಯೇಸುನ ಛೀಮ್‌ಣು ಕರಿ ಕರ್ರ್ಯ, ಶನಕತೊ ಇನಾಮಾಥಿ ಶಕತ್ ನಿಕ್ಕಿನ್ ಖ್ವಾರಾವ್‌ನ ಅಲ್ಫು ಕರುಕರ್ತುಥು.

ಖ್ವುಶಿ ಅಜ್ಜು ದುಖ್
(ಮತ್ತಾಯ 5:1-12)

20 ಯೇಸುನೆ ಇನ ಶಿಷ್ಯರ್ ಭಣಿ ದೇಖಿನ್ ಬೋಲ್ಯೊಕಿ,
“ಗರಿಬ್ ಹುಯಿರ್ಲ್ಲ್ವಾಳ ತುಮೆ ಖ್ವುಶಾಲಿವಾಳು ಹುಯಿರ್ಲ್ಲ್ವಾಸ್,
ದೇವ್‌ನು ರಾಜ್ಯ ತುಮಾರುಸ್!

21 ಭುಕ್ಯ ಛಾತೆ ತುಮೆ ಧನ್ಯ ಹುಯಿರ್ಲ್ಲ್ವಾಸ್;
ತುಮಾರು ಪೇಟ್ ಭರಾವ್‌ಶೆ!
ಹಮ್ಮೆ ರೊವವಾಳ ತುಮೆ ಧನ್ಯ ಹುಯಿರ್ಲ್ಲ್ವಾಸ್;
ತುಮೆ ಹಾಖ್‌ಶು!

22 ಅದ್ಮಿನ ಛಿಯ್ಯಾನ ಖ್ವಾಜೇಥಿ ಅದ್ಮಿಖಾರು ತುಮೂನ ಖ್ವರಮ್ ಕಾಡಿನ್, ದಾವೊ ಕರೀನ್, ಭಾರ್ ಕಾಡಿನಾಖಿನ್, ತುಮಾರು ನಾಮ್ ಬೋಲಾನುಬಿ ಖರಾಬ್‌ಕರಿ ಝಿಟ್ಟಾರ್‌ಲ್ಯತೊ, ತುಮೆ ಧನ್ಯ ಹುಯಿರ್ಲ್ಲ್ವಾಸ್.

23 ಅಮ್ ಖ್ವಾರು ಹುಯೂತೊ ಖ್ವಶಿಥಿ ಖೀಲ್‌ಕೂದ್ ಕರೊ, ಶನಕತೊ ಸೊರ್ಗಾಮ ತುಮೂನ ಘಣು ಇನಾಮ್ ಮಳ್‌ಶೆ. ಆ ಅದ್ವಿನು ಗುರುಗುರಬ್‌ಲ್ಯಬಿ ಪ್ರವಾದಿನ ಖ್ವಾರು ಅಮ್‌ಸ್ ಕರನ್ಯನಿ.

24 ಕತೋಬಿ ಹಮ್ಕೆ ಶೌಕಾರ್ ರ್ವಾವಾಳ ತುಮಾರಿ ಹಾಲ್ವ ಶಾತ್ ಬೋಲು!

ತುಮೆ ಅರಾಮ್‌ನಿ* ಜಿಂಧಾಗಿ ಚಲೈಲಿದ!

25 ಹಮ್ಕೆ ಪೇಟ್ ಭರೈರ್ದೆ ತುಮಾರಿ ಹಾಲ್ವ ಶಾತ್ ಬೋಲು!

ತುಮೆ ಭುಕ್ಕು ರ್ವಶು!

ಹಮ್ಕೆ ಹಾಖ್ವಾವಾಳ ತುಮಾರಿ ಹಾಲ್ವ ಶಾತ್ ಬೋಲು;

ತುಮೆ ಕುರ್‌ಲ್ಯಾವ್‌ಶು ಅಜ್ಜು ರೊವ್‌ಶು!

26 ಅದ್ವಿಖ್ವಾರು ತುಮೂನ ಖ್ವರಾಯೂತೊ, ತುಮಾರಿ ಹಾಲ್ವ ಶಾತ್ ಬೋಲು! ಇವ್ವ ಗುರುಗುರಬ್‌ಲ್ಯನೇಬಿ ಝೂಟಪ್ರವಾದಿ ಖ್ವಾರಾನ ಇಮ್‌ಸ್ ಖ್ವರಾಯು.

ದುಶ್‌ಮನ್ನ ಪ್ಯಾರ್ ಕರನ್ಯ

(ಮತ್ತಾಯ 5:38-48; 7:12)

27 “ಕತೋಬಿ ಮಾರಿ ವಾತೇನ ಖ್ವಮ್‌ಜಾವಾಳಾನ ಮೇ ಶಾತ್ ಬೋಲುಸ್‌ಕತೊ, ತುಮಾರ ದುಶ್‌ಮನ್ನ ಪ್ಯಾರ್ ಕರೊ, ತುಮಾರಪರ್ ದಾವೊ ಕರಾವಾಳಾನ ಅಲ್ವುಕರೊ.

28 ತುಮಾರಪರ್ ಶಾಪ್ಪ-ಶಬರ್ ದ್ಯವಾಳಾನ ಆಶೀರ್ವಾದ್ ಕರೊ, ತುಮಾರಪರ್ ಶಬರ್† ದ್ಯವಾಳನಖ್ವಾಜೆ ಪ್ರಾರ್ಥನೆ ಕರೊ.

29 ಕೋಣ್‌ತೋಬಿ ಏಕ್‌ಜಣು ತಾರ ಕಲ್ಲಪರ್ ಮಾರನ್ಯತೊ, ಇನ ಬಿಜೇಕ್ ಕಲ್ಲ ವತಾಳೊ. ತಾರು ಉಪ್ಪರ್‌ಲ್ಯು ಝುಗ್ಗಾನ ಖೇಚಿ ಲ್ಯಾವಳಾನ ಮಹಿನು ಕುಡ್‌ತಾನಾಬಿ ದಿನಾಕ್.

30 ತಾರಕನ ಕೋಣ್‌ತೋಬಿ ಶಾತ್ತೋಬಿ ಮಾಂಗ್ಯತೊ, ಇನ ದೇ, ತಾರು ಶೊತ್ ಛಿನ್ನೈಲ್ಯವಾಳಾನ, ಪಾಟ್ಲು ದೇ ಕರಿ ನಕೊ ಬೋಲ್.

* 6:24 6:24 ಅಕ್ಲಾಶ್‌ನಿ ಜಿಂಧಾಗಿ ಕರಿ ಮತ್‌ಲಬ್. † 6:28 6:28 ತುಮಾರಪರ್ ನೀಕೊಯ್ತೇಸ್ ಅಜ್ಜು ಖರಾಬ್-ಖರಾಬ್ ಗಾಳೆ ದೆವಾಳನ ಖ್ವಾಜೆ ಕರಿ ಮತ್‌ಲಬ್.

31 ಅದ್ವಿಖ್ಹಾರು ತುಮೂನ ಶಶ್ಯಾತ್ ಕರನ್ಹಕರಿ ತುಮೆ ಆಖ್ಹೊ ಕರೋಸ್ಕಿ, ಯೋಸ್ ತುಮೆ ಇವ್ವುನ ಕರೊ.

32 ತುಮೂನ ಪ್ಯಾರ್ ಕರಾವಾಳನಾಸ್ ತುಮೆ ಪ್ಯಾರ್ ವತಾಳ್ವಾತೊ, ತುಮೂನ ಶಾತ್ ಖ್ಹಿರಾವ್ಣಿ ಮಳ್ಳಶೆ? ಪಾಪಿ ಅದ್ವಿ ಖ್ಹಾರುಬಿ ಇವ್ವುನ ಕೋಣ್ ಲಾಡ್ಪ್ರೀತ್ ಒತಾಳಸ್ಕಿ ಇವ್ವುನಾಸ್ ಲಾಡ್ಪ್ರೀತ್ ಕರಾಸ್ಕಿ.

33 ತುಮೂನ ಅಟ್ಟುಕರಾವಾಳನಾಸ್ ತುಮೆ ಅಟ್ಟುಕರನ್ಹತೊ, ತುಮೂನ ಶಾತ್ ಖ್ಹಿರಾವ್ಣಿ ಮಳ್ಳಶೆ? ಪಾಪಿ ಅದ್ವಿ ಖ್ಹಾರುಬಿ ಇಮ್ಮುನ್ ಕರಾಸ್ಕಿ.

34 ತುಮೂನ ಕೋಣ್ ಉಧಾರ್ ಫೇಡಸ್ಕಿ, ಇವ್ವುನಾಸ್ ಉಧಾರ್ ದಿದಾತೊ, ತುಮೂನ ಶಾತ್ ಖ್ಹಿರಾವ್ಣಿ ಮಳ್ಳಶೆ? ಪಾಪಿ ಅದ್ವಿ ಖ್ಹಾರುಬಿ ಇವ್ವೆದಿದೂತೆ ಎತ್ತು ಇವ್ವುನ ಪಾಳ್ವು ಮಳ್ಳಶೆ ಕರಿ ಪಾಪಿ ಅದ್ವಿ ಖ್ಹಾರಾನ ಉಧಾರ್ ದೇಸ್‌ನಿ.

35 ಇನಖ್ಹಾಜೆ, ತುಮಾರ ದುಶ್‌ಮನ್ನ ಲಾಡ್ಪ್ರೀತ್ ಕರೊ ಅಜ್ಜು ಇವ್ವುನ ಅಟ್ಟುಕರೊ. ತುಮೆ ಇವ್ವುನ ಉಧಾರ್ ದ್ಯವಾನಿ ವಖ್ವತ್‌ಮ, ಫಾಳ್ವು ಇವ್ವೇಥಿ ಮಳ್ಳಶೆ ಕರಿ ಬೋಲಾನಿ ಆಖ್ಹೊ ಮ್ಹಂದಿನ್, ಉಧಾರ್ ದೆವೊ. ತದೆ ತುಮುನ ಘಣು ಇನಾಮ್ ಮಳ್ಳಶೆ ಅಜ್ಜು ತುಮೆ ಪರಮಂಡಲ್‌ನೊ ದೇವ್ನ ಲಡ್ಕಾಲುಶು. ಯೋತೊ ಕರ್ಮಿಷ್ಟಿನಾಬಿ, ಖರಾಬ್‌ನಾಬಿ ಅಟ್ಟೊ ಹುಯಿರನ್ಹೊಸ್.

36 ಪರ್‌ಲೋಕ್‌ನೊ ತುಮಾರೊ ಬಾ ಗೋರ್‌ಕರಾವಾಳೊ ಹುಯಿರನ್ಹೊತೆ ಇಮ್ಮುನ್, ತುಮೇಬಿ ಗೋರ್ ಕರಾವಾಳೊ ಹುಯಿರನ್ಹೊತೆ.

**ಬಿಜ್ಞಾನ ತೀರ್ಪ್ ನಕೊ ಕರೊ
(ಮತ್ತಾಯ 7:1-5)**

37 “ಕಿನಿ ಬಾರೇಮಾಬಿ ತೀರ್ಪ್ ನಕೊ ಕರೊ, ತದೆ ದೇವ್‌ಬಿ ತುಮೂನ ತೀರ್ಪ್ ಕರ್ತೆ ಕೊಯ್ತಿ; ಕಿನಾಪರ್‌ಬಿ ಗಲತ್ ನಕೊ ಲಗಾಡೊ, ತದೆ ದೇವ್‌ಬಿ ತುಮಾರಪರ್ ಗಲತ್ ಕೋ ಲಗಾಡ್‌ಶೇನಿ. ಬಿಜ್ಞಾನ ಮಾಪ್ ಕರೊ, ತದೆ ದೇವ್‌ಬಿ ತುಮುನ ಮಾಪ್ ಕರ್ತೆ.

38 ಬಿಜ್ಜಾನ ದೆವೊ, ತದೆ ದೇವ್‌ಬಿ ತುಮೂನ ದಿಶೆ. ದಾಬಿ ಹಲೈನ್, ಭಾರ್ ರಂಭಾವಖರ್ಡ್‌ಕು ಮಾಪಿನ್, ತುಮಾರಿ ರೋಳಿಮ ನಾಕ್‌ಶೆ, ತುಮೆ ಬಿಜ್ಜಾನ ಕಿಮ್ ಮಾಪಿನ್ ದೇಸ್ತಿ, ಇಮ್ಮತ್ ದೇವ್‌ಬಿ ತುಮೂನ ಮಾಪ್‌ಶೆ.

39 ಅಜ್ಜು ಯೇಸುನೆ ಇವ್ವುನ ಏಕ್ ಮತ್ಲಬ್‌ನಿ ಖೇಣಿನ ಬೋಲ್ಯೊ: ಯೋ ಶಾತ್‌ಕತೊ, “ಕಾಣೊ ಕಾಣಾನ ವಾಟ್ ವತಾಳನ ಕೋ ಹುವಾನಿ; ಇಮ್ ಕರ್ರೊತೊ, ಭೇ ಭಣ ಖಾಡ್‌ಮ ಪಡಿಜಾಶೆ.

40 ಶಿಷ್ಯ ಇನ ಗುರುಧಿ ಮೋಟೊ ಕಾಹೆ, ಕತೋಬಿ ಶಿಷ್ಯ ತಮಾಮ್ ಶಿಕಾನ ಬಾದ್‌ಮ, ಇನ ಗುರುನಿಮತ್ ಹುಯಿಜಾಸ್.

41 ತಾರ ಡೋಳಾಮ ಛಾತೆ ಪೇದಡ್‌ನಿ ಬಾರೇಮ ಸೋಚ್ಚೊಕೊಂತೆ, ತಾರ ಭೈನ ಡೋಳಾಮ ಛಾತೆ ಕಾಕ್ರಿನಿ ಬಾರೇಮ ಶನ ಸೋಚಸ್ತೆ?

42 ತಾರ ಡೋಳಾಮ ಛಾತೆ ಪೇದಡಸ್ ತುನ ದೆಖಾವ ಕೊಯ್ನಿನಿ. ಅಮ್ ರ್ವಾವಪರ್, ತೂ ತಾರ ಭೈನ, ‘ಭೈ ತಾರ ಡೋಳಾಮ ಛಾತೆ ಕಾಕ್ರಿನ ಕಾಡುಸ್ ಆವ್’ ಕರಿ ಕಿಮ್ ಬೋಲಾಸ್? ಅಲ ರಗಾರು ಪಹಿಲೆ ತಾರ ಡೋಳಾಮಾನು ಪೇದಡ್‌ನ ಕಾಡ್, ಬಾದ್‌ಮ ತಾರ ಭೈನ ಡೋಳಾಮಾನು ಕಾಕ್ರಿನ ಕಾಡಾನ ತುನ ಅಲ್ಟಿನಿತರ ದೆಖಾವ್‌ಶೆ.

ಏಕ್ ಝಾಡು ಅಜ್ಜು ಇನು ಪಂಡು
(ಮತ್ತಾಯ 7:16-20; 12:33-35)

43 ಅಲ್ಟು ಝಾಡು ಖರಾಬ್ ಪಂಡು ದೇಯಿಕೊಯ್ನಿ, ಇಮ್ಮತ್ ಖರಾಬ್ ಝಾಡು ಅಲ್ಟು ಪಂಡು ದೇಯಿಕೊಯ್ನಿ.

44 ಹರೇಕ್ ಝಾಡು ಕಿಮ್ಮು ಕರಿ ಬೋಲಾನು ಯೋ ಮ್ಹೇಲಾತೆ ಪಂಡಾಥೀಸ್ ಮಾಲುಮ್ ಪಡಾಸ್. ತುಮೆ ಕಾಟಾನಿಡಾಗ್‌ಮ ಅಂಜೀರ್‌ನು ಪಂಡು ತೋಡಾಕೊಯ್ನಿ ನತರ್‌ಕಿ ಕಾಟಾನಿ ಡಾಗೇಮ ದ್ರಾಕ್ಷಿನು ಪಂಡಾವ್‌ನ ಎಕ್ಚು ಕರಾಕೊಯ್ನಿ.

45 ಅಲ್ಟು ಅದ್ವಿ ಇನ ಮನ್‌ಮ ಜಮಕರಿರಾಖ್ತೊತೆ ಅಲ್ಟಿ ಕಣ್ಣಿಮಾಥು ಅಲ್ಟಾನ ಭಾರ್ ಕಾಡಸ್; ಕತೋಬಿ ಖರಾಬ್ ಅದ್ವಿ ಇನ ಮನ್‌ಮ

ಜಮಕರಿರಾಖ್ಯಂತೆ ಖರಾಬ್ ಕಣ್ಣಿಮಾಡು ಖರಾಬ್‌ನ ಭಾರ್ ಕಾಡಸ್. ಮನ್‌ಮ ಶಾತ್ ಛಾಕಿ ಯೋಸ್ ಮ್ಹೋಡವಾಟೆ ನಿಕ್ಕಸ್.

ಘರ್ ಭಾಂದಾವಾಳು ಬೇ ಅದ್ವಿನಿ ಬಾರೇಮ
(ಮತ್ತಾಯ 7:24-27)

46 “ತುಮೆ ಮನ, ‘ಪ್ರಭು, ಪ್ರಭು’ ಕರಿ ಚಿಕ್ರಿನ್‌ಬಿ, ಮೇ ಬೋಲುಸ್ತೆ ಇಮ್ ಶನ ಕೋ ಕರಾಂತೆ?

47 ಕೋಣ್ ಮಾರಕನ ಆಯಿನ್, ಮಾರಿ ವಾತೇನ ಖ್ವಮ್‌ಜಿನ್, ಅನೀನಿಫೋಣಿ ಚಾಲವಾಳು, ಯೋ ಕಿಮ್ನೊ ಹುಯಿರ್ದೆಶೆ ಕರಿ ತುಮೂನ ವತಾಳುಸ್.

48 ಯೋ ಅಲ್ಫಿನಿತರ್ ಖೋಂದೈನ್, ಬಂಡಾಪರ್ ಹದಿ ನಖೈನ್, ಘರ್ ಭಾಂದಾಸ್ತೆ ಅದ್ವಿನಿಫೋಣಿ ಹುಯಿರ್ದೆಸ್. ನದ್ದಿ ಭರೈನ್, ತೋಫಾನ್ ಯೋ ಘರ್‌ನ ಮಾರ್‌ಪಡ್ಕುತೋಬಿ, ಯೋ ಘರ್‌ನ ಹಲಾವಾನ ಇನ ಕೋಹುಯುನಿ. ಶನಕತೊ ಇನ ಬಂಡಾಪರ್ ಭಾಂದಿರಾಖ್ಯು.

49 ಕತೋಬಿ ಮಾರಿ ವಾತೇನ ಖ್ವಮ್‌ಜಿನ್‌ಬಿ, ಇನೀನಿಫೋಣಿ ಚಾಲಕೊಂತೆ ಅದ್ವಿಹದಿಕೊಂತೆ ಭಮೀನ್‌ಪರ್ ಘರ್ ಭಾಂದಾವಾಳಾನಿ ಫೋಣಿ ಹುಯಿರ್ದೆಸ್. ತೋಫಾನ್ ಆಯಿನ್, ಯೋ ಘರ್‌ನ ಮಾರ್‌ಪಡ್‌ತಾನ, ಯೋ ಘರ್ ರಡ್ಕಿನ್, ಪೂರ ಬರ್ಬಾತ್ ಹುಯಿಗಯು.

7

ಯೇಸುನೆ ಖ್ವೊ ಶಿಪಾಯಿನೊ ಮೋಟಾನೊ ಏಕ್ ಆಳ್‌ನ ಅಟ್ಟು ಕರೈಂತೆ

(ಮತ್ತಾಯ 8:5-13)

1 ಯೇಸುನೆ ಅದ್ವಿನ ಆ ಖ್ವಾರಿ ವಾತೇನ ಬೋಲಿನ್ ಖ್ವಮ್‌ಜಾಡನ ಬಾದ್‌ಮ, ಯೇಸು ಕಪೆನ್‌ಫಮ್‌ನ ಗಯೊ.

2 ಹಿಜ್ಜಾ ಖ್ವೊಶಿಪಾಯಿನೊ ಮೋಟಾನೊ, ಪ್ಯಾರ್‌ನೊ ಆಳ್ ಏಕ್ ಜಣೊ, ರೋಗ್ ಆಯಿನ್ ಮರಾನಿ ಹಾಲ್‌ಮ ಥೊ.

3 ಯೋ ಖ್ವೊ ಶಿಪಾಯಿನೊ ಮೋಟಾನೆ, ಯೇಸುನಿ ಬಾರೇಮ ಖ್ವಮ್‌ಜಿನ್, ಯೆಹೂದ್ಯರ್‌ನ ಶಾಣವ್‌ಮ ಥೋಡ ಭಣಾನ ಇನಾಕನ ಮೋಕ್ಲಿನ್, ಇನ ಆಳ್‌ನ ಅಲ್ಫು ಕರನ್ ಕರಿ ಬೋಲಿಲಿದೊ.

4 ಇವ್ಣೆಯೇಸುಕನ ಆಯಿನ್, “ತಾರೇಥಿ ಮದತ್ ಕರೈಲ್ಯವಾನ ಯೋ ಅದ್ವಿಲ್ಡಾಯಕ್ ಹುಯಿರನ್.

5 ಯೋ ಅಪ್ಪ ಅದ್ವಿನ ಪ್ಯಾರ್ ಕರಾವಾಳೊ ಹುಯಿರನ್ ಅಜ್ಜು ಇನೇಸ್ ಅಪ್ಪಖ್ವಾಜೆ ಸಬೆ ಭರಾವನು ಮಂದಿರ್‌ನ ಭಂದೈದಿದೊತೆ” ಕರಿ ಬೋಲಿನ್ ಯೇಸುನ ಗಿಂಗಾವಲಗಾಖ್ತರ್,

6 ಯೇಸು ಇವ್ಣ ಜೋಡೆ ಗಯೊ. ಯೇಸು ಘರ್‌ಕನ ಆಯಿನ್ ಪೋಳಾನ ಜರ ದೂರ್ ಥೋತೆ ತದ್ದೇಸ್, ಯೋ ಖ್ವೊಶಿಪಾಯಿನೊ ಮೋಟಾನೆ ಇನ ದೋಸ್ತ್ ಖ್ವಾರಾವ್‌ನ ಯೇಸುಕನ ಬೋಲಿ ಮೋಕ್ಲಿನ್, “ಪ್ರಭು, ತೂ ಖ್ವತ್‌ನಕೊ, ತೂ ಮಾರ ಘರ್‌ಕನ ಆವಾಯೆತ್ರಿಲ್ಡಾಯೇಕ್ ಮಾರಮ ಕೊಯ್ತೆ.

7 ಅತ್ರೇಸ್ ಕಾಹೆತೆ ತಾರಕನ ಆವಾನಾಬಿ ಮೇ ಲ್ಡಾಯೇಕ್‌ನೊ ಕಾಹೆ. ಕತೋಬಿ ತೂ ಖಲಿ ಏಕ್ ವಾತೆ ಬೋಲ್ಯೊತೊ ಬಶ್ ಮಾರ ಸೇವಕ್‌ನ ಅಲ್ಫು ಉಶೆ.

8 ಮೇಬಿ ಬೀಜಾನ ಹಾತ್‌ಹೇಟ್ ಕಾಮ್ ಕರಾವಾಳೊ ಹುಯಿರನ್. ಮಾರ ಹಾತ್‌ಹೇಟ್ ಸಿಪಾಯಿಖ್ವಾರು ಲ್ಹಾ. ಮೇ ಇವ್ಣಾಮ ಏಕ್ ಭಣಾನ ಜಾ ಕರಿ ಬೋಲ್ಯೊತೊ ಯೋ ಜಾಸ್, ಬಿಜ್ಜೇಕ್ ಭಣಾನ ಆವ್ತುಕರಿ ಬೋಲ್ಯೊತೊ ಆವಸ್. ಮಾರ ಆಳ್‌ನ ಅಮ್ಮು-ಅಮ್ಮು ಕಾಮ್ ಕರ್ ಕರಿ ಬೋಲ್ಯೊತೊ ಯೋ ಕರಸ್” ಕರಿ ಬೋಲ್ಯೊ.

9 ಆ ವಾತೆನ ಖ್ವಮ್‌ಜಿನ್ ಯೇಸುನೆ ಇನಿ ಬಾರೇಮ ಆಶ್ಚರ್ಯ್‌ಖ್ವಿನ್, ಇನ ಪೀಲೆ ವಳ್ಳಾವ್‌ತುಥೂತೆ ಝೂಂಡ್‌ಣ ಫರಿ ದೇಖಿನ್, “ಮೇ ತುಮೂನ ಬೋಲುಸ್ಕಿ, ಮೇ ಅತ್ರಿ ಮೋಟಿ ವಿಶ್ವಾಸ್‌ನ ಇಸ್ರಾಯೇಲ್ ಆದ್ವಿಮಾಬಿ ಕೋ ದೇಖ್ಲೊನಿ” ಕರಿ ಬೋಲ್ಯೊ.

10 ಅನ ಬಾದ್‌ಮ ಯೋ ಟಿಪಾಲ್ ದೈವಾಳು ಪಾಟ್ಲು ಫರಿ ಯೋ ಅದಿಕಾರಿನ ಘರ್‌ಕನ ಜೈನ್, ಯೋ ಆಳ್‌ನ ಅಲ್ಫು ಹುಯಿರನ್.

ದೇಖ್ತು

ಯೇಸುನೆ ಮುಂಡಚ್ಚೇನೊ ಛಿಯ್ಯಾನ ಜಿವಾಡ್ವೊತೆ

11 ಅನ ಬಾದ್‌ಮ್ ಯೇಸು ನಾಯಿನ್ ಕರಿ ಏಕ್ ಗಾಮ್‌ನ ಗಯೊ. ಇನ ಜೋಡ್ವೊ ಇನು ಶಿಷ್ಯರ್ ಅಜ್ಜು ಅದ್ವಿನಿ ಮೋಟಿ ಝುಂಡ್‌ಬಿ ಥೂ.

12 ಯೇಸು ಗಾಮ್‌ನ ಮಹಿ ಜಾವಾನು ದರ್ವ್ವಾಚ್ಚಕನ ಆವಾದಿನ್, ಮರಿಗಯೊತೆ ಏಕ್ ಮುರ್ದಾನ ಗಾಮ್‌ಥಿ ಭಾರ್ ಪಳ್ಳಿನ್ ಉಳ್ಳಾವ್ತೊ. ಯೋ ಮರಿಗಯೊತೆ ಅದ್ವಿ ಇನಿ ಆಯಾನ ಏಕನೊ ಏಕ್ ಛಿಯ್ಯೊ ಹುಯಿರ್ದೊಡ್ವೊ. ಇನಿ ಆಯ ಮುಂಡಚ್ಚಿ ಹುಯಿರ್ದೊಡ್ವೊ, ಯೋ ಗಾಮ್‌ನು ಅದ್ವಿನಿ ಮೋಟಿ ಝುಂಡ್‌ಸ ಯೋ ತಯೇಡ ಕೇಡೆ ಥು.

13 ಪ್ರಭುನೆ ಯೋ ತಯೇಡಾನ ದೇಖಿ ಗೋರ್‌ಖೈನ್, “ರೋವ್ ನಕೊ” ಕರಿ ಇನ ಬೋಲ್ಯೊ.

14 ಅಜ್ಜು ಖಾಟಾಕನ ಜೈನ್, ಇನ ಛೀಮ್‌ತಖ್ವತರ್, ಪಳ್ಳಿನ್ ಜಾವವಾಳು ಭೀರಿಗಯು. ತದೆ ಯೇಸುನೆ, “ಜಾನ್ಲಮಾನ್ ಛೋಕ್ರಾ ಉಟ್, ಕರಿ ಮೇ ತುನ ಬೋಲುಸ್!” ಕರಿ ಬೋಲ್ಯೊ.

15 ತದೆ ಯೋ ಮರಿಗಯುಡೊತೆ, ಯೋ ಛೋಕ್ರು ಉರಿ ಬೇಶಿನ್, ವಾತೆ ಬೋಲಾಲಗ್ಲು ತದೆ ಯೇಸುನೆ ಯೋ ಛೋಕ್ರಾ ಇನಿ ಆಯಾನ ದಿದೊ.

16 ಅನ ದೇಖಿನ್, ಹಿಜ್ಜಾಡೊತೆ ತಮಾಮ್ ಅದ್ವಿಡರಿನ್, ದೇವ್ವಸ್ತುತಿ ಕರ್ತುಹುಯಿನ್, “ಏಕ್ ಮಹಾನ್ ಪ್ರವಾದಿ ಅಪ್ಪಕನ ಐರ್ದೊಡ್ವೊ! ದೇವ್ ಇನ ಅದ್ವಿನಿ ಬಚ್ಚಾಡಾನ ಐರ್ದೊಡ್ವೊ” ಕರಿ ಬೋಲ್ಯೊ.

17 ಯೇಸುನಿ ಬಾರೇಮಾನಿ ಆ ಖಬರ್, ಯೂದಾಯ ದೇಖ್ವೊಮ್ ಅಜ್ಜು ಇನ ಅಶ್‌ಪಿಶ್‌ನು ತಮಾಮ್ ಮುಲಕ್‌ಮ ಪೈಲಿಗಯು

ಯೇಸು ಅಜ್ಜು ಬ್ಯಾಪ್ತಿಸ್ತದ್ಯವಾಳೊ ಯೋಹಾನ

(ಮತ್ತಾಯ 11:2-19)

18 ಯೋಹಾನನು ಶಿಷ್ಯರ್ ಚಾಲ್ಯುತೆ ಖ್ವಾರಿ ಬಾರೇಮ ಯೋಹಾನ್ನ್ ಬೋಲ್ಯೊ.

19 ತದೆ ಯೋಹಾನನೆ ಇನ ಶಿಷ್ಯರಾಮ ಬೇ ಜಣಾನ ಬುಲೈನ್, “ತೂಸ್ಕಿ ಶು ಯೋ ಆವ್‌ಶೇತೆ ಅದ್ಮಿಕಿ? ನಾತೊ ಹಮೆ ಬಿಜೇಕ್‌ನಖ್ವಾಜೆ ಟೆವಾವ್‌ಣು” ಕರಿ ಪುಲ್ಲಾವಾನಖ್ವಾಜೆ, ಇವ್ವುನ ಮಾಲಿಕ್‌ಕನ ಮೋಕ್‌ಲೈಸ್

20 ಇವ್ವೆ ಯೇಸುಕನ ಆಯಿನ್, “ತೂಸ್ಕಿ ಶು ಯೋ ಆವ್‌ಶೇತೆ ಅದ್ಮಿ? ಕೊಯಿನ್ನೊ ಹಮೆ ಬಿಜ್ಜೇಕ್ ಅದ್ಮಿನಖ್ವಾಜೆ ಟೆವಾವ್‌ಣು? ಕರಿ ಪುಲ್ಲಾವಾನಟೇಕೆ ಬ್ಯಾಪ್ತಿಸ್ಮದ್ಯವಾಳೊ ಯೋಹಾನನೆ ಹಮೂನ ತಾರಕನ ಮೋಕ್ಲಿರಾಖ್ವೊಸ್” ಕರಿ ಬೋಲ್ಯು.

21 ಯೋಸ್ ವಖ್ತಮ, ಯೇಸುನೆ ಕೈಯೆಕ್ಕಿ ಅದ್ಮಿನು ರೋಗ್‌ರಾಯೊನ ಅಲ್ಪು ಕರೈಸ್, ಅಜು ಭೂತ್ ಧರಿದಾಖವಾಳನ ಲೋಡಾಯೊ. ಅತ್ರೇಸ್ ಕಾಹೆತೆ ಘಣ ಕಾಣ ಅದ್ಮಿನ ಡೋಳಾನ ಜೋತ್ ದಿದೊ.

22 ಬಾದ್‌ಮ ಯೇಸುನೆ ಯೋಹಾನ್ ಶಿಷ್ಯರಾನ, “ತುಮೆ ಹಜ್ಜಾ ದೇಖ್ತಾತೆ ಅಜು ಖ್ವಮ್‌ಜ್ಯಾತೆ ಇನಿ ಬಾರೇಮ ಯೋಹಾನ್ ಜೈನ್ ಬೋಲೊ. ಕಾಣು ದೇಕ್‌ಶೆ, ಲಂಗ್ಡು ಚಾಲ್‌ಷೆ, ಖೋಡ್ ರ್ವಾಳು ಪಾಕ್ ಉಶೆ, ಬೈರು ಖ್ವಮ್‌ಜ್‌ಶೆ, ಮರಿಗಯುಹುಯು ಜಾನ್ ಲೀಲಿಶೆ ಅಜು ಗರೀಬ್‌ನ ಸುವಾರ್ತೆ ಬೋಲವ್‌ಕರಸ್.

23 ಮಾರಿ ಬಾರೇಮ ಶಕ್ ಕರಾಕೊಂತೆ ಇವ್ವೇಸ್ ಧನ್ಯ ಹುಯಿರ್ಲ್ವಸ್ ಕರಿ ಬೋಲೈಸ್

24 ಯೋಹಾನನು ಶಿಷ್ಯರ್ ಚಲ್ಯಾಜಾವಾದೀನ್, ಯೇಸುನೆ ಅದ್ಮಿನಿ ಝೂಂಡ್‌ನ ಯೋಹಾನ್ ಬಾರೇಮ ಬೋಲಾಲಗೊಕ್ಕಿ, “ಶಾತ್ ದೇಕ್ಪು ಕರಿ ತುಮೆ ಯೋಹಾನಕನ ಉಜ್ಜಾಡಿ ಝಗೋಮ ಗಯಾಥ್? ವಹಿರಾಮ ಹಲಾಸ್ತೆ ಫಾಖ್‌ನ ಡಂಟ್‌ನಾಕಿಶು?

25 ನಾತೊ ತುಮೆ ಶಾತ್ ದೇಕ್ಪುಕರಿ ಗಯಾಥ್? ಶನ್ಗಾರ್‌ನ ಲುಂಗ್ಡ ಪೇರ್ಟ್‌ರಾಖಾಸ್ತೆ ಅದ್ಮಿನಾಕಿಶು? ಅಮ್ಮು ಲುಂಗ್ಡ ಪೇರ್ಟ್‌ನ್ ಅರಾಮ್‌ನಿ ಜಿಂದಾಗಿ ಚಲಾವವಾಳು ಖ್ವಾರು ಮಹೇಲ್‌ಮ ರ್ಟ್ಲೆಸ್!

26 ಇಮ್‌ಕತೊ ಮನ ಬೋಲೊ, ಶಾತ್ ದೇಕ್ಕು ಕರಿ ಬಹರ್ ಗಯಾಥ್? ಪ್ರವಾದೀನಾಕಿ ಶು? ಒಹೊ ಖ್ವಾಚಮಾಬಿ, ಮೇ ಬೋಲುಸ್ಕಿ ಏಕ್ ಪ್ರವಾದಿಥೀಬಿ ಮೋಟಾನ ತುಮೆ ದೇಖ್.

27 'ದೇವ್ನೆ ಹಂದೇಕ್, ಮಾರ ದೂತಾನ ತಾರ ಖ್ವಾಪ್ಣೆ ಮೋಕ್ಲಿಶ್, ಯೋ ತೂ ಜಾಪಾನಿ ವಾಟ್ಲ ಖ್ವಾದು ಕರ್ಶೆ' ಕರಿ ಲೀಖ್ಪಿರ್ದೊಸ್ತೆ ಯೋ ಯೋಹಾನನಿಸ್ ಬಾರೇಮ್*

28 ಮೇ ತುಮೂನ ಬೋಲುಸ್ಕಿ, "ಜಮೀನ್‌ಪರ್ ತಯೇಡಾನ ಪೇಟೆ ಪೈದಹುಯುತೆ ಹರೇಕ್ ಅದ್ಮಿಮ ಯೋಹಾನಸ್ ಮೋಟೊ. ಕತೋಬಿ ದೇವ್ನಿ ರಾಜ್ಯಮ ಅಖ್ವೇಥಿ ನ್ಹಾನೊ ಜಿನ್‌ಕುಬಿ ಯೋಹಾನಥಿ ಮಹಾನ್ ಹುಯಿರ್ದೊಸ್.

29 ಯೋಹಾನ ಬೋಲ್ಯೊತೆ ಇಮ್ ತಮಾಮ್ ಅದ್ಮಿ ಅಜು ಶುಂಕ ವಶೂಲ್ ಕರಾವಾಳುಬಿ ದೇವ್‌ನೊ ಮಾರಗ್ ಖ್ವಾಚಕರಿ ಮಾನಿಲಿದು. ಇನಖ್ವಾಜೆ ಇವ್ಣೆ ಖ್ವಾರ್ದು ಯೋಹಾನನ್ ಹಾತೇಥಿ ಬ್ಯಾಪ್ತಿಸ್ಮ ಕರ್ಚಿಲಿದು.

30 ಕತೋಬಿ ಫರಿಸಾಯರ್ ಅಜು ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಇವ್ಣೆ ಬಾರೇಮ ದೇವ್ನಿ ಮರ್ಜಿನ ಝಿಟ್ಕಾರಿನ್, ಯೋಹಾನನ್ ಹಾತೇಖ್ವಾ ಬ್ಯಾಪ್ತಿಸ್ಮ ಕೋ ಲಿದೂನಿ.

31 ಅಜು ಯೇಸುನೆ ಅಮ್ ರ್ಹವಾಪರ್, "ಆ ಹಗಾಮ್ನ ಅದ್ಮಿನ ಖಿವಿ ಪರಕ್ತ ಬೋಲು? ಇವ್ಣೆ ಕಿಮ್ಮಿ ಘೋಣಿ ಛಾ?

32 ಬಜಾರ್‌ಮ ಬೇಶಿನ್, ಹಮೆ ತುಮಾರಖ್ವಾಜೆ ವಾಖ್ವಾಳಿ ವಜಾಡ್ಯ್, ತುಮೆ ಖೇಲ್ಕೊಯ್ನಿ; ಹಮೆ ಅಂದ್ರೋಖ್ವಾನು ಗೀದ್ ಬೋಲ್ಯ ಕತೋಬಿ ತುಮೇತೊ ರೋಯಾ ಕೊಯ್ನಿ" ಕರಿ ಬೋಲಾತೆ ಲಡ್ಕಾನಿಘೋಣಿ ಛಾ.

33 ಕಿಮ್‌ಕತೊ, ಬ್ಯಾಪ್ತಿಸ್ಮದ್ಯವಾಳೊ ಯೋಹಾನ ಆಯೊ, ಯೋ ರೋಟೊ ಖಾತೋಫೊಕೊಯ್ನಿ ಅಜು ದ್ರಾಕ್ಷಿನು ರಖ್ವ್ ಪೀತೋಫೊಕೊಯ್ನಿ, ತುಮೆ ಇನ ಭೂತ್ ಧರಿದಾಖ್ಯಸ್ ಕರಿ ಬೋಲೋಸ್.

34 ಅದ್ಮಿನೊ ಛಿಯೊ ಆಯೊ, ಯೋ ಖಾಣುಪಾಣಿ ಲ್ಯವಾಳೊ ಹುಯಿರೋಸ್. 'ತುಮೆ ಬೋಲೊಸ್ಕಿ, ದೇಖೋಲೊ, ಆ ಅದ್ಮಿ

* 7:27 7:27 ಮಲಾಕಿ-3:1

ಖಾಣನು ಮರ್ತೇಲ್ ಅಜ್ಜು ಪೀಕುಡ್ಕ, ಪಾಪಿಬಿ ಖರಾಬ್ ಅದ್ಮಿನೊ ದೋಸ್ತಿ” ಕರಿ.

35 ಕತೋಬಿ ದೇವ್ನಿ ಗ್ಯಾನ್ತೊ ಖ್ವಾಚ್‌ಕರಿ, ಇನ ಮಾನಿಲ್ಯಾವಾಳಧೀಸ್ ಮಾಲುಮ್‌ಪಡಸ್” ಕರಿ ಬೋಲ್ಯೊ.

ಪರಿಸಾಯವಾಳೊ ಸಿಮೋನನ ಘರ್‌ಮ ಯೇಸು

36 ಫರಿಸಾಯರ್‌ಮ ಏಕ್ ಜಣಾನೆ, ಯೇಸುನ ಖಾಣನ ಆವ್ಣುಕರಿ ಬೋಲಿಲಿದೊ. ಇನಾಖ್ವಾಜಿ ಯೇಸು ಇನ ಘರೆ ಜೈನ್ ಖಾಣು ಖಾವಾನ ಬೇಶಿಗಯೊ.

37 ಯೋ ಗಾಮ್ನಿ ಏಕ್ ಪಾಪೇಲಿ ತಯೇಡ ಥೀ. ಇನೆ ಯೇಸು ಯೋ ಫರಿಸಾಯರ್‌ನ ಘರ್‌ಮ ಲ್ಹಾ ಕರಿ ಮಾಲುಮ್ ಕರಿಲೀನ್, ಏಕ್ ಬಂಡಾನಿ† ಶೀಶಿಮ ವಾನು ತೇಲ್ನ ಲೀನ್ ಹಿಚ್ಚಾ ಆಯಿ.

38 ಯೋ ಯೇಸುನ ಪೀರೆ ಇನ ಗೋಡಾಕನ ಭೀರಿನ್, ರೊವ್‌ತಿಹುಯಿನ್, ಇನ ಗೋಡಾನ ಆಂರ್ಟೇಖ್ವು ಭಿಜೈನ್, ಬಾದ್‌ಮ ಇನ ಮುಡ್‌ಕ್ಯಾನ್ ಕೇಖ್ವಾಧಿ ಯೇಸುನ ಗೋಡ ನೂಫಿ ಅಜ್ಜು ಇನ ಗೋಡಾನ ಬುಚ್ಚಾ ದೀನ್, ಯೋ ವಾನು ತೇಲ್ನ ಇನ ಗೋಡಾಪರ್ ನಾಖಿ.

39 ಯೇಸುನ ಖಾಣನ ಬುಲಾಯೊಥೋತೆ ಫರಿಸಾಯರ್‌ನೆ ಅನ ದೇಖಿನ್, “ಆ ಪ್ರವಾದಿಸ್ ರ್ವಯೊಹೋತ್ಲೊ, ಇನ ಛೀಮುಕರಾತೆ ಕೋಣ್ ಕರಿ ಮಾಲುಮ್ ಕರಿಲಿದೊಹೋತ್; ಆ ಕಿಮ್ಮು ಪಾಪ್‌ಮ ಜಿವ್ಣು ಚಲಾವ್‌ಕರಾಸ್ ಕರಿ ಮಾಲುಮ್ ಕರಿಲಿದೊಹೋತ್!”

40 ತದೆ ಯೇಸುನೆ, “ಸೀಮೋನ್, ತುನ ಬೊಲಾನಿ ಏಕ್ ವಾತ್ ಲ್ಹಾ” ಕರಿ ಬೋಲ್ಯೊ.

ತದೆ ಸೀಮೋನ್ಚೆ “ಗುರು, ಬೋಲ್” ಕರಿ ಬೋಲ್ಯೊ.

41 ತದೆ ಯೇಸುನೆ, “ಏಕ್ ಶೌಕಾರ್‌ನ ಬೇ ಜ್ವಣ ಕರ್‌ಜ್ಯಾ ಥಾ; ಏಕ್ ಜಣೊ ಪಾಚ್ ಖೊರೂಪಾನ ಬಿಲ್ಲಾ ದೇವ್ಣುಡ್; ಬಿಜ್ಜೇಕ್ ಜಣೊ ಅಡೈವಿಖ್ವೊ ರೂಪಾನಬಿಲ್ಲಾ ದೇವ್ಣುಡ್.

† 7:37 7:37 ಆ ಶೀಶಿನ ‘ಅಲಬಾಶ್‌ಟರ್’ ಕರಿ ಧೋಳೊ ಅಜ್ಜು ಪೀಳೊ ಘಣ ಅಛ್ಚ ಬಂಡೇಡಿ ಬಣಾಯುಹುಯು

42 ಯೋ ಭೇ ಜ್ಞಾನಾನಾಬಿ ಫೇಡಾನ ಹಾತ್ ಕೋ ಹುಯೂನಿ. ಇನಖ್ವಾಜಿ ಯೋ ಭೇ ಜ್ಞಾನಾನು ಕರಙ್ಗ್ ಮ್ಹಂದಿದೊ. ಇಮ್‌ಕತೊ, ಯೋ ಭೇ ಜ್ಞಾನಾಮ ಕೋಣ್ ಯೋ ಶೌಕಾರ್‌ನ ಜ್ಞಾಖ್ತ್ ಪ್ಯಾರ್ ಕರ್ಶೆ?” ಕರಿ ಬೋಲ್ಯೊ.

43 ಸೀಮೋನನೆ, “ಕಿನೆ ಜ್ಞಾಖ್ತ್ ಕರಙ್ಗ್ ಲೀರಾಖ್ಯೊಧೋಕಿ ಯೋಸ್ ಕರಿ ದೆಖಾವಸ್” ಕರಿ ಬೋಲ್ಯೊ. ತದೆ ಯೇಸುನೆ ಇನ, “ತುನೆ ಬರಾಬರ್‌ಥಿ ತೀರ್ಪ್ ದಿದೊ. ಕರಿ ಬೋಲ್ಯೊ.

44 ತದೆ ಯೇಸುನೆ ಯೋ ತಯೇಡ ಭಣಿ ಫರಿನ್, ಸೀಮೋನ್ನ್, “ಆ ತಯೇಡಾನ ದೇಖ್ಯೊಕಿ ಶು? ಮೇ ತಾರ ಘರೆ ಆಯೊ, ತೂ ಮಾರ ಗೋಡಾನ ಪಾಣಿ ಕೋ ದಿದೋನಿ. ಕತೋಬಿ ಆತೊ, ಇನ ಡೋಳಾನ ಆಂಯ್ಲೇಥಿ, ಮಾರ ಗೋಡ ಧೋಯಿನ್, ಇನ ಮುಡ್‌ಕ್ಯಾನ ಕೇಖ್‌ಥಿ ನೂಲಿ.

45 ತುನೆ ಮನ ಏಕ್ ಹಲ್ಲಾಬಿ ಬುಚ್ಚಾ ಕೋ ದಿದೋನಿ, ಆತೊ ಮೇ ಮಹಿ ಆಯೊ ತಪ್‌ಥೊ ಮಾರ ಗೋಡಾನ ಬುಚ್ಚಾ ದ್ಯವಾನ ಕೋ ಮ್ಹೇಲಿನಿ.

46 ತೂ ಮಾರ ಮುಡ್‌ಕ್ಯಾನ ತೇಲ್ ಲಗಾಡ್ಯೊಕೊಯ್ಚಿ, ಕತೋಬಿ ಆತೊ ಮಾರ ಗೋಡಾನ ವಾನುತೇಲ್ ಲೋಥಿ.

47 ಇನಖ್ವಾಜಿ ಮೇ ಬೋಲುಸ್ಕಿ, ಅನೆ ವತಾಳಿತೆ ಜ್ಞಾಫ್ ಪ್ಯಾರ್ ದೇಖ್ಯೊತೆ, ಅನು ಪಾಪ್ ಘಣು ರ್ಹಯುತೋಬಿ ಮಾಪ್ ಹುಯಿಗಯು. ಕತೋಬಿ ಕಿನ ದ್ರಾಖ್ಣಿ ಪಾಪ್ ಮಾಪ್ ಹುಯುಕಿ, ಯೋ ದ್ರಾಖ್ಣಿ ಪ್ಯಾರ್ ಕರಾಸ್.

48 ತದೆ ಯೇಸುನೆ ಯೋ ತಯೇಡಾನ, “ತಾರು ಖ್ವಾರೊಸ್ ಪಾಪ್ ಮಾಪ್ ಹುಯಿಗಯು” ಕರಿ ಬೋಲ್ಯೊ.

49 ಯೇಸುನ ಜೋಡ್ತ್ ಖಾಣನ ಬೆರುಥೂತೆ ಖ್ವಾರು, “ಪಾಪ್ ಖ್ವಾರುಬಿ ಮಾಪ್ ಕರಿನಾಖಿದ್ಯವಾನ ಆ ಕೋಣ್?” ಕರಿ ಇವ್ಜ್-ಇವ್ಜಾಮಸ್ ಬೋಲಿಲಿದು.

50 ಕತೋಬಿ ಯೇಸುನೆ ಯೋ ತಯೇಡಾನ, “ತಾರಿ ವಿಶ್ವಾಸಸ್ ತುನ ಬಙ್ಗಾಡ್ಯು; ಶಾಂತಿಥಿ ಜ್ಞಾ” ಕರಿ ಬೋಲ್ಯೊ.

8

ಯೇಸುನಿ ಸೇವೆ ಕರೀತೆ ತಯೇಡಾವಾನಿ ಬಾರೇಮ

1 ಅನ ಬಾದ್‌ಮ ಯೇಸು ಖ್ವಾರ ಖ್ವಯೇರ್‌ಮ ಅಜು ಗಾಮಾಕರಿ ಫರ್ತೊಹುಯಿನ್, ದೇವ್ನಿ ರಾಜ್ಯನಿ ಅಲ್ಫಿ ಖಬರ್‌ನ ಬೋಲ್ತೊನಿಕ್‌ಳ್ಯೊ ಭಾರ ಜಣ ಶಿಷ್ಯರಾಬಿ ಇನಜೋಡೆ ಥಾ.

2 ಥೋಡಿ ತಯೇಡಾಬಿ ಇನಜೋಡೆ ಥಿ. ಆ ತಯೇಡಾವಾನ್ ಯೇಸುಧಿ ರೋಗ್-ರಾಯೊ ಅಲ್ಫು ಹುಯೂಥು ಅಜು ಭೂತ್ ಖ್ವಾರು ನಿಕ್ಕಿಗಯೂಥು. ಅವ್ಣಾಮ, ಖ್ವಾತ್ ಭೂತ್ ನಿಕ್ಕಿಗಯೂಥೂತೆ (ಮಗ್ದಲ ಗಾಮ್‌ನಿ) ಮರಿಯ,

3 ಹೆರೋದನು ಘರ್‌ಭಾರ್‌ನು ಇಶಾಬ್ ದೆವಾಳೊ ಹುಯಿರೊಥೋತೆ ಕೂಜನಿ ಬಾಯ್ಕೊ ಯೋಹಾನ್ಸ್, ಸುಸನ್ನ ಅಜು ಕೈಯೆಕ್ಕಿ ಬಿಜಿ ತಯೇಡಾಬಿ ಥಿ. ಅವ್ಣೆ ಇವ್ಣುಶೊಂತ್ ಪೈಶಾಧಿ ಯೇಸುನಿ ಅಜು ಇನ ಶಿಷ್ಯರಾನಿ ಚಾಕ್ರಿ* ಕರ್ತಿಥಿಯೆ.

ಪಂಡಾ ಛಿಡ್ಕಾವಾಳನಿ ಮತ್ಲಾಬ್‌ನಿ ಖೇಣಿ

(ಮತ್ತಾಯ 13:1-9; ಮಾರ್ಕ್ 4:1-9)

4 ಖ್ವಯೇರೆ-ಖ್ವಯೇರೇಥು ಕೈಯೆಕ್ಕಿ ಅದ್ಮಿಯೆ ಅವಕರ್ತೂಥು; ಅಜು ಅದ್ಮಿನಿ ಮೋಟಿ ಭೀಡ್ ಭರಾವಾದೀನ್, ಯೇಸುನೆ ಇವ್ಣುನ ಮತ್ಲಾಬ್‌ನಿ ಖೇಣಿಯೇಥಿ ಬೋಲ್ತೊ.

5 ಏಕ್ ಜುಣೊ ಪಂಡಾ ಛಿಡ್ಕಾನಖ್ವಾಜಿ ಖೇತ್ರೆ ಗಯೊ, ಯೋ ಪಂಡಾ ಛಿಡ್ಕಾನಿ ವಖ್ವತ್‌ಮ, ಥೋಡ ಪಂಡಾ ವಾಟ್ನ ಶೇಡೆ ಪಡೀನ್, ಖುಂದ್‌ಲೈಗು. ಆಬ್‌ಥು ಉಡಂತು ಜಿನಾವರ್ ಖ್ವಾರು ಆಯಿನ್ ಇನ ಚರಿಲಿದು.

6 ಅಜು ಥೋಡ ಪಂಡಾ ಬಂಡಾಪರ್‌ನಿ ಮಾಟಿಪರ್ ಪಡ್ಚು, ಯೋ ಪುಟಿನ್ ಮಾಟಿ ಭಿಗ್ಗಿಕೊಂತೆ ದೇವಿನ್, ಖ್ವುಕ್ಲೆಗು.

* 8:3 8:3 ಸೇವೆ ಕರ್ತಿಥಿಯೆ ಕರಿ ಮತ್‌ಲಬ್.

7 ಅಜ್ಜು ಥೋಡ ಪಂಡಾ, ಕಾಟಾನ ಡಾಗ್‌ಮ ಪಡ್ಕು ಆ ಕಾಟಾನು ಝಾಡಾ ಯೋ ಪಂಡಾವ್‌ನ ಜೋಡೆ ಫುಟಿನ್, ಶೋಶಿಯೇನ ದಾಬಿನಾಖ್ಕು.

8 ಬಿಜ್ಜು ಥೋಡ ಪಂಡಾ ಅಲ್ಪಿ ಜಮೀನ್‌ಪರ್ ಪಡೀನ್, ಫುಟಿನ್, ಏಕ್ ಪಂಡಾಪಿಟ್ ಖೊವತ್ರೆ ಪಂಡಾ ಮ್ಹೇಲ್ಕು”.

ಆ ಖ್ವಾರಿ ವಾತೆ ಬೋಲಾನ ಬಾದ್‌ಮ, ಯೇಸುನೆ, “ಕಿನ-ಕಿನ ಖ್ವಮ್‌ಜಾನ್ ಕಾನ್ ಛಾಕಿ ಇವ್ಣೆ ಖ್ವಮ್‌ಜಾದೆ!” ಕರಿ ಬೋಲ್ಯೊ.

ಮತ್ಲಬ್‌ನಿ ಖೇಣಿಯೇನಿ ಉದ್ದೇಶ್

(ಮತ್ತಾಯ 13:10-17; ಮಾರ್ಕ 4:10-12)

9 ಯೇಸುನು ಶಿಷ್ಯರ್ ಇನ, “ಆ ಮತ್ಲಬ್‌ನಿ ಖೇಣಿನು ಮತ್‌ಲಬ್ ಶಾತ್” ಕರಿ ಪುಲ್ಲಾಯು,

10 ಯೇಸುನೆ, “ದೇವ್ನಿ ರಾಜ್ಯನಿ ಖ್ವಾಚ್‌ನ ಮಾಲುಮ್ ಕರಿಲ್ಯವಾನಿ ಗ್ಯಾನ್ ತುಮೂನ ದೆವೈರ್‌ಲ್ಲ್ಹಾಸ್. ಕತೋಬಿ ಬಿಜ್ಜಾಖ್ವಾರ್ ಅದ್ಮಿನ ಡೋಳ ರ್ಲ್ಹಯುತೋಬಿ ದೆಖಾವ್ಣುನಾತೆ, ಅಜ್ಜು ಕಾನ್ ರ್ಲ್ಹಯುತೋಬಿ ಖ್ವಮ್‌ಜಾವ್ಣುನಾತೆ ಇಮ್ ಮತ್ಲಬ್‌ನಿ ಖೇಣಿಯೇನಿ ಬೋಲುಸ್” ಕರಿ ಜವಾಬ್ ದಿದೊ.

ಯೇಸುನೆ ಪಂಡಾ ಛಿಡ್ಕಾವಾಳನಿ ಮತ್ಲಬ್‌ನಿ ಖೇಣಿನ ಬೋಲಿವತಾಳ್ಕೊತೆ

(ಮತ್ತಾಯ 13:18-23; ಮಾರ್ಕ 4:13-20)

11 “ಆ ಮತ್ಲಬ್‌ನಿ ಖೇಣಿನು ಮತ್‌ಲಬ್ ಶಾತ್‌ಕತೊ, ಯೋ ಪಂಡು ಕತೊ ದೇವ್ನಿ ವಚನ್.

12 ಥೋಡು ಅದ್ಮಿ ವಚನ್ ಖ್ವಮ್‌ಜಾತಾಸ್‌ನ ಶೈತಾನ್ ಆಯಿನ್, ಇವ್ಣೆ ನಂಬಿನ್, ಇವ್ಣ ರಕ್ಷಣೆ ನಾ ಮಳ್‌ಣು ಕರಿ, ಯೋ ವಚನ್ ಇವ್ಣ ಮನ್‌ಮಾಥು ಕಾಡಿನಾಖಿದೇಸ್. ಅವ್ಣೆಸ್ ವಾಟ್ನಶೇಡೆ ಪಡ್ಯಾತೆ ಪಂಡಾ ಹುಯಿರ್‌ಲ್ಲ್ಹಾಸ್.

13 ಥೋಡು ಅದ್ಮಿ ವಚನ್ ಖ್ವಮ್‌ಜಾತಾಸ್‌ನ, ಖ್ವಿಶಿಧಿ ಇನ ಮಾನಿಲೇಸ್. ಅವ್ಣನ ಜಡ್‌ಕೊಂತೆ ಇನಖ್ವಾಜಿ ಜರಫಡಿಸ್ ಖಿಲಿ

ನಂಬಸ್ ಶೋದನೆನ ಹಗಾಮ್ಮ ಪಡಿಜಾಸ್. ಅವ್ಣೇಸ್ ಬಂಡಾಪರ್ ಪಡ್ಯಾತೆ ಪಂಡಾ ಹುಯಿರ್ದಾಸ್.

14 ಕಾಟಾನ ರ್ಹಿಕ್ರಾನು ರ್ಹುಗೋಪರ್ ಪಡ್ಯಾತೆ ಪಂಡಾ ಕೆಹುಕತೊ, ಥೋಡು ಅದ್ಮಿ ದೇವ್ನಿ ವಚನ್ನ ಖ್ವಮ್‌ಜಾಸ್, ಕತೋಬಿ ಆ ಜಿವ್ಣಾನಿ ಪಶ್ತಾವ್ಣಿ ಧನ್-ದೌಲತ್‌ನಿ ಭೋಗ್‌ಮ ಡುಬಿಜ್ಯೆನ್, ಇವ್ಣು ಫಲ್ ಕೋದೇಯ್ನಿ.

15 ಪಲ್‌ವಾಯಿಹುಯಿ ಜಮೀನ್‌ಪರ್ ಪಡ್ಯುಹುಯು ದಾಣೊ ಕತೊ ದೇವ್ನಿವಚನ್ನ ಖ್ವಮ್‌ಜೆನ್, ಖ್ವಾಚು ಅಜು ಅಲ್ಫ ಮನ್‌ಮ ಇನ ರಾಖಿನ್, ಇವ್ಣೆ ಖ್ವಮಾಳಿನ್ ಫಲ್ ದೇಸ್.

ದಿವಾನಿ ಬಾರೇಮ
(ಮಾರ್ಕ 4:21-25)

16 ಕೆಹು ಅದ್ಮಿಬಿ ದೀವೊ ಲಗಾಡಿನ್[†], ಹಂಡ್ಕಾನ ಹೇಟ್ ರ್ಹವೊ ನತರ್‌ಕಿ ಪಲಂಗ್‌ನ ಹೇಟ್ ರ್ಹವೊ ಲಪಾಡಿನ್ ಮ್ಹೇಲಾಕೊಯ್ನಿ. ಘರ್‌ಮ ಆವಾಳಾನ ಉಜಾಳು ದೆಖಾವಾನಿಘೋಣಿ, ದೀವೊ ಮ್ಹೇಲಾನಿ ಖಂಬಾಪರ್ ಮ್ಹೇಲಾಸ್.

17 ಖ್ವಾರಿಸ್ ಖ್ವಾಚಿ ಭಾರ್ ನಿಕಳಾಶೆ, ಅಜು ಲಪೈರ್ದಾತೆ ಖ್ವಾರಸ್ ಡೂಂಡಿನ್ ಭಾರ್ ಲ್ಯಾವಾಶೆ.

18 ಇನಖ್ವಾಜೇಸ್, ತುಮೆ ಖ್ವಮ್‌ಜಾನಿ ವಖ್ವತ್‌ಮ, ಹೊಷಾರ್‌ಥಿ ಖ್ವಮ್‌ಭೊ; ಶನಕತೊ ಕಿನಾಕನ ಲಾಕಿ ಇವ್ಣುನ ಬಿಜ್ಞೂಬಿ ದೆವಾವಾಶೆ, ಕತೋಬಿ ಕಿನಾಕನ ಕೊಯ್ನಿಕ್ ಇವ್ಣಾಕಂಡು, ಯೋ ಇನುಕರಿ ಸೋಚಾಸ್ತೆ ಇನಾಬಿ ಲಿನ್ಯೆಲಿಶೆ.

ಯೇಸುನಿ ಆಯ ಅಜು ಇನ ಭೈಯೆ

(ಮತ್ತಾಯ 12:46-50; ಮಾರ್ಕ 3:31-35)

19 ತದೆ ಯೇಸುನಿ ಆಯಾಬಿ ಇನ ಭೈಯೇ ಯೋ ಥೋತೆ ಹಿಜ್ಣಾ ಆಯಿನ್, ಅದ್ಮಿನಿ ರ್ಹೂಂಡ್‌ಥೀತೆ ಇನಖ್ವಾಜೆ ಯೇಸುನ ಖನ್ನೆ ಆವಾನ ಕೋ ಹುಯೂನಿ.

[†] 8:16 8:16 ಖ್ವಲ್‌ಗೈನ್ ಕರೀಬಿ ಬೋಲಾಸ್.

20 ಹಿಜ್ಜಾಧೂತೆ ಇವ್ವಾಮ ಏಕ್ ಜಣಾನೆ ಯೇಸುನ, “ತಾರಿ ಆಯಾಬಿ ತಾರ ಬೈಯೇ ಅಯಿನ್ ತುನ ದೇಕ್ಕು ಕರಿ, ಭಾರ್ ಭಿಯ್ಯುಸ್” ಕರಿ ಬೋಲ್ಯು.

21 ತದೆ ಯೇಸುನೆ ಇವ್ವ ಖ್ವಾರಾನ, “ಕೋಣ್ ದೇವ್ನಿ ವಚನ್ನ ಖ್ವಮ್‌ಜಿನ್, ಇನೀನಿಫೋಣಿ ಫಾಲಸ್ತಿ ಇವ್ವೆಸ್ ಮನ ಆಯಾಬಿ, ಬೈಯೇಬಿ ಹುಯಿರುಸ್” ಕರಿ ಜವಾಬ್ ದಿದೊ.

ಯೇಸುನೆ ದರ್ರಾವ್‌ನ ಖ್ವೊಪ್ ಕರೈತೆ
(ಮತ್ತಾಯ 8:23-27; ಮಾರ್ಕ 4:35-41)

22 ಏಕ್ ದನ್ನೆ ಯೇಸು ಇನ ಶಿಷ್ಯರನ ಜೋಡೆ, ಏಕ್ ಡೋಣ್‌ಮ ಚಢೀನ್ ಬೇಶಿಗಯೊ, ಅಜು ಇವ್ವುನ, “ಫಾಲೊ, ಅಪ್ಪೆ ದರ್ರಾವ್‌ನಿ ಪಾರ್ಲಿ ಬಾಜೂನ ಜೈಯೆ” ಕರಿ ಬೋಲ್ಯೊ. ತದೆ ಇವ್ವೆ ಡೋಣ್ಣಾ ಪಾಣಿಮ ಧಕೇಲಿನ್ ನಿಕ್‌ಳ್ಳು.

23 ಇವ್ವೆ ಜವ್‌ಕರ್ತುಧೂತೆ ತದೆ ಯೇಸುನ ನಿಂದರ್ ಆಯಿನ್ ಖ್ವುಯಿಗಯೊ. ಏಕ್‌ದಮ್ ಮೋಟೊ ವಹಿರೊ ವಾಗಿನ್, ಡೋಣ್‌ಮ ಪಾಣಿ ಭರಾವಲಗ್ಯೂಧು. ಅನೇಥಿ ಇವ್ವೆಫಾಣಿ ಮುಶ್ಕಿಲ್‌ಮ ಪಡಿಗಯ.

24 ತದೆ ಶಿಷ್ಯರ್ ಖ್ವಾರು ಯೇಸುಕನ ಐನ್, “ಗುರು, ಗುರು, ಹಮೆ ಮರ್‌ವಾನ ಆಯಾನಿ!” ಕರಿ ಬೋಲ್ಯು.

ತದೆ ಯೇಸುನೆ ಉಠೀನ್ ವಹಿರನಾಬಿ, ಪಾಣಿನು ರೋಕಾಳ್ಳನಾಬಿ ಗುರ್‌ಕಾಯೊ. ಗುರ್‌ಕಾವಖ್ವತರ್ ಯೋ ಭೀರಿಗಯು ಅಜು ಖ್ವೊಪೊ ಹುಯಿಗಯು.

25 ಬಾದ್‌ಮ ಯೇಸುನೆ ಇನ ಶಿಷ್ಯರನ, “ತುಮಾರಿ ವಿಶ್ವಾಸ್ ಕಿಜ್ಜಾ ಗೈ?” ಕರಿ ಪುಲ್ಲಾಯೊ.

ಕತೋಬಿ ಇವ್ವೆ ಆಶ್ಚರ್ಯಖಾದು ಅಜು ಡರಿಗಯು, ಅಜು ಬೋಲ್ಯುಕಿ, “ಆ ಅದ್ವಿ ಕೋಣ್ ಉಶೆ? ವಹಿರನಾಬಿ, ರೋಕಾಳ್ಳನಾಬಿ ಹುಕುಮ್ ದೇಸ್‌ನಿ; ಯೋಅಖ್ವುಬಿ ಆ ಬೋಲಾತೆ ಇಮ್ ಖ್ವಮ್‌ಜಾಸ್‌ನಿ!” ಕರಿ ಏಕ್‌ಥಿ-ಏಕ್ ಬೋಲಿಲಿದು

ಯೇಸುನೆ ಭೂತ್‌ಖ್ವಾರು ಧರರಾಖ್ಯುಧೂತೆ ಏಕ್ ಅದ್ಮಿನ ಅಛ್ಫು ಕರಯ್ತೆ

(ಮತ್ತಾಯ 8:28-34; ಮಾರ್ಕ 5:1-20)

26 ಯೇಸು ಅಜ್ಜು ಇನು ಶಿಷ್ಯರ್ ಗಲಿಲಾಯಥು ಗೆರಸೇನವಾಳನು ತಬರ್‌ಖಾನ ಆಯಿನ್ ಪೋಚ್ಚಾ.

27 ಯೇಸು ಕನಾರಿಪರ್ ಉತರ್‌ತಸ್ಸು ಯೋ ಗಾಮಾನು ಏಕ್ ಜಣೊ ಇನಖ್ವಾಪ್ಪೆ ಆಯು, ಇನ ಭೂತ್‌ ಖ್ವಾರು ಧರರಾಖ್ಯುಧು. ಆ ಕೈಯೆಕ್ ದನಥು ಲುಂಗ್ಡಸ್ ಫೇರಯ್ತು ಕೊಯ್ನಿ ಅಜ್ಜು ಘರ್‌ಮಾಬಿ ರಡ್ಡಿತೂಥು ಕೊಯ್ನಿ. ಮಖ್ವಾಣ್ಯನಿ ಘವಿಯೆಮಾಸ್ ರಡ್ಡಿತೂಥು.

28 ಇನೆ ಯೇಸುನ ದೇಖಿನ್ ಬಳೇಳಿನ್, ಇನಖ್ವಾಪ್ಪೆ ಪಡೀನ್, ಚೋರ್ ಆವಾಜ್‌ಫಿ, “ಪರಮಂಡಲ್‌ನೊ ದೇವ್ ಛಿಯ್ಯಾ, ಯೇಸು! ಮಾರೇಫಿ ತುನ ಶಾತ್ ಛಾ? ಮನ ಖ್ವತ್ತೆಶ್ ನಕೊ ಕರಿ ತುನ ಗಿಂಗಾವುಸ್” ಕರಿ ಬೋಲಿಲಿದೊ.

29 ಶನಕತೊ, “ಆ ಅದ್ಮಿನ ಮ್ಹಂದಿನ್ ಜಾ!” ಕರಿ ಯೇಸುನೆ ಯೋ ಭೂತ್‌ನ ಹುಕುಮ್ ದಿದೋಡೊ. ಘಣಿ ಹಲ್ಲ ಯೋ ಭೂತ್ ಇನ ಧರ್ತುಡು, ಎತ್ರೇಸ್ ಕಾಹೆತೆ ಯೋ ಅದ್ಮಿನ ಕೋಂಡಿಫಾಲಿನ್, ಹಾತ್-ಗೋಡಾನ ಖ್ವಂಕಳ್‌ಫಿ ಭಾಂದ್ಯತೋಬಿ, ಯೋ ಖ್ವಂಕ್‌ಳಿನ ತೋಡಿ ನಾಕ್ತೋಡೊ ಅಜ್ಜು ಯೋ ಭೂತ್ ಇನ ಉಜ್ವಾಡಿ ಝಗೋಮ ನಖ್ವಾಡ್‌ತೂಥು.

30 ಯೇಸುನೆ ಇನ, “ತಾರು ನಾಮ್ ಶಾತ್?” ಕರಿ ಪುಲ್ಲಾವಖ್ವತರ್, ಇನೆ, “ಮಾರು ನಾಮ್ ಝೂಂಡ್” ಕರಿ ಜವಾಬ್ ದಿದೊ. ಶನಕತೊ ಇನ ಘಣು ಭೂತ್ ಧರರಾಖ್ಯುಧು.

31 ಯೋ ಭೂತ್‌ಖ್ವಾರು ಯೇಸುನ, “ಹಮೂನ ಅಂತಸ್‌ಕೊಂತೆ ಪಾತಾಳ್ಕು ನಕೊ ನಖ್ವಾಡ್” ಕರಿ ಗಿಂಗೈಲಿದು.

32 ಹಿಜ್ವಾ ಖನ್ನೆಸ್ ಥೂತೆ ಪಹಾಡ್‌ಪರ್ ಡೂಕರ್‌ನಿ ಏಕ್ ಮೋಟಿ ಝೂಂಡ್ ಚರೂಕರ್‌ತೂಥು. ತದೆ ಯೋ ಭೂತ್ ಖ್ವಾರು, “ಯೋ

ಖ್ವಾರ ಡೂಕರ್‌ಮ ಪೇಖ್ವಾನ ಹಮೂನ ಹುಕುಮ್ ದೇ” ಕರಿ ಯೇಸುನ ಗಿಂಗೈಲಿದು. ಯೇಸುನೆ ಇಮ್ಮಸ್ ಹುವಾದೆ ಕರಿ ಬೋಲಾಖ್ವತರ್,

33 ಭೂತ್‌ಖ್ವಾರು ಯೋ ಅದ್ವಿನ ಮಹಿತು ಭಾರ್ ಆಯಿನ್, ಡೂಕರ್‌ಮ ಪೇಶಿಗಯು. ತದೆ ಯೋ ಡೂಕರ್‌ನಿ ಝೂಂಡ್ ನಾಶಿನ್, ಕಥಾರ್‌ನಿ ಝುಗೋಥು, ದರ್‌ವಾಮ ಪಡೀನ್, ದಮ್ ಫೋಟೈನ್ ಮರಿಗಯು.

34 ಡೂಕರ್ ಚರಾವವಾಳು ಚಾಲ್ಯುತೆ ಇನ ದೇಖಿನ್, ನಾಶಿಚೈನ್, ಯೋ ಗಾಮ್ಬಾ ಅಜು ಅಶ್‌ಪಿಶ್‌ನು ಖೇತರ್‌ಮಾನು ಅದ್ವಿನ ಚಾಲ್ಯುತೆ ಇನಿ ಬಾರೇಮ ಬೋಲ್ಯು.

35 ತದೆ ಯೋ ಅದ್ವಿಖ್ವಾರು ಚಾಲ್ಯುತೆ ಇನ ದೇಖಾನಖ್ವಾಜೆ ಯೇಸು ಥೋತೆ ಹಿಚ್ಚಾ ಆಯು. ತದೆ ಭೂತ್‌ಖ್ವಾರು ನಿಕ್ಕಿಗಯುಥೂತೆ ಯೋ ಅದ್ವಿ ಲುಂಗ್ಡಾವ್‌ನ ಪೇರ್ದಿಲಿನ್, ಅಲ್ಪಿ ಖ್ವಯಾಲ್‌ಥಿ, ಯೇಸುನ ಗೋಡಾಕನ ಬಿರುಥೂತೆ ದೇಖಿನ್, ಇವ್ವೆ ಖ್ವಾರು ಡರಿಗಯು.

36 ಚಾಲ್ಯುತೆ ಯೋ ಖ್ವಾರಾನ ದೇಖ್ಯುತೆ ಇವ್ವೆ ಯೋ ಭೂತ್ ಧರಿರಾಖ್ಯುಥೂತೆ ಇನ ಕಿಮ್ ಅಲ್ಪುಹುಯು ಕರಿ ಯೋ ಖ್ವಾರ ಅದ್ವಿನ ಬೋಲಿವತಾಳ್ಳು.

37 ಗೆರಸೇನವಾಳನು ತಬರ್‌ಖಾನು ಖ್ವಾರಾನ ಘಣು ಡರ್‌ಲಾಗ್ಯುತೆ ಇನಖ್ವಾಜೆ, ಇವ್ವೆ ಯೇಸುನ, “ತೂ ಹಮೂನ ಮೈಂದಿನ್ ಜಾ” ಕರಿ ಬೋಲಿಲಿದು. ಇನಖ್ವಾಜೆ ಯೇಸು ಡೋಣ್ಣಾ ಚಡೀನ್, ಪಾಲ್ತು ಫರಿ ಚಲೆಗಯೊ.

38 ಯೇಸು ಜಾವಾನಿ ವಖ್ವತ್‌ಮ, ಭೂತ್‌ಖ್ವಾರು ನಿಕ್ಕಿಗಯೂತೆ ಯೋ ಅದ್ವಿ ಯೇಸುನ, “ಮೇಬಿ, ತಾರ ಕೇಡೆಸ್ ರ್ವವುಸ್” ಕರಿ ಯೇಸುನ ಗಿಂಗೈಲಿದೊ.

39 ಕತೋಬಿ ಯೇಸುನೆ ಇನ, “ತೂ ಪಾಲ್ಟೊ ತಾರ ಘರೆ ಜಾ ಅಜು ದೇವ್ವೆ ತಾರಖ್ವಾಜೆ ಶಶ್ಯತ್ ಕರೈಯ್ ಕರಿ ಬೋಲ್” ಕರಿ ಬೋಲಿನ್ ಮೋಕ್ಲಿದಿದೊ.

ಯೋ ಅದ್ವಿ ಹಿಚ್ಚಾಥು ಚಲ್ಯುಚೈನ್, ಯೇಸುನೆ ಇನ ಶಶ್ಯತ್ ಕರೈಯ್ ಕರಿ ಯೋ ಗಾಮ್ಬಾಕರಿ ಬೋಲ್ತುನಿಕ್‌ಳ್ಳು.

ಯಾಯಿರನಿ ಛೋರಿ ಅಜ್ಜು ಯೇಸುನ ಝಗ್ಗಾನ ಛೀಮೀತೆ ತಯೇಡ

(ಮತ್ತಾಯ 9:18-26; ಮಾರ್ಕ 5:21-43)

40 ಯೇಸು ಪಾಟ್ಲೊಫರಿ ಆವಾದಿನ್ ಅದ್ವಿಖ್ವಾರು ಇನ ಬುಲೈಲಿದು, ಸಿ ಶನಕತೊ ಇವ್ವೆ ಖ್ವಾರು ಯೇಸುನ ಖ್ವಾಜೆ ಭಪಿರ ಖ್ವಾರು.

41 ತದೆ ಸಬಾಮಂದಿರ್‌ನೊ ಅದಿಕಾರಿ ಹುಯಿರ ಛೊಡ್ಲೋತೆ ಯಾಯಿರ ಕರಿ ನಾಮ್ನೊ ಏಕ್ ಜಣಾನೆ ಹಿಜ್ಜಾ ಆಯಿನ್, ಯೇಸುನ ಗೋಡಾಪರ್ ಪಡೀನ್, ಇನ ಘರೆ ಆವು ಕರಿ ಯೇಸುನ ಗಿಂಗೈಲಿದೊ.

42 ಶನಕತೊ, ಭಾರ ವರಖ್ವಾನ್ ಹುಯಿರ ಛೊಡ್ಲೀತೆ, ಇನಿ ಏಕ್‌ನಿ-ಏಕ್ ಛೋರಿ, ಮರಾನಿ ಹಾಲ್‌ಮ ಥಿ.

ಯೇಸು ಯಾಯಿರನ ಘರೆ ವಳ್ಳೊಜ್ಜಾತೊಡ್ಲೋತೆ ತದೆ, ಅದ್ವಿನಿ ಭೀಡ್ ಇನ ಅಶ್‌ಪಿಶ್ ಭರೈನ್ ಆಯು.

43 ಯೋ ಭೀಡ್‌ಮ ಭಾರ ವರಖ್ವಾಡ್, ಮುಟ್ಟು ರೋಗ್‌ಥೀತೆ ಏಕ್ ತಯೇಡ ಥಿ. ಯೋ ಇನಾಕನ ಥೂತೆ ಖ್ವಾರುಸ್ ಖರ್ಚಿ ಕರಿತೋಬಿ, ಕೋಣ್‌ಬಿ ಇನ ಅಲ್ಪು ಕೊಕರೈನಿ.

44 ತದೆ ಯೋ ತಯೇಡ ಝೂಂಡ್‌ಮ ಯೇಸುನ ಪೀರೇಡ್ಲು ಐನ್, ಇನ ಲುಂಗ್ಗಾನ ಕನಾರೀನ ಛೀಮಿ. ಛೀಮ್‌ತಾಸ್ಸು ಇನ ಲ್ಲೋಯಿ ಝರಾನು ಭೀರಿಗಯು.

45 ತದೆ ಯೇಸುನೆ, “ಮನ ಛೀಮ್ಲೂತೆ ಕೋಣ್?” ಕರಿ ಪುಲ್ಲಾಯೊ.

ತಮಾಮ್ ಅದ್ವಿನೆ ‘ಮೇ ಕಾಹೆ, ಮೇ ಕಾಹೆ’ ಕರಿ ಬೋಲ್ತಾನ, ಪೇತ್ರನೆ ಯೇಸುನ, “ಗುರು, ಅದ್ವಿನಿ ಭೀಡ್ ತಾರ ಅಶ್‌ಪಿಶ್ ಭರೈನ್, ತಾರಪರ್ ಪಡುಕರಾಸ್‌ನಿ” * ಕರಿ ಬೋಲ್ಯೊ.

46 ತೋಬಿ ಯೇಸುನೆ, “ಕೋಣ್‌ಕಿ ಏಕ್ ಜಣು ಮನ ಛೀಮ್ಲೂ ಮಾರೇಥಿ ಶಕತ್ ಗೈತೆ ಮನ ಮಾಲುಮ್‌ಪಡ್ಲೂ” ಕರಿ ಬೋಲಾಖ್ವಾರ್,

47 ಯೋ ತಯೇಡ ಅಜ್ಜು ಮೇ ಲಪಿರ ಛಾವಾನ ಉಶೆಕೊಯ್ನಿ ಕರಿ ಮಾಲುಮ್ ಕರಿಲೀನ್, ಕಾಪ್ಪಿಹುಯಿನ್ ಐನ್ ಯೇಸುನ ಗೋಡಾಪರ್

§ 8:40 8:40 ಸ್ವಾಗತ್ ಕರಯ್ ಕರಿ ಮತ್‌ಲಬ್

* 8:45 8:45 ಕತೊ, ತುನ

ಛೀಮುಕರಾಸ್‌ನಿ ನತರ್‌ಕಿ ತುನ ಧಕ್ಕೊ ದೆವ್‌ಕರಾಸ್‌ನಿ ಕರೀಬಿ ಹುವಾಸ್

ಪಡೀನ್, ಇನೆ ಶನಖ್ವಾಜೆ ಛೀಮೀತೆ ಕರಿ ಅಖ್ವಾನ ಖ್ವಾಮೆ ಬೋಲಿ. ಎತ್ರೇಸ್ ಕಾಹೆತೆ ಛೀಮ್‌ತಾಸ್‌ನ ಇನ ಅಟ್ಫು ಹುಯಿಗಯು ಕರಿ ಬೋಲಿ.

48 ತದೆ ಯೇಸುನೆ ಇನ, “ಛೋರಿ, ತಾರಿ ವಿಶ್ವಾಸ್‌ಥೀಸ್ ತುನ ಅಟ್ಫುಹುಯು. ಶಾಂತಿಥಿ ಜ್ಞಾ” ಕರಿ ಬೋಲ್ಯೊ.

49 ಯೇಸು ಆ ವಾತೆ ಬೋಲುಕರಾನಿ ವಖ್ವತ್‌ಮ, ಸಬೆ ಭರಾವಾನು ಮಂದಿರಾನು ಅದಿಕಾರಿ ಭಣಿವಾಳು ಏಕ್ ಜಞು ಏನ್ ಯಾಯಿರನ, “ತಾರಿ ಛೋರಿ ಮರಿಗೈ, ಅಜ್ಜು ಗುರುನ ಖ್ವತಾವ್ ನಕೊ” ಕರಿ ಬೋಲ್ಯೊ.

50 ಕತೋಬಿ ಯೇಸುನೆ ಅನ ಖ್ವಮ್‌ಜಿನ್, ಯಾಯಿರನ, “ಡರ್‌ನಕೊ, ಖಲಿ ವಿಶ್ವಾಸ್ ರ್ಹವಾದೆ, ಇನ ಅಟ್ಫು ಉಶೆ” ಕರಿ ಬೋಲ್ಯೊ.

51 ಯೇಸು ಯೋ ಘರ್‌ಕನ ಆವಾದಿನ್ ಪೇತ್ರ, ಯೋಹಾನ, ಯಾಕೋಬ್ ಅಜ್ಜು ಯೋ ಛೋಕ್ರಿನ ಆಯ-ಬಾ ಇವ್ಣುನ ಮ್ಹಂದಿನ್, ಕಿನಾಬಿ ಇನಾಕೇಡೆ ಮಹಿ ಕೊ ಆವಾದಿದೋನಿ.

52 ಹಿಜ್ವಾ ಥೂತೆ ತಮಾಮ್ ಅದ್ಮಿ ಯೋ ಛೋಕ್ರಿನಖ್ವಾಜೆ ರೊವ್‌ತುಹುಯಿನ್, ಛಾತಿ ಕೂಟುಕರ್ತೂಥೂ. ಅನ ದೇಖಿನ್ ಯೇಸುನೆ, “ನಕೊ ರೋವೊ, ಛೋಕ್ರಿ ಮರಿಕೊಯ್ವಿ, ಖ್ವತೀಸ್!” ಕರಿ ಬೋಲ್ಯೊ.

53 ಛೋಕ್ರಿ ಮರಿಗೈ ಕರಿ ಇವ್ಣುನ ಮಾಲುಮ್‌ಥೂತೆ ಇನಖ್ವಾಜೆ, ಇವ್ಣೆ ಖ್ವಾರೂಸ್ ಯೇಸುನ ದೇಖಿನ್ ಹಾಶ್ಚು.

54 ಕತೋಬಿ ಯೇಸುನೆ ಯೋ ಛೋಕ್ರಿನೊ ಹಾತ್ ಧರೀನ್, “ಪಪ್ಪಾ ಉಪ್ಪರ್ ಉಟ್!” ಕರಿ ಬೋಲ್ಯೊ.

55 ತದ್‌ನು-ತದ್ದೇಸ್ ಇನ ಜಾನ್‌ಆಯು. ಯೋ ಉಠೀನ್ ಭೀರಿಗೈ. ತದೆ ಯೇಸುನೆ ಇವ್ಣುನ, “ಅನ ಖಾವಾನ ಶಾತ್‌ತೋಬಿ ದೆವೊ” ಕರಿ ಬೋಲ್ಯೊ.

56 ಯೋ ಛೋಕ್ರಿನ ಆಯ-ಬಾನೆ ಆಶ್ಚರ್ಯಖಾದು, ಕತೋಬಿ ಯೇಸುನೆ ಅನಿ ಬಾರೇಮ ಕಿನಾಬಿ ನಾ ಬೋಲ್‌ನು ಕರಿ ಇವ್ಣುನ ಹುಕುಮ್ ದಿದೊ

9

ಯೇಸುನೆ ಭಾರ ಶಿಷ್ಯರನ ಬೋಲಿ ಮೋಕ್‌ಲೊತೆ

(ಮತ್ತಾಯ 10:5-15; ಮಾರ್ಕ 6:7-13)

¹ ಯೇಸುನೆ ಭಾರ ಜಣ ಅಪೊಸ್ತಲರ್ನ್ ಏಕ್‌ದಮ್ ಬುಲೈನ್, ಇವ್ವುನ ಭೂತ್‌ಖ್ತಾರು ಕಾಡಾನ ಅಜು ರೋಗ್-ರಾಯೊ ಅಟ್ಟುಕರಾನ ಶಕತ್ ಅಜು ಅದಿಕಾರ್* ದಿದೊ.

² ಅಜು ದೇವ್ನಿರಾಜ್ಯನಿ ಬಾರೇಮ ಬೋಲಿವತಾಳಾನ ಅಜು ರೋಗಿನ ಅಟ್ಟುಕರಾನ ಇವ್ವುನ ಮೋಕ್‌ಲೊ.

³ ಮೋಕ್ಲಾನಿ ವಖ್ತುಮ್ ಇವ್ವುನ, “ಜಾವಾನಿ ವಖ್ತುಮ್ ತುಮೆ ಶಾತ್ರಿ ನಕೊ ಲೀಜಾವೊ: ಲರ್ಮೊ ರ್ವೊ, ರೋಳಿ† ರ್ವೊ, ಖಾಣಾನು ಬುತ್ತು ಅಜು ಪೈಶಾ ರ್ವೊ ನಕೊ; ಬಿಜೇಕ್ ಕುಡ್‌ತು ಜಿನ್‌ಕುಬಿ ನಕೊ.

⁴ ತುಮೂನ ಖೆವ ಘರಮ್ ಬುಲೈಲೇಸ್ತಿ, ಯೋ ಗಾಮ್ ಮ್ವೇಲಿನ್ ಜಾವಾಲಗೂಬಿ ಯೋಸ್ ಘರಮ್ ರ್ವಾವಾಕರೊ.

⁵ ಅಜು ಖೆವ ಗಾಮ್‌ತೋಬಿ ತುಮೂನ ನಾ ಬುಲೈಲಿದುತೊ, ಯೋ ಗಾಮ್‌ನ ಮ್ವೊಂದಿನ್ ಜಾವೊ ಅಜು ತುಮಾರ ಗೋಡಾನ ಲಾಗಾತೆ ಧೂಳಿನ ಝಟ್‌ಕಿ ದೆವೊ. ಯೋ ಇವ್ವುನ ರ್ವೀತಾವನು ಸಾಕ್ಷಿ ಹುಯಿರ್‌ಶೆ.

⁶ ತದೆ ಶಿಷ್ಯರ್‌ಖ್ತಾರು ಹಿಜ್ಜಾಧು ನಿಕ್ಕಿನ್, ಏಕ್ ಗಾಮ್‌ಥು ಬಿಜೇಕ್ ಗಾಮ್ ಜಾತುಹುಯಿನ್, ಹರೇಕ್‌ಆಡಿ ದೇವ್ನಿ ಸುವಾರ್ತೆನ ಬೋಲ್ತುಹುಯಿನ್, ರೋಗ್‌ಮ ರ್ವಾವಾಳನ ಅಟ್ಟುಕರ್ನ್.

ಹೆರೋದನ ಗುಮಾನಿ ಹುಯೂತೆ

(ಮತ್ತಾಯ 14:1-12; ಮಾರ್ಕ 6:14-29)

⁷ ಗಲಿಲಾಯ ತಬರ್‌ಖಾಮ ಅದಿಕಾರ್ ಚಲಾವವಾಳೊ ಹೆರೋದನೆ, ಚಾಲುಕರಾತೆ ಆ ಖ್ತಾರಾನಿ ಬಾರೇಮ ಖ್ತಮ್‌ಜಿನ್, ಇನ ಘಣು ಕಲಾಪ್ಪಿ ಹುಯು. ಶನಕತೊ ಬ್ಯಾಪ್ತಿಸ್ಮದ್ಯವಾಳೊ ಯೋಹಾನ ಪಾಲ್ಟೊ ಜಿವೊಹುಯಿನ್ ಐರ್‌ವೊಕ್ ಕರಿ ಧೋಡು ಅದ್ನಿ ಬೋಲುಕರ್ತೂಘು.

* 9:1 9:1 ಹಕ್ ಕರೀಬಿ ಬೋಲೆಜಾಯ್ ಮತ್‌ಲಬ್

† 9:3 9:3 ಮಾಂಗಾನೊ ಬಟ್‌ವೊ ಕರಿ

8 ಅಜ್ಜು ಥೋಡು ಜ್ಞಾನ ಎಲೀಯ ಅಪ್ಪ ಇಚ್ಛೆಮ ಐರಕ್ಪೋಸ್ ಕರಿ, ಬಿಜ್ಜು ಥೋಡು ಜ್ಞಾನ ಜ್ಞಾನ ಹಗಾಮನೊ ಪ್ರವಾದೀಮ ಏಕ್ ಜ್ಞಾನ ಜಿವ್ವೊಹುಯಿನ್ ಉರಿ ಐರಕ್ಪೋಸ್ ಕರಿ ಬೋಲಿಲೆವ್‌ಕರ್ತೊಡು.

9 ಕತೋಬಿ ಹೆರೋದನೆ, “ಯೋಹಾನನು ಮುಡ್‌ಕ್ಯ ಕತ್ರಾಯೊತೆ; ಕತೋಬಿ ಆ ಕೋಣ್? ಅನಿ ಬಾರೇಮ ಅತ್ರಖ್ವಾರು ಮೇ ಖ್ವಿಮ್‌ಜುಸ್‌ನಿ?” ಕರಿ ಬೋಲಿನ್ ಯೇಸುನ ದೇಕ್ಪು ಕರಿ ಕರುಕರ್ತೊಡೊ

ಯೇಸುನೆ ಪಾಚ್ ಹಜಾರ್ ಅದ್ವಿನ ಖಡಾಯೋತೆ

(ಮತ್ತಾಯ 14:13-21; ಮಾರ್ಕ 6:30-44; ಯೋಹಾನ 6:1-14)

10 ಅಪೊಸ್ತಲರ್ ಖ್ವಾರು ಪಾಳ್ತುಫರಿ ಐನ್, ಇವ್ವೆ ಕರಕ್ಪೊತೆ ಅಖ್ವಾನ ಯೇಸುನ ಖ್ವಾವ್ಣೆ ಬೋಲ್ಯು. ತದೆ ಯೇಸುನೆ ಇವ್ವುನ ಅಲಕ್ ಕಾಡಿಲೀನ್, ಇನಜೋಡೆ ಬೆತ್ತಾಯಿದ ಕರಿ ಗಾಮನ್ ಬುಲೈಲಿ ಗಯೊ.

11 ಅದ್ವಿನಿ ಭೀಡ್ ಅನ ಖ್ವಿಮ್‌ಜಿನ್, ಯೇಸುನ ಪೀರೆ ಗಯು ಯೇಸುನೆ ಇವ್ವುನ ಬುಲೈಲಿನ್,† ಇವ್ವುನ ದೇವ್ನಿ ರಾಜ್ಯನಿ ಬಾರೇಮ ಬೋಲ್ಯೊ. ಅಜ್ಜು ಕಿನ-ಕಿನ ರೋಗ್‌ಥಿ ಅಲ್ಪು ಹೋಣುಥೂಕಿ ಇವ್ವುನ ಅಲ್ಪು ಕರಕ್ಪೊ.

12 ದನ್ ಡುಬಾಲಗ್ವೋಡೊ, ತದೆ ಯೋ ಭಾರ ಜ್ಞಾನ ಶಿಷ್ಯರ್ ಯೇಸುಕನ ಐನ್, “ಆ ಅದ್ವಿನಿ ಝೂಂಡ್‌ನ ಮೋಕ್ಲಿದೆ, ಅವ್ವೆ ಅಶ್‌ಪಿಶ್ ಲಾತೆ ಖ್ವಾರ ಗಾಂಬ್‌ಡಿಮ್‌ ಜೈನ್, ಖಾವಾನ ಖಾಣು, ಖ್ವಿವ್ವಾನ ಝಗೋನ ಡೂಂಡಿಲ್ವಾವದೆ. ಶನಕತೊ ಆ ಉಜ್ಜಾಡಿ ಝಗೊ” ಕರಿ ಬೋಲ್ಯು.

13 ತದೆ ಯೇಸುನೆ, “ತುಮೇಸ್ ಅವ್ವುನ ಖಾಣು ದೆವೊ” ಕರಿ ಇವ್ವುನ ಬೋಲ್ಯೊ.

† 9:11 9:11 ಸ್ವಾಗತ್ ಕರೀನ್ ಕರೀಬಿ ಹುವಾಸ್ ಕರೀಬಿ ಬೋಲಾಸ್

§ 9:12 9:12 ಗಾಮ್‌ಗೋಂಡೀಮ

ತದೆ ಇವ್ವೆ “ಹಮಾರಕನ ಪಾಚ್ ರೋಟಾ ಅಜು ಬೇ ಮಾಲ್ಟಾಲಾ ಮ್ಹಂದಿನ್, ಶಾತ್ರಿ ಕೊಯ್ನಿ. ಹಮೆ ಜೈನ್ ಆ ಖ್ಹಾರ್ ಅದ್ವಿನಖ್ಹಾಜೆ ಖಾಣು ಮೋಲ್‌ಲೀನ್ ಆವ್ವುಕಿ ಶು?” ಕರಿ ಪುಲ್ಲಾಯ.

14 ಹಿಜ್ಜಾ ಪರ್ಖ್ವಾ ಅದ್ಮಿಸ್ ಪಾಚ್ ಹಜಾರ್‌ಜಣು ಥೂ.

ತದೆ ಯೇಸುನೆ ಇನ ಶಿಷ್ಯರ್‌ನ, “ಅದ್ಮಿನ ಖ್ಹಾರು ಏಕೇಕ್ ಶಾಲ್‌ಮ ಅಡೈವಿಖ್ವ್-ಅಡೈವಿಖ್ವ್ ಅದ್ಮಿ ಕರೀನ್ ಹೇಟ್ ಬೆಖ್ಹಾಡೊ” ಕರಿ ಬೋಲ್ತಾನ,

15 ಇವ್ವೆ ಇಮ್ನುಸ್ ಬೆಖ್ಹಾಡ್ಲ.

16 ಬಾದ್‌ಮ ಯೇಸುನೆ ಯೋ ಪಾಚ್ ರೋಟಾ ಅಜು ಬೇ ಮಾಲ್ಟಾಲಾನ ಪಾಡಿಲೀನ್, ಪರಲೋಕ್ ಭಣಿ ದೇಖಿನ್, ಯೋ ರೋಟಾ ಅಜು ಮಾಲ್ಟಾವ್‌ನಟೀಕೆ ದೇವ್ನ ಧನ್ಯವಾದ್ ಕರೀನ್, ಇನ ತೋಡಿನ್, ಅದ್ಮಿ ಖ್ಹಾರಾವ್‌ನ ವಾಟ ಪಡಾನಟೀಕೆ ಶಿಷ್ಯರ್‌ನ ಹಾತ್‌ಮ ದಿದೊ.

17 ಅದ್ಮಿ ಖ್ಹಾರು ಪೇಟ್‌ಭರಿ ಖೈನ್, ಬಶ್‌ಹುಯು* ಅಜು ಶಿಷ್ಯರ್‌ನೆ ಉಭರ್‌ಯ್‌ತೆ ಟುಕ್ಡಾವ್‌ನ ಜಮಾಕರ್ತಖ್ಹತರ್ ಭಾರ ಟೋಕ್ಪಾ ಭರಾಯ.

ಪೇತ್ರನಿ ವಿಶ್ವಾಸ್

(ಮತ್ತಾಯ 16:13-19; ಮಾರ್ಕ 8:27-29)

18 ಏಕ್ ದನ್ನೆ ಯೇಸು ಎಕ್ಲೋಸ್ ಪ್ರಾರ್ಥನೆ ಕರುಕರಾನಿ ವಖ್ಹತ್‌ಮ, ಇನ ಶಿಷ್ಯರ್ ಇನಾಕನ ಆಯ. ತದೆ ಯೇಸುನೆ ಇವ್ವುನ, “ಅದ್ಮಿ ಖ್ಹಾರು ಮೇ ಕೋಣ್ ಕರಿ ಬೋಲಾಸ್?” ಕರಿ ಬೋಲ್ಯೊ.

19 ತದೆ ಶಿಷ್ಯರ್‌ನೆ, “ಥೋಡು ಅದ್ಮಿ ತುನ ಬ್ಯಾಪ್ತಿಸ್ಮದ್ಯವಾಳೊ ಯೋಹಾನ ಕರಿ ಬೋಲಾಸ್, ಅಜು ಥೋಡು ಜಣು ಎಲೀಯ ಕರಿ ಬೋಲಾಸ್, ಅಜು ಥೋಡು ಜಣು ಜೂನ ಹಗಾಮ್‌ನೊ ಪ್ರವಾದೀಮ ಏಕ್ ಜಣೊ ಜಿವ್ತೊಹುಯಿನ್ ಐರಸ್ತೊಸ್ ಕರಿ ಬೋಲಾಸ್” ಕರಿ ಜವಾಬ್ ದಿದಾ.

20 ಕತೋಬಿ ಯೇಸುನೆ ಇವ್ವುನ, “ತುಮೆ ಮನ ಕೋಣ್ ಕರಿ ಬೋಲೋಸ್?” ಕರಿ ಪುಲ್ಲಾವಖ್ಹತರ್,

* 9:17 9:17 ಹಕ್ಲಾಲ್ ಹುಯು ಕರೀಬಿ ಬೋಲಾಸ್

ಪೇತ್ರನೇ, “ತೂ ದೇವನೊ ಕ್ರಿಸ್ತ” ಕರಿ ಜವಾಬ್ ದಿದೊ.

ಯೇಸುನೆ ಇನಿ ಖ್ತಾಪ್ಪಿ ಅಜ್ಜು ಮರಣ್ಣಿ ಬಾರೇಮ ಬೋಲ್ಯೋತೆ
(ಮತ್ತಾಯ 16:20-28; ಮಾರ್ಕ 8:30—9:1)

21 ತದೆ ಯೇಸುನೆ ಇವ್ವುನ ಅನಿ ಬಾರೇಮ ಕಿನಾಬಿ ನಾ ಬೋಲ್‌ನು
ಕರಿ ರೈತಾಯೊ.

22 ಅನ ಬಾದ್‌ಮ ಯೇಸುನೆ ಇವ್ವುನ, “ಅದ್ಮಿನೊ ಛಿಯೊ ಘಣು
ಲತಾಡ ಪಡ್ವು, ಯೆಹೂದ್ಯರ್‌ನು ಶಾಣಾವ್‌ಥೀಬಿ, ಗಲ್‌ಥಯಾಜಕರ್‌ಥಿ
ಅಜ್ಜು ಮೋಶೆನಿ ಧರ್ಮಶಾಸ್ತ್ರ ಶಿಕಾಡವಾಳ ಶಾಸ್ತ್ರಿಯೇಥಿ ಧಕೇಲೈಜಾಶೆ,
ಅಜ್ಜು ಇನ ಮಾರಿನಾಕಶೆ, ಕತೋಬಿ ತೀನ್ ದನ್ನ ಬಾದ್‌ಮ, ಯೋ
ಜಿವ್ವೊಹುಯಿನ್ ಉರಿ ಆವ್‌ಶೆ” ಕರಿ ಬೋಲ್ಯೊ.

23 ಅತ್ರೇಸ್ ಕಾಹೆತೆ ಯೇಸುನೆ ಇವ್ವು ಖ್ವಾರಾವ್‌ನ ಶಾತ್
ಬೋಲ್ಯೊಕತೊ, “ಕೋಣ್‌ತೋಬಿ ಮಾರ ಜೋಡೆ ಆವ್ವುಕರಿ
ಉಶೇತೊ, ಇನು ಯೋ ಬೈಕಿಜೈನ್, ಹರ್‌ದನ್ ಇನಿ ಶಿಲ್‌ಬೇನ ಪಳ್ಳಿನ್,
ಮಾರ ಪೀರೆ ಆವಾದೆ.

24 ಕೋಣ್ ಇನೊ ಜಾನ್ ಬಚ್ಚಾಡಿಲೇವ್ವುಕರಿ ಕರಾಸ್ತಿ, ಯೋ ಇನೊ
ಜಾನ್ ಗುಮೈಲಿಶೆ, ಕತೋಬಿ ಮಾರಖ್ವಾಜೆ ಕೋಣ್ ಇನೊ ಜಾನ್
ಗುಮೈಲಿಶೆಕಿ, ಯೋ ಇನೊ ಜಾನ್ ಬಚಿಜಾಶೆ.

25 ಏಕ್ ಅದ್ಮಿ ಹಿಡಿ ಜಗತ್‌ನಾಸ್ ಜೂತಿಲೀನ್‌ಬಿ, ಇನೊ ಜಾನ್
ಗುಮೈಲಿದೊತೊ, ಇನ ಶನೀಸ್ ಫಾಯಿದೊ ಕೊಯ್ವಿ!

26 ಕೋಣ್‌ತೋಬಿ ಮನಾಬಿ ಅಜ್ಜು ಮಾರಿ ವಚನ್ನಖ್ವಾಜೆಬಿ
ಖ್ವಾರ್‌ಮಾಯೂತೊ, ಇನ ಅದ್ಮಿನೊ ಛಿಯೊ ಯೋಬಿ ಇನ ಬಾನಿ
ಪರಿಶುದ್ಧ ದೂತರ್‌ನಾಬಿ ಛಾತೆ ಮಹಿಮೆನಿ ಜೋಡೆ ಆವಾನಿ ವಖ್ವತ್‌ಮ
ಇನಿ ಬಾರೇಮ ಖ್ವಾರ್‌ಮಾವ್‌ಶೆ.

27 ತುಮೂನ ಖ್ವಾಚಾಮ ಬೋಲುಸ್ತಿ, ಹಜ್ವಾ ಭಿಯುತೆ ಇವ್ವಾಮ
ಥೋಡು ಭಣು ದೇವ್ನಿ ರಾಜ್ಯ ದೇಖಾತೋಡಿ ಮರ್‌ಶೆಸ್ ಕೊಯ್ವಿ” ಕರಿ
ಬೋಲ್ಯೊ.

ಯೇಸುನು ರೂಪ್ ಬದ್‌ಲ್ಯಾತೆ
(ಮತ್ತಾಯ 17:1-8; ಮಾರ್ಕ 9:2-8)

28 ಯೇಸುನೆ ಆ ಖ್ವಾರಿ ವಾತೇನ ಬೋಲಿನ್, ಆಟ್‌ದನ್ ಹುವಾನ ಬಾದ್‌ಮ, ಪೇತ್ರ, ಯಾಕೋಬ ಅಜ್ಜು ಯೋಹಾನ್ನ ಬುಲೈಲಿನ್ ಪ್ರಾರ್ಥನೆ ಕರಾನಖ್ವಾಜೆ, ಪಹಾಡ್‌ಪರ್ ಗಯೊ.

29 ಯೇಸು ಪ್ರಾರ್ಥನೆ ಕರುಕರಾನಿ ವಖ್ವತ್‌ಮ, ಇನು ಮ್ಹೋಡು ಬದ್ಲಿಗಯು, ಅಜ್ಜು ಇನು ಲುಂಗ್ಡು ಧೋಳುಫಟ್‌ಹುಯಿನ್, ಝುಮ್‌ಕಾಲಗ್ಲು.

30 ತದ್ವೇಸ್ ಬೇ ಪಖ್ವಾ ಇನಜೋಡೆ ವಾತೆ ಬೋಲುಕರ್ತಾಫ. ಅವ್ಣೆ ಕೋಣ್‌ಕತೊ, ಮೋಶೆ ಅಜ್ಜು ಎಲೀಯ.

31 ಅವ್ಣೆ ಪರಲೋಕ್‌ನಿ ಮಹಿಮೆಥಿ ದೆಖೈನ್, ಯೆರೂಸಲೇಮ್ ಯೇಸು ಮರಿನ್, ದೇವ್ನಿ ಮರ್ಜಿನ ಪೂರ ಕರ್‌ಶೇತೆ ಇನಿ ಬಾರೇಮ, ಇನಜೋಡೆ ವಾತೆ ಬೋಲುಕರ್ತಾಫು.

32 ಪೇತ್ರ ಅಜ್ಜು ಇನ ಜೋಡ್ಡು ರ್ವಾವಾಳು ಭರ್‌ನಿಂದರ್‌ಮ ಥೂ, ಕತೋಬಿ ನಿಂದರ್‌ಮಾಥು ಜಾಗಿ ಉಠೀನ್, ಯೇಸುನಿ ಮಹಿಮೆನ ಅಜ್ಜು ಇನಜೋಡೆ ಭಿಯಾಥಾತೆ ಯೋ ಭೇ ಜ್ಞಾನಾಬಿ ದೇಖ್ಲು.

33 ಮೋಶೆ ಅಜ್ಜು ಎಲೀಯ ಯೇಸುನ ಮ್ಹಂದಿನ್, ಜ್ಞಾವಾನಿ ವಖ್ವತ್‌ಮ, ಪೇತ್ರನೆ ಯೇಸುನ, “ಗುರು, ಹಮೆ ಹಜ್ಜಸ್ ರ್ವಾವಾನು ಕೆತ್ರೇಕ್ಲಿ ಅಲ್ಫು! ಹಮೆ ಹಜ್ಜಾತೀನ್ ಡೇರಾ ರೋಕೆಸ್, ಏಕ್ ತುನ, ಏಕ್ ಮೋಶೇನ ಅಜ್ಜು ಏಕ್ ಎಲೀಯನ ” ಕರಿ ಬೋಲ್ಯೊ ಪೇತ್ರನ, ಯೋ ಶಾತ್ ಬೋಲುಕರಾಸ್ ಕರಿ ಇನಾಸ್ ಮಾಲುಮ್ ಕೋ ಥೂನಿ.

34 ಪೇತ್ರ ಆ ಬೋಲುಕರಾನಿ ವಖ್ವತ್‌ಮ, ವಾದ್‌ಳು ಐನ್, ಇನೊ ಛಾಳೊ ಇವ್ವಾಪರ್ ಥಪಾಯು. ಅನೇಥಿ ಶಿಷ್ಯರ್ ಡರಿಗಯು.

35 ತದೆ ಯೋ ವಾದ್‌ಮಾಥು, “ಆ ಮಾರೊ ಛಿಯ್ಯೊ ಮೇ ಚೂಣ್ಯೊತೆ ಅನಾಸ್, ಅನಿ ವಾತೇನ ಖ್ವಮ್‌ಜೊ!” ಕರಿ ಏಕ್ ಅವಾಜ್ ಆಯೊ.

36 ಯೋ ಅವಾಜ್ ಭೀರಿಜ್ಞಾವಾನ ಬಾದ್‌ಮ, ಯೇಸು ಎಕ್ವಸ್ ಜ್ಞಾನ ದೇಖ್ಲು. ಯೋ ಶಿಷ್ಯರ್ ಇವ್ಣೆ ದೇಖ್ಲುತೆ ಇನಿ ಬಾರೇಮ, ಏಕ್

ಜ್ಞಾನಾಬಿ ಯೋ ದನೂಮ ಬೋಲ್ಕುಕೊಂತೆ ಖೊಪೊ ಪಡಿಗಯು.

ಯೇಸುನೆ ಭೂತ್ ಧರರಾಖ್ಯೂಡೂತೆ ಏಕ್ ಛೋಕ್ರಾನ ಅಟ್ಟು ಕರೊತ್ತೆ

(ಮತ್ತಾಯ 17:14-18; ಮಾರ್ಕ 9:14-27)

37 ತಿನ ಅಗಲ್ಯ ದನ್ನೆ ಯೇಸು ಅಜ್ಜು ಇನ ತೀನ್ ಶಿಷ್ಯರ್ ಪಹಾಡ್ ಉತ್ತಿನ್ ಆಯ. ತದೆ ಅದ್ವಿನಿ ಮೋಟಿ ಭೀಡ್ ಯೇಸುನ ಖಾಪ್ಪೆ ಆಯಿ.

38 ಯೋ ಭೀಡ್‌ಮಾಥು ಏಕ್‌ಜ್ಞಾನೆ, “ಗುರು, ಮಾರ ಛಿಯ್ಯಾನ ದೇಕ್‌ಕರಿ, ತುನ ಗಿಂಗಾವುಸ್. ಮನ ಆ ಎಕ್ಕ್‌ಸ್ ಛಿಯ್ಯೊ ಛಾತೆ.

39 ಅನ ಭೂತ್ ಧರಾಸ್, ಧರತಾಸ್‌ನ ಆ ಬಳೆಳಾಲಗಸ್, ಮೋಡವಾಟಿ ಜಲಭು ನಿಕ್ಕಾ ಏತ್ರೆ ಅನ ಧಡಾಶ ಮರಾವಸ್, ಅಜ್ಜು ಘಣು ಖ್ವತ್ತೆನ್, ಝಗ್‌ದಾಶೆ ಯೋ ಭೂತ್ ಅನ ಮ್ಹೇಲಾಕೊಯ್ನಿ!

40 ಯೋ ಭೂತ್‌ನ ಕಾಡೊ ಕರಿ, ತಾರ ಶಿಷ್ಯರ್‌ನ ಗಿಂಗೈಲಿದೊ. ಕತೋಬಿ ಇವ್ವ ಹಾತೆ ಕೋ ಹುಯೋನಿ” ಕರಿ ಚಿಕ್ರಿನ್ ಯೇಸುನ ಬೋಲ್ಯೊ.

41 ತದೆ ಯೇಸುನೆ, “ಏ ವಿಶ್ವಾಸ್‌ಕೊಂತೆ ಖರಾಬ್ ಪಿಳ್ಳಿಯೆ, ಮೇ ಬಿಜ್ಜು ಕೆತ್ರದನ್ ತುಮಾರ ಜೋಡೆ ರ್ವೀನ್, ತುಮೂನ ಖ್ವಮಾಳ್‌ಣು?” ಕರೊ ಜವಾಬ್‌ದಿದೊ. ಅಜ್ಜು ಯೋ ಅದ್ವಿನ, “ತಾರ ಛಿಯ್ಯಾನ ಹಜ್ಜಾ ಬುಲೈಲಿ ಆವ್” ಕರಿ ಬೋಲ್ಯೊ.

42 ಯೋ ಛೋಕ್ರು ಆವ್‌ಕರಾನಿ ವಖ್ವತ್‌ಮ, ಯೋ ಭೂತ್ ಇನ ಜಮೀನ್‌ಪರ್ ರಡ್‌ಕೈನ್, ಘಣು ಧಡಾಶ ಮರಾಯು. ಕತೋಬಿ ಯೇಸುನೆ ಯೋ ಭೂತ್‌ನ ಗುರ್‌ಕೈನ್, ಯೋ ಛೋಕ್ರಾನ ಅಟ್ಟು ಕರೀನ್, ಇನ ಬಾನ ಹಾತ್‌ಮ ದಿದೊ.

43 ಅನ ದೇಖಿನ್ ಅದ್ವಿಖ್ವಾರು ದೇವ್ನಿ ಮಹಾನ್ ಶಕತ್‌ಖ್ವಾಜೆ ಆಶ್ಚರ್ಯವಾದು.

ಯೇಸುನೆ ಇನಿ ಮರಣ್ಣಿ ಬಾರೇಮ ಬಿಜೇಕ್ ಹಲ್ಲ ಬೋಲ್ಯೊತೆ

(ಮತ್ತಾಯ 17:22-23; ಮಾರ್ಕ 9:30-32)

ಅದ್ಮಿಖ್ವಾರು ಯೇಸುನೆ ಕರಯ್ತೆ ಖ್ವಾರಿಸ್ ಕಾಮ್ನಿ ಬಾರೇಮ ಬಿಜ್ಜೂಬಿ ಆಶ್ಚರ್ಯ ಕರುಕರಾತೆ ತದ್ದೇಸ್, ಯೇಸುನೆ ಇನ ಶಿಷ್ಯರನ,

44 “ಮೇ ಬೋಲುಕರುಸ್ತೆ ವಾತೇನ ಭೈಕ್ಶು ನಕೊ; ಅದ್ಮಿನ ಛಿಯ್ಯಾನ ಅದ್ಮಿಖ್ವಾರಾನ ಹಾತ್ಮಮ ದೆವೈಜಾಶೆ”

45 ಕತೋಬಿ ಇನ ಶಿಷ್ಯರನೆ ಅನಿ ಮತ್ಲನ್ ಪರ್‌ಖ್ಯುಕೊಯ್ನಿ. ಯೋ ವಾತೆ ಇವ್ಣೇಥಿ ಲಪೈರ್ದೇಥೀತೆ ಇನಖ್ವಾಜೆ, ಇವ್ಣೆ ಮಾಲುಮ್ ಕರಯ್ತೆಕೊಯ್ನಿ. ಅಜ್ಜು ಅನಿ ಬಾರೇಮ ಯೇಸುನ ಬೋಲಾನ ಡರಿಗಯ್ತು.

ದೇವ್ನಿ ರಾಜ್‌ಮ ಕೋಣ್ ಮೋಟು?

(ಮತ್ತಾಯ 18:1-5; ಮಾರ್ಕ 9:33-37)

46 ಶಿಷ್ಯರಮ ಕೋಣ್ ಮೋಟೊ ಕರಿ ಬೋಲಾನಿ ಬಾರೇಮ ವಾತೆ ನಿಕಾಲಗಿ.

47 ತದೆ ಯೇಸುನೆ ಇವ್ಣಿ ದಿಲ್ಲಿ ವಾತೇನ ಮಾಲುಮ್ ಕರಿಲೀನ್, ಏಕ್ ಅಡ್ವಾಣಿ ಲಡ್ಕಾನ ಬುಲೈನ್, ಇನ ಪಾಕ್ತಿಮ† ಭಿರಾಖಿನ್,

48 ಇವ್ಣುನ ಬೋಲ್ಯೊಕಿ, “ಕೋಣ್‌ತೋಬಿ ಏಕ್ ಜ್ಞಣು ಮಾರ ನಾಮ್‌ಪರ್ ಆ ಅಡ್ವಾಣಿ ಲಡ್ಕಾನ ಬುಲೈಲೇಸ್ಕಿ, ಇವ್ಣೆ ಮನ ಬುಲೈಲ್ಯವಾದಾಖ್ವಲ್; ಅಜ್ಜು ಕೋಣ್ ಮನ ಬುಲೈಲೇಸ್ಕಿ, ಯೋ ಮನ ಮೋಕ್‌ಲ್ಯೊತೆ ಇನಾಸ್ ಬುಲೈಲ್ಯವಾದಾಖ್ವಲ್. ಇನಖ್ವಾಜೇಸ್ ತುಮಾರಾಮ ಕೋಣ್ ನ್ಹಾನೋಕಿ ಯೋಸ್ ಖ್ವಾರೇಥಿ ಮೋಟೊ ಹುಯಿರ್ದೆಶೆ” ಕರಿ ಬೋಲ್ಯೊ.

ತುಮಾರಪರ್ ವಹೇರ್ ಕರಾಕೊಯ್ತೆ ಇವ್ಣೆ ತುಮಾರ ಭಣಿವಾಳುಸ್

(ಮಾರ್ಕ 9:38-40)

49 ಯೋಹಾನನೆ, “ಗುರು, ಕೋಣ್‌ಕಿ ಏಕ್ ಜ್ಞಣು ತಾರು ನಾಮ್ ಬೋಲಿನ್ ಭೂತ್ ನಖ್ವಾಡುಕರ್ತುಫೂತೆ ಹಮೆ ದೇಖಿನ್, ಯೋ

† 9:47 9:47 ಶೇಡೆ ಕರೀಬಿ ಬೋಲಾಸ್

ಹಮಾರ ಭಣಿವಾಳು ಕಾಹೆತೆ ಇನಖ್ವಾಜೆ, ಹಮೆ ಇನ ‘ಭಿರಾಕಡ್ ಕರಿ ಬೋಲ್ಯ’ ಕರಿ ಬೋಲ್ಯೊ.

50 ಅನ ಖ್ವಮ್‌ಜಿನ್, ಯೇಸುನೆ ಯೋಹಾನ್ನ ಅಜ್ಜು ಬಿಜಾಖ್ವಾರ್ ಶಿಷ್ಯರ್‌ನ, “ಇನ ನಕೊ ಭೀರಾಖೊ. ಶನಕತೊ ತುಮೂನ ವಹೇರ್ ಕರಾಕೊಂತೆ ಇವ್ಣೆ ತುಮಾರ ಭಣಿವಾಳುಸ್ ಹುಯಿರಲ್ಹಾಸ್” ಕರಿ ಬೋಲ್ಯೊ.

ಸಮಾರಿಯಾನು ಗಾಮ್‌ವಾಳು ಯೇಸುನ ಬುಲೈಲಿದುಕೊಂತೆ

51 ಯೇಸು ಪರಲೋಕ್‌ಮ ಪಡೈಲಿವಾನಿ ವಖ್ತತ್ ಖನ್ನೆ ಆವಲಗಿಥೀತೆ ಇನಖ್ವಾಜೆ, ಯೋ ಯೆರೂಸಲೇಮ್‌ನ ಜಾಹಾನಟೇಕೆ ಘಟ್‌ಜಾನ್ ಕರಿಲೀನ್,

52 ಇನೇಥಿ ಅಗಾಡಿ ಟೆಪಾಲ್‌ಃ ದೈವಾಳಾನ ಮೋಕ್‌ಲ್ಯೊ. ಅವ್ಣೆ ಜೈನ್ ಯೇಸುನ ಹೋಣುತೆಖ್ವಾರು ಖ್ವಪಾರನಖ್ವಾಜೆ ಸಮಾರ್ಯವಾಳಾನು ಗಾಮ್‌ಆಯು.

53 ಯೇಸು ಯೆರೂಸಲೇಮ್‌ನ ಒಳೆಜಾತೊಥೋತೆ ಇನಖ್ವಾಜೆ, ಹಿಜ್ಜಾನು ಅದ್ನಿ ಇನ ಬುಲೈಲಿದುಕೊಯ್ನಿ.

54 ಅನ ದೇಖಿನ್, ಯೇಸುನು ಶಿಷ್ಯರ್ ಯಾಕೋಬ ಅಜ್ಜು ಯೋಹಾನನೆ, “ಪ್ರಭು, ಪರಲೋಕ್‌ಥು ಆಗ್ ಪಡೀನ್, ಅವ್ಣುನ ಬರ್ಬಾತ್ ಕರ್ ಕರಿ, ಹಮೆ ಹುಕುಮ್ ದೇವ್ಣು ಕರಿ, ತೂ ಆಖ್‌ಕ್‌ರಾಸ್ತಿ ಶು?” ಕರಿ ಪುಞಾವಖ್ತರ್,

55 ಯೇಸುನೆ ಫರಿನ್, ಇವ್ಣುನ ಗುರ್‌ಕಾಯೊ.

56 ಬಾದ್‌ಮ ಇವ್ಣೆ ಬಿಜ್ಜ ಗಾಮ್‌ನ ಗಯು.

ಯೇಸುನ ಶಿಷ್ಯರ್ ಕಿಮ್ ರ್ಹೀಣು ಕರಿ ಬೋಲಾನಿ ಬಾರೇಮ
(ಮತ್ತಾಯ 8:19-22)

‡ 9:52 9:52 ಖಬರ್ ಪೋಚವಾಳನ ಕರೀಬಿ ಬೋಲಾಸ್

57 ಇವ್ವೆವಾಟ್‌ಪರ್ ಜಾತುರ್ದವಾನಿ ವಖ್ವತ್‌ಮ, ಕೋಣ್ಣಿ ಏಕ್ ಜಞು ಯೇಸುನ, “ತು ಕಿಜ್ಲಾ ಗಯೊತೋಬಿ ಮೇ ತಾರ ಪೀಲೇಸ್ ಆವ್‌ಸ್” ಕರಿ ಬೋಲ್ಯೊ.

58 ತದೆ ಯೇಸುನೆ ಇನ, ‘ನ್ನೋರಿಯೆನ ಘವಿಯೆ ಛಾ, ಅಜು ಆಬ್‌ಪರ್ ಉಡಾತೆ ಜಿನಾವರ್‌ನ ಖ್ವಾರು ಮ್ಹಾಳೊ ಛಾ, ಕತೋಬಿ ಅದ್ವಿನ ಛಿಯ್ಯಾನ ಮುಡ್‌ಕ್ಯ ಟೇಕಯೆವ್ಡಿ ಝಗೋಬಿ ಕೊಯ್ನಿ” ಕರಿ ಬೋಲ್ಯೊ.

59 ಅಜು ಇನೆ ಬಿಜೇಕ್ ಜಣಾನ, “ಮಾರ ಪೀಲೆ ಆವ್” ಕರಿ ಬೋಲ್ಯೊ.

ಕತೋಬಿ ಇನೆ, “ಪ್ರಭು, ಮೇ ಪಹಿಲೆ ಜೈನ್ ಮಾರ ಬಾನ ಧಪ್‌ನೈದೀನ್ ಆವಾನ ಮನ ಹುಕುಮ್ ದೆ” ಕರಿ ಬೋಲ್ಯೊ.

60 ತದೆ ಯೇಸುನೆ ಇನ, “ಮರ್ಮ್‌ಹುಯಾಸ್ ಇವ್ವಮ ಮರಿಗಯಾತೆ ಇನ ಮಾಟಿ ಕರಾದೆ! ತೂ ಜೈನ್, ದೇವ್ನಿ ರಾಜ್ಯನಿ ಬಾರೇಮ ಬೋಲಿವತಾಳ್” ಕರಿ ಬೋಲ್ಯೊ.

61 ಬಿಜ್ಜೇಕ್ ಜಣಾನೆ, “ಪ್ರಭು, ಮೇ ತಾರ ಪೀಲೆ ಆವುಸ್, ಕತೋಬಿ ಮಾರ ಘರ್‌ವಾಳಕನ ಪಹಿಲೆ, ‘ಜೈನ್ ಆವುಸ್’ ಕರಿ ಬೋಲಿನ್ ಆವುಸ್” ಕರಿ ಬೋಲ್ಯೊ.

62 ತದೆ ಯೇಸುನೆ ಇನ, “ನಾಗರ್‌ಪರ್‌ಕ್ ಹಾತ್ ನಾಖಿನ್, ಪೀಲೆಫರಿ ದೇಖಾವಾಳು ದೇಖಾವಾಳು ಕೋಣ್‌ಬಿ, ದೇವ್ನಿ ರಾಜ್ಯನ ಲ್ಹಾಯೇಕ್‌ನು ಕಾಹೆ” ಕರಿ ಬೋಲ್ಯೊ.

10

ಯೇಸುನೆ ಬೇ ಉಪ್ಪರ್ ಖ್ವಡ್‌ತೀನಿಖ್ತ್ ಜಣಾನ ಬೋಲಿ ಮೋಕ್‌ಲ್ಯೊತೆ

§ 9:62 9:62 ಖೇತರ್‌ಮ ನಾಗ್ರಾನ ಶುರು ಕರಾನ ಬಾದ್‌ಮ, ಪೀಲೆಫರಿ ದೇಖಾವಾಳು ದೇವ್ನಾರ್‌ಜ್‌ನ ಖ್ವಾಜೆ ಕಾಮ್ ಕರಾನ ಲ್ಹಾಯಕ್‌ನು ಕಾಹೆ ಕರಿ ಬೋಲಾನುಸ್ ಅನಿ ಮತ್‌ಲಬ್.

1 ಅನ ಬಾದ್‌ಮ ಯೇಸು ಪ್ರಭು ಬಿಜೂಬಿ ಬೇ ಉಪ್ಪರ್ ಖಡ್‌ತೀನಿಖ್ಡ್* ಜ್ಞಾನ ಚೂಣಿನ್, ಬೆಬ್ಬೆ ಜ್ಞಣ ಕರೀನ್, ಯೋ ಜ್ಞಾವ್ಣುಕರಿ ಥೋತೆ ಹರೇಕ್ ಗಾಮ್‌ನ ಅಜ್ಜು ಝಗೋನ ಇನೇಥಿ ಅಗಾಡಿ ಇವ್ಣುನ ಮೋಕ್‌ಲೊ.

2 ಮೋಕ್ಲಾನಿ ವಖ್ವತ್‌ಮ ಇವ್ಣುನ, “ಅನಾಜ್ ಜಾಖ್ವತ್ ಲ್ಹಾ, ಕತೋಬಿ ಎಕ್ಚು ಕರಾನ ಕಾಮ್ ಕರಾವಾಳು ಕಮ್ ಲ್ಹಾ. ಇನಖ್ವಾಜೆ ಅನಾಜ್‌ನೊ ಪ್ರಭುನ ‘ತಾರು ಅನಾಜ್‌ನ ಎಕ್ಚು ಕರಾನಖ್ವಾಜೆ ಕಾಮ್‌ವಾಳಾನ ಮೋಕಲ್’ ಕರಿ ಬಿಂತಿ ಕರೊ.

3 ಭಾವೊ! ಭರಕ್‌ನ ಮಹಿ ಮೇಂಡಾವ್ಣ ಮೋಕ್ಲಾತೆ ಇಮ್, ಮೇ ತುಮೂನ ಮೋಕ್ಲಕರುಸ್.

4 ದೇಖೊ, ಪೈಶಾನಿ ಚಂಚಿ ರ್ಲವೊ, ಮಾಂಗಾನಿ ರ್ಲೋಳಿ ರ್ಲವೊ, ಖೋಖ್ಡಾ ರ್ಲವೊ ನಕೊ ಲೀಜಾವೊ. ಜಾವಾನಿ ವಖ್ವತ್‌ಮ, ವಾಟ್‌ಪರ್ ಕಿನಾಬಿ ಖಿಲಾಮ್ ಕರಿ ಬೋಲಿನ್, ವಖ್ವತ್ ಬರ್ಬಾತ್ ನಕೊ ಕರ್ತು.

5 ಎತ್ರೇಸ್ ಕಾಹೆತೆ ತುಮೆ ಖಿವ ಘರ್‌ಮ ಗಯಾತೋಬಿ, ‘ಆ ಘರ್‌ನ ಶಾಂತಿ ಹುವಾದೆ’† ಕರಿ ಬೋಲೊ.

6 ಶಾಂತಿಥಿ ರ್ಲವಾನ ಆಖ್ ಕರಾವಾಳು ಅದ್ವಿ ಹಿಜ್ಜಾ ರ್ಲಯೂತೊ, ತುಮಾರಿ ಆಶೀರ್ವಾದ್ ಇನಾಪರ್ ಟಿಕಶೆ, ನತರ್‌ಕಿ ಯೋ ಆಶೀರ್ವಾದ್ ಪಾಲ್ಟುಫರಿ ತುಮೂನ ಆವ್‌ಶೆ.

7 ಯೋಸ್ ಘರ್‌ಮ ರ್ಲವಾಕರೊ, ಇವ್ಣೆ ಶಾತ್ ದೇಸ್ಕಿ ಯೋ ಖಾವೊ, ಪೀಯೊ. ಕಾಮ್ ಕರಾವಾಳ‡ ಆಳ್ ಕೂಲಿನ ಲ್ಹಾಯೇಕ್ ಎತ್ರೇಸ್. ಇನಖ್ವಾಜೆ ಏಕ್ ಘರ್‌ನ ಮ್ಹಂದಿನ್ ಬಿಜೇಕ್ ಘರ್‌ಮ ಜೈನ್ ನಕೊ ರ್ಲವೊ.

8 ಅಜ್ಜು ತುಮೆ ಖಿವಾತೋಬಿ ಏಕ್ ಗಾಮ್ ಜಾವಾನ ಬಾದ್‌ಮ, ಹಿಜ್ಜಾನು ಅದ್ವಿ ತುಮೂನ ಬುಲೈಲಿದೊತೊ, ಇವ್ಣೆ ಶಾತ್ ದೇಸ್ಕಿ ಯೋ ಖಾವೊ.

* 10:1 10:1 ಗ್ರೀಕ್‌ನು ಥೋಡು ದಪ್ಪರ್‌ನಿ ಭಾಗ್‌ಮ ಖಡ್‌ತೀನಿಖ್ಡ್ ಕರೀಬಿ ಲಿಖ್ತಿರಲ್ಯಾಸ್.

† 10:5 10:5 ಯೆಹೂದ್ಯವಾಳು ಶಾಲೋಮ್ ಕರಿ ಬೋಲಾಸ್. ‡ 10:7 10:7 ಕತೊ ಆಳ್ ಕರಿ ಮತ್‌ಲಬ್

9 ಹಿಜ್ಜಾ ರೋಗ್-ರಾಯಮ ರ್ಹೀಸ್ತೆ ಇವ್ವ ಅಛ್ಚುಕರೊ, ಅಜ್ಜು ಹಿಜ್ಜಾನು ಅದ್ಮಿಖ್ಹಾರಾನ ದೇವ್ನಿ ರಾಜ್ಯ ತುಮಾರ ಖನ್ನೆ ಐರರ್ಹೀಸ್ ಕರಿ ಬೋಲೊ.

10 ಕತೋಬಿ ತುಮೆ ಖೆವಾತೋಬಿ ಏಕ್ ಗಾಮ್ ಜ್ಹಾವಾನ ಬಾದ್‌ಮ, ಹಿಜ್ಜಾನು ಅದ್ಮಿ ತುಮೂನ ನಾ ಬುಲೈಲಿದುತೊ, ಯೋ ಗಾಮ್‌ನಿ ಗಲ್ಲಿಯೇಮ ಜೈನ್,

11 'ಹಮಾರ ಗೋಡಾನ ಲಾಗೀತೆ, ತುಮಾರ ಗಾಮ್‌ನಿ ಧೂಳನ್ ಜಿನ್‌ಕುಬಿ, ಹಮೆ ತುಮಾರಿ ವಿರೋದ್ ಝಟ್ಟಿ ದೆವ್‌ಕರೇಸ್. ಕತೋಬಿ ದೇವ್ನಿ ರಾಜ್ಯ ತುಮಾರ ಖನ್ನೆ ಐರರ್ಹೀಸ್ ಕರಿ ತುಮೂನ ಮಾಲುಮ್ ರ್ಹವಾದೆ ಕರಿ ಬೋಲೊ.'

12 ಮೇ ತುಮೂನ ಬೋಲುಸ್ಸಿ, ನ್ಯಾವ್‌ನಿ ತೀರ್ಪ್‌ನ ದನ್ಮ ಯೋ ಗಾಮ್‌ನಿ ಹಾಲ್, ಸೊದೋಮ್ ಗಾಮ್‌ನಿ ಹಾಲ್‌ಥೀಬಿ ಖರಾಬ್ ರ್ಹಿಶೆ.

ವಿಶ್ವಾಸ್ ಕೊಂತೆ ಖ್ವಯೇರ್‌ನಿ ಬಾರೇಮ

(ಮತ್ತಾಯ 11:20-24)

13 ಅಯ್ಯೋ, ಖೊರಾಜಿನ್ ಖ್ವಯೇರ್, ತಾರಿ ಹಾಲ್ವ ಶಾತ್‌ಬೋಲು ಬೆತ್ಸಾಯಿದ ತುಮಾರಿ ಹಾಲ್ವ ಶಾತ್ ಬೋಲು! ತುಮಾರಾಮ ಚಾಲ್ಯುತೆ ಮಹಾನ್ ಕಾಮ್‌ಖ್ಹಾರು ತೂರ್ ಅಜ್ಜು ಸೀದೋನ್ ಖ್ವಯೇರ್‌ಮ ಚಾಲ್ಯುಹೋತ್ತೊ, ಹಿಜ್ಜಾವಾಳು ಕದೇಸ್‌ಕಿ ಟೈನೊಕೋಥ್‌ಲೊ ಲಪೇಟಿಲೀನ್, ರಾಕ್‌ಮ ಬೇಶಿನ್, ದೇವ್ ಭಣಿ ಫರಿಗಯೂಹೋತ್.

14 ಕತೋಬಿ ನ್ಯಾವ್‌ನಿ ತೀರ್ಪ್‌ನ ದನ್ಮ ತುಮೂನ ಉಷೇತೆ ಹಾಲ್‌ಥೀಬಿ ತೂರ್ ಅಜ್ಜು ಸೀದೋನ್ ಖ್ವಯೇರ್‌ನ ಹುಯುತೆ ಹಾಲತ್ಪರ್ ದೇವ್ ಘಣು ಗೋರ್ ಕರ್ಶೆ.

15 ಕಪೆರ್ನೊಮ್, ತೂ ಪರಲೋಕ್‌ನ ಚಫೀನ್ ಜೈಶ್‌ನ್? ಕೊಯ್ಲಿ! ತುನ ಪಾತಾಳ್‌ನಿ ನಾಕಶೆ!

16 ಯೇಸುನೆ ಇವ್ವುನ್, "ತುಮಾರಿ ವಾತೇನ ಖ್ವಮ್‌ಜ್ಹಾವಾಳು ಮಾರಿ ವಾತೆ ಖ್ವಮ್‌ಜ್ಹಾವಾಳು ಹುಯಿರರ್ಹೊಸ್; ತುಮೂನ ಝಿಟ್ಕಾರವಾಳು

ಮನ ಝಿಟ್ಕಾರವಾಳು ಹುಯಿರ್ದೊಸ್; ಮನ ಝಿಟ್ಕಾರವಾಳು ಮನ ಮೋಕ್ಲೊತೆ ಇನಾಸ್ ಝಿಟ್ಕಾರವಾಳು ಹುಯಿರ್ದೊಸ್” ಕರಿ ಬೋಲ್ಯೊ.

ಬೇ ಉಪ್ಪರ್ ಖ್ವಡ್ತೀನಿಖ್ವ್ ಜಣು ಪಾಲ್ತುಫರಿ ಆಯೊತೆ

17 ಯೋ ಬೇ ಉಪ್ಪರ್ ಖ್ವಡ್ತೀನಿಖ್ವ್ ಜಣು ಘಣು ಖ್ವಿಶಿಥಿ ಪಾಲ್ತುಫರಿ ಆಯಿನ್, “ಪ್ರಭು, ತಾರು ನಾಮ್ ಬೋಲ್ತಾನ ಭೂತ್‌ಖ್ವಾರು ಜಿನ್‌ಕುಬಿ ಹಮಾರಿ ಹುಕುಮ್‌ನ ಮಾನ್ಯು” ಕರಿ ಬೋಲ್ಯೊ.

18 ತದೆ ಯೇಸುನೆ ಇವ್ವುನ, “ಶೈತಾನ್ ವಿಜ್ಞೇನಿಮತ್ ಪರ್‌ಲೋಕ್‌ಥು ಹೇಟ್ ಪಡಾತೆ ಮೇ ದೇಖ್ಚೊ.

19 ಹಂದೇಖೊ, ಖ್ವಾಪ್‌ಪರ್‌ಬಿ, ವಿಛಿಪರ್‌ಬಿ ಚಾಲಾನ ಅಜ್ಜು ದುಶ್‌ಮನ್ನಿ ಖ್ವಾರೀಸ್ ಶಕತ್ ಹರಾವನ ಮೇ ತುಮೂನ ಅದಿಕಾರ್ ದೀರಾಖ್ಚೊಸ್. ಕೆಹೂಬಿ ತುಮೂನ ಖರಾಬ್ ಕೋ ಕರ್‌ಶೇನಿ.

20 ಕತೋಬಿ ಭೂತ್‌ಖ್ವಾರು ತುಮಾರಿ ವಾತೇನ ಖ್ವಿಮ್‌ಜಾಸ್ ಕರಿ ಬೋಲಿನ್ ಖ್ವಿಶಿ ನಕೊ ಕರೊ, ತುಮಾರು ನಾಮ್‌ಖ್ವಾರು ಪರ್‌ಲೋಕ್‌ಮ ಲೀಖ್ಚೆರ್ದೊಸ್ ಕರಿ ಬೋಲಿನ್ ಖ್ವಿಶಿ ಕರೊ”.

ಯೇಸುನೆ ಖ್ವಿಶಿ ಕರ್ದೊತೆ

(ಮತ್ತಾಯ 11:25-27; 13:16-17)

21 ಯೋಸ್ ವಖ್ವತ್‌ಮ ಯೇಸು ಪವಿತ್ರಾತ್ಮೆ ಖ್ವಿಶಿಹುಯಿನ್, ಅಮ್ ಪ್ರಾರ್ಥನೆ ಕರ್ದೊ, “ಬಾ, ಸೊರ್ಗ್ ಅಜ್ಜು ಧರ್ತಿನೊ ಯಜಮಾನ್! ಮೇ ತುನ ಧನ್ಯವಾದ್ ಕರುಸ್. ಶನಕತೊ ತುನೆ ಗ್ಯಾನಿ ಅಜ್ಜು ಅಕ್ಲಿಥಿ ಆ ವಾತೇನ ಲಪಾಡಿನ್, ಲಡ್ಕಾವ್ಣ ಮಾಲುಮ್ ಕರ್ಚೆರಾಖ್ಚೊಸ್. ಓಹೋಲಾ ಬಾ, ಅಮ್ಸ್ ತೂ ಕರ್ದೊ ಕರಿ ಥೊ.

22 ಮಾರೊ ಬಾ ಮನ ಖ್ವಾರುಸ್ ಮಾರ ಹಾತ್ಮ ದೀರಾಖ್ಚೊಸ್, ಛಿಯೊ ಕೋಣ್ ಕರಿ ಬಾನಸ್ ಮಾಲುಮ್ ಪಣ್ಣಿ ಬಿಜಾನ ಕಾಹೆ. ಬಾ ಕೋಣ್ ಕರಿ ಛಿಯೊಸ್ ಪಣ್ಣಿ ಬಿಜು ಕೋಣ್‌ಬಿ ಮಾಲುಮ್

ಕೋಕರಿರಾಖ್ಯಾನಿ. ಅಜ್ಜು ಛಿಯೊಕ್ಕಿ ಕಿನ ಬಾನಿ ಬಾರೇಮ ಮಾಲುಮ್ ಕರಾವಸ್ತಿ, ಇವ್ವೆಸ್ ಬಾನ ಮಾಲುಮ್ ಕರಿಲ್ವಾಳು ಹುಯಿರ್ದೊಸ್”.

23 ಅನ ಬಾದ್‌ಮ ಯೇಸುನೆ ಇನ ಶಿಷ್ಯರ್ ಭಣಿ ಫರೀನ್, ಖಲಿ ಇವ್ವುನ ಬೋಲ್ಯೋಕಿ, “ತುಮೆ ದೇಖುಕರಾಸ್ತೆ ಆ ಖ್ವಾರು ದೇಖವಾಳು ಧನ್ಯರ್ ಹುಯಿರ್ದೊಸ್!

24 ಶನಕತೊ ಘಣು ಪ್ರವಾದಿಖ್ವಾರು ಅಜ್ಜು ರಾಘಖ್ವಾರು ತುಮೆ ದೇಖುಕರಾತೆ ಆ ಖ್ವಾರಾನ ದೇಕ್ಕು ಕರಿ ಆಖ್ವಾ ಕರಲ್ಯತೋಬಿ, ಇವ್ವೆ ದೇಖ್ವು ಕೊಯ್ಲಿ. ತುಮೆ ಖ್ವಮ್‌ಜುಕರಾತೆ ಖ್ವಮ್‌ಜೊಣು ಕರಿ ಆಖ್ವಾ ಕರಲ್ಯತೋಬಿ ಖ್ವಮ್‌ಜ್ಜು ಕೊಯ್ಲಿ ಕರಿ ಮೇ ತುಮೂನ ಬೋಲುಸ್”.

ಯೇಸುನೆ ಗೋರ್‌ಕರಾವಾಳೊ ಸಮಾರಿಯಾನಿ ಮತ್ಲಬ್‌ನಿ ಖೇಣಿನ ಬೋಲ್ಯೋತೆ

25 ತದೆ ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿ ಏಕ್ ಭಣು ಉರಿ ಐನ್, ಯೇಸುನ ಖ್ವಪ್‌ಡಾವ್ವು ಕರಿ, “ಗುರು, ಹಮೇಶಾನಿ ಜಿಂದಾಗಿ ಮಳ್‌ಣುಕತೊ ಮೇ ಶಾತ್ ಕರಲ್ವು? ಕರಿ ಯೇಸುನ ಪುಲ್ಲಾಯೊ.

26 ತದೆ ಯೇಸುನೆ ಇನ, “ಮೋಶೇನು ಧರ್ಮಶಾಸ್ತ್ರಮ ಶಾತ್ ಲಿಖ್ತಿರ್ದೊಸ್? ಇನ ತೂ ಕಿಮ್ ಪಡ್ವೋಡೊ?” ಕರಿ ಪುಲ್ಲಾಯೊ.

27 ಇನೆ ಜವಾಬ್ ದಿದೋಕಿ, “ತಾರೊ ದೇವ್ ಹುಯಿರ್ದೊತ್ತೆ ಪ್ರಭುನ, ತಾರೊ ಪೂರ ದಿಲ್‌ಥೀಬಿ, ತಾರೊ ಪೂರ ಜಾನ್‌ಥೀಬಿ, ತಾರಿ ಪೂರ ಶಕತ್‌ಥೀಬಿ, ತಾರೊ ಪೂರ ಮನ್‌ಥೀಬಿ ಪ್ಯಾರ್ ಕರಲ್ವು ಅಜ್ಜು ತಾರ ಭೀಡೆವಾಳಾನ ತಾರೀನಿಫೋಣಿಸ್ ಪ್ಯಾರ್ ಕರಲ್ವು ಕರಿ ಲಿಖ್ತಿರ್ದೊಸ್” ಕರಿ ಜವಾಬ್ ದಿದೊ.

28 ಯೇಸುನೆ ಇನ, “ತುನೆ ಬರಾಬರ್‌ಥಿ ಜವಾಬ್ ದಿದೊ. ಇಮ್ಮೆಸ್ ಕರ್, ತದೆ ತೂ ಕದೇಬಿ ಜಿವ್ವು ರಕ್ಷಿತ್ ಕರಿ ಬೋಲ್ಯೊ.

29 ಕತೋಬಿ ಯೋ ಅದ್ವಿ ಇನುಯೋಸ್ ಖ್ವಾಚು ಕರಿ ಬೋಲಿ ವತಾಳಿಲ್ಯಾವನಖ್ವಾಜೆ ಆಖ್ವಾಕರೀನ್, “ಮಾರು ಭೀಡೆವಾಳು ಕತೊ ಕೋಣ್?” ಕರಿ ಯೇಸುನ ಪುಲ್ಲಾವಖ್ವತರ್;

30 ಯೇಸು ಇನ ಜವಾಬ್ ದೇತೊಹುಯಿನ್ ಬೋಲ್ಯೋಕಿ, “ಏಕ್ ಅದ್ಮಿ ಯೆರೂಸಲೇಮ್‌ಡು ಟೇಕ್ಡಿ ಉತ್ರಿನ್, ಯೆರಿಕೋ ಭಾವಾನಿ ವಖ್ತಮ್, ಚೋರನ್ ಹಾತ್‌ಮ್ ಖ್ವಪ್‌ಡಿಗಯ್. ಇವ್ಣೆ ಇನಾಕನ ಥೂತೆ ಖ್ವಾರೂಸ್ ಲೂಟಿಲೀನ್, ಮರ್‌ವಾಯೆತ್ರೆ ಮಾರ್‌ತೋಡ್ ಕರೀನ್, ಮ್ಹಂದಿನ್ ಚಲ್ಯಾಗಯ್.

31 ತದೆ ಕಿಮ್ಪಿ, ಏಕ್ ಯಾಜಕ್ ಯೋಸ್ ವಾಟೆಕರಿ ಉತ್ರಿನ್ ಭಾವಾನಿ ವಖ್ತಮ್, ಇನ ದೇಖಿನ್, ವೇಥೀನ್ ಚಲೆಗಯ್.

32 ಇಮ್ಪಸ್ ಏಕ್ ಲೇವಿಬಿ ಯೋ ಝಗೋಕನ ಆಯಿನ್, ಇನ ದೇಖಿನ್, ಮ್ಹೋಡು ಕರ್ವಟ್ ಕರಿಲೀನ್, ಬಿಜೇಕ್ ವಾಟೆ ಚಲೆಗಯ್.

33 ಕತೋಬಿ ಏಕ್ ಸಮಾರ್ಯವಾಳು ಚಾಲ್ತೊಹುಯಿನ್, ಯೋ ಥೋತೆ ಹಿಜ್ಜಾಐನ್, ಇನ ದೇಖಿ ಗೋರ್‌ಖೈನ್,

34 ಇನ ಖನ್ನೆ ಜೈನ್, ಇನ ಫಾವ್‌ಪರ್ ತೇಲ್ ಅಜ್ಜು ದ್ರಾಕ್ಷಿನು ಕಂದಾಯುಹುಯು ರಖ್ವನ್ ನಾಖಿನ್, ಭಂದ್ಪು ಅಜ್ಜು ಇನು ಶೊಂತ್ ಪಾಳ್ಕುಹುಯಾ ಜಾನ್ವರ್‌ಪರ್ ಇನ ಪಳ್ಳಿನ್, ಮಂಡಪ್‌ಕನ ಬುಲೈಲಿ ಜೈನ್, ಇನಿ ಚಾತ್ರಿ ಕರೈನ್.

35 ತಿನವ್ಣಣೆ ಯೋ ಸಮಾರಿಯವಾಳಾನೆ ಬೇ ರೂಪಾನು ಬಿಲ್ಲಾನ ಕಾಡಿನ್, ಛತ್ತರ್‌ವಾಳಾನ ದೀನ್, “ಅನ ದೇಕ್-ಭಾಲ್ ಕರ್, ಆ ಪೈಶಾಧಿ ಭಾಖ್ತೆ ಶಾತ್‌ತೋಬಿ ಖರ್ಚಿ ಹುಯೂತೊ, ಮೇ ಪಾಲ್ಟೊಫರಿ ಆಯಿಶ್‌ತೆ ತದೆ ತುನ ದಿಶ್” ಕರಿ ಬೋಲ್ಯೊ.

36 “ಆ ತೀನ್ ಭಣಾಮ್ ಚೋರ್‌ನ ಹಾತ್‌ಮ್ ಖ್ವಪ್‌ಡ್ಲೊತೆ ಇನ, ಖನ್ನೆವಾಳಾನಿಫೋಣಿ ಹುಯೋತೆ ಕೋಣ್ ಕರಿ ತುನ ಸೋಚಾವಸ್?” ಕರಿ ಪುಲ್ಲಾಯೊ.

37 ತದೆ ಯೋ ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿ, “ಇನಾಪರ್ ಗೋರ್ ಕರೈನ್ತೆ ಯೋಸ್” ಕರಿ ಜವಾಬ್ ದಿದೊ.

ತದೆ ಯೇಸುನೆ ಇನ, “ಜ್ಞಾ, ತೂಬಿ ಇಮ್ಪಸ್ ಕರ್” ಕರಿ ಬೋಲ್ಯೊ.

ಯೇಸು ಮಾರ್ಥ ಅಜ್ಜು ಮರಿಯನ ಘರೆ ಗಯೊತೆ

38 ಯೇಸುಬಿ ಇನು ಶಿಷ್ಯರ್ ಫರ್ತುಹುಯಿನ್ ಏಕ್ ಗಾಮ್ ಆಯು. ಹಿಜ್ಜಾ ಮಾರ್ಥ ಕರಿ ನಾಮ್ನಿ ಏಕ್ ಜಣಾನೆ ಯೇಸುನ ಇನ ಘರ್ಮ ಬುಲೈಲಿದಿ.

39 ಮಾರ್ಥನ ಮರಿಯ ಕರಿ ಏಕ್ ನ್ಹಾನಿ ಭೇನ್ ಥಿ. ಆ ಪ್ರಭುನ ಗೋಡಾಕನ ಬೇಶಿನ್, ಇನಿ ವಚನ್ನ್ ಖ್ವಮ್‌ಜುಕರ್‌ತೀಥಿ.

40 ಜಾಖ್ತ್ ಕಾಮ್ ಥೂತೆ ಇನಖ್ವಾಜೆ ಮಾರ್ಥನೆ ಖಟುಖೈನ್, ಯೇಸುಕನ ಆಯಿನ್, “ಪ್ರಭು, ಮಾರಿ ಭೇನ್ ಮನ ಎಕ್ಕ್‌ಸ್ ಜಣಿನ ಕಾಮ್ ಕರಾದೆಕರಿ ಮ್ಹೇಲಿದಿದೀನಿ, ಆ ಬಾರೇಮ ತುನ ಫಿಕರ್ ಕೊಯ್ತಿಕಿ ಶು? ಮನ ಮದತ್ ಕರಾದೆ ಕರಿ ಇನ ಬೋಲ್‌ಕರಿ ಬೋಲಿ.

41 ಕತೋಬಿ ಪ್ರಭುನೆ ಇನ, “ಮಾರ್ಥ, ಮಾರ್ಥ ತೂ ಕಾಮ್‌ಕೊಂತೆ, ವೇಚ್‌ಣೆಮಾಬಿ, ಘಬ್ರಾಟೆಮಾಬಿ ಖ್ವಪ್‌ಡಿರ್ಟ್ವೆಸ್.

42 ಕತೋಬಿ ಜರೂರತ್ ಹೋಣುತೆ ಎಕ್ಕ್‌ಸ್, ಮರಿಯನೆ ಅಟ್ಟ್ಲಿ ಚೂಣಿರಾಖಿಸ್, ಕೋಣೆಬಿ ಇನೇಥಿ ಯೋ ಕಾಡಾನ ಕೋ ಉಶೇನಿ” ಕರಿ ಬೋಲ್ಯೊ.

11

ಯೇಸುನೆ ಪ್ರಾರ್ಥನೇನಿ ಬಾರೇಮ ಬೋಲಿ ವತಾಳ್ಯೊತೆ

(ಮತ್ತಾಯ 6:9-13; 7:7-11)

1 ಏಕ್ ದನ್ನೆ ಯೇಸು ಏಕ್ ಝಗೋಪರ್ ಪ್ರಾರ್ಥನೆ ಕರುಕರ್ತೊಥೊ. ಪ್ರಾರ್ಥನೆ ಖತಮ್ ಹುವಾನ ಬಾದ್‌ಮ, ಇನ ಶಿಷ್ಯರ್‌ಮ ಏಕ್ ಜಣಾನೆ ಇನ, “ಪ್ರಭು, ಯೋಹಾನನೆ ಇನ ಶಿಷ್ಯರ್‌ನ ಪ್ರಾರ್ಥನೆ ಕರಾನ ಶಿಕಾಡ್ಯೊತೆ ಇಮ್ಮಸ್, ಹಮುನಾಬಿ ಪ್ರಾರ್ಥನೆ ಕರಾನ ಶಿಕಾಡ್” ಕರಿ ಬೋಲ್ಯೊ.

2 ತದೆ ಯೇಸುನೆ ಇವ್ಣುನ, “ತುಮೆ ಪ್ರಾರ್ಥನೆ ಕರಾನಿ ವಖ್ತ್‌ಮ, ಬಾ:

ತಾರು ನಾಮ್ ಪರಿಶುದ್ಧ ಕರಿ ಬೋಲಾವಾದೆ,

ತಾರಿ ರಾಜ್ಯ ಆವಾದೆ.

3 ಹಮೂನ ದನ್‌ಪರೋಜ್‌ನು ಖಾಣು ದೇ.

4 ಹಮಾರಿ ವಿರೋದ್ ಗಲತ್ ಕರಾತೆ ಹರೇಕ್ಸ್, ಹಮೆ ಮಾಪ್ ಕರೇಸ್ತೆ ಇಮ್ಮಸ್, ಹಮಾರಿ ಪಾಪ್ನ ಮಾಪ್ ಕರ್. ಹಮೂನ ಕರಣ್ ಶೋದನೆಮ ನಕೊನಾಕ್ ಕರಿ ಬೋಲಿಲೆವೊ ಕರಿ ಬೋಲ್ಯೊ.

5 ಅಜು ಯೇಸುನೆ ಇನ ಶಿಷ್ಯರ್‌ನ, “ತುಮಾರಾಮ ಏಕ್ ಜಣೊ ಅಧಿರಾತ್ಮ ಏಕ್ ದೋಸ್ತಾನ ಘರ್‌ಕನ ಜೈನ್, ‘ದೋಸ್ ಮನ ತೀನ್ ರೋಟಾ ಉಧಾರ್ ದೇ.

6 ಮಾರೊ ದೋಸ್ತಾಮ ಏಕ್ ಜಣೊ ಕಿಜ್ಜಾಕಿ ಒಳೆಜಾತೊಧೋತೆ ವಖ್ತಾಮ, ಮಾರ ಘರ್‌ಕನ ಐರ್ಟ್ಲೊಸ್. ಇನ ಖಾಣು ಖಡಾವಾನ ಮಾರಕನ ಶಾಪ್ತಿ ಕೊಯ್ತೆ ಕರಿ ಬೋಲ್ಯೊ.

7 ತದೆ ಯೋ ದೋಸ್ ಘರ್‌ನ ಮಹಿಧೋಸ್ ಇನ, ‘ಮನ ಖ್ತಾವ್ ನಕೊ; ಹಮೆ, ಬಾಕಲ್ ಮೂಚ್ಚೆರ್ಟ್ಲೊಸ್; ಮಾರ ಅಡ್ಡಾಣಿ ಲಡ್ಕಾ ಮಾರ ಜೋಡೆ ಖ್ತಾವ್. ಮೇ ಉರೀನ್, ತುನ ಶಾಪ್ತಿ ದೈವಾನ ಕೋ ಹುವಾನಿ’ ಕರಿ ಜವಾಬ್ ದಿದೊತೋಬಿ ದಿಯ್ಜಾಯ್.

8 ತೋಬಿ ದೋಸ್ತಾನಖ್ವಾಜೆ ಉರೀನ್ ನಾ ದಿದೊತೋಬಿ, ಯೋ ಖ್ವರ್ಮಾವಸ್‌ಕೊಂತೆ ಮಾಂಗ್‌ತೋಸ್ ರೆಪ್ಪೆ ಕರಿ ಬೋಲಿನ್, ಉರಿ ಐನ್ ಯೋ ಬೋಲಾತೆಯೆತ್ರು ಇನ ದಿಶೆ ಕರಿ ಮೇ ತುಮೂನ ಬೋಲುಸ್” ಕರಿ ಬೋಲ್ಯೊ.

9 “ಇನಖ್ವಾಜೆ ಮೇ ತುಮೂನ ಬೋಲುಸ್ಕಿ, ಮಾಂಗಿಲೆವೊ, ತುಮೂನ ದೇವಾವಾಶೆ. ಡೊಂಡೊ, ತುಮೂನ ಮಳ್‌ಶೆ. ಬಾಕಲ್‌ಪರ್ ಮಾರೊ, ತದೆ ತುಮೂನ ಬಾಕಲ್ ಕಾಡ್‌ಶೆ.

10 ಶನಕತೊ, ಮಾಂಗವಾಳ ಹರೇಕ್‌ನ ದೇವಾವಾಶೆ, ಡೊಂಡವಾಳನ ಮಳ್‌ಶೆ, ಬಾಕಲ್ ಖಟ್‌ಖಟಾವಸ್ಕಿ ಇನ ಕಡಾವಾಶೆ.

11 ತುಮಾರಾಮ, ಬಾ ಹುಯಿರ್ಟ್ಲೊತೆ ಕೋಣ್‌ತೋಬಿ ಮಾಲ್ಟಾಲು ಮಾಂಗವಾಳ ಛಿಯ್ಯಾನ, ಖ್ವಾಪ್ ದಿಶುಕಿ ಶು?

12 ನತರ್‌ಕಿ ಇಂಡು ಮಾಂಗಾತೆ ಛಿಯ್ಯಾನ, ವಿಛ್ಛಿ ದಿಶುಕಿ ಶು?

13 ಇಮ್‌ಕತೊ, ಖರಾಬ್ ಹುಯಿರ್ದಾತೆ ತುಮೇಸ್, ತುಮಾರ ಲಡ್ಕಾವ್ ಅಫ್ಫು ರಾಫುಖ್ಹಾರು ದೆವಾಪರ್, ಪರಲೋಕ್‌ನೊ ತುಮಾರೊ ಬಾ, ಇನಾಕನ ಮಾಂಗಿಲ್ಯವಾಳನ ಕೈಯೆಕ್ಲಿ ಜಾಫ ಪವಿತ್ರಾತ್ಮನ ದಿಶೆ ಕೊಯ್ತಿಕಿ ಶು?” ಕರಿ ಬೋಲ್ಯೊ.

ಯೇಸು ಅಜ್ಜು ಬೆಲ್ಜಬೂಲ್

(ಮತ್ತಾಯ 12:22-30; ಮಾರ್ಕ 3:20-27)

14 ಏಕ್ ಹಲ್ಲ ಯೇಸು ಮುಕ್ಲೊ ಭೂತ್‌ನ ನಖ್ಹಡುಕರ್ತೊರ್‌ಫೊ. ಕದೆ ಯೋ ಮುಕ್ಲೊ ಭೂತ್ ನಿಕ್ಕಿಗಯೂಕಿ, ತದೆ ಯೊ ಅದ್ನಿ ವಾತೆ ಬೋಲಾಲಗ್ಲು, ಅನ ದೇಖಿನ್, ಅದ್ನಿಖ್ಹಾರು ಆಶ್ಚರ್ಯಖಾದು.

15 ಕತೋಬಿ, ಇವ್ಣಾಮ ಥೋಡು ಜಣು, “ಆ, ಭೂತ್ ಖ್ಹಾರಾನೊ ಯಜಮಾನ್ ಹುಯಿರ್ದಾತೆ ಬೆಲ್ಜಬೂಲ್‌ನೊ ಶಕಡ್ಲಿ ಭೂತ್ ಖ್ಹಾರಾನ ಕಾಡಸ್ತೆ” ಕರಿ ಬೋಲ್ಯೊ.

16 ಬಿಜ್ಜು ಥೋಡು ಜಣು ಯೇಸುನ ಖ್ಹಪ್‌ಡಾವ್ಣು ಕರಿ, “ತೂ ಆಬಾಮ ಏಕ್ ಅದ್ಭುತ್ ಕರಿನ್ ವತಾಳ್” ಕರಿ ಇನ ಬೋಲ್ಯೊ.

17 ಯೇಸುನೆ ಇವ್ಣಿ ಸೋಚ್ಚು ಮಾಲುಮ್ ಕರಿಲೀನ್, ಇವ್ಣುನ ಬೋಲ್ಯೊಕಿ, “ಇವ್ಣ-ಇವ್ಣಾಮಸ್ ಭಾಗ್‌ಪಡೆಲ್ಯವಾನೊ ರಾಜ್ಯ ಬರ್ಬಾತ್ ಹುಯಿಜಾಸ್, ಇವ್ಣ-ಇವ್ಣಾಮಸ್ ಭಾಗ್‌ಪಡೀನ್, ಲಗಾತ್ ಭೇಡಾಲಗಸ್ತೆ ಘರ್ ತುಟಿಜಾಸ್,

18 ಇಮ್‌ಸ್ ಶೈತಾನ್, ಇನಿ ವಿರೋದ್ ಯೋಸ್ ಭೇಡಾಲಗ್ಲೊತೊ, ಇನಿ ರಾಜ್ಯಕಿಮ್ ಬಚ್‌ಶೆ? ಮೇ ಬೆಲ್ಜಬೂಲ್‌ನಿ ಶಕಡ್ಲಿ ಭೂತ್ ಕಾಡುಸ್ ಕರಿ ತುಮೆ ಬೋಲೋಸ್‌ನಿ.

19 ಮೇ ಬೆಲ್ಜಬೂಲ್‌ನಿ ಶಕಡ್ಲಿ ಭೂತ್‌ಖ್ಹಾರು ಕಾಡ್ತೊ ಉಶೇತೊ, ತುಮಾರು ಅದ್ನಿಕಿನಿ ಶಕಡ್ಲಿ ಭೂತ್‌ಖ್ಹಾರು ಕಾಡಸ್. ಅನಖ್ಹಾಜೆ ಇವ್ಣೆಸ್ ತುಮೆ ಗಲತ್ ಕರಿ ನ್ಯಾವ್ ಘೇಡ್‌ಶೆ.

20 ಕತೋಬಿ ಮೇ ದೇವ್ನಿ ಶಕಡ್ಲಿ ಭೂತ್‌ಖ್ಹಾರನ ಕಾಡ್ತೊ ಉಶೇತೊ, ದೇವ್ನಿ ರಾಜ್ಯ ತುಮಾರಕನ ಐಗೈ ಕರಿ ಆಸ್ ವತಾಳಸ್.

21 ಏಕ್ ಶಕತ್‌ವಾಳೊ, ಲರೊ, ತಲ್ವಾರ್ ಅಜು ಜಂಗ್ ಭಿಡಾನ ಹೋಣುತೆ ಖ್ವಾರಿಸ್ ತೈಯಾರಿ ಕರಿಲೀನ್, ಇನ ಘರ್‌ನ ವಖ್ವತಿ ಕರಾನಿ ವಖ್ವತ್‌ಮ, ಇನು ರಾಲ್ತುಖ್ವಾರು ಭತನ್‌ಧೀಸ್ ರಕ್ಷೀಸ್.

22 ಕತೋಬಿ, ಇನೇಥಿಬಿ ಶಕತ್‌ವಾಳೊ ಐನ್ ಇನ ಹರಾವನ ಬಾದ್‌ಮ, ಯೋ ಮಾಲಿಕ್ ಇನ ಘರ್‌ನ ಭತನ್‌ಧಿ ರಾಖಾನಟೀಕೆ, ರಾಖಿರಾಖ್ಯೊಥೋತೆ ಖ್ವಾರುಸ್ ರಾಲ್ತಾನ ಥಿನೈಲಿನ್, ಇನೆ ಲೂಟಿಲಿದೊ ಯೋ ಖ್ವಾರಾನ, ಇವ್ವ ಅದ್ಮಿಮ ವಾಟಪಾಡಿಲೆಸ್.

23 ಮಾರ ಭಣಿ ರಕ್ಷೀಯಿಕೊಂತೆ ಇವ್ವೆ ಖ್ವಾಚಮಾಬಿ ಮಾರು ವಿರೋದಿ ಹುಯಿರಲ್ವೊಸ್. ಮಾರ ಜೋಡ್ಕ ಎಕ್ವು ಕರಾನ ಮದತ್ ಕರಾಕೊಂತೆ ಇವ್ವೆ ಖ್ವಾಚಮಾಬಿ ಥಿಡ್‌ಗರ್ ಕರಾವಾಳೊ ಹುಯಿರಲ್ವೊಸ್.

ಭೂತ್ ಪಾಲ್ಟುಫರಿ ಆವಸ್ತೆ ಬಾರೇಮ (ಮತ್ತಾಯ 12:43-45)

24 ಏಕ್ ಅದ್ಮಿಮಾಥು ಭೂತ್ ನಿಕ್ಕಿಜಾವಾನ ಬಾದ್ಮ ಅರಾಮ್ ಕರಾನಖ್ವಾಜೆ ಝಗೊ ಥೂಂಡ್‌ತುಹುಯಿನ್, ಪಾಣಿಕೊಂತೆ ಝಗೋಮ ವನ್‌ವನ್ನು ರಕ್ಷೀಸ್. ಕತೋಬಿ ಅರಾಮ್ ಕರಾನ ಝಗೊ ಮಳಾಕೊಂತೆ ದೇಖಿನ್, ಯೋ ಭೂತ್ ಇನುಯೋಸ್, 'ಮೇ ಮ್ಹೊದಿನ್ ಆಯೋತೆ, ಮಾರ ಘರೆ ಪಾಲ್ಟೊಫರಿನ್ ಆವುಸ್ ಕರಿ ಬೋಲಿನ್,

25 ಯೋ ಘರ್‌ಕನ ಪಾಲ್ಟೊಫರಿ ಆಯಿನ್, ಯೋ ಝಡೈನ್, ಅಚ್‌ಕಟ್ ಹುಯಿರಲ್ವೊತೆ ದೇಖಸ್.

26 ತದೆ ಹಿಜ್ಜಾಥೊ ಜೈನ್, ಇನೇಥಿಬಿ ಖರಾಬ್ ಹುಯಿರಲ್ವೊತೆ ಬಿಜು ಖ್ವಾತ್ ಭೂತ್‌ನ ಬುಲೈಲ್ಯಾವಸ್, ಯೋ ಖ್ವಾರು ಇನ ಮಹಿ ಪೇಶಿನ್ ಹಿಜ್ಜಾಸ್ ರ್ವವಾಲಗಸ್. ತದೆ ಯೋ ಅದ್ಮಿನಿ ಖ್ವರ್ತಿಮಾನಿ ಹಾಲ್, ಪಹಿಲೆಥಿಬಿ ತೀರ್‌ಚಾಸ್ ಬಿಗ್‌ಡಿಜಾಸ್" ಕರಿ ಬೋಲೊ.

ಖ್ವಾಚಿ ಖ್ವುಶಿ

27 ಯೇಸು ಆ ವಾತೆಖ್ಹಾರು ಬೋಲುಕರಾನಿ ವಖ್ಹತ್‌ಮ, ಅದ್ವಿನಿ ಝೂಂಡ್‌ಮಾಥು ಏಕ್ ತಯೇಡಾನೆ, “ತುನ ಜುಣಿನ್, ದೂದ್ ಪಿಡೈನ್, ಪಾಳಿತೆ ಯೋ ತಯೇಡ ಧನ್ಯ ಹುಯಿರ್ದ್ವಿಸ್!” ಕರಿ ಚಿಕ್ರಿನ್ ಬೋಲಿ.

28 ತದೆ ಯೇಸುನೆ, “ಇನೇಥಿಬಿ, ದೇವ್ನಿ ವಚನ್ನ್ ಖ್ವಮ್‌ಜೀನ್, ಇನ ಪಾಡಿಫಾಲವಾಳುಸ್ ಧನ್ಯರ್ ಹುಯಿರ್ದ್ವಿಸ್” ಕರಿ ಬೋಲ್ಯೊ.

ಅದ್ಭುತ್ ಕರಿ ದೆಖಾಡ್ ಕರಿ ಬೋಲ್ಯೊತೆ
(ಮತ್ತಾಯ 12:38-42)

29 ಅದ್ವಿ ಝೂಂಡೆ-ಝೂಂಡೆ ಭರೈನ್ ಆವ್‌ಕರಾನಿ ವಖ್ಹತ್‌ಮ, ಯೇಸುನೆ ಇವ್ಣುನ, “ಆ ಪಿಳ್ಳಿ ಖರಾಬ್ ಪಿಳ್ಳಿ ಹುಯಿರ್ದ್ವಿಸ್! ಅವ್ಣೆ ಅದ್ಭುತ್ ಕಾಮ್ ದೇಕ್ಪು ಕರಿ ಆಖ್ತ್ ಕರಾಸ್, ಕತೋಬಿ ಯೋನಾನಿ ಜಿಂದ್‌ಗೀಮ ಚಾಲ್ಯುತೆ ಅದ್ಭುತಾಸ್ ಪಣ್ಣಿ ಬಿಜು ಅದ್ಭುತ್ ಅವ್ಣುನ ಕೋ ಮಳ್‌ಶೇನಿ.

30 ಯೋನ ನಿನವೆ ನಂಗರ್‌ವಾಳನ ಖ್ವಣೇದ್ ಹುಯಿರ್ದ್ವೊಡೊತೆ ಇಮ್ಮಸ್, ಅದ್ವಿನೊ ಥಿಯೊ ಆ ಪಿಳ್ಳಿವಾಳಾನ ಖ್ವಣೇದ್ ಹುಯಿರ್ದ್ವೊಸ್.

31 ನ್ಯಾವ್‌ನ ತೀರ್ಪ್‌ನ ದನ್ಯ ಶೇಬಾನಿ ರಾಣಿ ಉರಿ ಭೀರಿನ್, ಆ ಪಿಳ್ಳಿವಾಳಾನ, ‘ತುಮೆ ಅಪರಾದಿ’ ಕರಿ ಬೋಲ್‌ಶೆ. ಯೋ ಸೊಲೊಮೋನ್ನಿ ಚಾತುರ್* ವಾತೇನ ಖ್ವಮ್‌ಜಾನಖ್ವಾಜೆ ಧರ್ತಿನ್ ಕೈಯೆಕ್ತಿ ದಖ್ಪನ್‌ಥಿ ಆಯಿ. ಕತೋಬಿ ಮೇ ತುಮೂನ ಬೋಲುಸ್ಸಿ, ಸೊಲೊಮೋನ್‌ಥೀಬಿ ಮೋಟೊ ಹಜ್ಜಾ ಲ್ಲಾ.

32 ನ್ಯಾವ್‌ನ ತೀರ್ಪ್‌ನ ದನ್ಯ ನಿನವೆ ನಂಗರ್‌ವಾಳು ಉರಿ ಭೀರಿನ್, ಆ ಪಿಳ್ಳಿವಾಳಾನ, ‘ತುಮೆ ಅಪರಾದಿ’ ಕರಿ ಬೋಲ್‌ಶೆ. ಇವ್ಣೆ ಯೋನಾನೆ ಬೋಲ್ಯೊತೆ ವಚನ್ನ್ ಖ್ವಮ್‌ಜೀನ್, ದೇವ್ ಭಣಿ ಫರಿಗಯು; ಕತೋಬಿ ಮೇ ತುಮೂನ ಬೋಲುಸ್ಸಿ, ಯೋನಾಥೀಬಿ ಮೋಟೊ ಹಜ್ಜಾ ಲ್ಲಾ!

* 11:31 11:31 ಗ್ಯಾನ್ನಿ ವಾತೆ ಕರೀಬಿ ಹುವಾಸ್.

ಶರೀರ ಉಜ್ಜಾಳು

(ಮತ್ತಾಯ 5:15; 6:22-23)

33 ಕೋಣ್‌ಬಿ ದೀವೊ ಖ್ವಲ್‌ಗೈನ್, ಲಪಾಡಿನ್ ರ್ವವೊ, ನತರ್‌ಕಿ ಕೋಳಾನ್‌ಹೇಟ್ ರ್ವವೊ ಮ್ಹೇಲಾಕೊಯ್ನಿ. ಘರ್‌ನ ಮಹಿ ಆವಾಳಾನ್ ಉಜ್ಜಾಳು ದೆಖಾವಾನಿಘೋಣಿ, ದೀವೊ ಮ್ಹೇಲಾನಿ ಖಂಬಾಪರ್ ಮ್ಹೇಲಾಸ್.

34 ತಾರ ಡೋಳಾ ಶರೀರ್‌ನ ದಿವಾನಿಘೋಣಿ ಹುಯಿರ್ವ್ವಸ್. ತಾರ ಡೋಳ ಬರೋಬರ್ ರ್ವಯಾತೊ, ತಾರು ಶರೀರ್ ಅಖ್ವಸ್ ಉಜ್ಜಾಳು ರ್ವಿಶೆ: ಕತೋಬಿ ತಾರ ಡೋಳ ಖರಾಬ್ ರ್ವಯಾತೊ, ತಾರು ಶರೀರ್ ಅಖ್ವಸ್ ಅಂಧಾರು ಹುಯಿಜ್ಜಾಶೆ

35 ಇನಖ್ವಾಜೇಸ್, ತಾರು ಉಜ್ಜಾಳು ಅಂಧಾರು ನಾ ಹೋಣುತೆ ಇಮ್ ದೇಖಿಲೆ.

36 ತದೆ ತಾರು ಆಂಗ್-ತನ್ ಅಖ್ವಸ್ ಉಜ್ಜಾಖ್ವ್ವಿ ಭರೈನ್, ಖಿವಿ ಬಾಜುಮಾಬಿ ಅಂಧಾರು ನಾರ್ವಯುತೊ, ಯೋ ಉಜ್ಜಾಖ್ವ್ವಿ ಖಾರಿಸ್ ಬಾಜುಮ ಘೈಗ್‌ಶೆತೆ ಇಮ್ವಸ್, ದೀವೊ ಘೈಗಾನಿ ವಖ್ವತ್‌ಮ ಇನು ಉಜ್ಜಾಖ್ವ್ವಿ ತಾರಪರ್ ಘೈಗ್‌ಶೆ, “ಕರಿ ಬೋಲ್ಯೊ.

ಯೇಸುನೆ ಫರಿಸಾಯರ್ ಅಜು ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳ ಶಾಸ್ತ್ರಿಯೇಪರ್ ಗಲತ್ ಲಗಾಡ್ಲೊತೆ

(ಮತ್ತಾಯ 23:1-36; ಮಾರ್ಕ 12:38-40)

37 ಯೇಸುನೆ ವಾತೆ ಬೋಲಿನ್ ಖತಮ್ ಕರಾನ್ ಬಾದ್‌ಮ, ಫರಿಸಾಯರ್‌ವಾಳೊ ಏಕ್ ಜಣಾನೆ ಯೇಸುನ ಖಾಣನ ಬುಲಾಯೊ. ತದೆ ಯೇಸು ಇನ ಘರ್‌ನ ಮಹಿ ಜೈನ್, ಖಾಣನ ಬೇಶಿಗಯೊ.

38 ಯೇಸುನೆ ಹಾತ್ ಧೋಯೊಕೊಂತೆ ಖಾಣನ ಬೆರೂತೆ ಯೋ ಫರಿಸಾಯವಾಳನೆ ದೇಖಿನ್, ಆಶ್ಚರ್ಯಹುಯು.

39 ತದೆ ಪ್ರಭುನೆ ಇನ, “ಫರಿಸಾಯರ್ ಹುಯಿರ್ವ್ವಾತೆ ತುಮೆ ತುಮಾರು ಹಂಡ್‌ಕು ಅಜು ಥಾಳಿ ಭಾರ್ ಪಾಕ್‌ಧಿ ಮಾಂಜಸ್. ಕತೋಬಿ ತುಮಾರ ಮಹಿ ರಗಾವಾನು ಅಜು ಖರಾಬ್ ಚಾಲ್ ಭರೈರ್ವ್ವಾಸ್.

40 ಖ್ವಿಯಾಲ್‌ಭರಾ! ಭಾರ್‌ಲ್ಯು ಬಣಾಯೋತೆ ದೇವ್‌ನೇಸ್, ಮಹಿನೂಬಿ ಬಣೈರಾಖ್ಯೊಸ್ಸಿ.

41 ಅನಖ್ವಾಜೆಸ್ ಮಹಿ ಲ್ಹಾತೆ ಇನ ಗೋರ್‌ಗರೀಬ್‌ನ ದೆವೊ, ತದೆ ತಮಾಮ್ ರಾಘು ತುಮಾರಖ್ವಾಜೆ ಪಾಕ್ ಹುಯಿಜಾಶೆ.

42 ಅಲಾ ಫರಿಸಾಯರ್‌ವಾಳ, ತುಮಾರಿ ಹಾಲ್ವ ಶಾತ್ ಬೋಲು! ತುಮೆ ದೇವ್ನ ತುಮಾರಕನ ಲ್ಹಾತೆ ಹರೇಕ್‌ಮ ದಖ್ವೊಮ ಏಕ್ ಭಾಗ್ ದೆವೋಸ್; ತುಮೆ ಪಿಕಾವಸ್ತೆ ಖ್ವಾರಿಸ್ ತರಾನ್ವು ಣಡಿಬೂರಿನ ಅಜ್ಜು ಪುದೀನ, ಸದಾಪುಮಾಬಿ ಭಾಜಿಯೇಮ ದಖ್ವೊಮ ಏಕ್ ಭಾಗ್ ದೆವೋಸ್. ಕತೋಬಿ ನ್ಯಾವ್‌ಥಿ ಚಾಲಿಲ್ಯವಾನ ಅಜ್ಜು ಪ್ಯಾರ್ ವತಾಳನು ತುಮೆ ಬೈಕಿಗಯ. ಪಹಿಲೆ ತುಮೆ ಆ ಖ್ವಾರು ಕರಾನ ಆದತ್ ಕರಿಲೇವ್ಚು ಅಜ್ಜು ಯೋ ಖ್ವಾರುಬಿ ನಾ ಬೈಕ್‌ಣು.

43 “ಫರಿಸಾಯರ್‌ವಾಳ, ತುಮಾರಿ ಹಾಲ್ವ ಶಾತ್ ಬೋಲು! ಸಬೆ ಭರಾವನು ಮಂದಿರ್‌ಮ ಪಹಿಲಿ ಝಗೊ ದೈವಾನುಸ್ ತುಮೂನ ಪ್ಯಾರ್, ಅಜ್ಜು ದುಕಾನೇನಿ ಗಲ್ಲಿಯೇಮ ತುಮೂನ ಖ್ವಲಾಮ್ ಕರಾನ್ ಕರಿ ಬೋಲನುಸ್ ತುಮಾರಿ ಆಖ್ವೊ!

44 ತುಮಾರಿ ಹಾಲ್ವ ಶಾತ್ ಬೋಲು! ತುಮೆ ದಬಿಗಯೂತೆ ಮಖ್ವಾಣ್ಯನಿಘೋಣಿ ಲ್ಹಾ. ಇನಾಪರ್ ಚಾಲವಾಳ ಅದ್ವಿನ ತುಮೆ ಮಖ್ವಾಣ್ಯಕರಿ ಮಾಲುಮ್ ಕೊಯ್ಚಿ.

45 ತದೆ ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯ ಏಕ್ ಜಣು ಯೇಸುನ, “ಗುರು, ಆ ವಾತೆ ಬೋಲಾಥಿ ತೂ ಹಮುನಾಬಿ ಖ್ವರಮ್ ಕಾಡದಾಖ್ವೊ ಹುಯು” ಕರಿ ಬೋಲೊ.

46 ಯೇಸುನೆ ಜವಾಬ್ ದಿದೋಕಿ, “ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳ ಶಾಸ್ತ್ರಿಯೆ, ತುಮಾರಿ ಹಾಲ್ವಬಿ ಶಾತ್ ಬೋಲು! ತುಮೆ ಅದ್ವಿಪರ್ ಥೊವಾನ ಹುವಾಕೊಂತೆ, ಎತ್ರೊ ಬೋಞೊ ನಾಖೋಸ್. ಕತೋಬಿ ತುಮೇತೊ, ಯೋ ಭೋಜಾನ ಏಕ್ ಅಂಗ್‌ಳಿಥೀಬಿ ಛೀಮಕೊಯ್ಚಿ.

47 ತುಮಾರಿ ಹಾಲ್ವ ಶಾತ್ ಬೋಲು! ತುಮೆ ಪ್ರವಾದಿಯೇನಖ್ವಾಜೆ

ಅಲ್ಲಿ-ಅಲ್ಲಿ ಮಖ್ಯಾಣ್ಯನಿ ಘವಿಯೇನ ಬಣಾವೋಸ್, ಇವ್ವುನ ಮಾರ್ಯತೆ ತುಮಾರ ಗುರುಗುರಬ್ಲನೇಸ್.

48 ಅನೇಥಿ ತುಮಾರ ಗುರುಗುರಬ್ಲನೇ ಕರ್ಮತೆ ಇನ, ತುಮೇಸ್ ಸಾಕ್ಷಿ ಹುಯಿರಾಸ್. ಇವ್ವ ಕಾಮ್‌ಅಖ್ಯಾನ ಮಾನಿಲಿದ ಕರಿ. ಕಿಮ್‌ಕತೊ ಇವ್ವೆ ಪ್ರವಾದಿಯೇನ ಮಾರ್ಯ್ ತುಮೆ ಯೋ ಮಖ್ಯಾಣ್ಯನಿ ಘವಿಯೇನ ಭಾಂದೋಸ್.

49 ಅನಖ್ಯಾಜೆಸ್ ದೇವ್ನಿ ಗ್ಯಾನ್ ಬೋಲಸ್ಕಿ, “ಮೇ ಇವ್ವಾಕನ ಪ್ರವಾದಿಯೇನಾಬಿ, ಅಪೊಸ್ತಲರ್‌ನಾಬಿ ಮೋಕ್ಲೇಶ್, ಇವ್ವಾಮ ಥೋಡ ಜ್ಞಾನ ಮಾರಿನಾಕಶೆ ಅಜ್ಜು ಥೋಡ ಜ್ಞಾನ ಖ್ವಿತಾವ್‌ಶೆ.

50 ಅನಖ್ಯಾಜೆಸ್, ಜಗತ್ ಉಬ್‌ಜೂತೆ ತಪ್‌ಥು ಮರೈನಾಖಿ ದಿದೂತೆ ತಮಾಮ್ ಪ್ರವಾದಿಯೇನು ಮೋತ್‌ನ, ಆ ಜಗ್‌ನು ಅದ್ಮಿಹುಯಿರಾತ್ತೆ ತುಮೂನ ದಂಡ್ ಮಳಶೆ!

51 ಹೇಬೆಲ್‌ಥು ಧರೀನ್, ಬಲಿನಿ ಚಾಚರ್ ಅಜ್ಜು ಮಂದಿರ್‌ನ ಇಚ್‌ಮ ಮರೈ ನಾಖ್ಯತೆ ಜಕರೀಯನು ಮೋತ್‌ತೋಡಿನು ದಂಡ್ ತುಮೂನ ಮಳಶೆ. ಒಹೊ, ಮೇ ತುಮೂನ ಬೋಲಸ್ಕಿ ಯೋ ಖ್ವಾರಾವ್‌ನಟೀಕೆ ಆ ಜಗ್‌ನು ಅದ್ಮಿನ ದಂಡ್ ಮಳಶೆ!

52 ಮೋಶೆನಿ ಧರ್ಮಶಾಸ್ತ್ರ ಶಿಕಾಡವಾಳ ಶಾಸ್ತ್ರಿಯೆ ತುಮಾರಿ ಹಾಲ್ವ ಶಾತ್ ಬೋಲು! ದೇವ್ನಿ ಬಾರೇಮ ಶಿಕಾನಟೀಕೆ ಛಾತೆ ಬೀಗಾನ ತುಮೇಸ್ ರಾಖಿಲಿದ, ತುಮೇಬಿ ಮಹಿ ಜಾಯ್‌ಕೊಯ್ನಿ, ಬಿಜಾನಾಬಿ ಜಾವಾನ ಕೋ ಮ್ವೇಲಾನಿ” ಕರಿ ಬೋಲ್ಯೊ.

53 ಯೇಸು ಹಿಜ್ಜಾಥೊ ನಿಕ್ಕಾನಿ ವಖ್ವತ್‌ಮ, ಮೋಶೆನಿ ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯೆ ಅಜ್ಜು ಫರಿಸಾಯರ್‌ವಾಳು ಯೇಸುನಿ ಚಾವ್‌ಣ್ಯ ಕಾಡ್ಲ್ಯ, ಅಜ್ಜು ಘಣಿ ಬಾರೇಮ ಇನ ಪುಲ್ಲಾಯು.

54 ಯೇಸುನಿ ವಾತೇಮ ಶಾತ್‌ತೋಬಿ ಗಲತ್ ಮಳಾಸ್ಕಿ ಶುಕಿ ಕರಿ, ಇನ ಖ್ವಪ್‌ಡಾವಾನಟೀಕೆ ಘಣು ಕೋಶಿಷ್ ಕರ್ಮ್.

12

ಪರಿಸಾಯರ್‌ನು ಮಹಿ ಏಕ್ ಭಾರ್ ಏಕ್ ಬೋಲಾನಿ ಬಾರೇಮ

ಯೇತಾವ್ವಿ

(ಮತ್ತಾಯ 10:26-27)

1 ಎತ್ರಾಸ್‌ಮ ಹಜಾರೊ ಅದ್ಮಿನಿ ಭೀಡ್ ಉಪ್ರಾಧಾಳಿ ಪಡ್ತುಹುಯಿನ್, ಎಕ್ವ ಹುಯು. ತದೆ ಯೇಸುನೆ ಪಹಿಲೆ ಇನ ಶಿಷ್ಯರೊನ್, “ಫರಿಸಾಯನು ಶೋಡನು ಆಟಾನಿ ಬಾರೇಮ ಕತೊ, ಇವ್ಣೆ ರಗಾವನಿ ಬಾರೇಮ ಭತನ್‌ಧಿ ರ್ಹವೊ,

2 ಲಪೈರ್ಟ್ತೆ ಖ್ವಾರುಸ್ ಭಾರ್ ದೆಖಾವ್‌ಶೆ, ಖ್ವಾರಿಸ್ ಖ್ವಾಚಿ ವಾತೆ ಭಾರ್ ಮಾಲುಮ್ ಪಡ್‌ಶೆ.

3 ಅನಖ್ವಾಜಿಸ್, ತುಮೆ ಅಂಧಾರಾಮ ಬೋಲ್ಯಾತೆ ಯೋ ಖ್ವಾರು, ದನ್ನು ಉಜಾಳಾಮ ಖ್ವಮ್‌ಜಾವ್‌ಶೆ, ಅಜು ಕೋಣಮ ಲಪೀನ್, ಕಾನ್‌ಮ ಶಿಕಾಡಿ ಬೋಲಾಸ್ತೆ ಖ್ವಾರಿಸ್ ವಾತೆ ಘರ್‌ನ ಲ್ಲತ್‌ಪರ್‌ಥು ಖ್ವಮ್‌ಜಾವ್‌ಶೆ.

ಕಿನ ದೇಖಿನ್ ಡರ್ಟ್

(ಮತ್ತಾಯ 10:28-31)

4 “ಮಾರ ದೋಸ್ ಹುಯಿರ್ಟ್ತೆ ತುಮೂನ, ಮೇ ಬೋಲುಸ್ಕಿ, ಶರೀರೊನ್ ಮರ್‌ನಾಖಿನ್, ಇನೇಧಿ ಜಾಖ್ತ್ ಶಾತ್ವಿ ಕರಾಕೊಂತೆ ಇವ್ಣು ನ ದೇಖಿನ್, ನಕೊ ಡರ್‌ಶು.

5 ಕತೋಬಿ ತುಮೆ ಕಿನ ದೇಖಿನ್ ಡರ್ಟ್ ಕರಿ ಮೇ ತುಮೂನ ಬೋಲಿದೆವುಸ್, ಮರಿಜಾವನ ಬಾದ್‌ಮ, ನರಕ್ ನಾಖಾನಿ ಅದಿಕಾರ್ ರ್ಹವಾಳೊ ದೇವ್ವ ದೇಖಿನ್ ಡರೊ. ಓಹೊ, ಇನ ಎಕ್ವಸ್ ಜಣಾಧಿ ತುಮೆ ಡರ್ಟ್ತೆ.

6 ಪಾಚ್ ಭುರಕ್‌ಲಿಯೇನ ಬೇಕಾಖ್ವನ್ ವೇಚಾಕೊಯ್ತಿಕಿ ಶು? ತೋಬಿ, ಇನಾಮಾಥು ಏಕ್‌ನಾಬಿ ದೇವ್ ಭೈಕಕೊಯ್ತಿಕಿ.

7 ತುಮಾರೊ ಮುಡ್‌ಕ್ಯಾನೊ ಕೇಖ್ ಜಿನ್‌ಕುಬಿ ಗಣೈರ್ಟ್ತಾಸ್. ಇನಖ್ವಾಜಿ ಡರೊ ನಕೊ, ಕೈಏಕ್ತಿ ಭುರಕ್‌ಲಿಯೇಧೀಬಿ ತುಮೇಸ್ ಘಣ ಮೋಲ್‌ವಾಳ ಹುಯಿರ್ಟ್ತಾಸ್!

ಕ್ರಿಸ್ತ ದೇವ್‌ಕರಿ ಕಬೂಲಾನು ಅಜ್ಜು ರಿಫುಟಾರನಿ ಬಾರೇಮ
(ಮತ್ತಾಯ 10:32-33; 12:32; 10:19-20)

8 “ಮೇ ತುಮೂನ ಬೋಲಸ್ಕಿ, ಕೋಣ್ ಅದ್ವಿನ ಖ್ವಾಪ್ಣೆ ಯೋ ಮಾರವಾಳೊಕರಿ ಮಾನಿಲೇಸ್ಕಿ, ಅದ್ವಿನೊ ಛಿಯ್ಯೊಬಿ, ದೇವ್‌ನು ದೂತರ್‌ನ ಖ್ವಾಪ್ಣೆ ಯೋ ಮಾರವಾಳೊಕರಿ ಮಾನಿಲಿಶೆ.

9 ಕತೋಬಿ ಕೋಣ್ ಅದ್ವಿನ ಖ್ವಾಪ್ಣೆ ಯೋ ಮಾರವಾಳೊ ಕಾಹೆಕರಿ ಬೋಲಸ್ಕಿ, ಇನ ಮೇಬಿ ಮಾರ ದೇವ್ ದೂತರ್‌ನ ಖ್ವಾಪ್ಣೆ ಯೋ ಮಾರ ಭಣಿವಾಳೊ ಕಾಹೆಕರಿ ಬೋಲಿಶ್” ಕರಿ ಬೋಲ್ಯೊ.

10 ಅದ್ವಿನೊ ಛಿಯ್ಯಾಪರ್ ಶಾತ್‌ತೋಬಿ ಗಲತ್ ವಾತೆ ಬೋಲ್ಯೊತೊ, ಇವ್ಣುನ ಮಾಪಿ ಮಳ್‌ಶೆ; ಕತೋಬಿ ಪವಿತ್ರಾತ್ಮನ ವಿರೋದ್ ಖರಾಬ್ ಬೋಲವಾಳಾನ ಮಾಪಿಕೊಯ್ಲಿ.

11 “ಇವ್ಣೆ ತುಮೂನ, ಸಭೆ ಭರಾವನು ಮಂದಿರ್‌ಮ ರ್ವೊವೊ, ಅದಿಕಾರಿಕನ ರ್ವೊವೊ, ರಾಜ್ಯಪಾಲೊಕನ ರ್ವೊವೊ, ರಾಜ್‌ಭಾರ್ ಭಲಾವವಾಳ ಖ್ವಾಪ್ಣೆ ರ್ವೊವೊ ಖೇಚಿಲಿಗಯೂತೆ, ಇವ್ಣುನ ಶಾತ್ ಜವಾಬ್ ದೇವ್ಣು ಕಿಮ್ ಬೋಲ್ವುಕರಿ ವೇಚ್‌ಣೆ ನಕೊ ಕರ್ತು.

12 ಶನಕತೊ ಯೋ ವಖ್ವತ್‌ಮ, ತುಮೆ ಶಾತ್ ಬೋಲ್ವುಕರಿ ಪವಿತ್ರಾತ್ಮಾಸ್ ತುಮೂನ ಬೋಲಿದಿಶೆ.

ಖ್ವಿಯಿಲು ಶೌಕಾರ್‌ನಿ ಬಾರೇಮಾನು ಮತ್ಸಬ್‌ನಿ ಖೇಣಿ

13 ಅದ್ವಿನಿ ಝೂಂಡ್‌ಮಾಥು ಏಕ್ ಜಣು ಯೇಸುನ, “ಗುರು, ಮರಿಗಯೋತೆ ಹಮಾರ ಬಾನಿ ಆಸ್ತಿನ ಭಾಗ್‌ಪಾಡಿ ದೈವಾದೆಕರಿ ಮಾರ ಮೋಟಿ ಭೈನ ಬೋಲ್” ಕರಿ ಬೋಲಖ್ವತ್‌ರ್,

14 ತದೆ ಯೇಸುನೆ ಇನ, “ಅಲಾ ದೋಸ್, ನಯ್ಕೊಹುಯಿನ್ ರ್ವೊವೊ ನತರ್‌ಕಿ ಆಸ್ತಿನ ಭಾಗ್‌ಪಾಡವಾಳೊ ಹುಯಿನ್ ರ್ವೊವೊ, ಮನ ತುಮಾರ ಭೇ ಜಣಾಪರ್ ನೇಮಕ್ ಕರೈತೆ ಕೋಣ್?” ಕರಿ ಪುಲ್ಲಾಯೊ.

15 ಅಜ್ಜು ಹಿಜ್ಜಾಡೂತೆ ಖ್ವಾರುಸ್ ಅದ್ವಿನ, “ಜತನ್‌ಥಿ ರ್ವೊವೊ ಅಜ್ಜು ಹರೇಕ್ ತರೈವಾನು ಲಾಲಚ್‌ಥಿ ದೂರ್ ರ್ವೊವಾನಿಮತ್ ತುಮಾರು ತುಮೆ

ಬರಾಬರಾಧಿ ದೇಖಲೆವೊ. ಶನಕತೊ ಏಕ್ ಜಣಾನ ಕೆತ್ತು ಧನ್-ದಾಲತ್ ರ್ವಯುತೋಬಿ, ಯೋ ದಾಲತ್ ಇನ ಜಾನ್ನ್ ಆಧಾರ್ ಕೋ ಹುವಾನಿ.

16 ಅನ ಬಾದಾಮ ಯೇಸುನೆ ಇವ್ವುನ ಏಕ್ ಮತ್ತ್ಬಾನಿ ಖೇಣಿನ ಬೋಲ್ಯೊ: ಏಕ್ ಶೌಕಾರ್ ಅದ್ಮಿ ಥೂ. ಏಕ್ ಹಲ್ಲ ಇನಿ ಜಮೀನ್‌ಮ ಅಲ್ಟಿನಿತರ ಅನಾಜ್ ಪಿಕ್ಕ್ಯ.

17 ತದೆ ಯೋ ಇನ ಮನ್‌ಮ, 'ಮೇ ಶಾತ್‌ಕರು? ಮಾರು ಅನಾಜ್ ಅಖ್ವು ಭರಿನ್ ಮ್ಹೇಲಾನ ಝಗೊ ಕೊಯ್ನಿನಿ!' ಕರಿ ಸೋಚಿನ್,

18 'ಮೇ ಏಕ್ ಕಾಮ್ ಕರುಸ್; ಮಾರಿ ಕಣ್ಣಿನ ಪೋಡ್ಯೆನ್, ಇನೇಥಿಬಿ ಮೋಟಿ ಕಣ್ಣಿನ ಭಂದ್ಯೆನ್, ಹಿಜ್ಜಾ ಮಾರು ಖ್ವಾರೂಸ್ ಅನಾಜ್‌ನ ಅಜ್ಜು ಬಿಜ್ಜು ಖ್ವಾರೂಸ್ ರಾಲ್ಹಾನ ಮ್ಹೇಲುಸ್'

19 ಬಾದಾಮ ಮಾರು ಮೇ, ಹೇ ಜಾನ್, ಕೆತ್ಯಾಸ್ತಿ ವರಖ್ತ್ ಬೇಶಿನ್ ಖಾವಯೆತ್ರ ಅನಾಜ್ ತಾರಕನ ಪಡ್ಯೂಸ್. ಅರಾಮ್ ಕರಿಲೆ, ಖೈಪೀನ್ ಮ್ಹುಶಿ ಕರ್' ಕರಿ ಇನು ಯೋಸ್ ಬೋಲಿಲಿದೊ.

20 ಕತೋಬಿ ದೇವ್ ಇನ, "ಬಿಣ್‌ಅಕ್ಲಿ ಆ ರಾತೇಸ್ ತಾರ ಜಾನ್ನ್ ಕಾಡಿಲಿಶೆ; ತದೆ ತುನೆ ತಾರಖ್ವಾಜೆ ಜಮಾಕರೀನ್ ಮ್ಹೇಲಿರಾಖ್ಯೊತೆ ಯೋ ಖ್ವಾರು ಕಿನ ಉಶೆ?" ಕರಿ ಪುಲ್ಲಾಯೊ.

21 ಇನಖ್ವಾಜೆ ಯೋಸ್, ಧನ್-ದಾಲತ್‌ನ ಜಮಕರಿಲ್ಯವಾಳಾನಿ ಹಾಲ್‌ಬಿ ಅಮ್ಹಸ್, ಕತೋಬಿ ದೇವ್ ಡೋಳಾಮ ಇವ್ವೆ ಶೌಕಾರ್ ಕಾಹೆ.

ದೇವ್‌ಪರ್ ಭರೋಖ್ಲೊ ಕರಾನಿ ಬಾರೇಮ

(ಮತ್ತಾಯ 6:25-34)

22 ಅಜ್ಜು ಯೇಸುನೆ ಇನ ಶಿಷ್ಯರ್‌ನ, "ಅನಖ್ವಾಜೆಸ್ ಮೇ ತುಮೂನ ಬೋಲುಸ್ತಿ, ಜಿವಿರ್ದವಾನಟೀಕೆ ಶಾತ್ ಖಾಣು ಖಾಶುಕರಿ ರ್ವವೊ, ನತರ್‌ಕಿ ಶರೀರ್‌ನ ಪೆರ್ದಾನ ಲುಂಗ್ವಾವ್‌ನಟೀಕೆ ರ್ವವೊ ವೇಚ್‌ಣೆ ನಕೊ ಕರೊ.

23 ಖಾಣಥಿಬಿ ಜಾನ್, ಅಜ್ಜು ಲುಂಗ್ವಾವ್‌ಥಿಬಿ ಶರೀರ್ ಮಹಾನ್ ಹುಯಿರ್ದೂಸ್.

24 ಕಾಂಗಣ್ಣ ಅಖ್ಲು ದೇಖೊ, ಯೋ ಪಿಕಾವಕೊಯ್ನಿ ವ್ಹಾಡಾಬಿ ಕೊಯ್ನಿ; ಇವ್ಣುನ ಜಮಕರಾನು ಘರಾಬಿ ಕೊಯ್ನಿ, ಕಣ್ಣಿಬಿ ಕೊಯ್ನಿ; ಇಮ್ ರ್ಲಯುತೋಬಿ, ದೇವ್ ಇವ್ಣುನ ಖಡ್ಕೆನ್ ಪಾಳಸ್. ಉಡಂತು ಜಿನಾವರ್ಧೇಬಿ ತುಮೆ ಕೆತ್ತೇಕ್ಕಿ ಊಚ್ ಹುಯಿರ್ದಾಸ್.

25 ಅನಿ ಬಾರೇಮ ವೇಚ್ಚೆಣೆ ಕರಾಧಿ, ತುಮಾರಿ ಉಂಬರ್ ಭಡಾವನ ಕೀನೇಥಿಬಿ ಉಶೇಕಿ ಶು?

26 ನ್ಹನ್ನಾನು ಕಾಮ್ ಕರಾನಸ್ ತುಮಾರ ಹಾತೆ ಕೋ ಹುವ್ವಾನಿತೆ, ಮೋಟು-ಮೋಟು ಕಾಮ್ ಬಾರೇಮ ತುಮೆ ಶನ ವೇಚ್ಚೆಣೆ ಕರೊಸ್ತೆ?

27 ಜಂಗ್ಳಿಫೂಲ್ ಫುಟಾಸ್ತೆ ತರಿಕಾನ ದೇಖೊ; ಯೊ ಮ್ಹಿವತ್ ಕರಕೊಯ್ನಿ ಅಜು ಇನಖ್ವಾಜೆ ಲುಂಗ್ವಾವನಾಬಿ ಶಿವಿಲೆಯಿಕೊಯ್ನಿ. ತೋಬಿ ಮೇ ತುಮೂನ ಬೋಲುಸ್ಕಿ, ರಾಜ್ ಸೊಲೊಮೋನ್ನಾಬಿ, ಇನಾಕನ ಥೂತೆ ಖ್ವಾರುಸ್ ಖ್ವೋನ್ನುಖ್ವರಪ್ ಅಜು ರಾಜಾನು ಪೇರ್ವಾಖ್ವೊನ ಫೇರ್ದೊತೋಬಿ, ಆ ಫೂಲ್ಮ ಏಕ್‌ನ ಛಾತೆ ಶನ್‌ಗಾರ್ ಇನ ಕೋ ಥೂನಿ” ಕರಿ ಬೋಲ್ಯೊ.

28 ಅಲಾ, ದರ್ರಾಶಿ ವಿಶ್ವಾಸ್‌ವಾಳ, ಹಮ್ಕರ್ದೆನ್ ಕಾಲೆ ಚುಲ್ವಾಮ ಬಳಿಜಾವಾನ ಜಂಗ್ಳಿ ಫಾಖ್ವೊನ ದೇವ್ ಅಮ್ ಪೇರ್ದಾಯೋತೊ ಅನೇಥಿಬಿ ಜಾಖ್ವತ್ ತುನ ಹೊಡ್ಕೆಫೆರಾವ್‌ಶೆ.

29 ಅನಖ್ವಾಜೆಸ್ ಶಾತ್ ಖಾಣು? ಶಾತ್ ಪೀಣು? ಕರಿ ಬೋಲಿನ್, ಕದೇಬಿ ಸೋಚ್‌ತಾಹುಯಿನ್, ಪಸ್ತಾವೊ ನಕೊ.

30 ಅನಿ ಖ್ವಾರಿ ಬಾರೇಮ, ಆ ಜಗತ್‌ನುಅದ್ಮಿಕದೇಬಿ ಪಸ್ತಾವಸ್. ಆ ಅಖ್ಲು, ತುಮೂನ ಜರೂರತ್ ಛಾಕರಿ ಪರಲೋಕ್‌ನೊ ತುಮಾರ ಬಾನ ಮಾಲುಮ್.

31 ಅನಬದಲ್, ದೇವ್ನು ರಾಜ್ಯನಖ್ವಾಜೆ ತಖ್ವೊ, ತದೆ ಆ ಖ್ವಾರು ಯೋಸ್ ತುಮೂನ ದಿಶೆ” ಕರಿ ಬೋಲ್ಯೊ.

ಸೋರ್ಗಮಾನು ಶೊತ್ತಿ ಬಾರೇಮ

(ಮತ್ತಾಯ 6:19-21)

32 “ನ್ಹಾನಿ ಝೂಂಡ್, ಡರ್‌ನಕೊ; ಯೋ ರಾಜ್ಯನ ತುಮೂನ ದೈವಾನ ತುಮಾರೊ ಬಾನ ಖ್ವುಶಿ ಛಾ.

33 ತುಮಾರಕನ ಛಾತೆ ಖ್ವಾರುಸ್ ವೇಚಿನ್, ಆವಸ್ತೆ ಪೈಶಾನ ಗೋರ್-ಗರೀಬ್‌ನ ದೇವೊ. ತುಮಾರಕನ ಫಾಟಕೊಂತೆ ಚಂಚಿಯೇನ ಕರಿಲೆವೊ, ಪರ್‌ಲೋಕ್‌ಮ ಕಮ್ ಹುವಾಕೊಂತೆ ಶೊತ್ತ್ ಜಮಕರಿಲೆವೊ, ಕೆಹೊ ಚೋರ್‌ಬಿ ಇನ ಖನ್ನೆ ಆವಾನ ಕೋ ಆವಾನಿ ಅಜು ಇನ ಕೋರ್‌ಲ್ಹೈನ್ ಬರ್ಬಾತ್ ಕೋ ಉಶೇನಿ.

34 ತುಮಾರಿ ಶೊತ್ ಕಿಜ್ಜಾ ರ್‌ಲ್ಹೆಸ್ಕಿ, ಹಿಜ್ಜಾಸ್ ತುಮಾರೊ ದಿಲ್‌ಬಿ ರ್‌ಲ್ಹೆಸ್.

ಹೊಷಾರಿ ರ್‌ಲ್ಹಾಳು ಆಳ್ ಖ್ವಾರಾನಿ ಬಾರೇಮ

35 “ಶಾಸ್ತ್ರಿ ಆವೊ ತೈಯಾರ್ ರ್‌ಲ್ಹೊ, ಲುಂಗ್ ಪೇರರ್‌ಲ್ಹೊ ಖ್ವಾರಿರಾಖೊ, ತುಮಾರೊ ದೀವೊಖ್ವಾರು ಲಾಗ್ತುರ್‌ಲ್ಹಾದೆ,

36 ತುಮೇತೊ, ಇವ್ಣೊ ಯಜಮಾನ್ ಆಯಿನ್, ಬಾಕಲ್ ಮಾರ್‌ತಾಸ್ ಕಾಡಾನ ತೈಯಾರ್ ರ್‌ಲ್ಹೆನ್, ವ್ಯಹಾನು ಖಾಣು ಖೈನ್, ಕದೆ ಪಾಟ್ಲೊಫರಿ ಆವ್‌ಶೆಕರಿ ಜಪಿರ್‌ಲ್ಹೆಸ್ತೆ ಆಳ್‌ನಿಮತ್ ರ್‌ಲ್ಹೊ.

37 ಯಜಮಾನ್ ಐನ್ ಬಾಕಲ್ ಮಾರಾನಿ ವಖ್ತಾಮ, ಇವ್ಣೆ ಬಾಕಲ್ ಕಾಡಸ್. ಪಾಟ್ಲೊ ಪ್ರಭು ಫರಿಅಯಿನ್, ಕೆಹೊಖ್ವಾರೊ ಆಳ್ ತೈಯಾರ್ ಹುಯಿರ್‌ಲ್ಹೆನ್, ಇನಖ್ವಾಜೆ ಜಪಿರ್‌ಲ್ಹೆವಾನು ಯೋ ದೇಖಾಸ್ಕಿ ಇವ್ಣೆ ಧನ್ಯ ಹುಯಿರ್‌ಲ್ಹೆಶೆ! ಮೇ ತುಮೂನ ಖ್ವಾಚಾಮ ಬೋಲುಸ್ಕಿ, ಯೋ ಇನಿ ಕಂಬರ್‌ನ ಲುಂಗ್ ಭಾಂದಿಲೇನ್, ಇವ್ಣುನ ಖಾಣನ ಬೆಖ್ವಾಡೆನ್, ಇವ್ಣು ಖನ್ನೆ ಐನ್, ಇವ್ಣಿ ಚಾಕ್ರಿ ಕರ್‌ಶೆ.

38 ಯೋ ಅಧಿರಾತ್ಮಾಸ್‌ಕಿ, ನತರ್‌ಕಿ ಇನೇಥಿಬಿ ಜಾಖ್ತತ್ ವಖ್ತತ್ ಲಗಾಡಿನಸ್ಕಿ ಆಯೊತೋಬಿ, ಕೋಣ್ ತೈಯಾರ್ ಹುಯಿರ್‌ಲ್ಹೆಸ್ತೆ ಯೋ ದೇಖಾಸ್ಕಿ, ಇವ್ಣೆ ಧನ್ಯ ಹುಯಿರ್‌ಲ್ಹೊಸ್.

39 ಆ ವಾತೆ ತುಮಾರಿ ಯಾದ್‌ಮ್ ರ್‌ಲ್ಹಾದೆ; ಚೋರ್ ಆವಾನಿ ವಖ್ತತ್ ಘರ್‌ನ ಯಜಮಾನ್ ಮಾಲುಮ್ ರ್‌ಲ್ಹಯುಹೋತ್ಲೊ, ಯೋ ಹೊಷಾರಿ ರ್‌ಲ್ಹೆನ್, ಇನ ಘರ್‌ನ ಲೂಟದಿದೊಹೋತ್ ಕೊಯ್ನಿ.

40 ಇಮ್‌ಮ್, ತುಮೇಬಿ ತೈಯಾರ್ ರ್‌ಲ್ಹೆಣು, ಶನಕತೊ ತುಮೆ ಸೋಚಾಸ್‌ಕೊಂತೆ ವಖ್ತಾಮ ಅದ್ವಿನೊ ಛಿಯೊ ಆವ್‌ಶೆ.”

ಇಮಾನ್‌ದಾರ್ ಅಜ್ಜು ನಿಯ್ಯತ್ ಕೊಯ್ತೆ ಆಳ್ವೆ ಬಾರೇಮ
(ಮತ್ತಾಯ 24:45-51)

41 ತದೆ ಪೇತ್ರನೆ, “ಪ್ರಭು, ತುನೆ ಆ ಮತ್ಲಬ್‌ನಿ ಖೇಣಿನ ಬೋಲ್ಯೊತೆ ಹಮಾರ ಟೀಕೆಕಿ, ಹರೇಕ್ ಅದ್ವಿನ ಟೀಕೆ?” ಕರಿ ಪುಲ್ಲಾಯೊ.

42 ಯೇಸುನೆ ಶಾತ್‌ಬೋಲ್ಯೊಕತೊ, ವೇಳ್‌ವೇಳ್ವೆ ಹೋಣುತೆ ಯೊ ಜಿನಖ್ವನ್ ಮಾಪಿನ್ ದೈವಾನಖ್ವಾಜೆ ಯಜಮಾನ್ನೆ ಇನ ಘರ್‌ಮ ನೇಮ್‌ಶಾಯೋತೆ ನಿಯತ್‌ವಾಳೊಬಿ ಅಕ್ಲೀಬಿ ಹುಯಿರೋತೆ ಘರ್ರೊಸೇವಕ ಕೋಣ್?

43 ಘರ್‌ನೊ ಯಜಮಾನ್ ಐನ್, ಕೆಹೊ ಆಳ್ ಆ ಖ್ವಾರ್ಡು ಕರುಕರಾತೆ ಕರಿ ದೇಕ್‌ಶೇಕಿ, ಯೋ ಆಳ್ ಧನ್ಯ ಹುಯಿರ್ರೊಸ್.

44 ಯೋ ಯಜಮಾನ್ ಇಮ್ಮ ಆಳ್‌ನ ಇನು ಖ್ವಾರೊಸ್ ಧನ್-ದಾಲತ್‌ಪರ್ ಅದಿಕಾರಿಹುಯಿನ್ ನೇಮ್‌ಶಾವ್‌ಶೆ ಕರಿ ಮೇ ತುಮೂನ ಖ್ವಾಚಮಾಬಿ ಬೋಲುಸ್,

45 ಕತೋಬಿ ಯೋ ಆಳ್, ಇನೊ ಯಜಮಾನ್ ಒಗ್ಗಿಸ್‌ಮ ಕೋ ಆವ್‌ಶೇನಿ ಕರಿ ಇನ ಮನ್‌ಮ ಸೋಚಿಲೀನ್, ಬಿಜ್ಜಾಖ್ವಾರ್ ತಯೇಡ್-ಪರ್ಖ್ವಾ ಆಳ್‌ನ ಮಾರ್‌ತೊಹುಯಿನ್, ಖೈ-ಪೀನ್ ಉರಾಳಲಗ್ಗೊತೊ,

46 ತದೆ ಯೊ ಆಳ್ ಸೋಚಾಸ್‌ಕೊಂತೆ ದನ್ಮ ಅಜ್ಜು ಇನ ಮಾಲುಮಸ್ ಪಡಾಕೊಂತೆ ವಖ್ವತ್‌ಮ, ಇನೊ ಯಜಮಾನ್ ಐನ್, ಇನ ಕತ್ರೀನ್ ಟುಕ್‌ಡಾ-ಟುಕ್‌ಡಾ ಕರೀನ್, ವಿಶ್ವಾಸ್‌ಕೊಂತೆ ಅದ್ವಿನ ನಾಖಸ್ತೆ ಝಗೋಪರ್ ಇನ ನಾಕ್‌ಶೆ.

47 ಏಕ್ ಆಳ್, ಇನೊ ಯಜಮಾನ್ ಇನೇಥಿ ಶಾತ್ ಹೋಣುಕರಿ ಮಾಲುಮ್ ರ್ವೀನ್‌ಬಿ, ಯೋ ತ್ರೈಯಾರ್‌ಹುಯಿನ್, ಯೋ ಕಾಮ್ ನಾ ಕರ್ರೊತೊ, ಇನ ಬರೊಬರ್‌ನೊ ಮಾರ್ ಪಡ್‌ಶೆ.

48 ಕತೋಬಿ ಏಕ್ ಆಳ್‌ನ, ಇನೊ ಯಜಮಾನ್ ಇನೇಥಿ ಶಾತ್ ಹೋಣುಕರಿ ಮಾಲುಮ್ ಕೊಂತೆ, ಮಾರ್ ಖಾವಖ್ವರ್ಕು ಕಾಮ್ ಕರ್ರೊತೊ, ಇನಾಬಿ ದಂಡ್ ಮಳ್‌ಶೆ. ಕತೋಬಿ ಇನು ಕಾಮ್ ಶಾತ್‌ಕರಿ ಮಾಲುಮ್ ಕರೀನ್‌ಬಿ, ಇನ ಕರ್ರೊತೊ ಯೋ ಆಳ್‌ಥೀಬಿ, ಅನ ಕಮ್ ಮಾರ್ ಪಡ್‌ಶೆ. ಕಿನ ಜಾಖ್ವತ್ ದೆವೈರ್ರೊಸ್ತಿ,

ಇನೇಥಿ ಜಾಖ್ತ್ ಮಳಾಶೆಕರಿ ಆಖ್ತ್ ಕರ್ಶೆ, ಬಿಜೂಬಿ ಜಾಖ್ತ್ ದೆವೈರಾತ್ ಇನಾಕಂಥು, ಬಿಜೂಬಿ ಜಾಖ್ತ್ ಮಳಾಶೆಕರಿ ಆಖ್ತ್ ಕರ್ಶೆ.

ತೋಡಾವಾನ ಯೇಸುಸ್ ಕಾರಣ್
(ಮತ್ತಾಯ 10:34-36)

49 “ಮೇ ಆಯೋತೆ, ಭಮೀನ್‌ಪರ್ ಆಗ್ ನಾಕ್ಟಕರಿ; ಅತ್ರಾಸ್‌ಮ ಯೋ ಲಾಗಿಗಯುಹೋತ್ತೊ ಮನ ಕೆತ್ರೇಕ್ಟಿ ಖ್ವಿಶಿ ಹುಯುಹೋತ್!

50 ಕತೋಬಿ, ಮನ ಬಿಜೇಕ್ ತರಾನ್ವು ಬ್ಯಾಪ್ತಿಸ್ಮ್ ಏಕ್ ಮಳಾಣು. ಯೋ ಮಳಾತೋಡಿ, ಮೇ ಘಣಿ ಖ್ವಿಶಾಪ್ಪಿಮ ಛೂ.

51 ಭಮೀನ್‌ಪರ್ ಶಾಂತಿ ದ್ಯವಾನಟೇಕೆ, ಮೇ ಆಯೋಕರಿ ತುಮೆ ಸೋಪೋಸ್‌ಕಿ? ಕೊಯ್ಲಿ! ಶಾಂತಿ ದ್ಯವಾನ ಕಾಹೆ, ಕತೋಬಿ ತೋಡಾವಾನ ಐರಾನ್ವೊಸ್! ಕರಿ ಮೇ ತುಮೂನ ಬೋಲುಸ್.

52 ಕಿಮ್‌ಕತೊ, ಹಂಕೇಥು ಎಕ್ಸ್‌ ಘರಾಮ ಛಾತಿ ಪಾಚ್ ಅದ್ವಿಮ, ಬೇ ಜ್ಞಾನ ವಿರೋದ್ ತೀನ್ ಜ್ಞಣ ಉರ್‌ಶೆ, ತೀನ್ ಜ್ಞಾನ ವಿರೋದ್ ಬೇ ಜ್ಞಣ ಉಟ್‌ಶೆ, ಅಮ್ ಇವ್ವಾಮ ಭಾಗ್ ಪಡಿಚಾಶೆ.*

53 ಛಿಯ್ಯಾನಿ ವಿರೋದ್ ಬಾ, ಬಾನಿ ವಿರೋದ್ ಛೀಯ್ಲೊ; ಛೋರಿನಿ ವಿರೋದ್ ಆಯ, ಆಯಾನಿ ವಿರೋದ್ ಛೋರಿ, ವ್ಹವಾನಿ ವಿರೋದ್ ಖ್ವಾಖ್ವು, ಖ್ವಾಖ್ವುನಿ ವಿರೋದ್ ವ್ಹವ್ ಉಟ್‌ಶೆ.

ವಖ್ವತ್‌ನ ಪರ್ಲಿವೊ
(ಮತ್ತಾಯ 16:2-3)

54 ಎತ್ರಿಸ್ ಕಾಹೆತೆ ಯೇಸುನೆ ಅದ್ವಿ ಖ್ವಾರಾನಾಬಿ ಬೋಲ್ಯೊಕಿ, “ತುಮೆ ಪಶ್ಚಿಮ್† ದಿಕ್ಟ ಪಾಣಿನೊ ಮೋಡ್ ದೆಖಾವ್‌ತಾಸ್‌ನ, ‘ಪಾಣಿ ವರಖ್‌ಶೆ’ ಕರಿ ಬೋಲಾಸ್ಲಿ, ಇಮ್‌ಮ್‌ ಪಾಣಿ ವಖ್ವಾಸ್.

55 ದಕ್ಷಿಣ್ ದಿಕ್‌ಮಾಥು ವಹಿರೊ ವಾಗಲಗ್ಯೊತೊ, ‘ಗರ್ಮಿ ಉಟ್‌ಶೆ’ ಕರಿ ತುಮೆ ಬೋಲೋಸ್, ಯೋಬಿ ಇಮ್‌ಮ್ ಹುವಾಸ್.

* 12:52 12:52 ಕತೊ ಯೇಸುನ ನಂಬಸ್ತೆ ಅದ್ವಿ ಅಜ್ಜು ಇನ ನಂಬಾಕೊಂತೆ ಅದ್ವಿಮ ಭಾಗ್ ಪಡಿಚಾಶೆ ಕರಿ ಮತ್‌ಲಬ್. † 12:54 12:54 ಕತೊ ದನ್ ಡುಬಾಸ್ತೆ ಬಾಜ್ಜು

56 ರಗಾರ್ಯ, ತುಮೆ ಆಬ್ ಧರ್ತಿನ ದೇಖಿನ್, ಇನು ಮೋಸಮನ್ ತುಮೆ ಮಾಲುಮ್ ಕರಿಲೆವೋಸ್‌ನಿ, ಇಮ್ ರ್ವಾಪರ್, ಆ ವಖ್ತಾನ್ ಪರ್ಖಾನ ತುಮೂನ ಕೋ ಹುವ್ವಾನಿಶಿ ಶು?

ತುಮಾರ ದುಶ್‌ಮನ್ನ ಜೋಡೆ ಒಪ್ಪಂದಾನ್ ಕರಿಲೆವೊ
(ಮತ್ತಾಯ 5:25-26)

57 ಖ್ವಾಘು ಖಿವು ಕರಿ ತುಮೇಸ್ ಶನ ತೀರ್ಪ್‌ಕರಾಕೊಯ್ತಿ?

58 ತಾರಪರ್ ಹೊಜ್ಜತ್‌ಕರ್ನು ಕರಿ ಛಾತೆ ಇನ ಜೋಡೆ ನೈಯಾಕನ ಜಾವಾನಿ ವಖ್ತಾಮ್, ವಾಟ್‌ಪರಸ್ ಝಗ್ಗಾನ್ ಪರಿಹಾರ್ ಕರಾನ ಕೋಶಿಶ್ ಕರ್. ನತರ್‌ಕಿ ಯೋ ತುನ ನೈಯಾಕನ ಖೇಚಿಲಿಜಾಶೆ, ಯೋ ನಯ್ಕೊ ಜೇಲ್‌ನ ಶಿಪಾಯಿನ ಹಾತ್ಮ ದಿಶೆ ಅಜ್ಜು ಯೋ ತುನ ಜೇಲ್‌ಮ ಕೋಂಡಿಫಾಲ್‌ಶೆ.

59 ಏಕ್ ಪೈಶ್ರಾಬಿ ಜಿನ್ನುಕು ಮ್ಹೇಲ್‌ಶೆಕೊಂತೆ, ಅಖ್ವಿಸ್ ಪೈಶು ಫೇಡಾವಲಗೂಬಿ, ತೂ ಹಿಜ್ಜಾಢೊ ಭಾರ್ ಛುಟಿಶ್‌ಕೊಯ್ತಿ ಕರಿ ಮೇ ತುನ ಬೋಲುಸ್” ಕರಿ ಬೋಲ್ಯೊ.

13

ತುಮಾರು ಪಾಪ್ ಖ್ವಾರು ಮ್ಹೇಲಿನ್ ಫರೊ ನತರ್‌ಕಿ ಮರೊ

1 ಯೋಸ್ ವಖ್ತಾಮ್, ಹಿಜ್ಜಾ ಥೂತೆ ಥೋಡು ಜಣು, ಪಿಲಾತನೆ ಗಲಿಲಾಯವಾಳನು ಲ್ಹೋಯಿನ, ಇವ್ಣೆ ದೇವ್ ಬಲಿದಿದೂತೆ ಲ್ಹೋಯಿನ ಜೋಡೆ ಮಳಾಯೋತೆ* ಬಾರೇಮ ಯೇಸುನ ಬೋಲ್ಯು.

2 ತದೆ ಯೇಸುನೆ ಇವ್ಣುನ, “ಯೋ ಗಲಿಲಾಯವಾಳು ಇಮ್ಮಿ ತರಿಕಾಥಿ ಮರ್ಯತೆ ದೇಖಿನ್, ಇವ್ಣೆ ಬಿಜಾಖ್ವಾರ ಗಲಿಲಾಯವಾಳಾಥೀಬಿ ಪಾಪಿ ಕರಿ ಸೋಚೋಸ್ತಿ ಶು?

3 ಇಮ್ ನಾ ಸೋಚ್‌ನು! ಕರಿ ಮೇ ತುಮೂನ ಬೋಲುಸ್. ದೇವ್‌ಭಣಿ ಫರ್ಮಾನಾತೊ ತುಮೆಅಖ್ವು ಇಮ್ಮುಸ್ ನಾಶ್ ಹುಯಿಜಾಶು.

* 13:1 13:1 ಕತೊ ಗಲಿಲಾಯವಾಳು ದೇವ್ ಬಲಿದ್ಯವಾನಿ ವಖ್ತಾಮ್, ಪಿಲಾತನೆ ಇವ್ಣುನ ಮರಾಯೋತೆ ಬಾರೇಮ ಯೇಸುನ ಬೋಲ್ಯು ಕರೀಬಿ ಹುವಾಸ್

4 ಸಿಲೋಮ್‌ಮ ಊಚಿ ಭೀತ್ ಪಡೀನ್ ಮರೈತೆ ಯೋ ಅರಾರ ಅದ್ಮಿ ಯೆರೂಸಲೇಮ್ ಛಾತೆ ಬಿಭಾಖ್ವಾರಾಸ್ ಅದ್ಮಿಥೀಬಿ ಅಪರಾದಿ ಕರಿ ಸೋಚೋಸ್ಸಿ ಶು?

5 ಇಮ್ ಕಾಹೆ! ಕರಿ ಮೇ ತುಮೂನ ಬೋಲುಸ್. ತುಮಾರು ಪಾಪ್ ಮ್ಹೇಲಿನ್ ನಾ ಫರೈತೊ, ತುಮೆಖ್ವಾರುಬಿ ಇಮ್‌ಮ್ ಮರ್‌ಶು” ಕರಿ ಬೋಲೊ.

ಪಂಡು ಮ್ಹೇಲಾಕೊಂತೆ ಅಂಜೀರ್‌ನು ಝಾಡಾನಿ ಬಾರೇಮಾನು ಮತ್ಲಾನ್‌ನಿ ಖೇಣಿ

6 ಅನ ಬಾದ್‌ಮ ಯೇಸುನೆ ಏಕ್ ಮತ್ಲಾನ್‌ನಿ ಖೇಣಿನ ಬೋಲೊ: ಯೋ ಶಾತ್‌ಕತೊ, “ಏಕ್ ಅದ್ಮಿ ಇನು ದ್ರಾಕ್ಷಿನ್ ಬಾಗ್‌ಮ ಏಕ್ ಅಂಜೀರ್‌ನು ಝಾಡಾಣ ಪಾಳಿರಾಖೊಡೊ. ಏಕ್ ಹಲ್ಲ ಯೋ ಅದ್ಮಿ ಯೋ ಝಾಡಾಮ ಪಂಡು ಡೂಂಡ್‌ತುಹುಯಿನ್, ಹಿಜ್ಜಾ ಆಯು, ಕತೋಬಿ ಏಕ್‌ಬಿ ಮಳ್ಳುಕೊಯ್ತೆ.

7 ತದೆ ಯೋ ಅದ್ಮಿ ಬಾಗ್ ದೇಖಿಲ್ವಾಳಾನ, “ಹಂದೇಕ್, ಮೇ ತೀನ್ ವರಖೊಡೊಬಿ ಆ ಅಂಜೀರ್‌ನು ಝಾಡಾಮ ಪಂಡು ಡೂಂಡೊ ಆಯೊ, ಕತೋಬಿ ಏಕ್‌ಬಿ ಮಳ್ಳುಕೊಯ್ತೆ. ಅನ ಕತ್ರಿ ನಾಕ್! ಅನೇಥಿ ಧರ್ತಿನ್ ಶನಖ್ವಾಜೆ ಫಾಯಿದೊಕೊಂತೆ ಇಮ್ ಹೋಣು” ಕರಿ ಬೋಲೊ.

8 ತೋಬಿ ಯೋ ಬಾಗ್‌ನ ದೇಖಿಲ್ವಾಳಾನೆ, “ಪ್ರಭು, ಆ ವರಖೊಬಿ ಅನ ಮ್ಹಂದೆ; ಎತ್ರಾಮ ಮೇ ಅನ ಅಶ್‌ಪಿಶ್ ಖೋಂದಿನ್, ಗೋಬರ್ ನಾಮುಸ್.

9 ಹಮ್ಮೆನ ವರಖೊತೋಬಿ ಅಂಜೀರ್ ಮ್ಹೇಲ್ಯಾತೊ ಮ್ಹೇಲಾದೆ, ನತರ್‌ಕಿ ಅನ ಕತ್ರಿ ನಾಖಿದಿಯೇಜಾಯಿ” ಕರಿ ಭವಾಬಾದಿದೊ.

ಸಬ್ಬತ್‌ನ ದನ್ನೆ ಯೇಸುನೆ ಡೋಪ್‌ರು ಝುಕಿಹುಯು ತಯೇಡಾನ ಅಲ್ಫು ಕರೈತೆ

10 ಏಕ್ ದನ್ನೆ ಸಬ್ಬತ್‌ಮ ಯೇಸು ಸಬೆ ಭರಾವಾನು ಮಂದಿರ್‌ಮ ವಚನ್ ಬೋಲಿದೆವ್‌ಕತೊಡೊ.

11 ಹಿಜ್ಜಾ ಅರಾರ ವರಖ್ವ್ಡು ಭೂತ್ ಧರೀನ್, ಆಂಗ್ತನ್ಮ ರೋಗ್ ಧೂತೆ ಏಕ್ ತಯೇಡ ಥಿ. ಇನು ಡೋಪ್ರು ಝುಕಿರ್ದು ಅಜು ಇನ ಜರಾಬಿ ಮುಡ್‌ಕ್ಯು ಉಪ್ಪರ್ ಪಾಡೀನ್, ಉಭು ಭೀರಾಪನ ಕೋ ಹೋತುಡುನಿ.

12 ಯೇಸುನೆ ಇನ ದೇಖಿನ್, ಖನ್ನೆ ಬುಲೈನ್ ಇನ, “ಬಾಯಿ, ತಾರ ರೋಗ್‌ಥಿ ತೂ ಛುಟಿಗಿ!” ಕರಿ ಬೋಲಿನ್,

13 ಇನಾಪರ್ ಇನೊ ಹಾತ್ ಮ್ಹೇಲ್ಯೊ ಮ್ಹೇಲ್‌ತಾಸ್‌ನ ಯೋ ಉಭು ಭೀರಿಗೈ ಅಜು ಇನೆ ದೇವ್ ಸ್ತುತಿ ಕರಿ.

14 ಕತೋಬಿ ಯೋ ಸಬೆ ಭರಾವಾನು ಮಂದಿರ್‌ನು ಅದಿಕಾರಿನೆ ಆನ ದೇಖಿನ್, ಸಬ್ಬತ್ ದನ್ಮ ಯೇಸುನೆ ಅಲ್ಪು ಕರೈನಿ ಕರಿ ಬೋಲಿ ಇರಾದೊ ಖೈನ್, ಅದ್ಮಿ ಖ್ವಾರಾನ, “ಕಾಮ್ ಕರಾನ ಛೊ ದನ್ ಛಾ, ಯೋ ದನೂಮ ಐನ್ ಅಲ್ಪು ಕರೈಲೆವೊ; ಸಬ್ಬತ್ ದನ್ಮ ಪಣ್ಣಿ ನಕೊ!” ಕರಿ ಬೋಲೈ.

15 ಯೋ ವಾತೇನ ಖ್ವಮ್‌ಜಿನ್ ಪ್ರಭುನೆ ಇನ, “ತುಮೆ ರಗಾರು ತುಮಾರಾಮ ಹರೇಕ್ ಜಣು ಸಬ್ಬತ್ ದನ್‌ಮಾಬಿ, ಇವ್ವು ಡಾಂಡೊ ರ್ವೊ, ಗಧೇಡಾನ ರ್ವೊ ಕೋರಾಮಾಡು ಛೋಡಿನ್, ಪಾಣಿ ಪಿಡಾವಾನಟೇಕೆ ಧರ್‌ಲಿ ಜಾಸ್‌ನಿ.

16 ಇಮ್‌ಕತೊ, ಅರಾರ ವರಖ್ವ್ಡು ಶೈತಾನ್ನೆ ಭಾಂದಿರಾಖ್ಯೊತೆ, ಆ ಅಬ್ರಹಾಮಾನಿ ಪಿಳ್ಗಿವಾಳಿನ ಸಬ್ಬತ್‌ನ ದನ್ಮ ಭಂದಣ್‌ಮಾಡು ಛೋಡಾವ್‌ಣು ನಾಕಿಶು?” ಕರಿ ಜವಾಬ್ ದಿದೊ.

17 ಯೇಸುನಿ ಆ ವಾತೇನ ಖ್ವಮ್‌ಜಿನ್, ಯೇಸುನ ವಹೇರ್ ಕರಾವಾಳು ಖ್ವಾರಾನ ಖ್ವರಮ್‌ಲಾಗ್ಲು ಕತೋಬಿ ಅದ್ಮಿ ಖ್ವಾರು ಯೇಸುಥಿ ಹುಯೂತೆ ತಮಾಮ್ ಮಹಾನ್ ಕಾಮ್‌ಟೇಕೆ ಮ್ಹುಶಿ ಕರೈ.

ರಾಯಿನ ದಾಣಾನಿ ಬಾರೇಮಾನು ಮತ್ಲಾನ್ ಖೀಣಿ
(ಮತ್ತಾಯ 13:31-32; ಮಾರ್ಕ 4:30-32)

18 ಯೇಸುನೆ ಪುಲ್ಲಾಯೋಕಿ, “ದೇವ್ನಿ ರಾಜ್ಯ ಕಿನೀನಿಮತ್ ಛಾ? ಇನ ಮೇ ಶನೇಥಿ ಏಕ್‌ಕರು?

19 ಯೋ ರಾಯಿನ ದಾಣಾನಿ ಘೋಣಿ ಛಾ. ಏಕ್ ಅದ್ಮಿನೆ ಇನ ಲೀಜೈನ್ ಇನ ಖೇತರ್‌ಮ ಗಾಡ್ಕು. ತದೆ ಯೋ ಮೋಟುಹುಯಿನ್, ಝಾಡು ಹುಯು ಅಜು ಆಬ್‌ಪರ್ ಉಡಾತೆ ಜಿನಾವರ್ ಖ್ಹಾರ್ಡು ಆಯಿನ್, ಯೋ ಝಾಡಾನಿ ಡಾಳಿಯೆಪರ್ ಮ್ಹಾಳ ಭಾಂದಿಲಿದು.

ಶೋಡಾನಿ ಬಾರೇಮಾನು ಮತ್ಸಬ್‌ನಿ ಖೇಣಿ
(ಮತ್ತಾಯ 13:33)

20 ಯೇಸುನೆ ಬಿಜೂಬಿ ಪುಲ್ಲಾಯೋಕಿ, “ದೇವ್ನಿ ರಾಜ್ಯನ ಮೇ ಶನೇಥಿ ಏಕ್‌ಕರು?

21 ಯೋ ಶೋಡಾನಿ ಘೋಣಿ ಛಾ. ಏಕ್ ತಯೇಡ ಇನ ಲೀಜೈನ್, ತೀನ್ ಶೇರ್ ಆಟಾಮ ಕಲೈನ್ ಮ್ಹೇಲಾಖ್ತರ್, ಯೋ ಆಟೊ ಖ್ಹಾರ್ಡುಸ್ ಪುಗಿಆಯು.

ನ್ಹಾನು ದರ್ಮಜಾನಿ ಬಾರೇಮ
(ಮತ್ತಾಯ 7:13-14,21-23)

22 ಯೇಸು ಹರೇಕ್ ಖ್ಹಯೇರ್‌ಮ ಅಜು ಗಾಮ್ತ ವಚನ್ ಬೋಲಿದೇತೊಹುಯಿನ್, ಯೆರೂಸಲೇಮ್ ಭಣಿ ವಳ್ಳೊಜಾತೋಥೊ.

23 ತದೆ ಏಕ್ ಜಣಾನೆ ಯೇಸುನ, “ಪ್ರಭು, ಥೋಡು ಅದ್ಮಿನಾಸ್ ರಕ್ಷಣೆ ಮಳ್‌ಶೇಕಿ?” ಕರಿ ಪುಲ್ಲಾಯೊ.

24 ಯೇಸುನೆ ಜವಾಬ್ ದಿದೋಕಿ, ನ್ಹಾನ ಬಾಕಲ್ ವಾಟೆಕರಿ ಮಹಿ ಜಾವಾನ ಕೋಶಿಶ್ ಕರೊ, ಶನಕತೊ ಘಣು ಅದ್ಮಿ ಮಹಿ ಜಾವ್ಣುಕರಿ ಕರಸ್, ಕತೋಬಿ ಇವ್ಣೊಹಾತ್ ಕೋಹುಯುನಿ.

25 ಘರ್‌ನೊ ಯಜಮಾನ್ ಉರೀನ್, ಬಾಕಲ್ ಮೂಚಾನ ಬಾದ್‌ಮ, ತುಮೆ ಭಾರ್‌ಭೀರಿನ್, ಬಾಕಲ್‌ಪರ್ ಮಾರಿನ್, ‘ಪ್ರಭು, ಮಹಿ ಆವಾನ ಬಾಕಲ್ ಕಾಡ್! ಕರಿ ಬೋಲ್‌ಶು”. ತದೆ ಯೋ, ತುಮೆ ಕಿಜ್ಜಾವಾಳ ಕರಿ ಮನ ಮಾಲುಮ್ ಕೊಯ್ತೆ! ಕರಿ ಜವಾಬ್ ದಿಶೆ.

26 ತದೆ ತುಮೆ, “ಹಮೆ ತಾರ ಜೋಡೆ ಖಾದಾಥ, ಪೀದಾಥ. ಹಮಾರಿ ಗಲ್ಲಿಯೇಮ ತುನೆ ಹಮೂನ ವಚನ್ ಬೋಲಿದಿದೋಥೊ ಕರಿ ಬೋಲ್‌ಶು”.

27 ತೋಬಿ ಯೋ ತುಮೂನ, “ತುಮೆ ಕೋಣ್ಕಿ, ಕಿಜ್ಜಾಥ ಐರ್ದ್ವಾಸ್ತಿ ಮನ ಮಾಲುಮ್ ಕೊಯ್ತಿ! ಹಜ್ಜಾಥೊ ಹಟಿಜ್ಜಾವೊ, ತುಮೆ ಖ್ವಾರು ಖರಾಬ್ ಅದ್ತಿ! ಕರಿ ಬೋಲ್‌ಶೆ.

28 ಅಬ್ರಹಾಮ್, ಇಸಾಕ್, ಯಾಕೋಬ ಅಜ್ಜು ತಮಾಮ್ ಪ್ರವಾದಿ ಖ್ವಾರು ದೇವ್ನಿ ರಾಜ್ಯನ ಮಹಿ ರ್ಹಿಶೆ, ಕತೋಬಿ ತುಮೆ ಪಣ್ಣಿ ಭಾರ್ ರ್ಹಿಶು! ಅನ ದೇಖಿನ್ ಇವ್ಣೆರೊವ್‌ಶೆ ಅಜ್ಜು ಕರ್-ಕರ್ ದಾತ್ ಘಾವಾನು ಉಶೆ.

29 ಅತ್ರೇಸ್ ಕಾಹೆತೆ ಪೂರ್ವ,† ಪಶ್ಚಿಮ್,‡ ಉತ್ತರ್ ಅಜ್ಜು ದಕ್ಷಿಣ್ ದಿಕ್‌ಥು ಅದ್ತಿಖ್ವಾರು ಐನ್, ದೇವ್ನಿ ರಾಜ್ಯಮ ಮಿರ್ಝಾವಾನ್ ಖಾಣನ ಬೇಖ್‌ಶೆ.

30 ಹಮ್ಗೆ ಪಾಲ್ಟಳ್ ಛಾತೆ ಅದ್ತಿಖ್ವಾರು, ತದೆ ಅಗಾಡಿ ರ್ಹಿಶೆ, ಅಜ್ಜು ಹಮ್ಗೆ ಅಗಾಡಿ ಛಾತೆ ಖ್ವಾರು, ತದೆ ಪಾಲ್ಟಳ್ ರ್ಹಿಶೆ” ಕರಿ ಬೋಲ್ಯೊ.

ಯೆರೂಸಲೇಮ್‌ಪರ್ ಯೇಸುನಿ ಪ್ಯಾರ್

(ಮತ್ತಾಯ 23:37-39)

31 ಯೋಸ್ ವಖ್ತುತ್‌ಮ ಥೋಡು ಜಣು ಫರಿಸಾಯರ್ ಯೇಸುಕನ ಐನ್, ತೂ ಹಜ್ಜಾಥೊ ಚಲೊಜ್ಜಾ! ಹೆರೋದ ತುನ ಮಾರಿನಾಕ್ಚು ಕರಿ ಛಾ” ಕರಿ ಬೋಲ್ಯೊ.

32 ತದೆ ಯೇಸುನೆ ಇವ್ಣುನ, “ತುಮೆ ಜೈನ್, ಆಜ್ಞ್ ಅಜ್ಜು ಕಾಲ್ ಮೇ ಭೂತ್ ಕಾಡ್ತೊಹುಯಿನ್, ರೋಗ್‌ರಾಯೊನ ಅಛ್ಣು ಕರ್ತೊಹುಯಿನ್, ಪರ್‌ಶುನ ದನ್ನೆ ಮೇ ಮಾರು ಕಾಮ್ ಖತಮ್ ಕರ್ನ್ಚು, ಕರಿ ಯೋ ನ್ಹೋರಿನ ಬೋಲೊ” ಕರಿ ಬೋಲ್ಯೊ.

33 ತೋಬಿ ಆಜ್ಞ್ ಅಜ್ಜು ಕಾಲ್, ಅಜ್ಜು ಪರ್‌ಶುನ ದನ್ನೆತೋಡಿ ಮೇ ಫರ್‌ವಾನು ಛಾ. ಪ್ರವಾದಿನ ಯೆರೂಸಲೇಮಸ್ ಪಣ್ಣಿ ಬಿಜಿ ಝಗೋಪರ್ ನಾ ಮಾರ್ನ್ಚು.

† 13:29 13:29 ದನ್ ನಿಕೃತೆ ಭಣೀಥು ಕರಿ. ‡ 13:29 13:29 ದನ್ ಡುಬಾತೆ ಭಣೀಥು ಕರಿ.

34 ಯೆರೂಸಲೇಮ್, ಯೆರೂಸಲೇಮ್ ತೂ, ಪ್ರವಾದಿ ಖ್ವಾರಾನೊ ಜಾನ್ ಕಾಡಾವಾಳಿ. ದೇವ್ ತಾರಕನ ಮೋಕ್‌ಲೊತೆ ಖ್ವಾರಸ್ತ ಬಂಡೊ ಫೇಕಿನ್ ಮಾರವಾಳಿ, ಮುರ್‌ಗಿ ಇನ ಚೇಲ್ಕಾನ ಇನಿ ಪಾಖ್ತಿಯೆಮ ಪೆಖ್ವಾಡಿಲೇಯಿತ್ ಇಮ್, ತಾರ ಲಡ್ಕಾವ್ ಮೇ ಪೆಖ್ವಾಡಿಲೇವ್ಣ ಕರಿ ಮನ ಕೆತ್ರಿಕ್ಕಿಹಲ್ಲ ಮನ್‌ಹುಯು, ಕತೋಬಿ ತುನೆ ಅಮ್ ಕರಾನ ಮ್ಹೇಲಿಕೊಯ್ತಿ!

35 ಹಂದೇಕ್ ತಾರಿ ಮಂದಿರ್ ಉಜ್ವಾಡಿ ಪಡಿಜಾಶೆ. ‘ಪ್ರಭುನ ನಾಮ್‌ಪರ್ ಆವಾಳಾನ ಆಶೀರ್ವಾದ್ ಹುವಾದೆ’ ಕರಿ ತುಮೆ ಬೋಲಾತೋಡಿ, ತುಮೆ ಮನ ದೇಕ್‌ಶುಸ್ ಕೊಯ್ತಿ, ಕರಿ ಮೇ ತುಮೂನ ಬೋಲುಸ್” ಕರಿ ಬೋಲ್ಯೊ.

14

ಯೇಸುನೆ ಜಾನ್ ಅರಾಮ್‌ಕೊಂತೆ ಏಕ್ ಜಣಾನ ಅಲ್ಫು ಕರಂತ್ಯೆ

1 ಏಕ್‌ಹಲ್ಲ ಸಬ್ಬತ್ ದನ್ನೆ ಯೇಸು ಫರಿಸಾಯರ್‌ನು ಮೋಟಾವ್‌ಮ ಏಕ್ ಜಣಾನ ಘರೆ ಖಾಣನ ಗಯೊ. ಹಿಜ್ಜಾನು ಅದ್ಮಿಖ್ವಾರು ಯೇಸುನ ನಿಫಾ ಲಗಾಡಿನ್ ದೇಖುಕರ್ತುಧು.

2 ಹಿಜ್ಜಾಯೇಸುನ ಖ್ವಾಮೆ ಪೆಶರ್ ರೋಗ್ ಥೋತೆ ಏಕ್ ಜಣೊ ಥೊ.

3 ತದೆ ಯೇಸುನೆ ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯೆ ಅಜ್ಜು ಫರಿಸಾಯರ್‌ನ, “ಅಪ್ಪಿ ಖಾನುಲಮ ಸಬ್ಬತ್ ದನ್ಮ ಅಲ್ಫು ಕರಾನು ಬರಾಬರ್‌ಕಿ ಕೊಯ್ತಿ”? ಕರಿ ಪುಲ್ಲಾಯೊ.

4 ಕತೋಬಿ ಇವ್ಣೆ ಶಾತ್ರಿ ಫರೈನ್ ಬೋಲ್ಯು ಕೊಯ್ತಿ. ತದೆ ಯೇಸುನೆ ಯೋ ಅದ್ಮಿನು ಹಾತ್ ಧರೀನ್, ಇನ ಅಲ್ಫು ಕರೀನ್ ಬೋಲಿಮೋಕ್ಕಿದಿದೊ.

5 ತದೆ ಯೇಸುನೆ ಇವ್ಣುನ, “ತುಮಾರಾಮ ಕಿನಾತೋಬಿ ಏಕ್ ಜಣಾನೊ ಛಿಯೊ ನತರ್‌ಕಿ ಥಾಂಡೊ ಸಬ್ಬತ್ ದನ್ಮ ಬಾವ್ತಿಮ ಪಡಿಗಯೂತೊ ಯೋ ಇನ ಸಬ್ಬತ್ ದನ್‌ಮಾಬಿ ಉಪ್ಪರ್ ಪಾಡಕೊಯ್ತಿಶು?” ಕರಿ ಬೋಲ್ಯೊ.

6 ಕತೋಬಿ ಇವ್ವೆ ಅನಿ ಬಾರೇಮ ಶನೂಸ್ ಜವಾಬ್ ದ್ಯವಾನ ಕೋಹುಯುನಿ.

ತುನ ತೂ ನಕೊ ಭಡೈಲೀಶ್

7 ಖಾಣನ ಬುಲೈ ಮಂಗಾಯುತೆ ಅದ್ಮಿಖ್ವಾರು, ಖಾಣಾನಿ ಪಹಿಲಿ ಶಾಲ್‌ಮಾನಿ ಅಲ್ಪಿ ಝಗೋಪರ್ ಬೇಖ್ವಣು ಕರಿ ಝಗೊ ಚೂಣುಕರ್ತುಫೂತೆ ದೇಖಿನ್, ಯೇಸುನೆ ಇವ್ವುನ ಏಕ್ ಮತ್ಲಬ್‌ನಿ ಖೇಣಿನ ಬೋಲ್ಯೊ.

8 ಯೋ ಶಾತ್‌ಕತೊ, “ಕೋಣ್‌ತೋಬಿ ಏಕ್ ಜಣು ತುನ ವ್ಯಹಾನು ಖಾಣು ಖವಾನ ಬುಲಾಯೂತೊ, ಪಂತಿಮ ಪಹಿಲೆಸ್ ನಕೊ ಬೇಶಿಶ್. ಏಕ್ ವೇಳ್ ತಾರೆಥೀಬಿ ಮಹಾನ್ ಅದ್ಮಿನ ಇನೆ ಬುಲೈರಾಖ್ಲೊಲುಶೆ.

9 ಅಜ್ಜು ತುಮೂನ ಭೇ ಜಣಾನ ಬುಲಾಯೋತೆ ಯೋ ಐನ್, ‘ಆ ಝಗೊ ಅನ ಮ್ಹೆಂದೆ’ ಕರಿ ತುನ ಬೋಲಾನಿ ವಖ್ವತ್‌ಮ, ತೂ ಖ್ವಾರ್‌ಮೈನ್ ಖ್ವಾರೇಥಿ ಛೇಟುನಿ ಝಗೋಪರ್ ಜೈನ್ ಬೇಖ್ವಣು ಪಡ್‌ಶೆ.

10 ಕತೋಬಿ ಕೋಣ್‌ತೋಬಿ ತುನ ಬುಲಾಯೂತೊ, ತೂ ಜೈನ್ ಖ್ವಾರೇಥಿ ಛೇಟುನಿ ಝಗೋಪರ್ ಬೇಖ್ವ್. ಅಮ್ ಕರ್ರೋತೊ ತುನ ಬುಲಾಯೋತೆ ಯೋ ಐನ್, ‘ದೋಸ್, ಉಟ್ ಉಪ್ಪರ್‌ಲಿ ಝಗೋಪರ್ ಐನ್ ಬೇಖ್ವ್’ ಕರಿ ಬೋಲ್‌ಶೆ. ತದೆ ತಾರ ಜೋಡ್ಡ ಬೆರೂತೆ ಖ್ವಾರಾನ ಖ್ವಾಮೆ ತಾರಿ ಇಜ್ಜತ್ ಭಡ್‌ಶೆ.

11 ಶನಕತೊ ಕೋಣ್ ಇನುಯೋಸ್ ಮೋಟೊಕರಿ ಬೋಲ್ಯೆಲ್ಯವಾಳೊ ಹರೇಕ್‌ಜಣೊ ಹೇಟು ಹುಯಿಜಾಶೆ, ಅಜ್ಜು ಇನುಯೋಸ್ ಹೇಟುಕರಿ ಬೋಲ್ಯೆಲ್ಯವಾಳೊ ಯೋ ಮೋಟೊ ಹುಯಿಜಾಶೆ ಕರಿಬೋಲ್ಯೊ.

12 ಅಜ್ಜು ಯೇಸುನೆ ಇನ ಖಾಣನ ಬುಲಾಯೋತೆ ಇನಾಬಿ ಏಕ್ ವಾತ್ ಬೋಲ್ಯೊ. ಯೋ ಶಾತ್‌ಕತೊ, “ತೂ ಧೊಪಾರ್‌ನಿ ವಖ್ವತ್‌ಮ ರ್ಲವೊ ನತರ್‌ಕಿ ಖ್ವಾಂಜ್‌ನಿ ವಖ್ವತ್‌ಮ ರ್ಲವೊ, ಖಾಣಾನಖ್ವಾಜಿ ತಾರ ದೋಸ್ತಾನ ರ್ಲವೊ, ಬೈಯೇನ ರ್ಲವೊ, ತಾರ ಮಾಯಮಾತ್ರಾನ ರ್ಲವೊ, ಧನ್‌ದಾಲತ್‌ವಾಳ ಖನ್ನೆವಾಳ ರ್ಲವೊ ನಕೊಬುಲೈಶ್.

ಬುಲಾಯೋತೊ, ಇವ್ವೇಬಿ ತುನ ಪಾಲ್ತು ಖಾಣನ ಬುಲಾಯೇಜಾಯ್, ಅನೇಥಿ ತುನೆ ಕರೊತ್ಯೆ ಕರ್ನಿ ಭರ್ನಿ ಮಳಿಜಾಶೆ.

13 ಕತೋಬಿ ತೂ ಮಿರ್ಝಾವಾನ್ ಪಿಕಾವಾನಿ ವಖ್ತಮ, ಗೋರ್-ಗರೀಬ್‌ನ, ಪಾಂಗ್‌ಳ್ಯಾನ್, ಲಂಗ್ಡಾವ್‌ನ ಅಜು ಕಾಣಾವ್ ಬುಲಾವ್.

14 ತದೆ ತೂ ಧನ್ಯ ಹುಯಿಶ್, ಇವ್ವೆ ಪಾಲ್ತುಫರಿ ಶಾತ್ರಿ ಕರಾನಕೊಂತೆ ಇವ್ವೆ ನೀತಿವಾಳುಖ್ತಾರು ಮರ್ಣಮಾಥು ಪಾಲ್ತು ಜಿವ್ತುಹುಯಿನ್ ಆವಾನಿ ವಖ್ತಮ ದೇವ್ ತುನ ದೇವ್ತೆ ಇನ ದಿಶೆ.

ಮಿರ್ಝಾವಾನ್ ಬಾರೇಮಾನು ಮತ್ಸಾನ್ ಪೀಣಿ
(ಮತ್ತಾಯ 22:1-10)

15 ಖಾಣನ ಬೆರುಥೂತೆ ಇವ್ವಾಮ ಏಕ್ ಭಣು ಆ ವಾತೇನ ಖ್ವಮ್‌ಜಿನ್, ಯೇಸುನ, “ದೇವ್ನಿ ರಾಜ್ಯಮ ಮಿರ್ಝಾವಾನ್ ಖಾವಾನ ಬೇಖ್ವಾಳೋಸ್ ಧನ್ಯ ಹುಯಿರೊಸ್” ಕರಿ ಬೋಲ್ಯೊ.

16 ತದೆ ಯೇಸುನೆ ಇನ ಬೋಲ್ಯೊಕಿ, “ಏಕ್ ಅದ್ವಿನೆ ಏಕ್ ಮೋಟಿ ಮಿರ್ಝಾವಾನ್ ಪಿಕ್ಯೆನ್, ಕೈಯೆಕ್ತಿ ಅದ್ವಿನ ಬುಲಾಯೊ.

17 ಮಿರ್ಝಾವಾನ್ ಖಾವಾನಿ ವಖ್ತ ಆವಾದಿನ್, ಯೋ ಅದ್ವಿನೆ, ‘ಆವೊ, ಖಾಣು ತೈಯಾರ್ ಲ್ಹಾ!’ ಕರಿ, ಬುಲಾಯೊಥೋತೆ ತಮಾಮ್ ಅದ್ವಿನ ಬುಲಾವಾನಟೇಕೆ ಆಳ್‌ನ ಮೋಕ್‌ಲ್ಯೊ.

18 ಕತೋಬಿ ಇವ್ವೆ ಖ್ವಾರೊಸ್, ಮಾಪ್ ಕರ್ನ್ ಕರಿ ಎಕ್ಸ್ ದಿಲ್‌ಥಿ ಬೋಲಾಲಗ್ನ್, ಪಹಿಲೆವಾಳೊ ಯೋ ಆಳ್‌ನ ದೇಖಿನ್ ಬೋಲ್ಯೊಕಿ, ‘ಮೇ ಏಕ್ ಖೇತರ್‌ನ ಮೋಲ್ ಲೀರಾಖ್ಯೊಸ್, ಮೇ ಜೈನ್, ಯೋ ಖೇತರ್‌ನ ದೇಖಾನು ಜರೂರತ್ ಲ್ಹಾ; ಮನ ಮಾಪ್ ಕರ್ ಕರಿ ಬೋಲಿಲಿದೊ ಕರಿ ಬೋಲ್.’

19 ಬಿಜ್ಜೇಕ್ ಭಣಾನೆ ಬೋಲ್ಯೊಕಿ, ‘ಮೇ ಪಾಚ್ ಜೋಡಿ ಡಾಂಡಾವ್‌ನ ಲೀರಾಖ್ಯೊಸ್, ಇನ ದೇಖಿನ್ ಪರ್ಖಾನ ವಳ್ಳೊಜವುಸ್. ಮನ ಮಾಪ್‌ಕರ್ ಕರಿ ಬೋಲ್ಯೊ ಕರಿ ಬೋಲ್.’

20 ಅಜೇಕ್ ಭಣಾನೆ, ‘ಹಮ್ಮೆಸ್ ಮಾರೊ ವ್ಯಹಾ ಹುಯಿರೊಸ್, ಇನಖ್ವಾಜಿ ಮನ ಆವಾನ ಕೋ ಉಶೇನಿ’ ಕರಿ ಬೋಲ್ಯೊ.

21 ಯೋ ಆಳ್ ಪಾಲ್ಟುಫರಿನ್, ಇನ ಯಜಮಾನ್‌ಕನ ಏನ್, ಚಾಲ್ಯುತೆ ಇನಿ ಬಾರೇಮ ಬೋಲ್ಯು, ತದೆ ಯೋ ಘರ್‌ನ ಯಜಮಾನ್ನೆ ಖೀಜ್ ಖೈನ್, ಇನ ಆಳ್‌ನ, 'ತೂ ಒಗ್ಗಿಸ್‌ಮ, ಆ ಗಾಮ್‌ನು ಗಲ್ಲಿಯೇಮಾಬಿ, ಓಣಿಯೇಮಾಬಿ ಜೈನ್, ಗೋರ್-ಗರೀಬ್‌ನ, ಪಾಂಗ್‌ಳ್ಕಾಪ್ಪ ಲಂಗ್ಡಾವ್‌ನ, ಕಾಣಾಪ್ಪ ಖ್ವಾರು ಹಜ್ಜಾ ಬುಲೈಲ್ಯಾವ್' ಕರಿ ಬೋಲ್ಯೊ.

22 ಒಗ್ಗಿಸ್‌ಮ ಯೋ ಆಳ್‌ನೆ, 'ಯಜಮಾನ್ ತಾರಿ ಹುಕುಮ್ ಚಾಲಿಗಿ, ಕತೋಬಿ ಬಿಜೂಬಿ ಝಗೊ ಲ್ಹಾ' ಕರಿ ಬೋಲ್ಯೊ.

23 ತದೆ ಇನ ಯಜಮಾನ್ನೆ ಯೋ ಆಳ್‌ನ ಬೋಲ್ಯೊಕಿ, 'ತೂ ಜೈನ್, ಖ್ವಾರು ಖೇತರ್‌ನು ವಾಟ್‌ಪರ್ ಅಜು ವಾಡ್‌ಗಿಯೆಕನ ಲ್ಹಾತೆ ಹರೇಕ್ಸ್ ಜುಲಮ್‌ಥಿ ಮಹಿ ಬುಲೈಲ್ಯಾವ್. ಮಾರು ಘರ್ ಭರಾವಾದೆ' ಕರಿ ಬೋಲ್ಯೊ.

24 ಕತೋಬಿ ಮೇ ತುಮಾನ ಬೋಲುಸ್ಕಿ, 'ಮೇ ಅಗಾಡಿ ಬುಲಾಯೊಥೋತೆ ಇವ್ವಾಮ ಏಕ್ ಜಣುಬಿ ಮೇ ಕರಾಯೋತೆ ಖಾಣಾನಿ ಲಙ್ತನ್ ಲ್ಹಾಕಿಬಿ ನಾ ದೇಕ್ಟು!' ಕರಿ ಬೋಲ್ಯೊ."

ಯೇಸುನ ಶಿಷ್ಯರ್ ಹುಯಿರ್ದೇಣುಕತೊ ಕರ್ನುತೆ ಕಾಮ್
(ಮತ್ತಾಯ 10:37-38)

25 ಏಕ್ ಹಲ್ಲ ಘಣ ಅದ್ವಿನಿ ಭೀಡ್ ಯೇಸುನ ಕೇಡೆ ಫವ್‌ಕರಾತೆ ವಖ್ವತ್‌ಮ, ಯೇಸುನೆ ಫರಿನ್, ಇವ್ವುನ ಅಮ್ ಬೋಲ್ಯೊ.

26 ಮಾರಕನ ಆವಾಳು ಮಾರೇಥಿ ಜಾಖ್ವತ್, ಇನ ಆಯಬಾನ, ಬಾವಣ್, ಲಡ್ಕಾವ್‌ನ, ಮೋಟ ಬೈಯೆ ಭೇನೆ ಅಜು ಇನ ಜಾನ್ವಬಿ ನಾ ವಹೇರ್ ಕರೈತೊ ಯೋ ಮಾರೊ ಶಿಷ್ಯ ಹುಯಿರ್ದೇವಾನ ಕೊಹುವಾನಿ.

27 ಕೋಣ್‌ತೋಬಿ ಇನಿ ಶಿಲ್‌ಬೇನ ಪಳ್ಳಿನ್, ಮಾರ ಪೀಲೆ ನಾ ಆಯೂತೆ, ಯೋ ಮಾರೊ ಶಿಷ್ಯ ಹುಯಿರ್ದೇವಾನ ಕೋ ಹೊಯ್ತಿ.

28 ತುಮಾರಾಮ ಕೋಣ್‌ತೋಬಿ ಏಕ್ ಜಣು, ಏಕ್ ಊಚುಗುಂಬಜ್ ಭಾಂದ್‌ಣು ಕರಿ ರ್ದಯೊತೊ, ಇವ್ವೆ ಪಹಿಲೆ

ಬೇಶಿನ್, ಇನ ಭಂದಾವಾನ ಕೆತ್ತು ಖರ್ಚಿ ಉಶೆ ಕರಿ ಸೋಚ್‌ಸ್. ಶನಕತೊ, ಯೋ ಕಾಮ್ ಪೂರ ಕರಾಯೆತ್ರೆ ಪೈಶಾ ಛಾಕಿ ಕೊಯ್ನಿ ಕರಿ ದೇಖಾನಟೇಕೆ.

²⁹ ಅಮ್ ಇಶಾಬ್ ಕರೈಕೊಂತೆ, ಹದಿ ನಾಖಾನ ಬಾದ್‌ಮ, ಯೋ ಕಾಮ್ ಭೇರಿಗಯೊತೊ,

³⁰ ದೇಖಾವಾಳು ಖ್ಹಾರು, 'ಆ ಅದ್ನಿ ಭಂದಾವಾನ ಶುರುಕರೈ, ಕತೋಬಿ ಅನ ಪೂರ ಕರಾನ ಕೋಹುಯುನಿ!' ಕರಿ ಬೋಲಿನ್, ಇನಿ ನಕ್ಲೆ ಕಾಡ್‌ಶೆ.

³¹ ಏಕ್ ರಾಜ್ ಬಿಜೇಕ್ ರಾಜ್ಞಾನ ಜೋಡೆ ಜಂಗ್ ಭೇಡಾನ ಜಾವಾನ ಅಗಾಡಿ, ವೀಖ್ತ್ ಹಜ್ಞಾರ್ ದಂಡ್-ದಳಾವಾಯಿನ ಲೀನ್, ಜಂಗ್‌ನ ವಳ್ಳಾವಾತೆ ಯೋ ರಾಜ್ಞಾನ ಜೋಡೆ, ದಖ್ತ್ ಹಜ್ಞಾರ್ ದಂಡ್-ದಳಾವಾಯಿನ ಲೀಜೈನ್, ಹರಾವನ ಉಶೇಕಿ ಕೊಯ್ನಿ ಕರಿ ಪಹಿಲೇಸ್ ಬೇಶಿನ್ ಸೋಚ್‌ಸ್.

³² ಇಮ್ ಹರಾವನ ಕೋ ಉಶೇನಿ ಕರಿ ಮಾಲುಮ್ ಪಡ್ಚೊತೊ, ಯೋ ವಳ್ಳಾವಾತೆ ರಾಜ್ ದೂರ್ ರ್ವಾವಾನಿನ್ ವಖ್ತಮ್, ಇನು ಖಬರ್ ದೈವಾಳಾನ ಮೋಕ್ಲೀನ್, ಶಾಂತಿನು ಒಪ್ಪಂದ ಕರಿಲಿಯೆ, ಕರಿ ಬೋಲಿಲೇಸ್.

³³ ಇಮ್ಸ್, ತುಮಾರಮ ಕೋಣ್‌ಬಿ ರ್ವಾವೊ, ಇನಲ್ಲಾತೆ ಖ್ಹಾರನ್ನ ನಾ ಮ್ಹೇಲ್ಯೊತೊ, ಯೋ ಮಾರೊ ಶಿಷ್ಯ ಹುಯಿರ್ದೇವಾನ ಕೋ ಹುವಾನಿ" ಕರಿ ಬೋಲ್ಯೊ.

ಫಾಯಿದೊಕೊಂತೆ ಮೀಟ್‌ನಿ ಬಾರೇಮ
(ಮತ್ತಾಯ 5:13; ಮಾರ್ಕ 9:50)

³⁴ ಮೀಟ್ ಏಕ್ ಅಲ್ಫು ರಾಲ್ಫುಸ್. ಮೀಟಸ್ ಫಿಕ್ಕು ಹುಯಿಗುತೊ, ಇನ ಬಿಜುಪಾಲ್ತು ಶನೇಥಿ ರುಚ್‌ಲ್ಯಾವನು ಉಷೆ?

³⁵ ಇಮ್ಮು ಮೀಟ್‌ಥಿ ಜಮೀನ್ನ ರ್ವಾವೊ, ಖಾತ್‌ನ ರ್ವಾವೊ ಶನೂಸ್ ಫಾಯಿದೊ ಕೊಯ್ನಿ. ಇನ ಭಾರ್ ಫೇಕಿದೇಸ್. ಖ್ವಮ್‌ಜ್ಞಾನ ಕಾನ್‌ರ್ದವಾಳು ಖ್ವಮ್‌ಜ್ಞಾದೆ!" ಕರಿ ಬೋಲ್ಯೊ.

15

ಗುಮ್ಮೆಗಯೂತೆ ಮೇಂಡಾನಿ ಬಾರೇಮ
(ಮತ್ತಾಯ 18:12-14)

¹ ಏಕ್ ದನ್ನೆ ಯೇಸು ಬೋಲಾತೆ ವಾತೇನ ಖ್ಹಮ್‌ಜಾನಖ್ಹಾಜೆ, ಘಣು ಅದ್ವಿಶುಂಕ ವಶೂಲ್ ಕರಾವಾಳು ಅಜ್ಜು ಪಾಪಿಖ್ಹಾರು ಇನಾಕನ ಆಯು.

² ಅನ ದೇಖಿನ್ ಫರಿಸಾಯರ್ ಅಜ್ಜು ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯೇನೆ, “ಆ ಪಾಪಿ ಖ್ಹಾರಾನ ಜೋಡೆ ಮಳಿನ್, ಇವ್ಣ ಜೋಡೆ ಖಾಣು ಖಾಸ್ತಿ” ಕರಿ ಯೇಸುಪರ್ ಮಶ್ಲಾ ಮಾರ್ಚ್.

³ ತದೆ ಯೇಸುನೆ ಇವ್ಣನ ಏಕ್ ಮತ್ಲಬ್‌ನಿ ಖೇಣಿನ ಬೋಲ್ಯೊ.

⁴ ಯೋ ಶಾತ್‌ಕತೊ, “ತುಮಾರಾಮ ಕೋಣ್‌ತೋಬಿ ಏಕ್ ಜಣು, ಇನಾಕನ ಖ್ಹೋ ಮೇಂಡುರ್ದೇನ್, ಇನಾಮಾನು ಏಕ್ ಗುಮ್ಮೆಗಯೂತೆ, ಯೋ ನೌ ಉಪ್ಪರ್ ಖ್ಹಡ್‌ಚಾರೀಖ್ವ್ಡನ ಝೂಂಡ್‌ಮಾಸ್ ಮ್ಹಂದಿನ್, ಗುಮ್ಮೆಗಯೂತೆ ಯೋ ಮೇಂಡು ಮಳಾತೋಡಿ, ಇನ ಥೂಂಡಿನ್ ಜಾಯಿಕೊಯ್ಚಿ ಶು?

⁵⁻⁶ ಯೋ ಮಳಾನ ಬಾದ್‌ಮ, ಯೋ ಅದ್ವಿಖ್ಹಿತಿ ಕರ್ತುಹುಯಿನ್, ಮೇಂಡಾನ ಇನ ಖಾಂದಪರ್ ಮ್ಹೇಲಿಲೀನ್, ಘರೆಆಯಿನ್, ಇನಖ್ಹಾರ ದೋಸ್ತಾನ ಅಜ್ಜು ಖನ್ನೆವಾಳಾನ ಎಕ್ಚುಕರಿನ್, ‘ಗುಮ್ಮೆಗಯೂತೆ ಯೋ ಮೇಂಡು ಮಳ್ಳು ಮಾರ ಜೋಡೆ ಖ್ಹಿತಿಕರೊ’ ಕರಿ ಇವ್ಣನ ಬೋಲಾಕೊಯ್ಚಿ ಶು?

⁷ ಇಮ್ಮಸ್, ದೇವ್‌ಭಣಿ ಫರಾನ ಮನ್‌ಕೊಂತೆ, ನೌ ಉಪ್ಪರ್ ಖ್ಹಡ್‌ಚಾರೀಖ್ವ್ಡ ನೀತಿವಾಳ ಅದ್ವಿಧೀಬಿ, ದೇವ್‌ಭಣಿ ಫರಾಸ್ತೆ ಏಕ್ ಪಾಪಿನಿ ಬಾರೇಮ, ಪರ್‌ಲೋಕ್‌ಮ ಘಣು ಖ್ಹಿತಿಹುವ್ವಾಸ್ ಕರಿ ಮೇ ತುಮೂನ ಬೋಲುಸ್”.

ಗುಮ್ಮೆಗಯೂತೆ ಬಿಲ್ಲಾನಿ ಬಾರೇಮ

8 ಏಕ್ ತಯೇಡಾಕನ ದಖ್ಖೊ ರೂಪಾನು* ಬಿಲ್ಲು ಛಾ ಕರಿ ಸೋಚೊ. ಇನಾಮಾನು ಏಕ್ ಬಿಲ್ಲಾನ ಯೋ ಗುಮೈಲಿದಿತೊ ಯೋ ಶಾತ್ ಕರ್ಶೆ? ಯೋ ತಯೇಡ ದೀವೊ ಲಗಾಡೀನ್, ಹಿಡಿ ಘರ್‌ನಾಸ್ ಧೂಡೀನ್, ಗುಮೈಗಯೊತೆ ಯೋ ಬಿಲ್ಲು ಮಳಾತೋಡಿ, ಹೊಷಾರ್‌ಥಿ ಡೊಂಡಾ ಕೊಯ್ತಿಕಿ ಶು?

9 ಮಳಾನ ಬಾದ್‌ಮ, ಇನಿ ದೋಸ್‌ತಿಯೆ ಖ್ವಾರಿನ ಎಕ್ಟು ಕರಿಲೀನ್, 'ಗುಮೈಗಯೊತೆ ಯೋ ಮಾರು ಬಿಲ್ಲು ಮಳ್ಳು ಮಾರ ಜೋಡೆ ಖ್ವುತಿ ಕರೊ' ಕರಿ ಬೋಲಾಕೊಯ್ತಿಕಿ ಶು?

10 ಅಮ್ಮಸ್, ದೇವ್ ಭಣಿ ಫರಾಸ್ತೆ ಏಕ್ ಪಾಪಿನಿ ಬಾರೇಮ, ದೇವ್‌ನು ದೂತರ್ ಖ್ವಾರು ಖ್ವುತಿಕರಸ್" ಕರಿ ಬೋಲ್ಯೊ.

ಗುಮೈಗಯೊತೆ ಛಿಯ್ಯಾನಿ ಬಾರೇಮ

11 ಅನ ಬಾದ್‌ಮ ಯೇಸುನೆ ಅಮ್ ಬೋಲ್ಯೊ, "ಏಕ್ ಅದ್ವಿನ ಬೇ ಛಿಯ್ಯಾ ಥಾ.

12 ನ್ಹಾನೊ ಛಿಯ್ಯಾನೆ ಇನ ಬಾನ, 'ಬಾ, ಆಸ್ತಿಮ ಮನ ಆವ್ತೆ ಭಾಗ್ನು ಹಮ್ಮೇಸ್ ದೇ' ಕರಿ ಬೋಲ್ಯೊ. ತದೆ ಬಾನೆ ಇನಿ ಆಸ್ತಿನ ಭೇ ಛಿಯ್ಯಾನ ವಾಟ ಪಾಡಿದೊ.

13 ಥೋಡ ದನ್ನ ಬಾದ್‌ಮ, ಯೋ ನ್ಹಾನ ಛಿಯ್ಯಾನೆ ಇನಠೂತೆ ಖ್ವಾರೊಸ್ ವೇಚಿನ್, ಪೈಶಾ ಕರಿಲೀನ್, ದೂರ್‌ಲ್ಯಾ ದೇಖ್‌ವ್ ಜೈನ್. ಹಿಚ್ಚಾ ಇನ ಮನ್ ಆವಾತೆ ಇಮ್ ಜಿವ್ವುಕರಿನ್, ಇನಿ ಶೊತ್ತ್ ಗುಮೈಲಿದೊ.

14 ಅಮ್ ಯೋ ಖ್ವಾರೊಸ್ ಬರ್ಬಾತ್ ಕರಿಲ್ವಾನ ಬಾದ್‌ಮ, ಯೋ ದೇಖ್‌ವ್ ಕಾಳ್ಳುಕಾಳ್ ಏನ್, ಶಾತ್‌ಸೊಂತೆ ಇಮ್ಮಿ ಹಾಲ್ ಹುಯಿಗೈ.

15 ತದೆ ಯೋ ಜೈನ್, ಯೋ ದೇಖ್‌ವ್ ಏಕ್ ಅದ್ವಿಕನ ಕಾಮ್ ಪೇಶಿಗಯೊ. ಯೋ ಅದ್ವಿ ಇನ ಡೂಕರ್ ಚರಾವಾನಟಿಕೆ, ಇನ ಖೇತರ್‌ಮ ಮೋಕ್‌ಲ್ಯೊ.

* 15:8 15:8 ಆ ರೂಪಾಧಿ ಬಣ್ಣೆಹುಯು ಬಿಲ್ಲು.

16 ಅಮ್ ರ್ವಾವಾನಿ ವಖ್ವತ್‌ಮ, ಡೂಕರ್ ಖಾಸ್ತೆ ಫಳಿಯೆ ಖೈನ್‌ತೋಬಿ, ಪೇಟ್ ಭರಿಲೇವ್ಣ ಕರಿ ಯೋ ಆಖ್ವ ಕರ್ರೊತೋಬಿ, ಕೋಣ್‌ಬಿ ಇನ ಕೋ ದಿದೂನಿ.

17 ತದೆ ಇನ ಅಕ್ಕಲ್ ಅಯಿನ್, 'ಮಾರ ಬಾಕನ ಕೈಯೆಕ್ಕಿ ಕೂಲಿಆಳ್‌ನ ಖೈನ್, ಬಶ್‌ಹುವಾಯೆತ್ರೆ ಖಾಣು ಲ್ಹಾ. ಕತೋಬಿ ಮೇತೊ ಹಜ್ಜ ಭುಕ್ಕೊ ಮರುಕರೂಸ್!'

18 ಮೇ ಉಠೀನ್, ಮಾರ ಬಾಕನ ಜೈನ್, ಇನ 'ಬಾ, ಪರ್‌ಲೋಕ್‌ನಿ ವಿರೋದ್ ಅಜ್ಜು ತಾರಿ ವಿರೋದ್ ಪಾಪ್ ಕರಿರಾಖ್ಲೋಸ್.

19 ಅಜ್ಜು ಖ್ವಾವ್ಣೆ ಮೇ ತಾರೊ ಛಿಯೊ ಹುಯಿರ್ದವಾನ ಲ್ಹಾಯೇಕ್ ಕೊಯ್ಣಿ, ತಾರ ಕೂಲಿಆಳ್‌ಮ ಏಕ್‌ನಿಘೋಣಿ ಮನ ದೇಕ್' ಕರಿ ಸೋಚಿಲಿದೊ.

20 ತದೆ ಯೋ ಉಠೀನ್, ಪಾಳ್ತು ಇನ ಬಾಕನ ಗಯೊ.

ಯೋ ಅಞೂಬಿ ದೂರ್ ರ್ವಾವಾನಿಸ್ ವಖ್ವತ್‌ಮ, ಇನೊ ಬಾ ಇನ ದೇಖಿನ್, ಗೋರ್‌ಖೈನ್, ನಾಶಿಆಯಿನ್, ಇನ ಬಢೈನ್ ಬುಚ್ಚಾ ದಿದೊ.

21 ಕತೋಬಿ ಛಿಯಾನೆ ಇನ, 'ಬಾ, ಪರ್‌ಲೋಕ್‌ನಿ ವಿರೋದ್ ಅಜ್ಜು ತಾರ ಖ್ವಾವ್ಣೆ ಪಾಪ್ ಕರಿರಾಖ್ಲೋಸ್. ಅಜ್ಜು ತಾರ ಖ್ವಾವ್ಣೆ ಮೇ ಛಿಯೊ ಹುಯಿರ್ದವಾನ ಲ್ಹಾಯೇಕ್ ಕೊಯ್ಣಿ' ಕರಿ ಬೋಲ್ಯೊ.

22 ಕತೋಬಿ ಬಾನೆ ಇನ ಆಳ್‌ನ, 'ಫಟ್ ಕರಿ ಘಣ ಅಲ್ಫ ರ್ಘುಗ್ಗಾನ ಲಯಿನ್ ಅನ ಪೇರ್ದಾವೊ. ಅನಿ ಅಂಗ್‌ಳೀಮ ಅಂಘೂಟಿ ಅಜ್ಜು ಗೋಡಾಮ ಖೋಖ್ವಾಡಾ ಫಾಲೊ.

23 ಅಜ್ಜು ಪಲೈಹುಯೊ ಕೆಲ್ಡಾನ ಲೈನ್ ರ್ವೇಖ್ಲೊ ಮಿರ್ಘುವಾನ್ ಪಿಕ್ಲೆನ್ ಖ್ವುಶಿ ಕರಿಯೆ!

24 ಆ ಮಾರೊ ಛಿಯೊ ಮರಿಗಯೋಡೊ, ಪಾಳ್ತೊ ಬಚಿ ಐರ್ದೋಸ್; ಗುಮೈಗಯೋಡೊ ಹಮೈ ಮಳಿರ್ದೋಸ್' ಕರಿ ಬೋಲ್ಯೊ. ತದೆ ಇವ್ಣೆ ಖ್ವುಶಿ ಕರಾಲಗ್ಲು.

25 ಯೋಸ್ ವಖ್ವತ್‌ಮ, ಇನೊ ಮೋಟೊ ಛಿಯೊ ಖೇತರ್‌ಮ ಥೊ. ಯೋ ಘರ್‌ನ ಖನ್ನೆ-ಖನ್ನೆ ಆವಾನಿ ವಖ್ವತ್‌ಮ, ಪಾಜ್ಜು ವಜಾಡೀನ್,

ಖೇಲ್‌ಕೂದ್ ಕರುಕರಾತೆ ಅವಾಜ್‌ನ ಖ್ವಮ್‌ಜ್ಯೊ.

26 ತದೆ ಇನೆ ಆಳೊಮ ಏಕ್ ಜ್ಞಾನ ಇನಾಕನ ಬುಲೈನ್, 'ಆ ಶಾತ್ ಫಾಲುಕರಾಸ್ತೆ'? ಕರಿ ಪುಲ್ಲಾಯೊ.

27 ತದೆ ಆಳೊನೆ ಇನ, 'ತಾರೊ ನ್ಹಾನೊ ಭೈ ಪಾಲ್ಹುಫರಿ ಐರ್ಟ್ವೊಸ್. ಯೋ ಜತನ್‌ಥಿ ಆಯೋತೆ ಇನಖ್ವಾಜೆ, ತಾರ ಬಾನೆ, ಯೋ ಪಲ್ಹುಹುಯು ಕೆಲ್ದಾನ ರ್ಹೇಖ್ವಾಯೊ' ಕರಿ ಬೋಲ್ಯೊ.

28 ಅನ ಖ್ವಮ್‌ಜಿನ್, ಇನ ಮೋಟ ಭೈನೆ ಇರಾದೊ ಪ್ಲಿನ್, ಘರಾನ್ ಮಹಿ ಗಯೊಕೊಯ್ತೆ; ತದೆ ಇನೊ ಬಾ ಭಾರ್‌ಆಯಿನ್, 'ಮಹಿ ಆವ್' ಕರಿ ಇನ ಗಿಂಗೈಲಿದೊ.

29 ಕತೋಬಿ ಇನೆ ಇನ ಬಾನ, 'ದೇಕ್, ಅತ್ರಾವರಖ್ವ್ ಮೇ ಆಳೊನಿಮತ್, ತಾರಿ ಫಾತ್ರಿ ಕರ್ಟ್ಯೊ ಅಜ್ಜು ತಾರಿ ಏಕ್ ವಾತೆನಾಬಿ ಝಿಟ್ಕಾರ್ಟ್ಯೊ ಕೊಯ್ತೆ. ಇಮ್ ರ್ಹಯೊತೋಬಿ, ಮೇ ಮಾರ ದೋಸ್ತಖ್ವಾರಾನ ಜೋಡೆ ಖ್ವುಶಿ ಕರಾನ ಏಕ್ ಬೋಕ್‌ಡೋಬಿ ತುನೆ ದಿದೊಕೊಯ್ತೆ.

30 ಕತೋಬಿ ಶೂಳೆಖ್ವಾರಿನ ಭಾಂದಿಲೀನ್, ತಾರಿ ಆಸ್ತಿನ ಝಡ್‌ಪಿನ್ ಖಾದೋತೆ, ಆ ತಾರೊ ಛಿಯೊ ಆವ್ತಾನ, ಪಲ್ಹುಹುಯ ಕೆಲ್ದಾನ ಇನಖ್ವಾಜೆ ರ್ಹೇಖ್ವಾಯೋನಿ' ಕರಿ ಜವಾಬ್ ದಿದೊ.

31 ತದೆ ಇನ ಬಾನೆ, 'ಛಿಯ್ಯಾ ತೂ ಕದೇಬಿ ಮಾರ ಜೋಡೆ ಥೊ, ಅಜ್ಜು ಮಾರಕನ ಛಾತೆ ಖ್ವಾರು ತಾರುಸ್.

32 ತೋಬಿ ಖ್ವುಶಿ ಕರಾನು, ಶಂತೋಖ್ವ್ ಕರಾನು ಬರಾಬರಸ್. ಶನಕತೊ ಆ ತಾರೊ ಭೈ ಮರಿಗಯೋಥೊ ಪಾಲ್ಟೊ ಜಿವ್ವೊಹುಯಿನ್ ಐರ್ಟ್ವೊಸ್, ಗುಮೈಗಯೋಥೊ ಮಳಿರ್ಟ್ವೊಸ್" ಕರಿ ಬೋಲ್ಯೊ.

16

ಠಗಾರ್ಟ್ಯೊ ಮೇಸ್ತಿನಿ ಬಾರೇಮ

1 ಯೇಸುನೆ ಇನ ಶಿಷ್ಯರಾನ್ ಬೋಲ್ಯೊಕಿ, "ಏಕ್ ಶೌಕಾರ್ ಅದ್ವಿಥು. ಇನೆ, ಇನ ಧನ್-ದಾಲತ್‌ನ ದೇಖಿಲ್ಯವಾನಖ್ವಾಜೆ ಏಕ್ ಸೇವಕ್‌ನ

ನೇಮಕ್ ಕರೆಯೊಡೊ. ಥೋಡ ದನ್ನ ಬಾದ್‌ಮ, ಯೋ ಶೌಕಾರ್‌ನ ಮಾಲುಮ್ ಪಡ್ತೊಕಿ, ಯೋ ಸೇವಕ್ ಇನ ಯಜಮಾನ್ನ ಪೈಶಾಖ್ತಾರು ಬರ್ಬಾತ್ ಕರುಕರಸ್ ಕರಿ.

² ತದೆ ಇನೆ ಸೇವಕ್‌ನ ಬುಲೈನ್, “ಆ ಶಾತ್? ಮೇ ತಾರಿ ಬಾರೇಮ ಖ್ವಮ್‌ಜುಕರೊಸ್ತೆ. ಮಾರಿ ಧನ್-ದೌಲತ್‌ನಿ ಬಾರೇಮಾನು ಖ್ವಾರಿ ಇಶಾಬ್‌ನ ತೂ ಮನ ದೇ; ಅಜು ಖ್ವಾಮ್ಚೆ ತೂ ಮಾರ ಘರ್‌ನೊಸೇವಕ್ ಹುಯಿರ್ದೆವಾನ ಕೋ ಉಶೇನಿ” ಕರಿ ಬೋಲ್ಯೊ.

³ ಅಮ್ ರಡ್ವೇವಾನಿ ವಖ್ವತ್‌ಮ, ಯೋ ಘರ್‌ನೊ ಸೇವಕ್‌ನೆ ಇನುಯೋಸ್, “ಮಾರೊ ಯಜಮಾನ್, ಮನ ಕಾಮ್‌ಡ್ತು ಕಾಡಿನಾಖಿದ್ಯವಾನ ಆಯೊ. ಮೇ ಶಾತ್‌ಕರು? ಖಾಡ್‌ ಖೋಂದಾನಾಬಿ ಮನ ಶಕತ್‌ಕೊಯ್ಚಿ; ಧರಮ್ ಮಾಂಗಾನ ಮನ ಖ್ವರಮ್ ಲಾಗಸ್.

⁴ ಆ ಘರೆಯೊ ಸೇವಕ್‌ಹುಯಿರ್ದೊತೆ ಮನ ಕಾಮ್‌ಡ್ತು ಕಾಡಿನಾಖಿದ್ಯವಾನ ಬಾದ್ತ ಅದ್ವಿಖ್ವಾರು ಮನ ಇವ್ಚ ಘರ್‌ಮ ಬುಲೈಲ್ಯವಾನಿಫೊಣಿ ಮೇ ಶಾತ್‌ಕರ್ದುಕರಿ ಮಾಲುಮ್‌ಪಡ್ತು ಕರಿ ಸೋಚಿಲಿದೊ.

⁵ ಅನ ಬಾದ್‌ಮ, ಇನೆ ಇನೊ ಯಜಮಾನ್ನ ಕರಜ್ ದೇವ್ಣುತೆ ಹರೇಕ್ ಇನೆ ಬುಲಾಯೊ. ಪಹಿಲೆವಾಳಾನ, ‘ತೂ ಮಾರ ಯಜಮಾನ್ನ ಕೆತ್ತು ಉಧಾರ್ ದೇವ್ಣು?’ ಕರಿ ಇನೆ ಪುಲ್ಲಾಯೊ.

⁶ ತದೆ ಇನೆ, ‘ಖ್ವೊ ತಿತ್ತಿ ತೇಲ್’ ಕರಿ ಜವಾಬ್ ದೇತಾಖ್ವತರ್, ತದೆ ಯೋ ಸೇವಕ್‌ನೆ, ‘ಆ ತಾರು ಕಾಗತ್ ಪಾಡೀನ್, ಒಗ್ಗಿನ್ ಬೇಶಿನ್, ಅಡೈವಿಖ್ವಕರಿ ಲೀಕ್’ ಕರಿ ಇನ ಬೋಲ್ಯೊ.

⁷ ಅಜು ಇನೆ ಬಿಜ್ಜೀಕ್ ಜಣಾನ, ‘ಮಾರ ಯಜಮಾನ್ನ ತೂ ಕೆತ್ತು ದೇವ್ಣು?’ ಕರಿ ಇನೆ ಪುಲ್ಲಾವಖ್ವತರ್, ಇನೆ, ‘ಏಕ್ ಹಜಾರ್ ಪಲ್ಲೊ ಘವ್‌ಕರಿ ಬೋಲ್ಯೊ. ತದೆ ಇನೆ, ‘ಅಲ್ಲೆ ತಾರು ಕಾಗತ್, ಅನಾಪರ್ ಆಟ್ ಖ್ವೊಕರಿ ಲೀಖ್’ ಕರಿ ಬೋಲ್ಯೊ.

⁸ ತದೆ ಇನ ಯಜಮಾನ್ನ ಅನಿ ಬಾರೇಮ ಖ್ವಮ್‌ಜಿನ್, ಯೋ ಠಗಾರೆಯೊ ಹುಯಿರೋತೆ ಘರೆಯೊಸೇವಕ್‌ನ, ‘ತುನೆ ಫಾತುರ್‌ನು ಕಾಮ್ ಕರೆಯೊ’ ಕರಿ ಬೋಲಿನ್ ಖ್ವರಾಯೊ. ಶನಕತೊ, ಆ ಜಗತ್‌ನು

ಅದ್ವಿ ಇವ್ವಿ ಬಾರೇಮ, ಉಜ್ಜಾಖ್ವನ್ನು* ರಾಜ್ಯನ ಅದ್ವಿಧೀಬಿ ಚಾತುರ್ ಹುಯಿರ್ದ್ವಾಸ್.

9 ಯೇಸುನೆ ಬಿಜ್ಜೂಬಿ ಬೋಲ್ಯೋಕಿ, “ಮೇ ತುಮೂನ ಬೋಲುಸ್ಸಿ, ಆ ಜಗತ್‌ಮ ರಗಾಯಿಹುಯಿ ಧನ್-ದಾಲತ್‌ಧಿ, ತುಮೆ ಖ್ವಾರಾನ ದೋಸ್ತ್ ಕರಿಲೆವೊ, ಅಮ್ ಕರ್ಯಾತೊ, ತುಮಾರಕನ ಛಾತೆ ಖ್ವಾರು ನಿಕ್ಕಿಗಯೂತೋಬಿ, ಹರ್‌ಹಮೇಶ ರ್ವಾಾನು ಘರ್‌ಮ† ತುಮೂನ ಮಳ್ಳೆಲಿಶೆ.

10 ಥೋಡಾಮ ವಿಶ್ವಾಸ್‌ಧಿ ರ್ವಾಳು, ಜಾಖ್ವತ್‌ಮಾಬಿ ವಿಶ್ವಾಸ್‌ಧಿ ರ್ವೋಸ್, ಕತೋಬಿ ಥೋಡಾಮಸ್ ವಿಶ್ವಾಸ್‌ಕೊಂತೆ ಇವ್ವೆ ಜಾಖ್ವತ್‌ಮಾಬಿ ವಿಶ್ವಾಸ್‌ಧಿ ರ್ವೆಯ್‌ಕೊಯ್ವಿ.

11 ಅಮ್ ರ್ವಾಪರ್, ಜಗತ್‌ನೂಸ್ ಧನ್ ದಾಲತ್‌ನಿ ಬಾರೇಮ ತುಮೆ ವಿಶ್ವಾಸ್‌ಕೊಂತೆ ರ್ವಯಾತೊ, ಖ್ವಾಚು‡ ಧನ್ ದಾಲತ್‌ನ ತುಮಾರ ಹಾತ್ಮ ಕೋಣ್ ದಿಶೆ?

12 ಬಿಜ್ಜಾನಿ ಧನ್ ದಾಲತ್‌ನಿ ಬಾರೇಮ, ತುಮೆ ನಿಯಡ್ಲಿ ನಾ ರ್ವಯಾತೊ, ತುಮಾರಿ ಧನ್ ದಾಲತ್‌ನ ತುಮೂನ ಕೋಣ್ ದಿಶೆ?

13 ಕೆಹೊ ಆಳೆಬಿ ಬೇ ಯಜಮಾನ್ನ ಸೇವೆ ಕರಾನ ಕೋ ಹುವಾನಿ. ಯೋ ಏಕ್‌ನ ವಹೇರ್ ಕರೀನ್ ಬಿಜೇಕ್‌ನ ಪ್ಯಾರ್ ವತಾಳೆಶೆ. ನತರ್‌ಕಿ ಏಕ್‌ನ ನಿಯತ್‌ಧಿ ರ್ವೋನ್, ಬಿಜೇಕ್‌ನ ಫಿಕ್ಕರ್‌ಕೊಕರ್ಷೇನಿ. ಇಮ್ಮಸ್, ತುಮೆ ದೇವ್‌ನಾಬಿ ಅಜ್ಜು ಪೈಶಾನ ಆ ಭೇನಿ ಸೇವೆ ಏಕ್‌ದಮ್ ಕರಾನ ಕೋ ಹುವಾನಿ.

ಯೇಸುನೆ ಬೋಲ್ಯೋತೆ ಥೋಡಿ ವಾತೆ

(ಮತ್ತಾಯ 11:12-13; 5:31-32; ಮಾರ್ಕ 5:31-32)

14 ಫರಿಸಾಯರ್‌ವಾಳು ಆ ಖ್ವಾರಿ ವಾತೇನ ಖ್ವಮ್‌ಜಿನ್, ಇವ್ವುನ್ ಪೈಶಾನಿ ಲಾಲಚ್‌ಧೀತೆ ಇನಖ್ವಾಜೆ, ಯೇಸುನ ನಕ್ಕೆ ಕಾಡ್ವು.

* 16:8 16:8 ದೇವ್ನಿ ರಾಜ್ಯನು ಅದ್ವಿಕರಿ ಮತ್‌ಲಬ್. † 16:9 16:9 ಪರ್‌ಲೋಕ್‌ನು ಘರ್ ಕರಿ ಮತ್‌ಲಬ್ ‡ 16:11 16:11 ಕತೊ ಪರ್‌ಲೋಕ್‌ನು ಶೊತ್ ಕರಿ ಮತ್‌ಲಬ್.

15 ತದೆ ಯೇಸುನೆ ಇವ್ವುನ, “ಅದ್ವಿನ ಖ್ವಾಮ್ಚೆ, ತುಮೆ ಬರೊಬರ್ ಕರಿ ವತಾಳಿಲೇಸ್; ಕತೋಬಿ ದೇವ್ವೆ ತುಮಾರು ದಿಲ್ ಕಿಮ್ಮು ಕರಿ ಮಾಲುಮ್ ಕರಿರಾಖ್ಯೋಸ್. ಅದ್ವಿನ ಡೋಳಾಮ ಘಣ ಮೋಟಾ ಕರಿ ಬೋಲೈಲೇಸ್ತೆ ಇವ್ವೆ ದೇವ್ವ ಡೋಳಾಮ ಗಲೀಜ್ ಹುಯಿರ್ದೊಸ್.

16 ಮೋಶೇನು ಧರ್ಮಶಾಸ್ತ್ರ ಅಜ್ಜು ಪ್ರವಾದಿಯೇನೆ ಲೀಖ್ತಾ ಯೋ ಖ್ವಾರು ಬ್ಯಾಪ್ತಿಸ್ಮ ದೈವಾಳೊ ಯೋಹಾನತೋಡಿಸ್. ಅನ ಬಾದ್‌ಮ, ದೇವ್ವ ರಾಜ್ಯನಿ ಸುವಾರ್ತೆ ಬೋಲಾವ್‌ಕರಾಸ್. ಅನಾಮ ತಮಾಮ್ ಅದ್ವಿಖ್ವಾರು ಜುಲಮ್‌ಧಿ ಪೇಖ್‌ಶೆ.

17 ಆಬ್ಬಿ ಧರ್ತಿ ಮಟಿಜಾಶೆ, ಕತೋಬಿ ಧರ್ಮಶಾಸ್ತ್ರನ ಮಹಿನು ಏಕ್ ಟಿಪ್‌ಕುಬಿ ಜಿನುಕು ಮಟ್‌ಶೆ ಕೊಯ್ನಿ” ಕರಿ ಬೋಲೈಸ್.

18 ಇನಿ ಬಾವಣ್ಣ ಮ್ಹೇಲಿನ್, ಬಿಜೇಕ್‌ನ ವ್ಯಹಾ ಕರಿಲ್ಯವಾಳು ಹರೇಕ್‌ಬಿ ವ್ಯಬಿಚಾರ್ ಕರಾವಾಳು ಹುಯಿರ್ದೊಸ್. ಬಾವ್ತಿ ಮ್ಹೆಂದಿದೋತೆ ತಯೇಡಾನ ವ್ಯಹಾ ಕರಿಲ್ಯವಾಳು ವ್ಯಬಿಚಾರ್ ಕರಾವಾಳು ಹುಯಿರ್ದೊಸ್.

ಏಕ್ ಶೌಕಾರ್ ಅದ್ವಿ ಅಜ್ಜು ಲಾಜರ್‌ನಿ ಬಾರೇಮ

19 ಏಕ್ ಜಣೊ ಶೌಕಾರ್ ಥೊ. ಯೋ ಹರ್‌ಹಮೇಶ ಘಣಾಮೋಲನು ರಾಯಿಜಾಮಣ್ಣ ರಂಗ್ಣು ರೇಖ್‌ಮ್‌ನ ಲುಂಗ್ಡಾವ್‌ನ ಪೇರ್ಟಿಲೇನ್, ದನ್‌ರೋಜ್ ಘಣಿ ಅಕ್ಲಾಶ್‌ಧಿ ಜಿವ್ಣು ಚಲಾವ್‌ಕರ್ತೊಥೊ.

20 ಇನ ಘರ್‌ನ ದರ್ದ್ವಜಕನ, ಲಾಜರ್ ಕರಿ ಧರಮ್ ಮಾಂಗವಾಳೊ ಏಕ್‌ಜಣೊ ಪಡ್ವೊಥೊ. ಅನು ಆಂಗ್‌ತನ್ ಅಖ್ವುಸ್ ಫೋಡ-ಪುಂಗ್‌ಣಿಯೆ ಥು.

21 ಯೋ ಶೌಕಾರ್ ಖೈನ್ ನಾಖಸ್ತೆ ವಿಠ್ಠು ಖಾಣುತೋಬಿ ಖೈನ್, ಭುಕ್ ಮಟ್ಕಿಲೇವ್ಣು ಕರಿ ಥು. ಅತ್ರೇಸ್ ಕಾಹೆತೆ ಕುತ್‌ರ್ದಾ ಜಿನ್‌ಕುಬಿ ಇನು ಫೋಡಾವ್‌ನ ಚಾಟ್‌ತೂಥು.

22 ಅಮ್‌ರ್ದವಾನಿ ವಖ್ತಮ್, ಥೋಡ ದನ್ನ ಬಾದ್‌ಮ, ಯೋ ಧರಮ್ ಮಾಂಗವಾಳೊ ಮರಿಗಯೊ. ತದೆ ಪರ್‌ಲೋಕ್‌ನು ದೂತರ್

ಆಯಿನ್, ಇನ ಪಳ್ಳಿ ಜೈನ್, ಸಿ ಅಬ್ರಹಾಮ್‌ನಿ ಛಾತಿನ ಚಿಕಾಯು. ಯೋ ಶೌಕಾರ್‌ಬಿ ಮರಿಗಯೊ, ಇನು ಮಖ್ವಾಣ್ಣು ಕರಯ್.

23 ಯೋ ಪಾತಾಳ್ಳ ಮಹಿ ಖ್ತಾಪ್ಣಿ ಪಡುಕರಾನಿ ವಖ್ವತ್‌ಮ, ಡೋಳ ಪಾಡೀನ್, ದೂರ್‌ಥೊ ಅಬ್ರಹಾಮ್‌ನಾಬಿ ಇನಿ ಛಾತಿ ಚಿಕ್ಕಿರಯ್ಲೊತೆ ಲಾಞ್‌ನಾಬಿ ದೇಖ್ಲೊ.

24 ತದೆ ಇನೆ, “ಬಾ, ಅಬ್ರಹಾಮ್! ಮಾರಪರ್ ಗೋರ್ ಕರೀನ್, ಲಾಞ್‌ನ ಮೋಕಲ್. ಯೋ ಇನಿ ಅಂಗ್‌ಳಿನ ಪಾಣಿಮ ಡುಬೈನ್, ಮಾರಿ ಜೀಬ್‌ನ ರಂಡು ಕರಾದೆ, ಶನಕತೊ ಆ ಆಗ್‌ಮ ಮೇ ಘಣು ಖ್ವತುಕರೂಸ್” ಕರಿ ಚಿಕ್ಕಿನ್ ಬೋಲಿಲಿದೊ.

25 ಕತೋಬಿ ಅಬ್ರಹಾಮ್‌ನೆ ಇನ, “ಛಿಯ್ಯಾ ತುನೆ ಆಖ್ವತ್‌ಕರಯ್ಲೊತೆ ಖ್ವಾರೀಸ್ ಖ್ವಶಿ, ತಾರಿ ಜಿಂದ್‌ಗೀಮ ತುನ ಮಳ್ಳು. ಇಮ್ಮಸ್, ಲಾಞ್‌ನೇ ಲತಾಡ ಪಡ್ಲೊಕರಿ ಬೋಲಾನು ಯಾದ್ ಕರಿಲೆ. ಕತೋಬಿ ಹಮ್ಮೆ ಹಜ್ಜಾ ಅನ ಸಮಾಧಾನ್ ಛಾ, ಕತೋಬಿ ತುನ ಖ್ವತಾಪ್ಣಿ ಮಳಿರಯ್ಲೊಸ್.

26 ಅತ್ರೀಸ್ ಕಾಹೆತೆ ಹಮಾರ ಅಜ್ಜು ತುಮಾರ ಇಚ್‌ಮ ಏಕ್ ಮೋಟಿ ಖಾಡ್ ಛಾ. ಇನಖ್ವಾಜೀಸ್, ಹೈಕಡ್‌ತು ತುಮಾರ ಭಣಿ ಜಾವ್ಣುಕರಿ ಕರಯ್ಲೊತೆ, ಜಾವಾನ ಕೋ ಹುವಾನಿ ಅಜ್ಜು ಹೀಕಡ್‌ತು ಕೋಣ್‌ಬಿ ಉಲಾಂಗಿನ್ ಹಮಾರಕನ ಆವಾನ ಕೋ ಹುವಾನಿ” ಕರಿ ಬೋಲೊ.

27 ತದೆ ಯೋ ಶೌಕಾರ್‌ನೆ, ‘ಬಾ ಅಬ್ರಹಾಮ್, ಮೇ ತುನ ಗಿಂಗಾವುಸ್, ಲಾಞ್‌ನ ಮಾರ ಬಾನ ಘರೆ ಮೋಕಲ್ ಕರಿ ಬೋಲಿಲಿದೊ.

28 ಮನ ಪಾಚ್ ಭೈಯೇ ಛಾ. ಇವ್ಣೆತೋಬಿ ಆ ಖ್ವತಾಪ್ಣಿ ನಿ ಝಗೋಪರ್ ನಾ ಆವ್ಣೆತೆ ಇಮ್, ಲಾಞ್‌ನ ಜೈನ್, ಇವ್ಣೆನ ರ್ಪೀತಾವಾದೆ’ ಕರಿ ಬೋಲ್ಯು.

29 ಕತೋಬಿ ಅಬ್ರಹಾಮ್‌ನೆ, ‘ತಾರ ಭೈಯೇಕನ ಮೋಶೆ ಅಜ್ಜು ಪ್ರವಾದಿಯೇನು ಪುಸ್ತಕ ಖ್ವಾರು ಛಾ, ಇವ್ಣೆ ಇನ ಖ್ವಮ್‌ಜಾದೆ’ ಕರಿ ಬೋಲ್ಯೊ.

§ 16:22 16:22 ಅಬ್ರಹಾಮ್‌ನಿ ಪಾಕ್ತಿಮ ಬೆಖ್ವಾಡ್ಲು ಕರಿ ಮತ್ಸರ್.

30 ತದೆ ಯೋ ಶೌಕಾರ್ನೆ, 'ಬಾ ಅಬ್ರಹಾಮ್, ಇಮ್‌ಕಾಹೆ! ಮರೈಹುಯು ಕೋಣ್‌ತೋಬಿ ಏಕ್ ಜಣು ಪಾಳ್ತು ಜಿವ್ತುಹುಯಿನ್, ಗಯೂತೊ, ಇವ್ಣೆ ದೇವ್‌ಭಣಿ ಫರಾಶೆ' ಕರಿ ಬೋಲ್ಯೊ.

31 ಕತೋಬಿ ಅಬ್ರಹಾಮನೆ ಇನ, 'ಇವ್ಣೆ ಮೋಶೇನು ಅಜ್ಜು ಪ್ರವಾದಿಯೇನೂಸ್ ವಾತೇನ ಖ್ವಮ್‌ಜ್ಜುನಾತೊ, ಮರೈಹುಯು ಏಕ್ ಜಣು ಜಿವ್ತುಹುಯಿನ್ ಉರಿತೋಬಿ, ಇವ್ಣೆ ಮಾನ್‌ಶೆ ಕೊಯ್ಣಿ' ಕರಿ ಬೋಲ್ಯೊ."

17

ಪಾಪ್ಪಿ ಬಾರೇಮ

(ಮತ್ತಾಯ 18:6,7,21,22; ಮಾರ್ಕ 9:42)

1 ಯೇಸುನೆ ಇನ ಶಿಷ್ಯರನ್ ಬೋಲ್ಯೊಕಿ, "ಅದ್ವಿನ ಪಾಪ್‌ಮ ಭಲಾವವಾಳು ರಾಳ್ತು ಆವ್‌ಶೆಸ್ ಆವ್‌ಶೆ, ಕತೋಬಿ ಇಮ್ ಹುವ್ವಾನಿಘೋಣಿ ಕರಾಸ್ತೆ, ಯೋ ಅದ್ವಿನಿ ಹಾಲ್ತು ಶಾತ್ ಬೋಲು!

2 ಆ ನ್ಹಾನಾವ್‌ಮ ಏಕ್ ಜಣಾನ ಪಾಪ್‌ಮ ಭಲಾವಧೀಬಿ, ಇನ ಫಲೆಂಡ ಕೇಡೆ ಘಟ್ಟಿನ ಬಂಡಾನ ಭಂದೈಲೀನ್, ದರೈವ್‌ಮ ನಖೈಲ್ಯವಾನೂಸ್ ಇನ ಅಲ್ಫು!

3 ಇನಖ್ವಾಜೇಸ್, ತುಮೆ ಕರಾತೆ ಬಾರೇಮ ಜತನ್ ರ್ವವೊ!

ತಾರೊ ಭೈಪಾಪ್ ಕರೈಯೊತೊ, ಇನ ಗುರ್‌ಕಾವ್, ಏಕ್ ವೇಳ್ ಯೋ ಪಾಪ್ಪ ಮ್ಹೇಲಿನ್ ಫರಿಗಯೊತೊ, ಇನ ಮಾಪ್ ಕರ್.

4 ಯೋ ದನ್ನ ಖ್ವಾತ್ ಹಲ್ಲಾಬಿ ತುನ ಗಲತ್‌ಕರೀನ್ ಖ್ವಾತ್‌ಹಲ್ಲಾಬಿ ತಾರಭಣಿ ಫರಿನ್, 'ಮೇ ದಿಲ್ ದುಖೈಲೇವುಸ್, ಮನ ಕ್ಷಮಾಕರ್' ಕರಿ ಬೋಲಿಲಿದೋತೊ ಇನ ಮಾಪ್‌ಕರ್ ಕರಿ ಬೋಲ್ಯೊ.

ವಿಶ್ವಾಸ್‌ನಿ ಬಾರೇಮ

5 ಅಪೊಸ್ತಲರೈ ಪ್ರಭುನ, "ಹಮಾರಿ ವಿಶ್ವಾಸ್‌ನ ಭಡಾವ್" ಕರಿ ಬೋಲಿಲಿದ.

6 ತದೆ ಪ್ರಭುನೆ ಇವ್ವುನ, “ರಾಯಿಯೆವ್ವಿ ವಿಶ್ವಾಸ್ ತುಮೂನ ರ್ಡ್ಡಯುತೊ, ತುಮೆ ಆ ಅಂಜೀರ್‌ನ ಝಾಡ್‌ಣ, ‘ಫ್ಲಡ್ ಖ್ವಮೇದ್ ಉಖ್‌ಡೈಚೈನ್, ದರ್ಯಾವ್‌ಮ ಗಡಿಚಾ!’ ಕರಿ ಬೋಲ್ಯಾತೋಬಿ, ಯೋ ತುಮಾರಿ ವಾತೇನ ಖ್ವಮಜ್‌ಶೆ” ಕರಿ ಬೋಲ್ಯೊ.

ಆಳ್‌ನು ಕಾಮ್ನಿ ಬಾರೇಮ

7 “ತುಮಾರಾಮ ಕಿನಾತೋಬಿ ನಾಗ್ರಾವಾಳೊ ನತರ್‌ಕಿ ಮೇಂಡ್ ಚರಾವವಾಳೊ ಆಳ್ ಲ್ಹಾ ಕರಿ ಲ್ಹಾವೊ. ಯೋ ಆಳ್ ಖೇತರ್‌ಮಾಥು ಘರ್‌ಕನ ಆಯೂತೊ, ತುಮೆ ಇನ, ‘ಒಗ್ಗಿಆವ್, ಖಾಣನ ಬೇಖ್ಡ್ ಕರಿ ಬೋಲಸ್ಚಿ ಶು?

8 ಕೊಯ್ನಿಸಸ್ ಕೊಯ್ನಿ! ತುಮೆ ಇನ, ‘ಮನ ಖಾಣು ತೈಯಾರ್‌ಕರ್, ಅಜ್ಜು ಕಂಬರ್‌ನ ಲುಂಗ್ಡು ಭಾಂದಿಲೀನ್, ಮೇ ಖೈನ್‌ಪೀಯ್ಯಾತೋಡಿ, ಮಾರಿ ಚಾಕ್ರಿಕರ್, ಬಾದ್‌ಮ ತೂ ಖೈನ್‌ಪೀ ಕರಿ ಬೋಲಾಕೊಯ್ನಿಕ್ ಶು?

9 ಇನಿ ಹುಕುಮ್‌ನಿಘೋಣಿ ಚಾಲ್ಯುತೆ ಯೋ ಆಳ್‌ನ, ‘ತುನ ಧನ್ಯವಾದ್’ ಕರಿ ಬೋಲ್‌ಶೇಕ್ ಶು?

10 ಅಮ್ಮಸ್, ತುಮೆ ತುಮೂನ ಹುಕುಮ್ ಕರ್ಯ್ತೆ ಇನ, ಪೂರ ಕರಾನ ಬಾದ್‌ಮ, ‘ಹಮೆ ಫಾಯಿದೊಕೊಂತೆ ಆಳ್ ಹುಯಿರ್ಲ್ಹಾಸ್, ಹಮೆ ಖಲಿ ಹಮಾರು ಕಾಮ್ನಿ ಕರಿರಾಖ್ಯಾಸ್’ ಕರಿ ಬೋಲ್‌ನು” ಕರಿ ಬೋಲ್ಯೊ.

ಯೇಸುನೆ ಖೋಡ್ ಲಾಗಿಹುಯು ದಖ್ವ್‌ಅದ್ನಿನ್ ಗುಣ್‌ಕರ್ರೊತೆ

11 ಯೇಸು ಯೆರೂಸಲೇಮ್ ಭಣಿ ಒಳೆಚಾತೊಥೋತೆ ತದೆ, ಗಲಿಲಾಯ ಅಜ್ಜು ಸಮಾರ್ಯ ತಬರ್‌ಖಾನು ಇಚ್ಛೆಮಾನಿ ವಾಟೆಕರಿ ಗಯೊ.

12 ಏಕ್ ಗಾಮ್‌ಆವಾದಿನ್, ಹಿಜ್ಜಾ ಖೋಡ್ ಲಾಗಿರ್ಲ್ಹೊಡೊತೆ ದಖ್ವ್ ಜಣು ಇನಖ್ವಾಪ್ಪೆ ಆಯಿನ್, ದೂರ್ ಭೀರಿನ್,

13 “ಯೇಸು, ಗುರೂ, ಹಮಾರಪರ್ ಗೋರ್‌ಕರ್!” ಕರಿ ಚಿಕ್ರಿನ್ ಬೋಲ್ಯು.

14 ಯೇಸುನೆ ಇವ್ವುನ ದೇಖಿನ್, “ತುಮೆ ಜೈನ್, ಯಾಜಕವ್ವ ತುಮಾರು ಆಂಗ್‌ತನ್ ವತಾಳೊ” ಕರಿ ಬೋಲ್ಯೊ ಇವ್ಣೆ ಜಾವನಿ ವಖ್ವತ್‌ಮಸ್, ಇವ್ಣೆ ಪಾಕ್ ಹುಯಿಗಯ್.

15 ಇವ್ವಾಮ ಏಕ್ ಜಣು ಇನ ಅಲ್ಫು ಹುಯೂತೆ ದೇಖಿನ್, ಚೋರ್ ಆವಾಜ್‌ಫಿ, ದೇವ್ನಿ ಖ್ವರಾವ್ಣಿ ಕರ್ತುಹುಯಿನ್, ಪಾಲ್ಟುಫರಿ ಆಯ್.

16 ಯೋ ಯೇಸುನ ಗೋಡಾಪರ್ ಪಡೀನ್, ಇನ ಧನ್ಯವಾದ್ ಕರ್ಲ್ಯೊ ಯೋ ಸಮಾರ್ಯವಾಳೊ ಹುಯಿರಲ್ವೊಡೊ.

17 ತದೆ ಯೇಸುನೆ ಇನ, “ದಖ್ಲೆ ಜಣಾನ ಅಲ್ಫು ಹುಯೂನಿ? ಬಿಜು ನೌ ಜಣ ಕ್ಯಾ?” ಕರಿ ಪುಲ್ಲಾಯೊ.

18 ದೇವ್ನಿ ಸ್ತುತಿ ಕರಾನಖ್ವಾಜೆ, ಆ ಪರೈ ದೇಖ್‌ವಾಳಾನ ಮ್ಹೆಂದಿನ್, ಬಿಜು ಕೋಣ್‌ಬಿ ಪಾಲ್ಟುಫರಿ ಆಯ್ ಕೊಯ್ನಿ ಶು? ಕರಿ ಬೋಲ್ಯೊ.

19 ಅಜು ಯೇಸುನೆ ಇನ, “ಉಪ್ಪರ್ ಉರಿನ್, ಜಾ; ತಾರಿ ವಿಶ್ವಾಸ್‌ಫೀಸ್ ತುನ ಅಲ್ಫುಕರ್ಲ್ಯೊ” ಕರಿ ಬೋಲ್ಯೊ.

ದೇವ್ನಿ ರಾಜ್ ಆವ್‌ಶೇತೆ ಬಾರೇಮ (ಮತ್ತಾಯ 24:23-28,37-41)

20 ಫರಿಸಾಯರ್‌ಮ ಥೋಡು ಜಣು ಯೇಸುನ, “ದೇವ್ನಿ ರಾಜ್ಯ ಕದೆ ಆವ್‌ಶೇ?” ಕರಿ ಪುಲ್ಲಾಯ್. ತದೆ ಇನೆ ಇವ್ವುನ, “ದೇವ್ನಿ ರಾಜ್ ದೆಖಾವನಿಫೋಣಿ ಆವಾನು ಕಾಹೆ,

21 ಕೋಣ್‌ಬಿ, “ಹಂದೇಖೊ ಹಜ್ವಾ ಲ್ಲಾ” ನತರ್‌ಕಿ “ಹಂದೇಖೊ ಹಿಜ್ವಾ ಲ್ಲಾ” ಕರಿ ಬೋಲಾನ ಕೋ ಹುವಾನಿ. ಶನಕತೊ ದೇವ್ನಿ ರಾಜ್ಯ ತುಮಾರ ಮಹಿಸ್ ಲ್ಲಾ” ಕರಿ ಬೋಲ್ಯೊ.

22 ಅಜು ಯೇಸುನೆ ಇನ ಶಿಷ್ಯರ್‌ನ, “ಏಕ್ ವಖ್ವತ್ ಆವ್‌ಶೇ, ತದೆ ತುಮೆ, ಅದ್ವಿನೊ ಛಿಯ್ಯಾನ ದನ್ಮ ಏಕ್ ದನ್‌ತೋಬಿ ದೇಕ್ಚು ಕರಿ ಆಖ್ಲೆ ಕರ್ಲ್ಯಾತೋಬಿ, ತುಮೆ ಇನ ದೇಕ್‌ಶು ಕೊಯ್ನಿ.

23 ಅದ್ವಿಖ್ಹಾರು ತುಮೂನ, 'ಹಂದೇಖೊ, ಹಜ್ಜಾ ಲ್ಲಾ!' ನತರಾಕಿ, 'ಹಂದೇಖೊ, ಹಿಜ್ಜಾ ಲ್ಲಾ' ಕರಿ ಬೋಲಾಶೆ. ಕತೋಬಿ ತುಮೆ ಇವ್ಣ ಪೀಲೆ ನಕೊಜಾಶು.

24 ಶನಕತೊ, ವಿಜ್ಞಳಿ* ಖಡ್ಕಿನ್, ಆಬಾಮ ಏಕ್ ಬಾಜುಧು ಬಿಜ್ಜೇಕ್ ಬಾಜುತೋಡಿ ಚಮಾಕಾಸ್ತೆ ಇಮ್ಮಸ್, ಅದ್ವಿನೊ ಛಿಯ್ಯೊ ಇನ ದನ್ಮ ರ್ಹಿಶೆ.

25 ಕತೋಬಿ ಅನೇಥಿಬಿ ಅಗಾಡಿ, ಅದ್ವಿನೊ ಛಿಯ್ಯೊ ಘಣಿ ಖ್ಹಿತ್ತಾಪ್ಪಿ ಪ್ಲಿನ್, ಆ ಹಗಾಮ್ನ ಅದ್ವಿಧಿ ರ್ಹಿಟ್ಕಾರವ್ಣು.

26 ನೋಹಾನ ದನ್ಮ ಚಾಲ್ಯುತೆ ಇಮ್ಮಸ್, ಅದ್ವಿನೊ ಛಿಯ್ಯಾನ ದನ್ಮಾಬಿ ಚಾಲ್ಷೆ.†

27 ತಮಾಮ್ ಅದ್ವಿ ಖಾತು-ಪೀತು ಹುಯಿನ್, ವ್ಯಹಾ ಕರಿದೇತುಹುಯಿನ್, ವ್ಯಹಾ ಕರಲೇತುಹುಯಿನ್ ಥು. ನೋಹಾನೆ ಜಹಾಜ್ಞನ ಮಹಿ ಚಡ್ಪೋತೆ ದನ್ಮಾಬಿ ಇವ್ಣೆ ಇಮ್ಮಸ್ ಕರುಕರ್ತುಥು. ತದೆ ತೋಫಾನ್ ಆಯಿನ್, ತಮಾಮ್ ಅದ್ವಿನ ಬರ್ಬಾತ್ ಕರಿನಾಖ್ಲು.

28 ಲೋಟನ ದನ್ಮ ಚಾಲ್ಯುತೆ ಇಮ್ಮಸ್ ಚಾಲ್ಷೆ. ಅದ್ವಿಖ್ಹಾರು ಖಾತು-ಪೀತುಹುಯಿನ್, ಮೋಲ್ ಲೇತುಹುಯಿನ್, ವೇಚ್ಚತುಹುಯಿನ್, ಖಿತರಾಮ ಗಾಡ್ತುಹುಯಿನ್, ಘರ್ ಭಾಂದ್ತುಹುಯಿನ್ ಥೂ.‡

29 ಕತೋಬಿ ಲೋಟ ಸೊದೋಮ್ ಗಾಮ್ನ ಮ್ಹಂದಿನ್ ನೀಕ್ಳೋತೆ ತದೆ, ಆಬಪರ್ಥು, ಆಗ್ನೊ ಅಜ್ಜು ರಂಜಕ್ನೊ ಪಾಣಿ ವರ್ಶಿನ್ ಇವ್ಣ ಖ್ಹಾರಾವ್ನ ಬರ್ಬಾತ್ ಕರಿನಾಖ್ಲು.

30 ಅದ್ವಿನೊ ಛಿಯ್ಯೊ ದೆಖಾವಾಶೇತೆ ದನ್ಮಾಬಿ ಅಮ್ಮಸ್ ರ್ಹಿಶೆ.

31 ಯೋ ದನ್ಮ ಇನ ಘರ್ನ ಲ್ಲತ್ಪರ್ ರ್ಹಿವಾಳು, ಇನು ರಾಲ್ತು ಪಾಡಾನಟಿಕೆ ಹೇಟ್ ಉತ್ರಿನ್, ಘರಾಮ ನಾ ಆವ್ಣು ಇಮ್ಮಸ್, ಖೀತರಾಮ ರ್ಹಿವಾಳುಬಿ ಪಾಲ್ತುಫರಿ ಇನ ಘರೆ ನಾ ಜಾಹ್ಣು.

32 ಲೋಟನಿ ಬಾವಣ್ಣ ಯಾದ್ ಕರಿಲೆವೊ!§

* 17:24 17:24 ವಿಜ್ಞಳಿ ಕರೀಬಿ ಬೋಲಾಸ್ † 17:26 17:26 ಆದಿಕಾಂಡ 6.5-8

‡ 17:28 17:28 ಆದಿಕಾಂಡ 18.20—19.25 § 17:32 17:32 ಆದಿಕಾಂಡ 19.26

33 ಕೋಣ್ ಇನೊ ಜಾನ್ ಬಙ್ಗಾಡಿಲೇವ್ಣುಕರಿ ಕರಾಸ್ಕಿ ಯೋ ಇನ ಗುಮೈಲಿಶೆ; ಕತೋಬಿ ಕೋಣ್ ಇನೊ ಜಾನ್ ಗುಮೈಲೇಸ್ಕಿ ಯೋ ಇನ ಬಙ್ಗಾಡಿಲಿಶೆ.

34 ಮೇ ತುಮೂನ ಬೋಲುಸ್ಕಿ, ಯೋ ರಾತ್ಮವಕ್ಕಸ್ ಖಟಿಯಾಪರ್* ಬೇ ಜುಣು ಖ್ವುತುರ್ದೇಶೆ, ಏಕ್‌ಜಣಾನ ಪಳ್ಳಿಶೆ, ಏಕ್‌ನ ಮ್ಹಂದಿಶೆ.

35 ಬೇ ತಯೇಡ ಎಕ್ಕಸ್ ಘಟ್ಟಪರ್ ದಳುಕರಾಶೆ, ಏಕ್‌ನ ಪಳ್ಳಿಶೆ, ಏಕ್‌ನ ಮ್ಹಂದಿಶೆ ಕರಿ ಬೋಲ್ಯೊ.

36 ಖೇತರಾಮ ರ್ದವಾಳ ಬೇಜಣಾಮ ಏಕ್‌ಜಣೊ ಪಡೈಚ್ಚಲ್ಯೊಜಾಶೆ ಬಿಜೇಕ್‌ಜಣೊ ಹಿಜ್ವಾಸ್ ಮ್ಹೇಲ್ಯೆಜಾಶೆ ಕರಿ ಬೋಲ್ಯೊ.

37 ತದೆ ಶಿಷ್ಯರಾನೆ, “ಪ್ರಭು, ಆ ಕಿಜ್ಜಾ ಉಶೆ?” ಕರಿ ಫುಲ್ಲಾವಖ್ವಿತರ್, ಯೇಸುನೆ ಇವ್ಣುನ, “ಮುರ್ದು ಕಿಜ್ವಾಕಿ, ಹಿಜ್ವಾಸ್ ಗರದ್‌ಖ್ವಾರ್ದು ಎಕ್ಕುಹುವಾಸ್” ಕರಿ ಜವಾಬ್ ದಿದೊ.

18

ಏಕ್ ಮುಂಡಚ್ಚಿ ಅಜ್ಜು ನಯ್ಯೊನಿ ಬಾರೇಮಾನು ಮತ್ಲಬ್‌ನಿ ಖೇಣಿ

1 ತದೆ ಯೇಸುನೆ ಖಟು ನಾ ಖಾಣುತೆ, ಹಮೇಶ ಪ್ರಾರ್ಥನೆ ಕರ್ತುರ್ದೇವ್ಣು ಕರಿ ವತಾಳಾನಟೇಕೆ, ಇನ ಶಿಷ್ಯರಾನ ಏಕ್ ಮತ್ಲಬ್‌ನಿ ಖೇಣಿನ ಬೋಲ್ಯೊ.

2 ಯೋ ಶಾತ್‌ಕತೊ, “ಏಕ್ ಗಾಮ್ತ ಏಕ್ ನಯ್ಯೊ ಥೊ. ಯೋ ದೇವ್‌ನಾಬಿ ದೇಖನ್ ಡರ್‌ತೋಥೊ ಕೊಯ್ಚಿ, ಅಜ್ಜು ಅದ್ವಿನ ಮಜ್ಜೂರ್ ಕರ್ತೊಥೊ ಕೊಯ್ಚಿ.

3 ಯೋಸ್ ಗಾಮ್ತ ಏಕ್ ಮುಂಡಚ್ಚಿ ತಯೇಡ ಥೀ. ಯೋ ಘಡಿಕೇಡೆ ಇನಾಕನ ಏನ್, ‘ಮಾರೊ ನ್ಯಾವ್‌ಫೇಡೈನ್, ಮಾರ ದುಶ್‌ಮನ್‌ಧಿ ಮನ ಬಙ್ಗಾಡ್’ ಕರಿ ಬೋಲ್‌ತಿರ್ದೇತೀಧಿ.

* 17:34 17:34 ಮಂಙಾಪರ್, ಬಿಲ್ಲಾವಿಪರ್ ಕರೀಬಿ ಹುವಾಸ್.

4 ಫೋಡ ದನ್ ಇನೆ ಧ್ಯಾನ್ ಕೋ ದಿದೋನಿ. ಕತೋಬಿ ಬಾದ್‌ಮ ಇನು ಯೋಸ್, 'ಮೇ ದೇವ್‌ನಾಬಿ ದೇಖಿನ್ ಡರಾವಾಳೊ ಕಾಹೆ, ಅದ್ವಿನಾಬಿ ಮಜೂರ್ ಕರಾವಾಳೊ ಕಾಹೆ,

5 ತೋಬಿ ಆ ಮುಂಡಚ್ಚಿ ತಯೇಡ ಘಡಿಕೇಡೆ ಆಯಿನ್, ಮನ ಬೋಲ್‌ತಿರ್ದಿಸ್ತೆ ಇನಖ್ವಾಜೆ, ಮೇ ಅನಿ ನ್ಯಾವ್ ಫೇಡ್ಯೆನಾಖುಸ್. ನತರ್‌ಕಿ ಆ ಘಡಿಕೇಡೆ ಆಯಿನ್ ಮನ ಖ್ತಾವಾಶೆ!' ಕರಿ ಬೋಲಿಲಿದೊ."

6 ಅಜು ಪ್ರಭುನೆ, "ಯೋ ಠಗಾರು ನೈಯಾನೆ ಬೋಲ್ಯೋತೆ ಇನ ಖ್ವಮ್‌ಚೊ.

7 ದೇವ್ನೆ ಚೂಣ್ಯೋತೆ ಅದ್ವಿ ರಾತ್-ದನ್ ಇನ ಮದತ್‌ಖ್ವಾಜೆ ಬಿಂತಿಕರ್ದೊತೊ, ಯೋ ಇವ್ಣಿ ಬಾರೇಮ ದೇರ್‌ಕರ್ದೊತೋಬಿ ಇವ್ಣಿ ನ್ಯಾವ್‌ನ ಫೇಡವಸ್‌ಕೊಂತೆ ರ್ದಿಸ್ತೇಕಿ ಶು? ಯೋ ಇವ್ಣಿ ಮದತ್ ಕರಾನ ವೇರಸ್ ಕರ್ಶೆ ಕೊಯ್ನಿ.

8 ಮೇ ತುಮೂನ ಬೋಲುಸ್ಕಿ, ಯೋ ಒಗ್ಗಿಸ್‌ಮ ಇನ ಅದ್ವಿಖ್ವಾರಾನು ನ್ಯಾವ್ ಫೇಡ್‌ಶೆ. ಅಮ್ ರ್ದಿಯುತೋಬಿ, ಅದ್ವಿನೊ ಛಿಯ್ಣೊ ಆವ್‌ಶೇತೆ ತದೆ, ಜಮೀನ್‌ಪರ್ ವಿಶ್ವಾಸ್‌ನ ದೇಕ್‌ಶೇಕಿ ಶು?" ಕರಿ ಬೋಲ್ಯೊ.

ಪರಿಸಾಯರ್‌ವಾಳೊ ಅಜು ಶುಂಕ ವಶೂಲ್ ಕರಾವಾಳಾನಿ ಬಾರೇಮಾನು ಮತ್ಲಬ್‌ನಿ ಖೇಣಿ

9 ಅತ್ರೇಸ್ ಕಾಹೆತೆ, ಹಮೇಸ್ ನೀತಿವಾಳ ಕರಿ ಭರೋಖ್ವೊಕರಿನ್, ಬಿಜ್ ಖ್ವಾರಾನ ಕಡ್‌ತೇಲ್‌ನಿಮತ್ ದೇಖಾತೆ ಇವ್ಣುನಾಬಿ, ಯೇಸುನೆ ಏಕ್ ಮತ್ಲಬ್‌ನಿ ಖೇಣಿನ ಬೋಲ್ಯೊ.

10 ಏಕ್ ಹಲ್ಲ ಬೇ ಜಣ ಪ್ರಾರ್ಥನೆ ಕರ್ದು ಕರಿ ಮಂದಿರ್‌ನ ಗಯ, ಏಕ್ ಜಣೊ ಪರಿಸಾಯರ್‌ವಾಳೊ ಅಜು ಬಿಜೇಕ್ ಜಣೊ ಶುಂಕ ವಶೂಲ್ ಕರಾವಾಳೊ.

11 ಪರಿಸಾಯರ್‌ವಾಳೊ ಭೀರಿನ್, ಪ್ರಾರ್ಥನೆ ಕರಾನಿ ವಖ್ತಮ್, 'ಓ ದೇವ್, ಲೂಟಿ ಕರಾವಾಳು, ಠಗಾವಾಳು, ವ್ಯಬಿಚಾರ್ ಕರಾವಾಳು ಅಲಕ್ ಅದ್ವಿವೊನಿಘೋಣಿ ಮೇ ಕಾಹೆ. ಆ ಶುಂಕ ವಶೂಲ್

ಕರಾವಾಳಾನಿ ಫೋಣಿಬಿ ಮೇ ಕಾಹೆತೆ, ಇನಖ್ವಾಜೆ ತುನ ಧನ್ಯವಾದ್ ಕರುಸ್.

12 ವಾರಾನ ಬೇಹಲ್ಲ ಉಪವಾಸ್ ರ್ವುವುಸ್, ಅಜ್ಜು ಮೇ ಕಮಾವಸ್ತೆ ಖ್ವಾರಾಸ್‌ಮಾಬಿ ದಖ್ವೆಮ ಏಕ್ ಭಾಗ್ ದೆವುಸ್' ಕರಿ ಬೋಲ್ಯೊ.

13 ಕತೋಬಿ, ಯೋ ಶುಂಕ ವಶೂಲ್ ಕರಾವಾಳೊ ದೂರ್ ಭೀರಿನ್, ಆಬ್‌ಭಣಿ ಡೋಳಪಾಡಿ ದೇಖಾನಾಬಿ ಮನ್‌ಕೊಂತೆ, ಛಾತಿ ಕೂಟ್‌ತೊ ಹುಯಿನ್, 'ದೇವ್, ಪಾಪಿ ಹುಯಿರ್ದೋತೆ ಮಾರಪರ್ ಗೋರ್ ಕರ್' ಕರಿ ಬೋಲ್ಯೊ.

14 ಮೇ ತುಮೂನ ಬೋಲುಸ್ತಿ, ಆ ಶುಂಕ ವಶೂಲ್ ಕರಾವಾಳುಸ್ ದೇವ್ನ ಡೋಳಾಮ ಬರೊಬರ್ ಕರಿ ಬೋಲ್ಯೆಲಿನ್, ಘರೆ ಗಯೊ. ಕತೋಬಿ ಯೋ ಪರಿಸಾಯವಾಳೊ ಇಮ್ ಕೊಗಯೋನಿ. ಇನುಯೋಸ್ ಮೋಟೊಕರಿ ಬೋಲ್ಯೆಲ್ಯವಾಳೊ ಹರೇಕ್‌ಜಣೊ ಹೇಟು ಹುಯಿಜಾಶೆ, ಇನುಯೋಸ್ ಹೇಟುಕರಿ ಬೋಲ್ಯೆಲ್ಯವಾಳೊ ಯೋ ಮೋಟೊ ಹುಯಿಜಾಶೆ ಕರಿಬೋಲ್ಯೊ.

ಯೇಸುನೆ ಅಡ್ಡಾಣಿ ಲಡ್ಕಾವ್‌ನ ಆಶೀರ್ವಾದ್ ಕರ್ಚೊತೆ

(ಮತ್ತಾಯ 19:13-15; ಮಾರ್ಕ 10:13-16)

15 ಥೋಡು ಅದ್ತಿ ಇವ್ಣ ಅಡ್ಡಾಣಿ ಲಾಡ್ಕಾವ್‌ಪರ್ ಯೇಸುನೊ ಹಾತ್ ಮೆಲ್ಲಾವ್ಣು ಕರಿ ಇನಾಕನ ಲಾಯು. ಕತೋಬಿ ಅನ ದೇಖಿನ್ ಶಿಷ್ಯರ್‌ಖ್ವಾರ್ಡು ಇವ್ಣುನ ಗುರ್‌ಕಾಯು.

16 ಕತೋಬಿ ಯೇಸುನೆ ಲಡ್ಕಾವ್‌ನ ಇನ ಖನ್ನೆ ಬುಲೈನ್, "ಅಡ್ಡಾಣಿ ಲಡ್ಕಾವ್‌ನ ಮಾರಕನ ಆವಾನ ಮ್ಹೇಲೊ, ಇವ್ಣುನ ಭಿರಾಕೊ ನಕೊ, ಶನಕತೊ ದೇವ್‌ನು ರಾಜ್ಯ ಅಮ್‌ನಾಸ್‌ವಾಳಾನು.

17 ತುಮೂನ ಖ್ವಾಚಮಾಬಿ ಬೋಲುಸ್ತಿ, ಕೋಣ್ ಅಡ್ಡಾಣಿ ಲಡ್ಕಾನಿ ಫೋಣಿ ದೇವ್ನಿ ರಾಜ್ಯನ ನಾ ಮಾನ್ಯತೊ, ಇವ್ಣೆ ಇನಮಹಿ ಕೋಸ್‌ಜಾಶೇನಿ" ಕರಿ ಬೋಲ್ಯೊ.

ಏಕ್ ಶೌಕಾರ್ ಅದ್ತಿನಿ ಬಾರೇಮ

(ಮತ್ತಾಯ 19:16-30; ಮಾರ್ಕ 10:17-31)

18 ಯೆಹೂದ್ಯರಾನೊ ಏಕ್ ಅದಿಕಾರಿ ಯೇಸುನ, “ಅಟ್ಟೊ ಗುರು, ಹಮೇಶಾನಿ ಜಿಂದಾಗಿ ಮನ ಮಳೆಣುಕತೊ, ಮೇ ಶಾತ್ ಕರ್ನ್ವ? ಕರಿ ಪುಲ್ಲಾಯೊ.

19 ತದೆ ಯೇಸುನೆ ಇನ, “ಮನ ಅಟ್ಟೊ ಕರಿ ಶನ ಬೋಲಾಸ್ತೆ? ದೇವ್ ಎಕ್ಸ್ ಜಣೊ ಅಟ್ಟೊ ಪಣ್ಣಿ ಬಿಜ್ಜು ಕೋಣ್‌ಬಿ ಅಟ್ಟು ಕಾಹೆ.

20 ವ್ಯಬಿಚಾರ್ ನಾ ಕರ್ನ್ವ ಖೂನಿ ನಾಹೋಣು, ಚೋರಿ ನಾ ಕರ್ನ್ವ ಝೂಟೆ ಇಂಜಾಮ್ ನಾ ಲಗಾಡ್‌ಣು, ತಾರ ಆಯ ಬಾನ ಮರ್ಯಾದಿ ದೇವ್ಣು ಕರಿ ಲ್ಹಾತೆ ದೇವ್ನಿ ಹುಕುಮ್ ಖ್ವಾರಿ ತುನ ಮಾಲುಮ್ ಲ್ಹಾನಿ.” ಕರಿ ಬೋಲ್ಯೊ

21 ತದೆ ಯೋ ಅದ್ಮಿ “ಮೇ ಅಡ್ಕಾಣಿಪರ್‌ಥೋಸ್ ಆ ಖ್ವಾರು ಪಾಡಿ ಚಾಲ್ತೊ ಐರ್ಟೊಣ್” ಕರಿ ಫರೈನ್ ಬೋಲ್ಯೊ.

22 ಅನ ಖ್ವಮ್‌ಜಿನ್, ಯೇಸುನೆ ಇನ, “ತೂ ಕರ್ನುತೆ ಬಿಜ್ಜೇಕ್ ಕಾಮ್ ಲ್ಹಾ, ತಾರಕನ ಲ್ಹಾತೆ ಖ್ವಾರುಸ್ ಶೊತ್ತ್ ವೇಚಿನ್, ಆವಸ್ತೆ ಪೈಶಾನ ಗರೀಬ್‌ನ ದೆ. ತದೆ ಪರ್‌ಲೋಕ್‌ಮ ತುನ ಶೊತ್ ರಟ್ಟಿಶೆ; ಅಜ್ಜು ತೂ ಆಯಿನ್, ಮಾರ ಪೀಲೆ ಆವ್” ಕರಿ ಬೋಲ್ಯೊ.

23 ಕತೋಬಿ ಯೋಅದ್ಮಿ ಘಣು ದನ್-ದಾಲತ್‌ವಾಳೊ ಹುಯಿರ್ಟೊಡ್ಹೋತೆ ಇನಖ್ವಾಜೆ, ಆ ವಾತೆನ ಖ್ವಮ್‌ಜಿನ್, ಘಣು ದುಖ್ ಖಾದೊ.

24 ತದೆ ಯೇಸುನೆ ಇನ ದೇಖಿನ್, ಧನ್‌ದಾಲತ್‌ವಾಳು ಅದ್ಮಿ ದೇವ್ನಿ ರಾಜ್ಯಮ ಜಾವಾನು ಕೆತ್ರಿಕ್ಕಿ ಮುಶ್ಕಿಲ್!

25 ಶೌಕಾರ್ ಅದ್ಮಿ ದೇವ್ನಿ ರಾಜ್ಯಮ ಜಾವಾಥೀಬಿ, ಊಟ್ ಖ್ವುಯಿನ ಡೋಳವಾಟೆ ಪೇಶಿಜಾವನು ಶುಲ್ಪ!” ಕರಿ ಬೋಲ್ಯೊ.

26 ಯೇಸುನಿ ಆ ವಾತೆನ ಖ್ವಮ್‌ಜ್ಯೂತೆ ಇವ್ಣೆ “ಅಮ್ ರ್ವಯುತೊ, ಕಿನ ರಕ್ಷಣೆ ಮಳೆಶೆ” ಕರಿ ಪುಲ್ಲಾಯು.

27 ಯೇಸುನೆ ಇವ್ಣುನ, “ಅದ್ಮಿನ ಹಾತೆ ಹುವ್ವಾಕೊಂತೆ ಕಾಮ್ ದೇವ್ನಿ ಹಾತೆ ಹುವ್ವಾಸ್” ಕರಿ ಬೋಲ್ಯೊ.

28 ತದೆ ಪೇತ್ರನೆ ಯೇಸುನ, “ಹಂದೇಕ್! ಹಮೆ ಹಮಾರು ಘರ್‌ಖ್ತಾರು ಮ್ಹೆಂದಿನ್, ತಾರ ಪೀಲೆ ಐರ್‌ತ್ವಾಸ್‌ನಿ!” ಕರಿ ಬೋಲ್ಯೊ.

29 ಅನ ಖ್ವಮ್‌ಜಿನ್ ಯೇಸುನೆ ಇವ್ಣುನ, “ತುಮೂನ ಖ್ವಾಚ್ ಬೋಲುಸ್ಕಿ, ಕೋಣ್ ದೇವ್ನಿ ರಾಜ್ಯನಖ್ವಾಜೆ, ಘರ್‌ನ ರ್ಲವೊ, ಬಾವಣ್ಣ ರ್ಲವೊ, ಬೈಯೇನ ರ್ಲವೊ, ಆಯ-ಬಾನ ರ್ಲವೊ, ಲಡ್ಕಾನ ರ್ಲವೊ ಮ್ಹೆಂದಿದ ಉಶೇತೊ,

30 ಇನ ಆ ಜಗ್‌ಮಾಸ್ ಇನೇಥಿಬಿ ಜಾಖ್ತ್ ಮಳಾಶೆ, ಅಜ್ಜು ಉಳ್ಳಾವತೆ ಜಂಗ್‌ಮ ಹರ್‌ಹಮೇಶ ರ್ಲವಾಳಿ ಜಿಂದ್‌ಗಿ ಮಳಾಶೆ” ಕರಿ ಬೋಲ್ಯೊ.

ಯೇಸುನೆ ಇನಿ ಮರಣ್ಣಿ ಬಾರೇಮ ತಿನ್ನೇಹಲ್ಲ ಬೋಲ್ಯೊತೆ
(ಮತ್ತಾಯ 20:17-19; ಮಾರ್ಕ 10:32-34)

31 ಯೇಸುನೆ ಇನ ಭಾರ ಜಣ ಶಿಷ್ಯರನ ಏಕಾಡಿ ಬುಲೈಲಿನ್, “ಖ್ವಮ್‌ಜೊ! ಅಪ್ಲೆ ಯೆರೂಸಲೇಮ್‌ನ ವಳ್ಳಾಜಯ್ಯೆಸ್, ಅದ್ಮಿನೊ ಥಿಯ್ಯಾನಿ ಬಾರೇಮ ಪ್ರವಾದಿಯೇನೆ ಲೀಖಿರಾಖ್ಯತೆ ಇಮ್ಮತ್, ಹಿಜ್ಜಾ ಚಾಲ್‌ಪೆ.

32 ಇನ ಪರೈ ಭಾತ್‌ವಾಳಾನ ಹಾತ್‌ಮ ದಿನಾಕ್‌ಶೆ, ಇವ್ಣೆ ಇನ ಚಿಂಫಾವಾಶೆ, ಇನಿ ಖ್ವರಮ್ ಕಾಡ್‌ಶೆ, ಅಜ್ಜು ಇನಾಪರ್ ಧೂಕ್‌ಶೆ.

33 ಇವ್ಣೆ ಇನ ಕೊಳ್ಜೇಥಿ ಮಾರಾಶೆ ಅಜ್ಜು ಮಾರಿನಾಕ್‌ಶೆ, ಕತೋಬಿ ತೀನ್ನೊ ದನ್ಮ ಯೋ ಪಾಲ್ಟೊ ಜಿವ್ವೊಹುಯಿನ್ ಉರಿ ಆವಾಶೆ” ಕರಿ ಬೋಲ್ಯೊ.

34 ಕತೋಬಿ ಅನಾಮ ಏಕ್ ವಾತೇನಾಬಿ ಶಿಷ್ಯರ್ ಪರ್‌ಖ್ಯುಕೊಯ್ತು; ಶನಕತೊ ಆ ವಾತೆನಿ ಮತ್ಲಬ್‌ನ ಇವ್ಣೇಥಿ ಲಪೈರ್‌ಲ್ಲ್ಯಾಡ್, ಅಜ್ಜು ಯೇಸು ಶನಿ ಬಾರೇಮ ಬೋಲುಕರಾಸ್ ಕರಿ ಇವ್ಣುನ ಮಾಲುಮ್‌ಪಡ್ಕು ಕೊಯ್ತು.

ಯೇಸುನೆ ಧರಮ್ ಮಾಂಗವಾಳ ಕಾಣಾನ ಗುಣ್‌ಕರೈಲ್ಯೊತೆ
(ಮತ್ತಾಯ 20:29-34; ಮಾರ್ಕ 10:46-52)

35 ಯೇಸು ಯೆರಿಕೋನ ಖನ್ನೆ ಆವಕರಾನಿ ವಖ್ವತ್‌ಮ, ಹಿಜ್ಜಾ ಮಾರಗ್‌ನ ಶೇಡೆ ಬೇಶಿನ್, ಏಕ್ ಕಾಣು ಧರಮ್ ಮಾಂಗುಕರ್ತುಫ್.

36 ಅದ್ನಿನಿ ಭೇಡ್ ವಳಿಜಾತಿಥೀತೆ ಖ್ವಮ್‌ಜಿನ್, ಇನೆ, “ಆ ಶಾತ್ ಚಾಲುಕರಾಸ್ತೆ?” ಕರಿ ಪುಲ್ಲಾಯೊ.

37 ಇವ್ಣೆ ಇನ, “ನಙ್ಗರೇತ್‌ನೊ ಯೇಸು, ಆ ವಾಟೆ ಕರಿ ವಳೇಜಾಸ್” ಕರಿ ಬೋಲ್ಯೊ.

38 ತದೆ ಯೋ ಕಾಣು ಜೋರೆಥಿ ಚಿಕ್ರಿನ್, “ಯೇಸು! ದಾವೀದ್‌ನ ಛಿಯ್ಯಾ! ಮಾರಪರ್ ಗೋರ್‌ಕರ್” ಕರಿ ಬೋಲ್ಯೊ.

39 ಖ್ವಾಮ್ಣೆ ವಳ್ಳುಜಾತುಫೊತೆ ಅದ್ನಿ ಇನ, “ಖ್ವೊಪ್ ರ್” ಕರಿ ಬೋಲಿನ್ ಗುರ್‌ಕಾಯು. ಕತೋಬಿ ಯೋ ಬಿಜೂಬಿ ಜೋರೆಥಿ ಚಿಕ್ರಿನ್, “ದಾವೀದ್‌ನ ಛಿಯ್ಯಾ! ಮಾರಪರ್ ಗೋರ್‌ಕರ್” ಕರಿ ಬೋಲ್ಯೊ.

40 ತದೆ ಯೇಸುನೆ ಭೇರಿನ್, ಯೋ ಕಾಣಾನ ಇನಾಕನ ಬುಲಾವೊ ಕರಿ ಹುಕುಮ್ ದಿದೊ. ಯೋ ಕಾಣು ಖನ್ನೆ ಆವಾದಿನ್, ಯೇಸುನೆ ಇನ,

41 “ಮೇ ತುನ ಶಾತ್ ಕರ್ನ್ ಕರಿ ತಾರಿ ಆಖ್ವ್” ಕರಿ ಪುಲ್ಲಾಯೊ.

ತದೆ ಇನೆ, “ಮನ ಪಾಳ್ತು ದೆಖಾವಾನಿ ಘೋಣಿ ಕರ್ಲಾ ಪ್ರಭು” ಕರಿ ಬೋಲ್ಯೊ.

42 ಯೇಸುನೆ ಇನ, “ತುನ ದೆಖಾವಾದೆ, ತಾರಿ ವಿಶ್ವಾಸ್‌ಥೀಸ್ ತುನ ಅಲ್ಪಹುಯು” ಕರಿ ಬೋಲ್ಯೊ.

43 ತದ್‌ನು-ತದ್ವೇಸ್ ಇನ ದೆಖಾಯು. ಯೋ ದೇವ್ನಿ ಸ್ತುತಿ ಕರ್ತೊಹುಯಿನ್, ಯೇಸುನ ಪೀಠೆ ಗಯೊ. ಅದ್ನಿಖ್ವಾರ್ ಚಾಲ್ಯುತೆ ಇನ ದೇಖಿನ್, ದೇವ್ನಿ ಸ್ತುತಿಕರ್ನ್.

19

ಯೇಸು ಅಜು ಜಕ್ಕಾಯ

1 ಯೇಸು ಯೆರಿಕೋ ವಾಟೆಕರಿ ಒಳೆಜಾತೊಫೊ.

2 ಹಿಜ್ಜಾ ಶುಂಕ ಮಾಂಗವಾಳನೊ ಮೋಟೊ ಹುಯಿರ್ದೊಡೊತೆ ಜಕ್ಕಾಯ ಕರಿ ಏಕ್‌ಫಣೊ ಥೊ. ಯೋ ಧನ್-ದೌಲತ್‌ವಾಳೊ ಹುಯಿರ್ದೊಡೊ.

3 ಯೋ ಯೇಸುನ ದೇಕ್ಕು ಕರಿ ಆಖ್ವಾಕರ್ದೊ ಕತೋಬಿ ಯೋ ಕುಳ್ಳೊ ಹುಯಿರ್ದೊಡೊತೆ ಅಜ್ಜು ಅದ್ಮಿನಿ ಭೀಡ್‌ಫೀತೆ ಇನಖ್ವಾಜೆ, ಯೇಸುನ ದೇಖಾನ ಕೋ ಹುಯೊನಿ.

4 ಇನಖ್ವಾಜೆ ಯೋ ಯೇಸುನ ದೇಕ್ಕು ಕರಿ, ಅದ್ಮಿನಿ ಭೀಡ್‌ಫೀತೆ ಖ್ವಾಪ್ಪೆ ನಾಶಿ ಜೈನ್, ಏಕ್ ವಡ್‌ನ ರ್ಲುಡ್‌ಪರ್ ಚಡ್‌ಗಿಯೊ. ಶನಕತೊ, ಯೇಸು ಯೋಸ್ ವಾಟೆಕರಿ ಆವಾಳೊ ಥೊ.

5 ತದೆ ಯೇಸು ಹಿಜ್ಜಾ ಆಯಿನ್, ಉಪ್ಪರ್ ದೇಖಿನ್, “ಜಕ್ಕಾಯ, ಫಟ್ ಕರಿ ಉತ್ರಿನ್ ಆವ್, ಶನಕತೊ ಆಜ್ ಮೇ ತಾರ ಘರಮ ರ್ಹವಾನ ಆಯೊ” ಕರಿ ಇನ ಬೋಲ್ಯೊ.

6 ತದೆ ಜಕ್ಕಾಯ ಒಗ್ಗಿಸ್‌ಮ ಉತ್ರಿ ಐನ್, ಖ್ವಶಿಥಿ ಯೇಸುನ ಸ್ವಾಗತ್ ಕರ್ದೊ.

7 ಅನ ದೇಖಿನ್ ಅದ್ಮಿಖ್ವಾರು, “ಯೇಸು ಪಾಪಿನ ಘರಮ ಮೆಹಮಾನ್ ಹುಯಿನ್ ವಳ್ಳೊಜ್ಜಾಸ್” ಕರಿ ಭಣ್‌ಕ್ಯ.

8 ಕತೋಬಿ ಜಕ್ಕಾಯಾನೆ ಭೀರಿನ್, ಪ್ರಭುನ, “ಗುರು ಹಂದೇಕ್! ಮಾರಿ ಆಸ್ತಿಮ ಆಧು ಗೋರ್-ಗರೀಬ್ ದೆವುಸ್ ಅಜ್ಜು ಮೇ ಕಿನಾತೋಬಿ ರಗೈರಾಖ್ಯೊ ಉಶೇತೊ, ಇನ ಏಕ್‌ನ ಚಾರ್ ದೆವುಸ್” ಕರಿ ಬೋಲ್ಯೊ.

9 ಅನ ಖ್ವಮ್‌ಜಿನ್, ಯೇಸುನೆ ಇನ, “ಆಜ್ ಆ ಘರನ ರಕ್ಷಣೆ ಐರ್ದೊಸ್, ಶನಕತೊ ಆಬಿ ಅಬ್ರಹಾಮ್‌ನೊ ಪಿಳ್ಳಿವಾಳೊ ಹುಯಿರ್ದೊಡೊನಿ.

10 ಶನಕತೊ ಅದ್ಮಿನೊ ಛಿಯ್ಯೊ ಗುಮೈಗೂತೆ ಇನ ಡೊಂಡಿನ್ ಬಚ್ಚಾಡನಖ್ವಾಜೆ ಐರ್ದೊಸ್ತೆ” ಕರಿ ಬೋಲ್ಯೊ.

ಖ್ವೊನ್ನಾನು ಬಿಲ್ಲಾವ್‌ನಿ ಬಾರೇಮಾನು ಮತ್ಲಬ್‌ನಿ ಖೇಣಿ
(ಮತ್ತಾಯ 25:14-30)

11 ಇವ್ವೆ ಆ ವಾತೆಖ್ಹಾರಿ ಖ್ವಮ್‌ಜುಕರಾನಿ ವಖ್ವತ್‌ಮ, ಯೇಸು ಯೋ ಯೆರೂಸಲೇಮ್‌ನ ಖನ್ನೆಸ್ ಪೋಚಿಗಯೊಥೋತೆ ಇನಖ್ವಾಜೆ, ಅಜ್ಜು ಅದ್ವಿಖ್ಹಾರು ದೇವ್ನಿ ರಾಜ್ಯ ಒಗ್ಗಿಸ್‌ಮ ದೆಖಾವಾಶೆ ಕರಿ ಸೋಚ್ಕೂತೆ ಇನಖ್ವಾಜೆ, ಯೇಸುನೆ ಬಿಜ್ಜೇಕ್ ಮತ್ಲಬ್‌ನಿ ಖೇಣಿನ ಬೋಲ್ಯೊ.

12 ಯೋ ಶಾತ್‌ಕತೊ, “ಏಕ್ ಮೋಟ ಘರ್‌ನು ಶೌಕರ್ ಅದ್ವಿಥು, ಯೋ ರಾಜ್‌ಭಾರ್‌ಲೀನ್, ಪಾಟ್ಲುಫರಿ ಇನ ಘರೆ ಆವ್ಣುಕರಿ ಖ್ವಾಜ್ ಕರೀನ್, ದೂರ್‌ಲ್ಯೊ ದೇಖ್ವನ್ ನಿಕ್‌ಱ್ಯೊ.

13 ಯೋ ಜಾವನ ಆಗಾಡಿ, ಇನ ಸೇವಕರ್‌ಮ ದಖ್ತ್ ಜಣಾನ ಬುಲೈನ್, ಹರ್ ಏಕ್‌ನ ಖ್ವೊನ್ನಾನು ಬಿಲ್ಲು ದೀನ್, “ಮೇ ಆವಾತೋಡಿ ಅನೇಥಿ ಧಂದೊ ಕರೊ” ಕರಿ ಇವ್ಣುನ ಬೋಲ್ಯೊ.

14 ಕತೋಬಿ ಇನು ಶೊಂತ್ ಖ್ವಯೇರ್ನ್ ಅದ್ವಿ ಇನಾಪರ್ ದಾವೊ ಕರೀನ್, ಇನ ಪೀಲೆ ಖಬರ್ ದೈವಾಳಾನ ಮೋಕ್ಲಿನ್, “ಆ ಹಮಾರಪರ್ ರಾಜ್‌ಭಾರ್ ಚಲಾವಾನು ಹಮೂನ ಅಲ್ಫು ಲಾಗಕೊಯ್ನ್” ಕರಿ ಇನ ಬೋಲ್ಯೊ.

15 ತೋಬಿ ಯೋ ಅದ್ವಿ ರಾಜ್ಯನಿ ಅದಿಕಾರಿಹುಯಿನ್ ಫಾಟ್ಲೊಫರಿ ಆಯೊ. ತದೆ ಇನೆ, “ಮೇ ಖ್ವೊನ್ನಾನು ಬಿಲ್ಲು ದಿದೊಥೋತೆ ಸೇವಕರ್‌ನ ಮಾರ ಖ್ವಾಮೆ ಬುಲಾವೊ. ಇವ್ಣೆ ಕೆತ್ತು ಕಮೈರಾಖ್ಯುಸ್ ಕರಿ ಮನ ಮಾಲುಮ್ ಪಡ್ಣು” ಕರಿ ಹುಕುಮ್‌ದಿದೊ.

16 ಪಹಿಲೊ ಸೇವಕ್‌ನೆ ಇನಖ್ವಾಮ್ಣೆ ಆಯಿನ್, “ಪ್ರಭು ತುನೆ ದಿದೋತೆ ಏಕ್ ಖ್ವೊನ್ನಾನು ಬಿಲ್ಲಾಥಿ, ಮೇ ದಖ್ತ್ ಖ್ವೊನ್ನಾನು ಬಿಲ್ಲಾ ಕಮೈರಾಖ್ಯೋಸ್” ಕರಿ ಬೋಲ್ಯೊ.

17 ಯೋ ಇನ, “ಶಬಾಶ್! ತೂ ಅಲ್ಫೊ ಸೇವಕ್! ತೂ ಥೋಡಾಮ ನಿಯಥ್ಲಿ ರ್ವಯೋತೆ ಇನಖ್ವಾಜೆ, ಮೇ ತುನ ದಖ್ತ್ ಖ್ವಯೇರ್‌ಪರ್ ಅದಿಕಾರಿಕರಿನ್ ಮ್ವೇಲುಕರೊಸ್” ಕರಿ ಬೋಲ್ಯೊ.

18 ಬಿಜ್ಜೇಕ್ ಜಣೊ ಆಯಿನ್, “ಗುರು ತುನೆ ದಿದೋತೆ ಏಕ್ ಬಿಲ್ಲಾಥಿ, ಮೇ ಪಾಝ್ ಖ್ವೊನ್ನಾನು ಬಿಲ್ಲಾ ಕಮೈ ಕರಿರಾಖ್ಯೋಸ್” ಕರಿ ಬೋಲ್ಯೊ.

19 ತದೆ ರಾಜಾನೆ ಅನ, “ತೂಬಿ ಪಾಚ್ ಖ್ವಯೇರ್‌ಪರ್ ಅದಿಕಾರಿಹುಯಿನ್ ರ್ಲೆ” ಕರಿ ಬೋಲ್ಯೊ.

20 ಅನ ಬಾದ್‌ಮ ಬಿಜ್ಜೆಕ್ ಜಣು ಐನ್, “ಪ್ರಭು, ಅಲಾ ತುನೆ ದಿದೋತೆ ಖ್ವೊನ್ನಾನು ಬಿಲ್ಲು, ಅನ ಏಕ್ ಚೌಕಾಮ ಲಪೇಟಿನ್ ಮ್ಹೇಲಿರಾಖ್ಲೊ.

21 ತೂ ತಾರು ಕಾಹೆತೆ ರಾಘ್‌ನ ಫಳ್ಳಿ ಜಾವಾಳೊ, ತುನೆ ಛಿಡ್‌ಕ್ಯೊಕೊಂತೆ ಇನ ವ್ಹಾಡವಾಳೊ ಕರಣ್ ಅದ್ವಿಕರಿ ಬೋಲಿನ್, ತಾರೇಛಿ ಡರಿನ್, ಆ ಬಿಲ್ಲಾನ ಚೌಕಾಮ ಭಾಂದೀನ್, ಲಪಾಡಿರಾಖ್ಲೊ” ಕರಿ ಬೋಲ್ಯೊ.

22 ಅನ ಖ್ವಮ್‌ಜಿನ್ ಯೋ ರಾಜ್ ಇನ, “ತೂ ಖರಾಬ್ ಸೇವಕ್! ತಾರಿ ವಾತೆಛೀಸ್ ತುನ ತೀರ್ಪ್ ಕರುಸ್. ಮೇ ಮಾರು ಕಾಹೆತೆ ರಾಘ್‌ನ ಪಳ್ಳಿನ್ ಜಾವಾಳೊ, ಮೇ ಪಿಕಾಯೊಕೊಂತೆ ಇನ ವ್ಹಾಡವಾಳೊ ಕರಣ್ ಅದ್ವಿಕರಿ ತುನ ಮಾಲುಮ್‌ನಿ.

23 ಇಮ್‌ಕತೊ, ತೂ ಮಾರು ಖ್ವೊನ್ನಾನು ಬಿಲ್ಲಾನ ಬಡ್ವಿಪರ್ ಶನ ಕೋ ದಿದೋನಿ?” ಕರಿ ಬೋಲ್ಯೊ.

24 ತದೆ ಖನ್ನೆ ಭಿಯ್ಯುಥೂತೆ ಇವ್ವುನ ಇನೆ, “ಅನಕಂಥು, ಯೋ ಖ್ವೊನ್ನಾನು ಬಿಲ್ಲಾನ ಲೀನ್, ದಖ್ಡ್ ಖ್ವೊನ್ನಾನು ಬಿಲ್ಲಾ ಛಾತೆ, ಇನ ದೆವೊ” ಕರಿ ಬೋಲ್ಯೊ.

25 ಕತೋಬಿ ಇವ್ವೆ ಇನ, “ಪ್ರಭು, ಇನಾಕನ ಅಗಾಡಿಸ್ ದಖ್ಡ್ ಖ್ವೊನ್ನಾನ ಬಿಲ್ಲಾ ಛಾನಿ” ಕರಿ ಬೋಲ್ಯೊ.

26 ತದೆ ರಾಜಾನೆ ಇವ್ವುನ ಬೋಲ್ಯೊಕಿ, “ಮೇ ಬೋಲುಸ್ಕಿ, ಕಿನಾಕಿನ ಛಾಕಿ ಇವ್ವುನ ಬಿಜ್ಜೂಬಿ ದೇವಾವ್‌ಶೆ, ಕತೋಬಿ ಕಿನಾಕನ ಕೊಯ್ತಿಕಿ ಇವ್ವಕಂಥು, ಛಾತೆಬಿ ಕಾಡಿಲಿಶೆ”

27 ಅಜ್ಜು ಮೇ ಇವ್ವಾಪರ್ ರಾಜಾ ನಾ ಹುಯಿರ್ದೇಣು ಕರಿ ಬೋಲ್ಯುಥೂತೆ ಯೋ ಮಾರ ದುಶ್‌ಮನ್ನ ಖ್ವಾರ್ರು, ಹಮ್ಕೆ ಹಜ್ಜಾಲ್ಯೆನ್, ಮಾರ ಖ್ವಾಮ್ಜೆಸ್ ಇವ್ವುನ ಮಾರಿ ನಾಕ್ಚು!” ಕರಿ ಬೋಲ್ಯೊ.

ಯೇಸು ರಾಜಾನಿಘೋಣಿ ಯೆರೂಸಲೇಮ್ ಗಯೋತೆ
(ಮತ್ತಾಯ 21:1-11; ಮಾರ್ಕ 11:1-11; ಯೋಹಾನ 12:12-19)

28 ಆ ಖ್ವಾರು ಬೋಲಾನ ಬಾದ್‌ಮ, ಯೇಸು ಇವ್ವೇಢಿ ಖ್ವಾಮ್ಪಿ-ಖ್ವಾಮ್ಪಿ ಚಾಲಿನ್, ಯೆರೂಸಲೇಮ್ ಭಣಿಗಯೊ.

29 ಅನ ಬಾದ್‌ಮ ಯೇಸು, ಆಲಿವ್ ತೇಲ್‌ನುಝಾಡ್ ಪಹಾಡ್‌ಕನ, ಥೂತೆ, ಬೆತ್ಪಗೆ ಅಜು ಬೇಥಾನ್ಯ ಕರಿ ಗಾಮ್‌ನ ಖನ್ನೆ ಆವಾದಿನ್, ಶಿಷ್ಯರಾಮ ಬೇ ಜಣಾನ ಬುಲೈನ್, “ತುಮಾರ ಖ್ವಾಮ್ಪಿ ಛಾತೆ ಗಾಮ್ ಜಾವೊ.

30 ತುಮೆ ಯೋ ಗಾಮ್‌ನ ಮಹಿ ಜಾತಸ್‌ನ ಹಿಜ್ಜಾ ಭಂದೈರ್ದೈಶೆತೆ, ಏಕ್ ಜಾನ್‌ಮಾನ್ ಗಧೇಡಾನ ಚೆಲ್ಕಾನ ದೇಕಾಶು, ಹಂಕೆತೋಡಿ ಇನಾಪರ್ ಕೋಣ್‌ಬಿ ಕೋ ಬೆರೂನಿ. ಇನ ಫೋಡಿನ್, ಹಜ್ಜಾಧರಿಲೀನ್ ಆವೊ,

31 ಕೋಣ್‌ತೋಬಿ ತುಮೂನ, ‘ಅನ ಶನ ಫೋಡುಕರಾಸ್ತೆ?’ ಕರಿ ಪುಲ್ಲಾಯುತೊ, ಪ್ರಭುನ ಆ ಹೋಣುಕಸ್ ಕರಿ ಬೋಲೊ” ಕರಿ ಬೋಲಿನ್ ಮೋಕ್‌ಲೊ.

32 ಇವ್ವೆಜೈನ್, ಯೇಸುನೆ ಬೋಲೊಥೋತೆ ಇಮ್ಮಸ್ ಥೂತೆ ದೇಖ್.

33 ಇವ್ವೆಯೋ ಗಧೇಡಾನ ಚೆಲ್ಕಾನ ಫೋಡುಕರಾನಿ ವಖ್ತಾಮ, ಇನ ಯಜಮಾನ್ವೆ “ಇನ ಶನ ಫೋಡುಕರಾಸ್ತೆ?” ಕರಿ ಬೋಲ್ಯ.

34 ತದೆ ಇವ್ವೆ “ಆ ಪ್ರಭುನ ಹೋಣುಕಸ್” ಕರಿ ಜವಾಬ್ ದಿದು.

35 ಯೋ ಗಧೇಡಾನ ಯೇಸುಕನ ಲೈನ್, ಇವ್ವ ಲುಂಗ್ಡಾವ್‌ನ, ಯೋ ಗಧೇಡಾನಚೆಲ್ಕನ ಉಪ್ಪರ್ ನಾಖಿನ್, ಯೇಸುನ ಇನಾಪರ್ ಬೆಖ್ವಾಡ್.

36 ಯೇಸು ಜಾತೊರ್ದವಾನಿ ವಖ್ತಾಮ, ಇವ್ವೆ ಇವ್ವ ಲುಂಗ್ಡಾವ್‌ನ ವಾಟ್‌ಪರ್ ಬಿಲ್ಲಾಯು.

37 ಯೇಸು ಯೆರೂಸಲೇಮ್‌ನ ಖನ್ನೆ ಆಲಿವ್ ಪಹಾಡ್‌ನು ಉತರ್‌ತಿ ಝಗೋಕನ ಆವಾದಿನ್, ಇನ ಶಿಷ್ಯರಾನಿ ಮೋಟಿ ಝೂಂಡ್ ಖ್ವುಶಿ ಕರ್ತುಹುಯಿನ್, ಇವ್ವೆ ದೇಖ್ತೊತೆ ಖ್ವಾರಿಸ್ ಮಹಾನ್ ಕಾಮ್‌ಖ್ವಾಜೆ ಜೋರ್ ಅವಾಜ್‌ಢಿ ದೇವ್ನಿ ಸ್ತುತಿ ಕರ್ಯ್.

38 “ಪ್ರಭುನ ನಾಮ್‌ಪರ್ ಆವಾಳ ರಾಜಾನ ಆಶೀರ್ವಾದ್ ಹುವಾದೆ ಪರ್‌ಲೋಕ್‌ಮ ಸಮಾಧಾನ್, ಉಪ್ಪರ್‌ಲ್ಯ ಲೋಕ್ ಮಹಿಮೆ ಹುವಾದೆ!” ಕರಿ ಘಣಿಮೋಟಿ ಅವಾಜ್ ದೇವ್ ಸ್ತುತಿ ಕರಲಗ್ತು.

39 ಅದ್ನಿ ಝೂಂಡ್‌ಮ ಥೂತೆ ಥೋಡು ಫರಿಸಾಯರ್‌ವಾಳು ಯೇಸುನ, “ಗುರು, ತಾರ ಶಿಷ್ಯರ್‌ನ ಖೊಪ್ ರ್‌ವೊ ಕರಿ ಗುರ್‌ಕಾವ್” ಕರಿ ಬೋಲ್ತು.

40 ತದೆ ಯೇಸುನೆ, “ಮೇ ತುಮೂನ ಬೋಲುಸ್ಕಿ, ಅವ್ಣೆ ಖೊಪ್ಪೊ ಹುಯಿಗಯೂತೊ, ಆ ಬಂಡಾಸ್ ಇವ್ಣು ಇವ್ಣೆ ಚಿಕರ್‌ಶೆ” ಕರಿ ಜವಾಬ್ ದಿದೊ.

ಯೇಸು ಯೆರೂಸಲೇಮ್‌ನ ಖಾಜೆ ರೋಯೊತೆ

41 ಯೇಸು ಯೆರೂಸಲೇಮ್ ಖ್ವಯೇರ್ನ್ ಖನ್ನೆ ಆಯಿನ್, ಇನ ದೇಖಿನ್, ಇನಿ ಬಾರೇಮ ರೋವ್‌ತೊಹುಯಿನ್,

42 ಅಜು ಬೋಲ್ಯೊಕಿ, “ಶಾಂತಿಧಿ ರ್‌ವಾನ ಶಾತ್ ಹೋಣು ಕರಿ ಬೋಲಾನು, ತೂ ಹಫ್ಲಾಸ್ ಮಾಲುಮ್ ಕರಿಲಿದಿಹೋತ್‌ತೊ ಕೆತ್ಸಿ, ಅಲ್ಫ್ ಥೂ! ಕತೋಬಿ ಹಮ್ಮೆ ತುನ, ಯೋ ದೇಖಾನ ಕೊ ಉಶೇನಿ,

43 ಏಕ್ ವಖ್ತ್ ಆವ್‌ಶೆ, ತದೆ ತಾರು ದುಶ್‌ಮನ್ ಖ್ವಾರು, ತಾರ ಅಶ್‌ಪೀಶ್ ಭೀತ್ ಭಾಂದಿನ್, ತುನ ಖ್ವಾರಿಸ್ ಬಾಜುಧು ಕಬ್‌ಜಾ ಕರೀನ್,

44 ಇವ್ಣೆ ತುನ ಅಜು ತಾರಿ ಭೀತ್‌ನ ಮಹಿ ಛಾತೆ ಖ್ವಾರ ಅದ್ನಿನ್ ಬರ್ಬಾತ್ ಕರ್ಶೆ, ಏಕ್-ಬಂಡಾಪರ್ ಬಿಜ್ಜೀಕ್ ಬಂಡೊ ಭೀರೆವ್ಣುನಾತೆ ಇಮ್ ಇವ್ಣೆ ಕರ್ಶೆ, ಶನಕತೊ, ದೇವ್ ತುನ ಬಫಾಡ್‌ಣು ಕರಿ ಆಯೋತೆ ವಖ್ತ್‌ನ, ತೂ ಪರ್ಖಿ ಕೊಯ್ಲಿ!” ಕರಿ ಬೋಲ್ಯೊ.

ಯೇಸು ಮಂದಿರ್‌ಮ ಗಯೊತೆ

(ಮತ್ತಾಯ 21:12-17; ಮಾರ್ಕ 11:15-19; ಯೋಹಾನ 2:13-22)

45 ಅನ ಬಾದ್‌ಮ ಯೇಸು ಮಂದಿರ್‌ಮ ಜೈನ್, ವೇಚ್‌ವಾಳನ ಭಾರ್ ನಖ್ವಾಡಲಗ್ಲೊ.

46 ಅಜ್ಜು ಇವ್ವುನ ಬೋಲ್ಯೊಕಿ, “ದೇವ್ವೆ ಬೋಲ್ಯೊಕಿ, ‘ಮಾರಿ ಮಂದಿರ್ ಪ್ರಾರ್ಥನೇನು ಘರ್ ಹುಯಿರ್ದಿಶೆ’ ಕರಿ ಲೀಖ್ತಿರ್ದೊಸ್ನಿ.* ಕತೋಬಿ ತುಮೆ ಅನ ಚೋರ್ನಿ ಲಪಾನಿ ಘವಿ ಬಣ್ಣೆನಾಖ್ವಿ.

47 ದನ್‌ರೋಜ್ ಯೇಸು ಮಂದಿರ್‌ಮ ವಚನ್ ಬೋಲಿದೆತೋಡೊ. ಕತೋಬಿ ಮಹಾಯಾಜಕ, ಮೋಶೇನಿ ವಚನ್ ಶಿಕಾಡವಾಳು ಶಾಸ್ತ್ರಿಯೆ ಅಜ್ಜು ಶಾಣು ಖ್ವಾರ್ಡು ಯೇಸುನ ಮರ್‌ನಾಖಿದೇವ್ವು ಕರಿ ಕೋಶಿಶ್ ಕರ್ದ್.

48 ಕತೋಬಿ ಇನ ಖಿವಿ ತರಿಕಾಧಿ ಮರ್‌ನಾಖಿ ದಿಯೆಜಾಯ್ ಕರಿ ಬೋಲಾನು ಇವ್ವ ಮಾಲುಮ್ ಕೋ ಪಡ್ವುನಿ, ಶನಕತೊ ಅದ್ವಿಖ್ವಾರ್ಡು ಯೇಸುನಿ ವಾತೆನ ಚಿಂತ್‌ಲಗಾಡಿನ, ಖ್ವಮ್‌ಜ್‌ತೂಡು.

20

ಯೇಸುನಿ ಅದಿಕಾರ್‌ನಿ ಬಾರೇಮ ಪುಲ್ಲಾಯೂತಿ
(ಮತ್ತಾಯ 21:23-27; ಮಾರ್ಕ 11:27-33)

1 ಏಕ್ ದನ್ನೆ ಯೇಸು ಮಂದಿರ್‌ಮ ಅದ್ವಿನ ವಚನ್ ಬೋಲಿದೇತೊಹುಯಿನ್, ಸುವಾರ್ತೆನ ಬೋಲುಕರ್ತೊಡೊತೆ ತದೆ, ಮಹಾಯಾಜಕ, ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯೆ ಅಜ್ಜು ಶಾಣುಖ್ವಾರ್ಡು ಮಳಿನ್ ಯೇಸುಕನ ಆಯು.

2 ಅಜ್ಜು ಇವ್ವೆ ಇನ, “ಹಮೂನ ಬೋಲ್! ಆ ಖ್ವಾರ್ಡು ಕರಾನ ತುನ ಶನಿ ಅದಿಕಾರ್ ಲ್ಲಾ?ಅಮ್ಮಿ ಹಕ್ ತುನ ಕೋಣ್ ದಿದು?” ಕರಿ ಬೋಲ್ವು.

3 ತದೆ ಯೇಸುನೆ ಇವ್ವುನ, “ಮೇಬಿ ತುಮೂನ ಏಕ್ ಸವಾಲ್ ಪುಲ್ಲಾವುಸ್. ಮನ ಬೋಲೊ,

4 ಬ್ಯಾಪ್ತಿಸ್ಮ ದ್ಯವಾನಿ ಹಕ್, ಯೋಹಾನ್ ಪರಲೋಕ್‌ಧಿ ಆಯುಕಿ, ಅದ್ವಿಧಿ ಆಯು? ಕರಿ ಪುಲ್ಲಾಯೊ.

5 ತದೆ ಇವ್ವೆ, “ಅವ್ವೆ ಶಾತ್ ಬೋಲಿಯೆ? ಪರ್‌ಲೋಕ್‌ಧು ಆಯು ಕರಿ ಅವ್ವೆ ಬೋಲ್ಯಾತೊ, ಇಮ್‌ಕತೊ, ತುಮೆ ಇನ ಶನ ನಂಬ್ಯಾಕೊಯ್ವಿ? ಕರಿ ಬೋಲ್‌ಶೆ.

* 19:46 19:46 ಯೆಶಾಯ 6.7; ವಿಮೋಚನ ಕಾಂಡ 19.46; ಯೆರೆಮೀಯ 7.11

6 ಅದ್ವಿಧಿ ಆಯು ಕರಿ ಬೋಲ್ಯಾತೊ, ಅದ್ವಿಖ್ವಾರು ಯೋಹಾನ ಪ್ರವಾದಿ ಕರಿ ನಂಬಿರಾಖ್ವುತೆ ಇನಖ್ವಾಜೆ, ಇವ್ಣೆ ಅಪ್ಪುನ ಬಂಡೊ ಫೇಕಿ ಮಾರ್ಶೆ” ಕರಿ ಇವ್ಣ-ಇವ್ಣಾಮಸ್ ಬೋಲಿಲಿದು.

7 ಇನಖ್ವಾಜೆ ಇವ್ಣೆ, “ಯೋ ಕಿಜ್ಲಾಧು ಆಯು ಕರಿ ಹಮೂನ ಮಾಲುಮ್ ಕೊಯ್ನಿ” ಕರಿ ಜ್ಹಾವಾಬ್ ದಿದು.

8 ತದೆ ಯೇಸುನೆ ಇವ್ಣುನ, “ಆ ಖ್ವಾರು ಖಿವಿ ಹಕ್‌ಥಿ ಕರುಸ್ ಕರಿ ಬೋಲಾನು, ಮೇಬಿ ತುಮೂನ ಕೋ ಬೋಲಾನಿ” ಕರಿ ಬೋಲ್ಯೊ.

ದ್ರಾಕ್ಷಿನು ಬಾಗ್‌ನ ವಾರ್‌ನ ಕರಾವಾಳಾನಿ ಬಾರೇಮಾನು ಮತ್ಲಬ್‌ನಿ ಖೇಣಿ

(ಮತ್ತಾಯ 21:33-46; ಮಾರ್ಕ 12:1-12)

9 ಬಾದ್‌ಮ ಯೇಸುನೆ ಅದ್ವಿಯೇನ ಏಕ್ ಮತ್ಲಬ್‌ನಿ ಖೇಣಿನ ಬೋಲ್ಯೊ ಯೋ ಶಾತ್‌ಕತೊ, “ಏಕ್ ಅದ್ವಿ ಏಕ್ ದ್ರಾಕ್ಷಿನು ಬಾಗ್‌ನ ಬಣೈನ್, ಇನ ವಾರ್‌ನ ದೀನ್, ಬಿಜ್ಜೇಕ್ ದೇಖ್ವನ್ ಜೈನ್, ಘಣ ದನ್‌ತೋಡಿ ಹಿಜ್ವಾಸ್ ಥೊ.

10 ದ್ರಾಕ್ಷಿ ತೋಡಾನಿ ವಖ್ವತ್ ಆವಾದಿನ್, ಏಕ್ ಆಳ್‌ನ ವಾರ್‌ನ ದೀರಾಖ್ಯೊಥೊತೆ ಇವ್ಣಾಕನ ಮೋಕ್‌ಲ್ಯೊ ಕತೋಬಿ ಇವ್ಣೆ ಇನ ಮಾರಿನ್, ಖಾಲಿಹಾತೆ ಮೋಕ್ಲಿದಿದು.

11 ತದೆ ಇನೆ ಬಿಜ್ಜೇಕ್ ಆಳ್‌ನ ಇವ್ಣಾಕನ ಮೋಕ್ಲಾಖ್ವುತರ್, ಇನಾಬಿ ಮಾರಿನ್, ಖ್ವರಮ್ ಕಾಡೀನ್, ಖಾಲಿಹಾತೆ ಮೋಕ್ಲಿದಿದು.

12 ತದೆ ಇನೆ ಬಿಜ್ಜೇಕ್ ಜ್ಹಣಾನ ಮೋಕ್‌ಲ್ಯೊ; ಇವ್ಣೆ ಇನಾಬಿ ಫೋಡ ಹುವ್ವಾವತ್ರಿ ಮಾರಿನ್, ಭಾರ್ ಫೇಕಿದಿದು.

13 ತದೆ ಯೋ ದ್ರಾಕ್ಷಿನೊ ಬಾಗ್‌ನೊ ಮಾಲಿಕ್‌ನೆ ಮೇ ಶಾತ್‌ಕರು? ಮಾರೊ ಲಾಡ್‌ನೊ ಛಿಯ್ಯಾನ ಮೋಕ್ಲಸ್! ಇನಾತೋಬಿ ದೇಖಿನ್ ಮರ್ಯಾದಿ ದೇಸ್ಕಿ ಶುಕಿ! ಕರಿ ಸೋಚಿನ್ ಮೋಕ್‌ಲ್ಯೊ.

14 ಕತೋಬಿ ಯೋ ವಾರ್‌ನ ಲೀರಾಖ್ಯೊಥೊತೆ ಇವ್ಣೆ ಇನ ದೇಖಿನ್, “ಆಸ್ ಮಾಲಿಕ್‌ನೊ ಛಿಯ್ಯೊ ಅನ ಮಾರಿನಾಖಿದಿಯ್ಯೊ ತದೆ ಇನು ಶೊತ್ ಖ್ವಾರು ಅಪ್ಪು ಹುಯಿಜ್ಲಾಶೆ!” ಕರಿ ಏಕ್‌ಥಿ ಏಕ್ ಬೋಲಿಲಿದು.

15 ಅಜ್ಜು ಇನ ದ್ರಾಕ್ಷಿನ ಬಾಗ್‌ಮಾಥು ಭಾರ್ ಧಕೇಲಿನ್, ಮಾರಿನಾಕ್ಯು

ಇಮ್‌ಕತೊ, ಯೋ ದ್ರಾಕ್ಷಿನು ಬಾಗ್‌ನೊ ಯಜಮಾನ್ ಆಯಿನ್, ಇವ್ವುನ ಶಾತ್ ಕರ್ಶೆ?” ಕರಿ ಯೇಸುನೆ ಪುಲ್ಲಾಯೊ.

16 “ಯೋ ಆಯಿನ್, ವಾರ್‌ನ ಲೀರಾಖ್ಯುಧೂತೆ, ಇವ್ವುನ ಮಾರಿನಾಖಿನ್, ಇನ ದ್ರಾಕ್ಷಿನ ಬಾಗ್‌ನ ಬಿಜ್ಜಾವ್ ದಿಶೆ” ಕರಿ ಬೋಲ್ಯೊ.

ಅನ ಖ್ವಮ್‌ಜಿನ್ ಅದ್ಮಿಖ್ವಾರು, “ಅಮ್ ನಾಹೋಣು!” ಕರಿ ಬೋಲ್ಯೊ.

17 ಕತೋಬಿ ಇವ್ವುನ ದೇಖಿನ್ ಯೇಸುನೆ,
“ಘರ್ ಭಾಂದಾವಾಳು ನಕೊಕರಿ ಝಿಟ್ಕಾರಯೋತೆ ಬಂಡೋಸ್,
ಹೋಣುತೆ ಕೋಣಾನೊ ಬಂಡೊ ಹುಯೊ” ಕರಿ ಲೀಖ್ವಿರ್ದೊತೆ*

ಇನಿ ಮತ್‌ಲಬ್ ಶಾತ್?” ಕರಿ ಪುಲ್ಲಾಯೊ.

18 ಯೋ ಬಂಡಾಪರ್ ಪಡಾವಾಳು ಹರೇಕ್ ಜ್ಞಾನ ಟುಕ್‌ಡಾ-ಟುಕ್‌ಡಾ ಕರಿನಾಕ್‌ಶೆ; ಅಜ್ಜು ಆ ಬಂಡೊ ಕಿನಾಪರ್ ಪಡ್‌ಶೇಕಿ, ಇನ ಬುಕ್‌ನು-ಬುಕ್‌ನು ಕರಿನಾಕ್‌ಶೆ” ಕರಿ ಬೋಲ್ಯೊ.

ಶುಂಕ ಭಾಂದಾನಿ ಬಾರೇಮ ಪುಲ್ಲಾಯೊತೆ
(ಮತ್ತಾಯ 22:15-22; ಮಾರ್ಕ 12:13-17)

19 ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯೆ ಅಜ್ಜು ಮಹಾಯಾಜಕ ಆ ವಾತೇವ್ ಖ್ವಮ್‌ಜಿನ್, ಆ ಹಮಾರಿ ಬಾರೇಮಾಸ್, ಆ ಮತ್ಲಬ್‌ನಿ ಖೇಣಿನ ಬೋಲ್ಯೊ ಕರಿ ಮಾಲುಮ್ ಕರಿಲೀನ್, ಯೋಸ್ ವಖ್ವತ್‌ಮ, ಯೇಸುನ ಧರ್‌ನು ಕರಿ ಕರ್ಯ ಕತೋಬಿ ಅದ್ಮಿನ ಡರ್‌ಥಿ ಇನ ಧರ್ಯ ಕೊಯ್ತಿ.

20 ಅನ ಬಾದ್‌ಮ ಇವ್ವೆ ಯೇಸುನ ರೋಮ್‌ನು ಅಧಿಪತಿನಹಾತ್ತ್ ಅಜ್ಜು ಇನಿ ಅದಿಕಾರಿನಾಬಿ ದೇವ್ವು ಕರಿ ಸೋಚಿನ್, ಇನ ಧರ್‌ನು ಕರಿ ಜ್ಞಪಾಲಗ್ಲು, ಅನಖ್ವಜೆಸ್ ನೀತಿವಾಳಾನಿಮತ್ ನಾಟಕ್‌ಕರಾಸ್ತೆ ಥೋಡ ಜ್ಞಾನ, ಯೇಸುನ ವಾತೇಮ ಖ್ವಪ್‌ಡಾವ್ವು ಕರಿ ಇನಾಕನ ಮೋಕ್‌ಲ್ಯು.

* 20:17 20:17 ವಿಮೋಚನ ಕಾಂಡ 20:17; ಕೀರ್ತನೆ 118:22

21 ಅವ್ವೆ ಯೇಸುನ, “ಗುರು, ತೂ ಬರೊಬರ್‌ಥೀಸ್ ವಾತೆ ಬೋಲಾಸ್ ಅಜು ವಚನ್ ಬೋಲಿದೇಸ್, ಕರಿ ಹಮೂನ ಮಾಲುಮ್. ತು ಕಿನಾಬಿ ಮ್ಹೋಡು, ದೇಖಿನ್, ವಾತೆ ಬೋಲಾಕೊಯ್ನಿ. ಕತೋಬಿ ದೇವ್ನಿ ರಾಜ್ಯನಿ ಬಾರೇಮಾನಿ ಖಾಚಿನ್ ಅದ್ವಿನ ಬೋಲಿ ವತಾಳಸ್ ಕರೀಬಿ ಹಮೂನ ಮಾಲುಮ್.

22 ಕೈಸರ್‌ನ ಶುಂಕ ಭಾಂದಾನು ನ್ಯಾವಾಕಿಕೊಯ್ನಿ ಕರಿ ಹಮೂನ ಬೋಲ್” ಕರಿ ಪುಲ್ಲಾಯು.

23 ಕತೋಬಿ ಯೇಸುನೆ, ಇವ್ವೆ ಇನ ವಾತೆಮ ಖ್ವಪ್‌ಡವಾನ ಕರುಕರಸ್ ಕರಿ ಮಾಲುಮ್ ಕರಿಲೀನ್ ಇವ್ವುನ,

24 “ಮನ ಏಕ್ ರೂಪಾನು ಬಿಲ್ಲು ವತಾಳೊ. ಇನಾಪರ್ ಕಿನು ನಾಮ್‌ಬಿ ರೂಪ್ ಲ್ಹಾ?” ಕರಿ ಪುಲ್ಲಾವಖ್ವತರ್,

ಇವ್ವೆ “ಕೈಸರ್‌ನು” ಕರಿ ಜಾವಾಬ್‌ದಿದು.

25 ತದೆ ಯೇಸುನೆ ಇವ್ವೆ, “ಇಮ್‌ಕತೊ, ಕೈಸರ್‌ನು ಶಾತ್ ಲ್ಹಾಕಿ ಕೈಸರ್‌ನ ದೆವೊ, ಅಜು ದೇವ್‌ನು ಶಾತ್ ಲ್ಹಾಕಿ ಯೋ ದೇವ್ನ ದೆವೊ” ಕರಿ ಬೋಲ್ಯೊ.

26 ಅದ್ವಿನ ಖ್ವಾಮ್ವೆ ಯೇಸುನ ವಾತೆಮ ಖ್ವಪ್‌ಡವಾನ ಕೋಹುಯನಿ, ಇನಖ್ವಾಜೆ ಇವ್ವೆ ಖ್ವೊಪ್ ಹುಯಿಗಯು ಅಜು ಯೇಸುನೆ ದಿದೋತೆ ಜವಾಬ್‌ನ ಖ್ವಮ್‌ಜಿನ್, ಆಶ್ಚರ್ಯ ಖಾದು.

ಮರ್‌ವಾನ ಬಾದ್ತ ಪಾಳ್ತು ಜಿವ್ತುಹುಯಿನ್ ಉತಾನಿ ಬಾರೇಮ ಪುಲ್ಲಾಯೂತೆ

(ಮತ್ತಾಯ 22:23-33; ಮಾರ್ಕ 12:18-27)

27 ಅನ ಬಾದ್‌ಮ, ಮರವಾಳು ಪಾಳ್ತು ಜಿವ್ತುಹುಯಿನ್ ಉತಾಕೊಯ್ನಿ ಕರಿ ಬೋಲಾವಾಳು ಹುಯಿರ್ದೊತೆ ಸದ್ವುಕಾಯವಾಳಾಮ, ಥೋಡ ಭಣ ಯೇಸುಕನ ಐನ್,

28 “ಗುರು, ‘ಮೋಟೊ ಭೈನ ಬಾವಣ್ ರ್ವೀನ್ ಯೋ ಲಡ್ಕಾಕೊಂತೆ ಮರಿಗೋತೊ, ಇನೊ ನ್ಹಾನೊ ಭೈ ಯೋ ಬಾವಣ್ ಕರಿಲೀನ್ ಲಡ್ಕಾ ಪೈದಾ ಕರ್ನ್ ಅಜು ಯೋ ಲಡ್ಕಾ ಮರ್ಯೊತೆ ಭೈನ ಲಡ್ಕಾ ಬೋಲೈಲಿಶೆ’ ಕರಿ ಮೋಶೆನೆ ಹಮಾರಖ್ವಾಜೆ ಲೀಖಿರಾಖ್ವೊಸ್‌ನಿ.

29 ಖ್ವಾತ್‌ಜಣ ಭೈಯೆ ಥಾ. ಇವ್ಣಾಮ ಮೋಟೊ ಭೈನೆ ಬಾವಣ್ ಕರೀನ್, ಲಡ್ಕಾಕೊಂತೆ ಮರಿಗಯೊ.

30-31 ಅನ ಬಾದ್‌ಮ ಬೇನೊ ಭೈನೆ ಇನ ವ್ಯಹಾ ಕರೀನ್, ಬಾದ್‌ಮ ಯೋಬಿ ಮರಿಗಯೊ. ತದೆ ತೀನ್ನೊ ಭೈನೆ ಇನ ಕರಿಲಿದೊ ಅಜು ಯೋಬಿ ಮರಿಗಯೊ. ಅಮ್ಮಸ್ ಖ್ವಾತೆ ಭೈಯೇಬಿ, ಯೋ ತಯೇಡಾನ ಕರಿಲೀನ್, ಲಡ್ಕಾಕೊಂತೆ ಮರಿಗಯ.

32 ಆ ಖ್ವಾರಾನ ಬಾದ್‌ಮ ಯೋ ತಯೇಡಾಬಿ ಮರಿಗೈ.

33 ಇಮ್‌ಕತೊ ಪಾಲ್ಟು ಜಿವ್ತುಹುಯಿನ್ ಉಟ್‌ಶೇತೆ ತದೆ, ಯೋ ತಯೇಡ ಖೆವಾನಿ ಬಾವಣ್ ಹುಯಿರೈಶೆ? ಶನಕತೊ ಖ್ವಾತೆ ಜಣಾಬಿ ಇನ ಕರಿಲಿದಾಥಾನಿ” ಕರಿ ಪುಲ್ಲಾಯು.

34 ತದೆ ಯೇಸುನೆ ಇವ್ಣುನ, “ಆ ಜಗತ್‌ನು ತಯೇಡ ಪರ್ಖ್ವಾ ವ್ಯಹಾ ಕರೀಲೆಸ್.

35 ಕತೋಬಿ ಮರಿಗಯೊತೆ ಇವ್ಣಾಮಾಥು ಪಾಲ್ಟು ಜಿವ್ತುಹುಯಿನ್ ಉರಿ ಆವಾನ ಲ್ಹಾಯ್‌ಕ್ ಹುಯಿರೈಶೆ ಅಜು ಆವ್‌ಶೇತೆ ಜಗ್‌ಮ ಜಿವ್‌ಶೇತೆ ತಯೇಡ ಪರ್ಖ್ವಾ ವ್ಯಹಾ ಕರ್ತೆ ಕೊಯ್ಲಿ, ವ್ಯಹಾ ಕರಿಲಿಶೆಬಿ ಕೊಯ್ಲಿ!

36 ಇವ್ಣೆ ಅಜು ಪಾಲ್ಟು ಮರ್‌ಶೆಸ್‌ಕೊಂತೆ, ದೇವ್‌ನು ದೂತರ್‌ನಿ ಘೋಣಿ ರೈಶೆ. ಪಾಲ್ಟು ಜಿವ್ತುಹುಯಿನ್ ಉರೈತೆ ಇನಖ್ವಾಜೆ, ಇವ್ಣೆ ದೇವ್‌ನ ಲಡ್ಕಾ ಹುಯಿರೈಶೆ.

37 ಮರವಾಳು ಜಿವ್ತುಹುಯಿನ್, ಉಟ್‌ಶೇತೆ ಇನಿ ಬಾರೇಮ ಮೋಶೇನೆ ಅಲ್ಫಿನಿತರ ವತಾಳಿರಾಖ್ಯೊಸ್. ಬಳುಕರಾತೆ ಆಗ್‌ನಿ ಡಾಗ್‌ನಿ ಬಾರೇಮ ಲೀಖಾನಿ ವಖ್ವತ್‌ಮ, ಪ್ರಭುನೆ, ‘ಅಬ್ರಹಾಮ್‌ನೊ ದೇವ್, ಇಸಾಕನೊ ದೇವ್, ಯಾಕೋಬನೊ ದೇವ್’ ಕರಿ ಬೋಲಿರಾಖ್ಯೊಸ್.

38 ಯೋ ಜಿವ್‌ತಾನೊ ದೇವ್ ಹುಯಿರೋಸ್, ಪಣ್ಣಿ ಮರೈಹುಯಾನೊ ಕಾಹೆ, ಶನಕತೊ ಇನ ಡೋಳಾಮ ಇವ್ಣೆ ಖ್ವಾರು ಜಿವ್ತುಸ್ ಲ್ಹಾ.

39 ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯೆನು ಧೋಡು ಜಣು, “ಗುರು! ತು ಅಟ್ಟು ಜವಾಬ್‌ದಿದೊ” ಕರಿ ಬೋಲ್ಯು.

40 ಅನೇಥಿ ಇವ್ವೆ ಬಿಜು ಶಾಸ್ತ್ರಿಯೇಸುನ ಪುಲ್ಲಾವಾನ ಡರ್ಯ್.

ಕ್ರಿಸ್ತನಿ ಬಾರೇಮ ಪುಲ್ಲಾಯೊತೆ

(ಮತ್ತಾಯ 22:41-46; ಮಾರ್ಕ 12:35-37)

41 ತದೆ ಯೇಸುನೆ ಇವ್ವುನ, “ಕ್ರಿಸ್ತ ದಾವೀದ್‌ನೊ ಛಿಯ್ಯೊ ಕರಿ ಅದ್ಮಿಖ್ತಾರು ಬೋಲಾಸ್ಸಿ ಯೋ ಕಿಮ್ ಉಶೆ?

42-43 ‘ಮೇ ತಾರ ವಹೇರರ್ಯನ ತಾರ ಗೋಡಾನೊ ರಚ್ಚೊ

ಬಣಾವಲಗು

ಮಾರಿ ಖಾವಿಬಾಜು ಬೆರೋರೆ’ ಕರಿ

ಪ್ರಭುನೆ, ಮಾರ ಮಾಲಿಕ್‌ನ ಬೋಲ್ಯೊ ಕರಿ ದಾವೀದ್‌ನೇಸ್ ಕೀರ್ತನೇನ ಪುಸ್ತಕ್‌ಮ ಲೀಖಿರಾಖ್ತೊಸ್.

44 ದಾವೀದ್‌ ಇನ ‘ಪ್ರಭು’ ಕರಿ ಬೋಲಿರಾವಪರ್, ಕ್ರಿಸ್ತ ದಾವೀದ್‌ನೊ ಛಿಯ್ಯೊ ಕಿಮ್ ಉಶೆ? ಕರಿ ಬೋಲ್ಯೊ.

ಯೇಸುನೆ ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳ ಶಾಸ್ತ್ರಿಯೇನ ರ್ಪೇತಾಯೊತೆ

(ಮತ್ತಾಯ 23:1-36; ಮಾರ್ಕ 12:38-40)

45 ಅದ್ಮಿಖ್ತಾರು ಇನಿ ವಾತೆ ಖ್ವಮ್‌ಜುಕರಾನಿ ವಖ್ವಾಮ, ಯೇಸುನೆ ಇನ ಶಿಷ್ಯರ್,

46 ಮೋಶೇನು ವಚನ್ ಶಿಕಾಡವಾಳು ಶಾಸ್ತ್ರಿಯೇನಿ ಬಾರೇಮ ಹೊಷಾರ್‌ಥಿ ರ್ಲವೊ. ಲಾಂಬೊ ಝಗ್ಲೊ ಪೇರ್ಟ್‌ಲೀನ್ ಹೈಕಡ್ ಹೀಕಡ್ ಫರಾವಾಳು, ದುಕಾನೇನಿ ಗಲ್ಲಿಮ ಅದ್ಮಿಖ್ತಾರು ಇವ್ವ ಖ್ವರಾವ್ಣಿ ಕರ್ಯ್ ಕರಿ ಅಜು ಸಭೆ ಭರಾವನು ಮಂದಿರಮ ಪಹಿಲಿ ಝಗೋಪರ್ ಅಜು ಮಿರ್ಪ್‌ವಾನೇನಿ ಝಗೋಮ ಅಲ್ಪಿ ಝಗೋಪರ್ ಬೇಖ್ತೊಣು ಕರಿ ಖಲಿ ಅಮ್ಮಿಸ್ ಅಖ್ವಕರಾವಾಳು ಹುಯಿರರ್ಯ್.

47 ಅವ್ವೆ ಮುಂಡಚ್ಚಿ ತಯೇಡಾವ್‌ನ ಘರ್‌ನ ಲೂಟಿನ್, ವತಾಳಿಲ್ಯಾವನಖ್ವಾಜೆ ದೇವ್‌ನ ಲಾಂಬಿ ಪ್ರಾರ್ಥನೆ ಕರಾಸ್. ಅಥಾವ್‌ನ ಘಣಿ ನಿಶತ್ ಮಳಾಶೆ!” ಕರಿ ಬೋಲ್ಯೊ.

21

ಮುಂಡಚ್ಚಿನಿ ಕಾಣ್ಣೆ
(ಮಾರ್ಕ 12:41-44)

1 ಯೇಸುನೆ ಮುಡ್‌ಕ್ಯ ಪಾಡೀನ್, ಶೌಕರ್ ಅದ್ಮಿಖ್ವಾರು ಮಂದಿರ್‌ನಿ ಹುಂಡಿಮ ಕಾಣ್ಣೆ ನಾಖುಕರಾತೆ ಇನ ದೇಖ್ಣೊ.

2 ಅಜು ಏಕ್ ಗರೀಬ್ ಮುಂಡಚ್ಚಿ ತಯೇಡ ಐನ್, ಬೇ ನ್ಹಾನು ತಾಂಬಾನು ಕಾಖ್ತನಾಖಿತೆ ಇನಾಬಿ ಇನೆ ದೇಖ್ಣೊ.

3 “ಮೇ ತುಮೂನ ಖ್ವಾಚ ಬೋಲುಸ್ಕಿ, ಆ ಗರೀಬ್ ಮುಂಡಚ್ಚಿ ತಯೇಡಾನೆ ಬಿಭಾಖ್ವಾರೇಧಿ ಭಾಖ್ತುತ್ ನಾಖಿರಾಖಿಸ್.

4 ಕಿಮ್‌ಕತೊ, ಬಿಭಾಖ್ವಾರ ಅದ್ಮಿನೆಇವ್ವುನ ಬಶ್‌ಹುಯಿನ್ ಉಭರ್‌ತ್ಯತೆ ಇನಾಮಾಥು ಕಾಣ್ಣಿನ ದಿದು; ಕತೋಬಿ ಆ ಎತ್ರೈ ಗರೀಬ್ ರಡ್ಡೀನ್‌ಬಿ, ಇನಾಕನ ಥೂತೆ ಜಿವ್ವನ ನಾಖಿದಿದಿ” ಕರಿ ಬೋಲ್ಯೊ.

ಯೇಸುನೆ ಮಂದಿರ್‌ನಿ ಬರ್ಬಾತ್‌ನಿ ಬಾರೇಮ ಬೋಲ್ಯೊತೆ
(ಮತ್ತಾಯ 24:1-2; ಮಾರ್ಕ 13:1-2)

5 ಶಿಷ್ಯರಾಮ ಥೋಡು ಜಣು ಮಂದಿರ್‌ನಿ ಬಾರೇಮ, ಆ ಕೆತ್ರೈ ಖ್ವಾಜ್‌ನ ಬಂಡಾವಾಧಿ ಅಜು ದೇವ್‌ನ ಕಾಣ್‌ಕೆ ದಿದೂತೆ ರಾಲ್ವವಾಧಿ ಕೆತ್ರೈಕ್ ಅಲ್ವು ದೆಖಿವ್‌ಕರಾಸ್” ಕರಿ ಬೋಲಿಲಿದು.

6 ತದೆ ಯೇಸುನೆ ಇವ್ವುನ, “ತುಮೆ ಆ ಖ್ವಾರು ದೇಖುಕರಾಸ್‌ನಿ, ಏಕ್ ದನ್ ಆವಾಶೆ, ಯೋ ದನ್ಮ ಹಜ್ಜಾ ಏಕ್ ಬಂಡಾಪರ್ ಬಿಜ್ಜೆಕ್ ಬಂಡೊ ಭೀರಿಶೆ ಕೊಯ್ವಿ; ಅಖ್ವಾಸ್ಸ ರಡ್‌ಕೈನಾಖಿದಿಶೆ” ಕರಿ ಬೋಲ್ಯೊ.

ವದೇಖ್ಣೊ ಅಜು ಖ್ವತಾಪ್ಪಿ
(ಮತ್ತಾಯ 24:3-14; ಮಾರ್ಕ 13:3-13)

7 ಇವ್ವೆ ಯೇಸುನ, “ಗುರು, ಆ ಖ್ವಾರು ಕದೆ ಉಶೆ? ಆ ಖ್ವಾರು ಚಾಲಾನಿವಖ್ವೆತಿ ಖಿವಿ ಖ್ವಣೇದ್ ಉಶೆ? ಕರಿ ಬೋಲಖ್ವತರ್,

8 ಯೇಸುನೆ ಇವ್ವುನ, “ಜತನ್‌ಥಿ ರ್ವೊ! ತುಮೂನ ಕೋಣ್‌ಬಿ ರಗಾವ್ವುನಾತಿ ಇಮ್ ದೇಖಿಲೇವೊ. ಶನಕತೊ, ಕೈಯೆಕ್ಕಿ ಜಣು ಐನ್, ಮಾರು ನಾಮ್‌ಲೀನ್, ‘ಮೇಸ್ ಕ್ರಿಸ್ತ, ಮೇಸ್ ಕ್ರಿಸ್ತ’ ಕರಿ ಅಜ್ಜು ಯೋ ವಖ್ವತ್ ಐಗೈ ಕರಿ ಬೊಲೆಶೆ. ಕತೋಬಿ ಇವ್ವ ಪೀಲೆ ನಕೊಞಾಶು.

9 ಅತ್ರೇಸ್ ಕಾಹೆತಿ ಜಂಗ್ ಭೀಡುಕರಾತಿ ಅಜ್ಜು ಕಲ್ವಾಗಟ್ ಪಡುಕರಾತಿ ಇನಿ ಬಾರೇಮ ತುಮೆ ಖ್ವಮ್‌ಜ್ಯಾತೊ, ಡರ್‌ಶು ನಕೊ; ಪಹಿಲೆ ಆ ಖ್ವಾರು ಚಾಲಾನು ಜರೂರತ್ ಲ್ಲಾ. ತೋಬಿ ತದ್‌ನು-ತದ್ವೇಸ್ ಅಂತ್ ಕೋ ಆವ್‌ಶೇನಿ” ಕರಿ ಬೋಲ್ಯೊ.

10 ಅಜ್ಜೂಬಿ ಯೇಸುನೆ ಇವ್ವುನ ಬೋಲ್ಯೊಕಿ, “ದೇಖ್ವೆನ್ ವಿರೋದ್ ದೇಖ್ವೆ ರಾಜ್ಯನ ವಿರೋದ್ ರಾಜ್ಯ ಉಟ್‌ಶೆ.

11 ಜಮೀನ್ ಹಲೆಶೆ, ಹರೇಕ್ ಬಾಜುಮ ಕಾಳ್ತುಕಾಳ್‌ಬಿ ಅಜ್ಜು ಪಿಳಾಕ್‌ನೊ ರೋಗ್ ಖ್ವಾರು ಆವ್‌ಶೆ; ಆಬ್‌ಮ ಘಣು ಖ್ವಣೇದ್ ಆಬ್‌ಮ ಮಾಲುಮ್‌ಪಡ್‌ಶೆ.

12 ಕತೋಬಿ ಆ ಖ್ವಾರು ಚಾಲಾನ ಅಗಾಡಿ, ಇವ್ವೆ ತುಮೂನ ಧರೀನ್, ಖ್ವತಾವ್‌ಶೆ; ತುಮೂನ ಸಬೆ ಭರಾವನು ಮಂದಿರ್‌ಮ ಜೇಲ್‌ನ ಅದಿಕಾರಿನ ದೀನ್ ಮಾರ ನಾಮ್‌ಖ್ವಾಜೆ, ರಾಜ್ಞಾವ್‌ನ ಖ್ವಾಮ್ವೆ ಅಜ್ಜು ರಾಜ್‌ಭಾರ್ ಚಲಾವವಾಳಾನ ಖ್ವಾಮ್ವೆ ತುಮೂನ ಭೀರಾಕ್‌ಶೆ.

13 ಅನೇಥಿ ಸಾಕ್ಷಿ ಬೋಲಾನ ತುಮೂನ ನಿರ್ದಾಳು ಉಶೆ.

14 ಯೋ ವಖ್ವತ್‌ಮ, ತುಮೆ ಶಾತ್ ಜವಾಬ್ ದೇವ್ವುಕರಿ ಬೋಲಾನಿ ಬಾರೇಮ, ಪಹಿಲೆಸ್ ಕೊ ಸೊಞ್‌ಶೂನಿ ಕರಿ ತುಮಾರು ದಿಲ್ ಘಟ್ ಕರಿಲೆವೊ.

15 ಶನಕತೊ ತುಮಾರು ದುಶ್‌ಮನ್ ಖ್ವಾರು, ತುಮಾರ ವಿರೋದ್ ಭೀರವಾನ ಅಜ್ಜು ವಾತಿ ಫರೈನ್ ಬೋಲಾನ ಕೋ ಹುವ್ವಾನಿತಿ ಇಮ್ಮಿ ವಾತಿ, ಅಜ್ಜು ಗ್ಯಾನ್ನ ಮೇ ತುಮೂನ ದಿಶ್.

16 ತುಮಾರ ಆಯ-ಬಾ, ಬೈಯೇ ಮಾಯ-ಮಾತ್ರ ಅಜ್ಜು ದೋಸ್ತಸ್ ತುಮೂನ ಧರಿನ್ ದಿಶೆ. ಅಜ್ಜು ತುಮಾರಾಮ ಧೋಡು ಜಣಾನ

ಮರ್ನಾಖಿದಿಶೆ.

17 ಅತ್ರೇಸ್ ಕಾಹೆತೆ ಮಾರನಾಮ್ಖಾಜೆ ಹರೇಕ್ ಜಣು ತುಮೂನ ದಾವೊ ಕರ್ತೆ.

18 ತೋಬಿ, ತುಮಾರೊ ಮುಡ್‌ಕ್ಯಾನೊ ಏಕ್ ಕೇಖ್ವೊಬಿ ಲುಕ್‌ಶಾನ್ ಕೋ ಉಶೇನಿ.

19 ತುಮೆ ಖ್ವಮಾಳಿನ್ ಭೀರ್ಯಾತೊ, ತುಮಾರೊ ಜಾನ್ನ್ ತುಮೆ ಬಙ್ಫಾಡಿಲಿಶು.

ಯೇಸುನೆ ಯೆರೂಸಲೇಮ್‌ನಿ ಬರ್ಬಾತ್‌ನಿ ಬಾರೇಮ ಬೋಲ್ಯೊತೆ
(ಮತ್ತಾಯ 24:15-21; ಮಾರ್ಕ 13:14-19)

20 “ದಂಡ್-ದಳವಾಯಿಖ್ವಾರು ಯೆರೂಸಲೇಮ್ ಖ್ವಯೇರ್ನ್ ಘೇರಿಲಿದುತೆ ತುಮೆ ದೇಖ್ಯಾತೊ, ಯೋ ಒಗ್ಗಿಸ್‌ಮ ಬರ್ಬಾತ್ ಹುವಾನು ಹಗಾಮ್ ಖನ್ನೆಆಯಿಗುಕರಿ ತುಮೆ ಮಾಲುಮ್ ಕರಿಲಿಶು.

21 ತದೆ ಯೂದಾಯಮ ರ್ಹವಾಳು ಪಹಾಡ್‌ಕನ ಮಿಲ್ಯೆನ್ ಜಾವಾದೆ; ಯೋ ಖ್ವಯೇರ್‌ಮ ರ್ಹವಾಳು ಇನ ಮೈಂದಿನ್ ಚಲ್ಯುಜಾಣು ಅಜ್ಜು ಗಾಮ್ ರ್ಹವಾಳು, ಯೋ ಖ್ವಯೇರ್‌ಮಹಿ ನಕೊಜಾವಾದೆ.

22 ಶನಕತೊ ಲೀಖೈರ್ದೊತೆ* ಖ್ವಾರು ಚಾಲಾನಖ್ವಾಜೆ, ಯೋ ದನ್ ಖ್ವಾರು ನಿಶತ್‌ನೊ ದನ್ ಹುಯಿರ್ದೊತೆ.

23 ಯೋ ದನ್ಯ ಬೇಜೂನಿ ತಯೇಡ ಅಜ್ಜು ದೂದ್ ಪಿಡಾವವಾಳಿ ತಯೇಡಾನಿ ಹಾಲ್ನ ಶಾತ್ ಬೋಲು! ಆ ತಬರ್‌ಖಾಪರ್ ಘಣಿ ಮೋಟಿ ವದೇಖ್ವೊಆವ್‌ಶೆ ಅಜ್ಜು ದೇವ್ನೊ ಇರಾದೊ ಆ ಅದ್ಮಿಖ್ವಾರಾಪರ್ ಆವ್‌ಶೆ.

24 ಅವ್ವಾಪ್ ಧೋಡ ಜಣಾನ ತಲ್ವಾರ್‌ಥಿ ಮಾರಿನಾಕ್‌ಶೆ, ಅಜ್ಜು ಬಿಜಾವ್ ಪರೈ ದೇಖ್ವೊವಾಳು ಖ್ವಾರು ಧರೀನ್ ಲೀಜಾಶೆ. ಪರೈ ದೇಖ್ವೊವಾಳನು ದನ್‌ಖ್ವಾರು ಪೂರ ಹುವ್ವಾತೋಡಿ, ಯೆರೂಸಲೇಮ್ ಇವ್ವೇಥಿ ಮುಂದ್ಲಾವ್ತುಪಂಡ್‌ಷೆ.

ಅದ್ಮಿನೊ ಛಿಯೊ ಆವ್‌ಶೇತೆ ಬಾರೇಮ
(ಮತ್ತಾಯ 24:29-31; ಮಾರ್ಕ 13:24-27)

* 21:22 21:22 ವಿಮೋಚನ ಕಾಂಡ 21:22: ಹೋಶಿಯ 9.7

25 ಭಾಂದ್, ಚಂದರ್‌ಮೊ ಅಜ್ಜು ಶುಕ್ಕರ್‌ಮ ಖ್ವಾರ್ಡು ಖ್ವಣೇದ್‌ನು ಕಾಮ್ ಮಾಲುಮ್ ಪಡ್‌ಶೆ. ಜಮೀನ್‌ಪರ್ ದರ್‌ವಾನ್‌ನೊ ಅಜ್ಜು ರೋಕಾಳ್‌ನು ಅವಾಜ್‌ಥಿ ಅದ್ಮಿಖ್ವಾರ್ಡು ಘಬ್‌ರೈಜಾಶೆ.

26 ಆಬ್‌ನಿ ಶಕತ್ ಖ್ವಾರಿ ಹಲ್‌ಶೆತೆ ಇನಾಖ್ವಾಜೆ, ಅದ್ಮಿಖ್ವಾರ್ಡು ಡರ್‌ಥಿ, 'ಆ ಜಗತ್ ಶಾತ್ ಹುವಾನ ಆಯು!' ಕರಿ ಬೋಲಿನ್ ಘಬ್‌ರೈಜಾಶೆ.

27 ತದೆ ಅದ್ಮಿನೊ ಥಿಯೊ ಘಣಿ ಶಕತ್‌ಥೀಬಿ, ಮಹಾನ್ ಮಹಿಮೆಥೀಬಿ, ವಾದ್ಯಪರ್ ಆವ್‌ಶೇತೆ ಇವ್ಣೆ ದೇಕ್‌ಶೆ.

28 ಆ ಖ್ವಾರ್ಡು ಚಾಲಾನಿ ವಖ್ವತ್‌ಮ, ಉರಿ ಭೀರ್‌ವೊ, ಅಜ್ಜು ಮುಡ್‌ಹ್ಯ ಪಾಡನ್ ಉಪ್ಪರ್‌ದೇಖೊ, ಶನಕತೊ ತುಮಾರಿ ಛುಟ್ಕಾರ್ ಖನ್ನೆಸ್ ಅಯಿರ್‌ಕ್ಷಿಸ್!" ಕರಿ ಬೋಲ್ಯೊ.

ಅಂಜೀರ್‌ನು ಝಾಡಾನಿ ಬಾರೇಮಾನು ಪಾಟ
(ಮತ್ತಾಯ 24:32-35; ಮಾರ್ಕ 13:28-31)

29 ಅನ ಬಾದ್‌ಮ ಯೇಸುನೆ ಇವ್ಣುನ ಏಕ್ ಮತ್‌ಲಬ್ ಖೇಣಿನ ಬೋಲ್ಯೊ ಯೋ ಶಾತ್‌ಕತೊ, "ಅಂಜೀರ್‌ನ ಝಾಡ್‌ಣ ಅಜ್ಜು ಬಿಜ್ಞ ಝಾಡಾವ್‌ನಾಬಿ ದೇಖೊ.

30 ಯೋ ಚಿಗುರ್‌ತಾಸ್‌ನ ತುಮೆ, ತಡ್ಕಾನ ಹಗಾಮ್ ಖನ್ನೆ ಐಗು ಕರಿ ತುಮಾರು ತುಮೇಸ್ ಮಾಲುಮ್ ಕರಿಲೇವೊಸ್ಸಿ.

31 ಇಮ್ಯಸ್, ತುಮೆ ಆ ಖ್ವಾರ್ಡು ಹುವಾನು ದೇಖಾನಿ ವಖ್ವತ್‌ಮ, ದೇವ್ನಿ ರಾಜ್ಯ ಖನ್ನೆ ಐಗು ಕರಿ ಮಾಲುಮ್ ಕರಿಲೇವೊ.

32 ಮೇ ತುಮೂನ ಖ್ವಾಚಮಾಬಿ ಬೋಲುಸ್ಸಿ, ಆ ಹಗಾಮ್ನು ಅದ್ಮಿಖ್ವಾರ್ಡು ಬಚಿರ್‌ವಾನಿ ವಖ್ವತ್‌ಮಾಸ್, ಆ ಖ್ವಾರ್ಡು ಉಶೆ!

33 ಆಬ್ ಧರ್ತಿ ಮಟಿಜಾಶೆ, ಕತೋಬಿ ಮಾರಿ ವಾತಿಖ್ವಾರ್ಡು ಮಟ್‌ಶೆಸ್ ಕೊಯ್ನಿ.

ಹೊಷಾರ್ ರ್‌ವಾನಿ ಬಾರೇಮ

34 "ತುಮಾರಿ ಬಾರೇಮ ಜತನ್‌ಥಿ ರ್‌ವೊ! ಜಾಖ್ವತ್ ಖಾವಾಣ್‌ಪಿವಾಣ್ಣಿ ಅಹಂಕಾರ್‌ಥೀಬಿ ಕಯೇಪ್‌ಥೀಬಿ ಜಗತ್ನಿ ಸೋಚ್‌ಥೀಬಿ ತುಮಾರು ಮನ್ ವಜನ್‌ಹುಯಿಗಯು.

35 ಆ ದನ್ ತುಮಾರಲುಪ್ಪರ್ ಫಾಖ್ತಾನಿ ಮತ್ ಆವ್‌ಶೆ. ಯೋ ಜುಮೀನ್‌ಪರ್ ಛಾತೆ ಹರೇಕ್‌ಪರ್ ಆವ್‌ಶೆ.

36 ಇನಖ್ವಾಜೀಸ್, ಖ್ವಾರಿಸ್ ವಖ್ತಮ ತೈಯಾರ್ ರ್ವವೊ, ಚಾಲ್‌ಶೇತೆ ಆ ಖ್ವಾರಾಮ ಬಚಿನ್, ಅದ್ಮಿನೊ ಛಿಯ್ಯಾನ ಖ್ವಾಮ್ಚೆ ಭೀರ್‌ವನ ತುಮೆ ಶಕತ್‌ವಾಳ ಹುವಾನಟೇಕೆ, ಖ್ವಾರಿಸ್ ವಖ್ತಮ ದೇವ್ ಪ್ರಾರ್ಥನೆ ಕರ್ತಾಹುಯಿನ್ ಜತನ್‌ಧಿ ರ್ವವೊ” ಕರಿ ಬೋಲ್ಯೊ.

37 ಯೇಸು ದನ್ನು ಮಂದಿರ್‌ಮ ವಚನ್ ಬೋಲಿದೇತೋಥೊ ಅಜು ಖ್ವಾಂಚ್‌ನು ಆಲಿವ್‌ನು ಪಹಾಡ್‌ಕನ ಜೈನ್ ರಾತ್ ಅಖ್ವು ಹಿಜ್ಜಾಸ್ ರ್ವತೊಥೊ.

38 ಅದ್ಮಿಖ್ವಾರ್ಡು ಇನಿ ವಚನ್ನ್ ಖ್ವಮ್‌ಜಾನ ಟೇಕೆ, ದನ್‌ರೋಚ್ ಅಧಿರ್ದೇಣಿಸ್ ಉರೀನ್, ಮಂದಿರ್‌ಮ ಇನಾಕನ ಆವ್‌ತೂಡು.

22

ಯೇಸುನಿ ವಿರೋದ್ ಮಶ್ತ ಭಂದಾಯುತೆ

(ಮತ್ತಾಯ 26:1-5; ಮಾರ್ಕ 14:1-2; ಯೋಹಾನ 11:45-53)

1 ಖಾಟುಕೊಂತೆ ರೋಟಾನಿ ಪೂಜಾ, ಕತೊ ಪಸ್ ಪೂಜಾನೊ ದನ್ ಖನ್ನೆ ಐಗೋಥೊ.

2 ಮಹಾಯಾಜಕ, ಅಜು ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿಯೆ ಯೇಸುನ ಮರಾವ್ಣು ಕರಿ ಸೋಚಿನ್, ಅದ್ಮಿನ ಡರ್‌ಧಿ ಬರಾಬರ್‌ನಿ ವಖ್ತನಖ್ವಾಜೆ ಭಪಿರ್‌ಲ್ಲ್ಯಾಡು.

ಯೂದನೆ ಯೇಸುನ ಧೋಕೇಡಿ ಧರಿದ್ಯವಾನ ಮಾನಿಗಯೋತೆ

(ಮತ್ತಾಯ 26:14-16; ಮಾರ್ಕ 14:10-11)

3 ತದೆ ಶೈತಾನ್ ಭಾರ ಜಣ ಶಿಷ್ಯರ್ಮ ಏಕ್ ಜಣೊ ಹುಯಿರ್ದೊತೆ, ಇಸ್ಕರಿಯೋತ ಯೂದಮ ಪೇಶಿಗಯೊ.

4 ತದೆ ಯೂದಾನೆ, ಮಹಾಯಾಜಕ ಅಜು ಮಂದಿರ್‌ನ ವಖ್ತಿ ಕರವಾಳಾವ್‌ಕನ ಜೈನ್, ಯೋ ಯೇಸುನ ಧೋಕೇಡಿ ಧರಿದ್ಯವಾನಿ ಬಾರೇಮ ಇವ್ಣ ಜೋಡೆ ವಾತೆ ಬೋಲ್ಯೊ.

5 ತದೆ ಇವ್ವೆ ಖ್ವಶಿಖೈನ್, “ತುನ ಪೈಶಾ ದಿಯೈಸ್” ಕರಿ ವಾತೆದಿದು.

6 ಇನೆ ಮಾನಿಜೈನ್, ಅದ್ವಿನಿ ಗಲಾಟ್‌ಕೊಂತೆ ವೇಳ್ತ ಯೇಸುನ ಇವ್ವುನ ಧರಿದೇಣುಕರಿ, ಬರೋಬರ್‌ನಿ ವಖ್ವತ್‌ನಖ್ವಾಜೆ ಭಪೀನ್ ದೇಮಿಕರ್ತೊಥೊ.

ಪಸ್ಕಾನು ಖಾಣು ಖಾವಾನಟೀಕೆ ಯೇಸು ತೈಯಾರ್ ಹುಯೋತೆ
(ಮತ್ತಾಯ 26:17-25; ಮಾರ್ಕ 14:12-21; ಯೋಹಾನ 13:21-30)

7 ಖಾಟುಕೊಂತೆ ರೋಟಾನು ಪೂಜಾನೊ ದನ್ ಆಯು. ಯೋ ದನ್‌ಮ ಯೆಹೂದ್ಯರ್ ಅದ್ವಿಖ್ವಾರು ಪಸ್ಕನ ಖಾಣನಖ್ವಾಜೆ ಮೇಂಥು ರೇಖ್ತೊತೊಥು.

8 ಯೇಸುನೆ ಪೇತ್ರ ಅಜ್ಜು ಯೋಹಾನ್ನ್, “ತುಮೆ ಜೈನ್, ಅಪ್ಪಖ್ವಾಜೆ ಪಸ್ಕಾನು ಖಾಣನ ಖ್ವವಾರೊ” ಕರಿ ಬೋಲ್ಯೊ.

9 ಇವ್ವೆ ಇನ, “ಹಮೆ ಕಿಜ್ಲಾ ಜೈನ್, ಖ್ವವಾರ್‌ನು” ಕರಿ ಪುಲ್ಲಾಯ?

10 ತದೆ ಯೇಸುನೆ ಇವ್ವುನ, “ಹಂದೇಖೊ, ತುಮೆ ಖ್ವಯೇರ್ನ್ ಮಹಿ ಜಾತಸ್‌ನ, ಏಕ್ ಅದ್ವಿ ಪಾಣಿನೊ ಘಡೊ ಪಳ್ಳಿನ್, ತುಮಾರ ಖ್ವಾಮ್ಲೆ ಆವಾಶೇತೆ ದೇಕ್‌ಶು. ಇನ ಪೀರೇಸ್ ಜೈನ್, ಯೋ ಜಾಶೇತೆ ಘರ್‌ಮ ಜಾವೊ.

11 ಅಜ್ಜು ಯೋ ಘರ್‌ನ ಯಜಮಾನ್ನ್, “ಹಮಾರೊ ಗುರು, ಇನ ಶಿಷ್ಯರ್‌ನ ಜೋಡೆ ಪಸ್ಕಾನು ಖಾಣು ಖಾವಾನಖ್ವಾಜೆ, ಕೋಣೊ ಕಿಜ್ಲಾ ಲ್ಲಾ, ಕರಿ ತುನ ಪುಲ್ಲಾಯೊ ಕರಿ ಬೋಲೊ.

12 ಯೊ ತುಮುನ ಖ್ವಾರೂಸ್ ಕುಡ್‌ಶಿ ಪಲಂಗ್‌ಥಿ ಖ್ವವಾರೈರ್‌ಶೇತೆ, ಲ್ಲತ್‌ನ ಉಪ್ಪರ್‌ಲ್ಯೊ ಮೋಟ ಕೋಣಾನ ವತಾಳಾಶೆ, ಹಿಜ್ಲಾ ಖಾಣನ ಖ್ವವಾರೊ” ಕರಿ ಬೋಲಿನ್ ಮೋಕ್‌ಲ್ಯೊ.

13 ಇವ್ವೆ ಜೈನ್, ಯೇಸುನೆ ಇವ್ವುನ ಬೋಲ್ಯೊತೆ ಇಮ್ಮಸ್ ಥೂತೆ ದೇಖಿನ್, ಪಸ್ಕಾನು ಖಾಣನ ತೈಯಾರ್ ಕರ್ಯ್.

ಪ್ರಭುನು ಭೋಜನ್
(ಮತ್ತಾಯ 26:26-30; ಮಾರ್ಕ 14:22-26; 1 ಕೊರಿಂಥ
11:23-25)

14 ವಖ್ತ್ ಆವಾದಿನ್, ಯೇಸು ಇನ ಭಾರ ಅಪೊಸ್ತಲರ್ನ್ ಜೋಡೆ
ಖಾಣನ ಬೇಶಿಗಯೊ.

15 ತದೆ ಯೇಸುನೆ ಇವ್ವುನ, “ಮೇ ಖ್ತಾಪ್ಪಿ ಖಾವಾನ ಅಗಾಡಿ,
ತುಮಾರ ಜೋಡೆ ಆ ಪಸ್ಕಾನು ಖಾಣು ಖಾಣುಕರಿ ಘಣು ಆಖ್ತ್
ಕರ್ಯೊಡೊ.

16 ಮೇ ತುಮೂನ ಬೋಲುಸ್ಕಿ, ದೇವ್ನಿ ರಾಜ್ಯಮ ಅನಿ ಖ್ತಾಪಿ
ಮತ್‌ಲಬ್ ಪೂರ ಹುವ್ವಾತೋಡಿ, ಮೇ ಪಸ್ಕಾನು ಖಾಣನ ಪಾಟ್ರು
ಖೈಶಸ್ ಕೊಯ್ನಿ” ಕರಿ ಬೋಲ್ಯೊ.

17 ಅನ ಬಾದ್‌ಮ ಯೇಸುನೆ, ದ್ರಾಕ್ಷಿನು ರಖ್ಣಿ ಕಟೋರಿನ
ಪಾಡೀನ್, ದೇವ್ನಿ ಧನ್ಯವಾದ್‌ಕರೀನ್, ಅಲ್ಲೇವೊ, ಅನ ತುಮಾರಾಮ
ವಾಟ ಪಾಡಿಲೆವೊ.

18 ಹಂಕೇಥು ಧರೀನ್ ದೇವ್ನಿ ರಾಜ್ಯ ಆವಾತೋಡಿ, ಮೇ ಫಾಟ್ರು ಆ
ದ್ರಾಕ್ಷಿನು ರಖ್ಣಿ ಪೀಶಸ್ ಕೊಯ್ನಿ ಕರಿ ತುಮುನ ಬೋಲುಸ್” ಕರಿ
ಬೋಲ್ಯೊ.

19 ಇನ ಬಾದ್‌ಮ ಯೇಸುನೆ ರೋಟಾನ ಪಾಡೀನ್,
ದೇವ್ನಿ ಧನ್ಯವಾದ್ ಕರೀನ್, ಇನ ತೋಡೀನ್, ಇವ್ವುನ ದೀನ್,
“ಆ ತುಮಾರಖ್ತಾಪಿ ದೆವೈರ್ಯೊತೆ ಮಾರಿ ಶರೀರ್, ಮನ
ಯಾದ್‌ಕರಾನಖ್ತಾಪಿ ಅಮ್‌ಕರೊ” ಕರಿ ಬೋಲ್ಯೊ.

20 ಇಮ್ಮಸ್ ಖಾಣನ ಬಾದ್‌ಮ, ಯೇಸುನೆ ಕಟೋರಿನ ಪಾಡೀನ್,
“ಆ ಕಟೋರಿ ತುಮಾರಖ್ತಾಪಿ ರಂಭಾವನು ಮಾರು ಲ್ಹೋಯಿಥಿ
ಬಣೈರ್ಯೊತೆ. ನವಿ ಒಪ್ಪಂದ ಹುಯಿರ್ಯೊಸ್, ಅನ ಮಾರ ಲ್ಹೋಯಿಥಿ
ಮುದ್ರೊ ಮರೈರ್ಯೊಸ್.

21 “ತೋಬಿ, ಹಂದೇಖೊ! ಮನ ಧೋಕೇಥಿ ಧರಿದ್ಯವಾಳೊ ಮಾರ
ಜೋಡೆಸ್ ಖಾಣು ಖವ್‌ಕರಾಸ್.

22 ದೇವ್ವೆ ಸೋಚ್ಚೊತೆ ಇಮ್ಮಸ್, ಅದ್ವಿನೊ ಛಿಯ್ಚೊ ಮರ್ಶೆ; ಕತೋಬಿ ಇನ ಧರಿದ್ಯವಾಳ ಅದ್ವಿನಿ ಹಾಲ್ವ ಶಾತ್ ಬೋಲು!

23 ಅನ ಖ್ವಮ್‌ಜಿನ್ ಇವ್ಚೆ, “ಇನ ಧೋಕೇಥಿ ಧರಾವಾಳೊ ಅಪ್ಪಾಮ ಕೋಣ್ ಉಶೆ?” ಕರಿ ಇವ್ಚ-ಇವ್ಚಾಸ್‌ಮ ಬೋಲಿಲಿದು.

ಕೋಣ್ ಮೋಟು ಕರಿ ಬೋಲಾನಿ ಬಾರೇಮ ವಾತೆಚೀತೆ

24 ಅತ್ರೇಸ್ ಕಾಹೆತೆ, ಖ್ವಾರೇಥಿ ಮಹಾನ್ ಕೋಣ್? ಕರಿ ಬೋಲೈಲಿಶೆ, ಕರಿ ಶಿಷ್ಯರ್ ಇವ್ಚ-ಇವ್ಚಾಸ್‌ಮ ವಾತೆಚೀತೆ ಕರಾಲಗ್ಚು.

25 ತದೆ ಯೇಸುನೆ ಇವ್ಚುನ, “ಯೆಹೂದ್ಯರ್‌ಕಾಹೆತೆ ರಾಜ್‌ಖ್ವಾರು, ಇವ್ಚ-ಇವ್ಚ ಅದ್ವಿಪರ್ ರಾಜ್‌ಭಾರ್ ಚಲಾವಸ್, ಅಜ್ಞು ಇವ್ಚಾಪರ್ ಅದಿಕಾರ್ ಚಲಾವವಾಳು, ‘ಅದ್ವಿಯೇವ್‌ನು ದೋಸ್ತ’ ಕರಿ ಬೋಲೈಲೇಸ್.

26 ಕತೋಬಿ ತುಮಾರಮ ಇಮ್ ನಾರ್ಡ್ವೆವ್ಚು, ತುಮಾರಮ ಮಹಾನ್ ಕರಿ ರ್ಡ್ವೆಸ್ತೆ ಇವ್ಚೆ ನ್ಹಾನಾವ್‌ನಿ ಮತ್ ರ್ಡ್ವೆವ್ಚು ಶಾಣು ಕರಿ ರ್ಡ್ವಾವಾಳು ಸೇವಕನಿ ಘೋಣಿ ರ್ಡ್ವೆವ್ಚು.

27 ಕೋಣ್ ಮಹಾನ್? ಖಾಣು ಖಾವನ ಬೆರೂತೆ ಯೋಕಿ, ಇನಿ ಚಾಕ್ರಿ ಕರಾವಾಳೊ? ಖಾವನ ಬೆರೋಸ್ತೆ ಯೋಸ್ ಕಾಹೆಕಿಶು, ಕತೋಬಿ ಮೇ ತುಮಾರಾಮ ಚಾಕ್ರಿ ಕರಾವಾಳನಿಘೋಣಿ ಛೂ.

28 ತುಮೆ ಮಾರಿ ಖ್ವಾರಿ ಖ್ವತಾಪ್ಚಿಮ, ಮಾರ ಜೋಡೆ ರ್ಡ್ವೆಯಾಹುಯ.

29 ಮಾರೊ ಬಾ, ಮನ ರಾಜ್ಯನ ಚಲಾವಾನ ಹಕ್ ದಿದೋತೆ ಇಮ್ಮಸ್, ಮೇಬಿ ತುಮೂನ ಅದಿಕಾರ್ ಚಲಾವಾನ ಹಕ್ ದೆವುಸ್.

30 ಮಾರಿ ರಾಜ್ಯಮ ತುಮೆ, ಮಾರಿ ಮೇಜ್‌ಪರ್ ಖಾಶುಪೀಶು, ಅಜ್ಞು ಸಿಂಹಾಸನ್‌ಪರ್ ಬೇಶಿನ್, ಇಸ್ರಾಯೇಲ್‌ನ ಭಾರ ಖೂಮ್‌ವಾಳಪರ್ ಅದಿಕಾರ್ ಚಲಾವ್‌ಶು.

ಯೇಸುನೆ ಪೇತ್ರ ಇನ ಝಿಟ್ಕಾರ್‌ಶೆತೆ ಬಾರೇಮ ಬೋಲ್ಯೊತೆ

(ಮತ್ತಾಯ 26:31-35; ಮಾರ್ಕ 14:27-31; ಯೋಹಾನ 13:36-38)

31 ಸೀಮೋನ್, ಸಿಮೋನ್! ಹಂದೇಕ್! ಶೈತಾನ್ ತುಮೂನ ಘವ್‌ನ ತೂರಾನಿಫೋಣಿ ಹುಕುಮ್‌ನ ಮಾಂಗಿರಾಖ್ಯೊಸ್.

32 ಕತೋಬಿ ತಾರಿ ವಿಶ್ವಾಸ್ ಕಮ್ ನಾ ಹೋಣುಕರಿ, ಮೇ ತಾರಿ ಬಾರೇಮ ದೇವ್ ಪ್ರಾರ್ಥನೆ ಕರಿರಾಖ್ಯೊಸ್ ಸೀಮೋನ್. ಅಜ್ಜು ತೂ ಮಾರಭಣಿ ಫರಾನ ಬಾದ್‌ಮ, ತಾರ ಭೈಯೇನ ಭಾಲಿ ದೇವ್ಣ್ ಕರಿ ಬೋಲ್ಯೊ.

33 ಕತೋಬಿ ಇನೆ ಯೇಸುನ, “ಪ್ರಭು, ಮೇ ತಾರ ಜೋಡೆ ಜೇಲ್‌ಮ ಜಾವಾನಾಬಿ ಅಜ್ಜು ಮರನಾಬಿ ತೈಯಾರ್ ಲ್ಲೊ!” ಕರಿ ಬೋಲ್ಯೊ.

34 ತದೆ ಯೇಸುನೆ ಇನ, “ಪೇತ್ರ, ಆ ರಾತೆ, ತೂ ಮಾರಿ ಬಾರೇಮ, ‘ಆ ಮನ ಮಾಲುಮ್ ಕೊಯ್ನ್’ ಕರಿ ತೀನ್ ಹಲ್ಲ ಬೋಲಾತೋಡಿ, ಮುರ್‌ಗೊ ಬಾಂಗ್ ದಿಶೆ ಕೊಯ್ನ್ ಕರಿ ಮೇ ತುನ ಬೋಲುಸ್” ಕರಿ ಬೋಲ್ಯೊ.

ಚಂಚಿ, ಬಟ್‌ವೊ ಅಜ್ಜು ತಲ್ವಾರ್‌ನಿ ಬಾರೇಮ

35 ಅಜ್ಜು ಯೇಸುನೆ ಇನ ಶಿಷ್ಯರನ, “ಮೇ ತುಮೂನ ಚಂಚಿ, ಬಟ್‌ವೊ ನತರಾಕಿ ಖೋಖ್ಡಾ ಕೊಯ್ಣಿ ತೆ ಮೋಕ್‌ಲ್ಯೊಥೋತೆ ತದೆ, ತುಮೂನ ಶಾತ್‌ತೋಬಿ ಕಮ್ ಹುಯುಕಿ ಶು? ಕರಿ ಪುಲ್ಲಾವಖ್ವತರ್, ಇವ್ಣೆ “ಶಾತ್ಪಿ ಕೊಯ್ನ್” ಕರಿ ಜವಾಬ್ ದಿದು.

36 ತದೆ ಯೇಸುನೆ ಇವ್ಣುನ, “ಕತೋಬಿ ಹಮ್ಮೆ, ಕಿನ-ಕಿನಾಕನ ಚಂಚಿ ನತರಾಕಿ ಬಟ್‌ವೊ ಲ್ಲಾಕಿ ಇನ ಪಾಡಿಲೆವೊ; ಅಜ್ಜು ಕಿನಾಕನ ತಲ್ವಾರ್ ಕೊಯ್ಣಿ ಇವ್ಣೆ ಇವ್ಣು ಹೋಡ್‌ಣಿನ ವೇಚಿನ್, ಏಕ್ ತಲ್ವಾರ್‌ನ ಲೀಲೆವ್ಣು.

37 ಶನಕತೊ, ಪ್ರವಾದಿಖ್ವಾರು ಮಾರಿ ಬಾರೇಮ ಲೀಖ್ಪಿರ್ದೊತ್* ಇಮ್, ಅಪರಾದಿಮ ಏಕ್ ಜ್ಞಾನಿನಿಮತ್ ಮನ ಸೋಚ್ಚು ಕರಿ ಬೋಲಾನು ಫಾಲ್ತುತೆ, ಇನಖ್ವಾಜೆ ಯೋ ಪೂರ ಹುವಾನ ಆಯು.

* 22:37 22:37 ವಿಮೋಚನ ಕಾಂಡ 22:37: ಯೆಶಾಯ 53:12

38 ಶಿಷ್ಯರಾನೆ ಇನ, “ಪ್ರಭು, ಹಂದೇಕ್! ಹಜ್ಜಾ ಬೇ ತಲ್ವಾರ್ ಲ್ಲಾ” ಕರಿ ಬೋಲ್ಯೊ ತದೆ ಯೇಸುನೆ, “ಎತ್ತು ಬಶ್” ಕರಿ ಬೋಲ್ಯೊ.

ಯೇಸುನೆ ಆಲಿವ್‌ನು ಪಹಾಡ್‌ಪರ್ ಪ್ರಾರ್ಥನೆ ಕರೊತ್ಲೆ
(ಮತ್ತಾಯ 26:36-46; ಮಾರ್ಕ 14:32-42)

39 ಯೇಸು ಯೆರೂಸಲೇಮ್‌ನ ಮ್ಹೆಲಿನ್, ಯೋ ಜಾತೊಥೋತೆ ಇಮ್ಮಸ್, ಆಲಿವ್ ಪಹಾಡ್‌ನ ಗಯೊ, ಶಿಷ್ಯರಾಬಿ ಇನ ಕೇಡೆ ಗಯ.

40 ಯೋ ಝಗೋಪರ್ ಆವಾದಿನ್, ಯೇಸುನೆ ಇವ್ಣುನ, “ತುಮೆ ಶೋದನೆಮ ಪಡ್ನುನಾತೆ ಇಮ್, ಪ್ರಾರ್ಥನೆ ಕರೊ” ಕರಿ ಬೋಲ್ಯೊ.

41 ಅನ ಬಾದ್‌ಮ ಯೇಸು ಇವ್ಣುನ ಮ್ಹೆಂದಿನ್, ಬಂಡೊ ಫೇಕವಿ ದೂರ್ ಜೈನ್, ಗುಡ್‌ಘ್ ಟೇಕಿನ್ ಪ್ರಾರ್ಥನೆ ಕರೊ.

42 “ಬಾ, ತಾರಿ ಮರ್ಜಿ ಉಶೇತೊ, ಆ ಖ್ವತಾಪ್ಪಿನ್ ಕಟೋರಿನ, ಮಾರೇಥಿ ದೂರ್ ಹಟಾವ್; ತೋಬಿ, ಮಾರಿ ಮರ್ಜಿ ಕಾಹೆ, ತಾರಿ ಮರ್ಜಿ ಹುವಾದೆ” ಕರಿ ಬೋಲಿನ್ ಪ್ರಾರ್ಥನೆ ಕರೊ.

43 ತದೆ ಪರಲೋಕ್‌ಥೊ ಏಕ್ ಧೂತ ಐನ್, ಯೇಸುನ ದೆಖ್ಲಿನ್, ಇನ ಭಾಲಿ ದಿದೊ.

44 ಯೋ ಘಣಿ ದುಖ್‌ಥಿ ಬಿಜೂಬಿ ಪ್ರಾರ್ಥನೆ ಕರುಕರಾನಿ ವಖ್ತಾಮ್, ಇನು ಪಶುನೊ ಲ್ಹೋಯಿನ್ ಬೂಂದಾವ್‌ನಿಮತ್ ಜಮೀನ್‌ಪರ್ ಪಡ್ನು.

45 ಪ್ರಾರ್ಥನೆಮಾಥು ಯೇಸು ಉರಿನ್, ಪಾಲ್ತುಫರಿ ಇನ ಶಿಷ್ಯರಾಕನ ಆಯಿನ್, ದುಖ್‌ಥಿ ಭರೈನ್, ಇವ್ಣೆ ಖ್ವತೂಥೂತೆ ದೇಖಿನ್,

46 ಯೇಸುನೆ ಇವ್ಣುನ, “ತುಮೆ ಶನ ಖ್ವತಾಸ್? ಉಪ್ಪರ್ ಉಲೊ, ಅಜ್ಜು ತುಮೆ ಶೋದನೆಮ ಪಡ್ನುನಾತೆ ಇಮ್ ಪ್ರಾರ್ಥನೆ ಕರೊ” ಕರಿ ಬೋಲ್ಯೊ.

ಯೇಸುನ ಧರೊತ್ಲೆ

(ಮತ್ತಾಯ 26:47-56; ಮಾರ್ಕ 14:43-50; ಯೋಹಾನ 18:3-11)

47 ಯೇಸು ವಾತೆ ಬೋಲುಕರಾನಿ ವಖ್ವತ್‌ಮಾಸ್, ಅದ್ಮಿನಿ ಏಕ್ ಭೀಡ್ ಹಿಚ್ಚಾ ಆಯಿ. ಭಾರಭಣ ಶಿಷ್ಯರಾಮ ಏಕ್ ಭಣೊ ಹುಯಿರೈದ್ಲೋತೆ ಯೂದ, ಇವ್ಣ ಖ್ವಾಪ್ಪೆ-ಖ್ವಾಪ್ಪೆ ಚಾಲ್ತೊ ಉಳ್ಳಾವ್ತೋ. ಯೋ ಯೇಸುನ ಬುಚ್ಚಾ ದೈವಾನಖ್ವಾಜೆ ಖನ್ನೆ ಆಯೊ.

48 ತದೆ ಯೇಸುನೆ ಇನ, “ಯೂದ, ಬುಚ್ಚಾದೀನ್, ಧೋಕೇಥಿ ಅದ್ಮಿನೊ ಛಿಯ್ಯಾನ ಧರಿದೈವಾನ ಆಯೋಕಿ ಶು?” ಕರಿ ಬೋಲ್ಯೊ.

49 ಯೇಸುನ ಜೋಡ್ಲಾಡಾತೆ ಶಿಷ್ಯರಾಖ್ವಾರು ಚಾಲ್‌ಶೆತೆ ಇನ ದೇಖಿನ್, ಯೇಸುನ, “ಪ್ರಭು, ಹಮೆ ಹಮಾರು ತಲ್ವಾರ್‌ಥಿ ಮಾರಿಯೇಕಿ ಶು?” ಕರಿ ಪುಲ್ಲಾಯು.

50 ಅವ್ಣಾಮ ಏಕ್ ಭಣೊ, ತಲ್ವಾರ್‌ಥಿ ಮಾರಿನ್, ಗಲ್‌ಥಯಾಜಕ್‌ನ ಆಳ್‌ನ ಖಾವಿ ಬಾಚುನ ಕಾನ್ನ ಕತ್ತಿನಾಖ್ಯೊ.

51 ಕತೋಬಿ ಯೇಸುನೆ ಇನ, “ಅತ್ರೇಸ್ ಬಶ್!” ಕರಿ ಬೋಲಿನ್, ಯೋ ಆಳ್‌ನು ಕಾನ್ನ ಛೀಮಿನ್, ಇನ ಅಳ್ಳು ಕರೈಲ್ಯೊ.

52 ಬಾದಾಮ ಯೇಸುನೆ ಇನ ಧರಾನ ಆಯೊತೆ, ಮಹಾಯಾಜಕನ, ಮಂದಿರ್‌ನ ಕಾವ್ಣಿ ಕರಾವಾಳ ದಂಡ್ ದಳೆವಾಯಿನ ಅಚ್ಚು ಸಭೆನ ಶಾಣಾಪನಾಬಿ, “ಚೋರ್‌ನ ಧರಾನಿಫೋಣಿ, ತಲ್ವಾರೆ, ಲಠ ಪಳ್ಳಿನ್ ಮನ ಧರಾನ ಆಯಾಕಿ ಶು?

53 ಮೇ ದನ್‌ರೋಚ್ ದೇವ್ಣಿ ಮಂದಿರ್‌ಮ ತುಮಾರ ಜೋಡೆ ಥೋತೆ ತದೆ, ತುಮೆ ಮನ ಧರೈಕೊಯ್ಣಿ. ಕತೋಬಿ ಆ ತುಮಾರಿ ವಖ್ವತ್, ಅಂಧಾರನಿ ಶಕತ್ ಅದಿಕಾರ್ ಕರಾನಿ ವಖ್ವತ್” ಕರಿ ಬೋಲ್ಯೊ.

ಪೇತ್ರನೆ ಯೇಸುನ ಝಿಟ್ಕಾರೈತೆ

(ಮತ್ತಾಯ 26:57-58,69-75; ಮಾರ್ಕ 14:53-54,66-72; ಯೋಹಾನ್ 18:12-18,25-27)

54 ಇವ್ಣೆ ಯೇಸುನ ಧರೀನ್, ಗಲ್‌ಥಯಾಜಕ್‌ನ ಘರ್‌ನ ಮಹಿ ಲೀಗಯು. ಅಚ್ಚು ಪೇತ್ರ ದೂರ್‌ಥೊ ಇವ್ಣ ಪೀಲೆ-ಪೀಲೆ ಗಯೊ.

55 ಖ್ವಾಪ್ಪೆನಿರುಗೋನ, ಇಚ್‌ಮ ಆಗ್ ಲಗಾಡಿನ್, ಇನ ಅಶ್‌ಪಿಶ್ ಬೆರುಥೂತೆ, ಅದ್ಮಿನ ಜೋಡೆ ಪೇತ್ರಬಿ ಬೇಶಿಗಯೊ.

56 ಪೇತ್ರ ಹಿಜ್ಜಾ ಉಜ್ಜಾಳಾಮ ಬೆರಿತೆ, ಏಕ್ ಭಣಿ ಆಳ್‌ನೆ ರರ್‌ಖ್ತೆ, ದೇಖಿನ್, “ಆಬಿ ಯೇಸುನ ಜೋಡೆ ಥೊ!” ಕರಿ ಬೋಲಿ.

57 ಕತೋಬಿ ಪೇತ್ರನೆ, “ಮನ ಯೋ ಮಾಲುಮಸ್ ಕೊಯ್ನಿಲಿ, ಬಾಯಿ!” ಕರಿ ಬೋಲ್ಯೊ.

58 ಜರ ಘಡಿನ ಬಾದ್‌ಮ, ಏಕ್ ಭಣಾನೆ ಪೇತ್ರನ ದೇಖಿನ್, “ತೂಬಿ ಇವ್ವಾಮ ಏಕ್ ಭಣೊ ಹುಯಿರ್ದೊಸ್” ಕರಿ ಬೋಲ್ಯೊ.

ಕತೋಬಿ ಪೇತ್ರನೆ “ಮೇ ಕಾಹೇಲ ಬಾಬ!” ಕರಿ ಜವಾಬ್ ದಿದೊ.

59 ಅಜ್ಜು ಏಕ್ ಘಂಟಾನ ವಖ್ವತ್‌ಮ, ಅಜೇಕ್ ಭಣಾನೆ, “ಖ್ವಾಚಮಾಬಿ ಆಬಿ ಯೇಸುನ ಜೋಡೆ ರ್ವಯೊಹುಯೊ, ಶನಕತೊ ಆಬಿ ಗಲಿಲಾಯವಾಳೊಸ್‌ನಿ!”

60 ಕತೋಬಿ ಪೇತ್ರನೆ, “ತೂ ಶಾತ್ ಬೋಲುಕರಾಸ್ತೆಕಿ ಮನ ಮಾಲುಮ್ ಕೊಯ್ನಿ?” ಕರಿ ಜವಾಬ್‌ದಿದೊ.

ಯೋ ಬೋಲುಕರಾತೆ ವಖ್ವತ್‌ಮಾಸ್, ಮುರ್‌ಗೊ ಬಾಂಗ್ ದಿದು.

61 ಪ್ರಭುನೆ ಪೀರೆ ಫರಿನ್, ಪೇತ್ರನಸ್ ರರ್‌ಕಿ ದೇಖ್ಚೊ, ತದೆ ಪೇತ್ರನೆ ಇನ, ಪ್ರಭು “ಮುರ್‌ಗೊ ಬಾಂಗ್‌ದ್ಯವಾನ ಅಗಾಡಿ, ತೂ ಮಾರಿ ಬಾರೇಮ, ‘ಯೋ ಮನ ಮಾಲುಮ್ ಕೊಯ್ನಿ’ ಕರಿ ತೀನ್‌ಹಲ್ಲ ಬೋಲಿಶ್” ಕರಿ ಬೋಲ್ಯೊಥೋತೆ ವಾತೆನ ಯಾದ್ ಕರಿಲಿನ್,

62 ಭಾರ್‌ಜೈನ್, ಖ್ವತ್‌ಕ್ಯಾ ಭರಿನ್[†] ರೋಯೊ.

ಯೇಸುನಿ ನಕ್ಲೆ ಕಾಡ್ಕುತೆ ಅಜ್ಜು ಇನ ಮಾರ್‌ಯ್ತೆ

(ಮತ್ತಾಯ 26:67-68; ಮಾರ್ಕ 14:65)

63 ಯೇಸುನ ಕಾಪ್ಪಿ ಕರುಕರ್ತುಫೂತೆ ಇವ್ಚೆ ಇನಿ ನಕ್ಲೆ ಕಾಡ್ಕು ಅಜ್ಜು ಇನ ಮಾರ್‌ಯ್ತೆ.

64 ಇನ ಮ್ಹೊಡಾಪರ್ ಲುಂಗ್ಡು ನಾಖಿನ್, “ತುನ ಮಾರ್‌ಯ್ತೆ ಕೋಣ್? ಕರಿ ಹಮೂನ ಪ್ರವಾದ್‌ನೆ ಬೋಲ್” ಕರಿ ಬೋಲ್ಯೊ.

65 ಅಜ್ಜು ಇನಿಬಾರೇಮ ಕೈಏಕ್ ದೂಷಣೆ ಬೋಲಿನ್, ಖ್ವರಮ್ ಕಾಡ್ಕು.

[†] 22:62 22:62 ಥಾಳ್ ಪಡೀನ್ ರೋಯೊ

ಯೇಸುನ ನ್ಯಾವ್ ಫೇಡಾನಿ ಝಗೋಕನ ಲಾಯುತೆ
(ಮತ್ತಾಯ 26:59-66; ಮಾರ್ಕ 14:55-64; ಯೋಹಾನ 18:19-24)

⁶⁶ ವಾಣು ಹುವ್ವಾದೀನ್, ಶಾಣುಖ್ವಾರು ಅಜ್ಜು ಮಹಾಯಾಜಕ, ಮೋಶೇನು ಧರ್ಮಶಾಸ್ತ್ರ ಶಿಕಾಡವಾಳು ಶಾಸ್ತ್ರಿ ಖ್ವಾರು ಎಕ್ವುಹುಯಿನ್, ಯೇಸುನ ನ್ಯಾವ್ ಫೇಡಾನಿಝಗೋಕನ ಲೀಗಯು.

⁶⁷ “ತೂ ಕ್ರಿಸ್ತ ಉಶೇತೊ, ಹಮೂನ ಬೋಲ್?” ಕರಿ ಬೋಲ್ಯು.
ತದೆ ಯೇಸುನೆ ಇವ್ವುನ, “ಮೇ ಬೋಲ್ಯೋತೊ, ತುಮೆ ನಂಬಾಕೊಯ್ನಿ” ಕರಿ ಜವಾಬ್ ದಿದೊ.

⁶⁸ ಅಜ್ಜು, “ಮೇ ತುಮೂನ ಶಾತ್‌ತೋಬಿ ಬೋಲಿಲಿದೋತೊ ತುಮೆ ಜವಾಬ್ ಕೋ ದಿಶುನಿ.

⁶⁹ ಹಂಕೇಥು, ಕತೋಬಿ ಅದ್ಮಿನೊ ಛಿಯ್ಯೊ ಮಹಾನ್ ಶಕತ್‌ವಾಳೊ ದೇವ್ನ ಖಾವಿಬಾಜ್ಜುಮ ಬೆರೊರ್ದೇಶೆ” ಕರಿ ಬೋಲ್ಯೊ.

⁷⁰ ಇವ್ವೆ ಖ್ವಾರೂಸ್, “ಇಮ್‌ಕತೊ, ತೂ ದೇವ್‌ನೊ ಛಿಯ್ಯೊಕಿ ಶು?” ಕರಿ ಪುಲ್ಲಾಯು.

ತದೆ ಯೇಸುನೆ ಇವ್ವುನ, “ಮೇ ಯೋಸ್ ಕರಿ ತುಮೇಸ್ ಬೋಲ್ಯಾನಿ” ಕರಿ ಜವಾಬ್ ದಿದೊ.

⁷¹ ಅನ ಖ್ವಮ್‌ಜಿನ್ ಇವ್ವೆ “ಅಪ್ಪ ಬಿಜಿ ಖೆವಿ ಸಾಕ್ಷಿನಿ ಜ್ಞರೂರತ್ ಕೊಯ್ನಿ! ಅಪ್ಪೆ ಖ್ವುಡ್ ಅನೆ ಬೋಲ್ಯೋತೆ ಇನ ಖ್ವಮ್‌ಜ್ಯಾನಿ!” ಕರಿ ಬೋಲ್ಯು.

23

ಯೇಸುನ ಪಿಲಾತನ ಖ್ವಾಪ್ಪೆ ಲಾಯುತೆ
(ಮತ್ತಾಯ 27:1-2,11-14; ಮಾರ್ಕ 15:1-5; ಯೋಹಾನ 18:28-38)

¹ ಹಿಜ್ಜಾ ಎಕ್ವು ಹುಯಿರ್ಲ್ಯಥೂತೆ ತಮಾಮ್ ಅದ್ಮಿ ಉರೀನ್, ಯೇಸುನ ಪಿಲಾತಕನ ಬುಲೈಲಿಗಯು.

2 ಹಿಜ್ಜಾ ಇವ್ವೆ ಯೇಸುಪರ್, “ಆ ಅದ್ಮಿ ಅಪ್ಪ ಅದ್ಮಿ ಖ್ವಾರಾನ ಗಲತ್ ವಾಟ್‌ಪರ್ ಲೀವಳ್ಳೊಜ್ಹಾಸ್, ಇವ್ವುನ, ‘ತುಮೆ ಕೈಸರ್‌ನ ಶುಂಕ ನಕೊ ಭಾಂದೊ’ ಕರಿ ಬೋಲಸ್, ಅತ್ರೇಸ್ ಕಾಹೆತೆ ಇನು ಯೋಸ್, ‘ಮೇ ಕ್ರಿಸ್ತ ಕರಿ ಏಕ್ ರಾಜ್’ ಕರಿ ಬೋಲ್ತೊಫಂಡಾಸ್” ಕರಿ ಬೋಲಿನ್ ಗಲತ್ ಲಗಾಡ್ಲು.

3 ಪಿಲಾತನೆ ಯೇಸುನ, “ತೂ ಯೆಹೂದ್ಯರ್‌ನೊ ರಾಜಾಕಿ ಶು?” ಕರಿ ಪುಲ್ಲಾಯೊ,

ತದೆ ಯೇಸುನೆ ಇನ, “ತುನೇಸ್ ಬೋಲ್ತೊನಿ” ಕರಿ ಜವಾಬ್ ದಿದೊ.

4 ತದೆ ಪಿಲಾತನೆ ಮಹಾಯಾಜಕರ್ ಅಜ್ಜು ಅದ್ಮಿನಿ ಭೇಡ್ಲ, “ಆ ಅದ್ಮಿಮ ಮನ ಶನೀಶ್ ಗಲತ್ ಕೋ ದೆಖಾಯುನಿ” ಕರಿ ಬೋಲ್ತೊ.

5 ಕತೋಬಿ ಇವ್ವೆ, “ಯೂದಾಯನು ಖ್ವಾರಸ್ ಅದ್ಮಿನ, ಆ ವಚನ್ ಬೋಲಿದೇತೊಹುಯಿನ್, ಇವ್ವಾಮ ಕಲ್ವಾಗಟ್ ನಾಖಿರಾಖ್ಯೊಸ್. ಅನೆ ಗಲಿಲಾಯಾಥು ಶುರು ಕರೀನ್, ಹಮ್ಮೆ ಹಜ್ಜಾ ಐರ್ಟೊಸ್ತೆ” ಕರಿ ಬಿಜೂಬಿ ಘಟ್‌ಥಿ ಬೋಲ್ತು.

ಯೇಸುನ ಹೆರೋದಕನ ಮೋಕ್‌ಲ್ಯತೆ

6 ಅನ ಖ್ವಮ್‌ಜಿನ್ ಪಿಲಾತನೆ, “ಆ ಅದ್ಮಿ ಗಲಿಲಾಯವಾಳೊಕಿ ಶು? ಕರಿ ಪುಲ್ಲಾಯೊ.

7 ಯೇಸು ಹೆರೋದ ಅದಿಕಾರ್ ಭಲಾವ್‌ಕರಾಸ್ತೆ ಗಾಮ್‌ವಾಳೊ, ಕರಿ ಪಿಲಾತನ ಮಾಲುಮ್ ಪಡ್‌ತಾನ, ಯೇಸುನ ಹೆರೋದಕನ ಮೋಕ್‌ಲ್ಯೊ ಯೋ ದನ್ಮ ಹೆರೋದ ಯೆರೂಸಲೇಮ್‌ಚ್ ಥೊ.

8 ಯೇಸುನ ದೇಖಿನ್, ಹೆರೋದನ ಘಣು ಖ್ವುಶ್ತಿಹುಯು. ಶನಕತೊ, ಇನೆ ಯೇಸುನಿ ಬಾರೇಮ ಘಣು ಖ್ವಮ್‌ಜಿರಾಖ್ಯೊಥೊ, ಇನಖ್ವಾಜಿ ಘಣ ದನ್‌ಥು, ಇನ ದೇವ್ಣುಕರಿ ಥೊ, ಯೇಸು ಕೆಹುತೋಬಿ ಅದ್ಭುತ್ ಕರಾತೊ, ಇನ ದೇಕ್ಣು ಕರಿ ಆಖ್‌ಡ್ಲು.

9 ತದೆ ಹೆರೋದನೆ ಯೇಸುನ ಕೆತ್ತು ಪುಲ್ಲಾಯೊತೋಬಿ, ಯೇಸುನೆ ಇನ ಜವಾಬ್ ಕೋ ದಿದೋನಿ.

10 ಗಲಾಡೆಯಾಜಕರ್ ಅಜ್ಜು ಮೋಶೇನು ಧರ್ಮಶಾಸ್ತ್ರ ಶಿಕಾವಾಳು ಶಾಸ್ತ್ರಿಯೆ ಭೀರಿನ್, ಯೇಸುನಿ ವಿರೋದ್ ನೀಕೊಂತೇಸ್ ವಾತೆನ ಬೋಲುಕರ್ತೂಢು.

11 ಹೆರೋದ ಅಜ್ಜು ಇನು ಸಿಪಾಯಿಖ್ವಾರು ಯೇಸುನಿ ಛಿಂಫಾವ್ಣಿ ಕರಿನ್, ನಕ್ಲೆ ಕಾಡ್ಲ್ಯಾ ಅಜ್ಜು ಘಣು ಅಟ್ಟು ಝಗ್ಗಾನ ಫೇರೈನ್, ಪಾಠು ಪಿಲಾತಕನ ಮೋಕ್ಲಿದಿದೊ.

12 ಯೋಸ್ ದನ್ನೆ ಹೆರೋದ ಅಜ್ಜು ಪಿಲಾತ ದೋಸ್ತ್ ಬಣ್ಣ್ಯಾ ಅನೇಢಿ ಅಗಾಡಿ ಇವ್ಣೆ ದುಶ್‌ಮನ್ ಹುಯಿರ್ತ್ಲಾ.

ಯೇಸುನ ಮರಣ್ ದಂಡ್ ದಿದೂತೆ
(ಮತ್ತಾಯ 27:15-26; ಮಾರ್ಕ 15:6-15; ಯೋಹಾನ
18:39—19:16)

13 ತದೆ ಪಿಲಾತನೆ, ಮಹಾಯಾಜಕರ್‌ನ, ಅಧಿಕಾರಿನ ಅಜ್ಜು ಅದ್ಮಿ ಖ್ವಾರಾವ್‌ನ ಏಕ್‌ದಮ್ ಬುಲೈನ್,

14 ಇವ್ಣುನ, “ತುಮೆ ಆ ಅದ್ಮಿನ ಮಾರಕನ ಲೈನ್, ಅದ್ಮಿ ಖ್ವಾರಾನ ಗಲತ್ ವಾಟ್‌ಪರ್ ಚಲಾವ್‌ಕರಾಸ್ ಕರಿ ಬೋಲ್ಯಾ ಕತೋಬಿ ಮೇ ಅನ ತುಮಾರ ಖ್ವಾಮ್ಣೆಸ್ ವಿಚಾರ್ ಕರ್ಯೊತೋಬಿ, ತುಮೆ ಲಗಾಡ್ಯತೆ ಗಲ್ಲಿಮ, ಏಕ್‌ಬಿ ಆನಾಮ ಮನ ಮಳ್ಳುಕೊಯ್ನಿ.

15 ಹೆರೋದನಾಬಿ ಅನಾಮ ಗಲತ್ ಕೋ ದೆಖಾಯುನಿ, ಇನಖ್ವಾಜೆಸ್, ಇನೆ ಅನ ಪಾಠು ಅಪ್ಪಕನ ಮೋಕ್‌ಲೊತೆ. ಮರಣ್ ದಂಡ್ ಖಾವಾಖ್ವಾರ್‌ಕು ಗಲತ್ ಯೇಸುನೆ ಕರಿರಾಖೊಕೊಯ್ನಿ.

16 ಅನಖ್ವಾಜೆ, ಮೇ ಅನ ಕೊಳ್ಳೇಢಿ ಮರೈನ್, ಮ್ಹಂದೆವುಸ್” ಕರಿ ಬೋಲ್ಯೊ.

17 ಪಸ್ಸು ಪೂಜಾನಿ ವೇಳ್ಕ ಅದ್ಮಿಖ್ವಾರು ಬೋಲಿಲೇಸ್ತೆ ಏಕ್‌ಜಣಾನ ಖ್ವಾರ್‌ಕೊಟ್‌ಮಾಢು ಪಿಲಾತ ಭಾರ್ ಕಾಡಿಮ್ವೇಲ್‌ನು ಪಡ್ತುಢು.

18 ಕತೋಬಿ ಇವ್ಣೆ ಜೋರೇಖ್ವು ಚಿಕ್ರಿನ್, “ಅನ ಮರೈನಾಕ್! ಹಮಾರಖ್ವಾಜೆ ಬರಬ್ಬನ ಮ್ಹೇಲಿದೆ” ಕರಿ ಬೋಲ್ಯೊ.

19 ಖ್ವಯೇರಾಮ ಚಾಲ್ಯುಥೂತೆ ಕಲ್ಹಾಗಟ್‌ನಟೇಕೆ ಅಜ್ಜು ಅದ್ಮಿನ ಮರ್‌ನಾಖ್ಯುತೆ ಇನಖ್ವಾಜೆ ಬರಬ್ಬನ ಜೇಲ್‌ಮ ಕೋಂಡಿ ಘಾಲಿರಾಖ್ಯುಥು.

20 ಪಿಲಾತನೆ ಯೇಸುನ ಛೋಡಾವಣು ಕರಿ ಬಿಜ್ಜು ಪಾಲ್ತು ಇವ್ವ ಜೋಡೆ ವಾತೆ ಬೋಲ್ಯೊ.

21 ಕತೋಬಿ ಇವ್ವೆ, “ಇನ ಶಿಲ್‌ಬೆಪರ್ ನಾಕ್! ಶಿಲ್‌ಬೆಪರ್ ನಾಕ್!” ಕರಿ ಚಿಕ್ಕುಕರ್ತುಥು.

22 ಕತೋಬಿ ಪಿಲಾತನೆ ತೀನ್ನೆಹಲ್ಲ, “ಶನ? ಆ ಖಾರಾಬ್ ಶಾತ್ ಕರಿರಾಖ್ಯೋಸ್? ಮರಣ್ ದಂಡ್ ದೆವಾಖ್ವೊರ್‌ಖ್ವು ಗಲತ್ ಅನಾಮ ಮನ ದೆಖಾಯು ಕೊಯ್ತು! ಅನಖ್ವಾಜೆ, ಮೇ ಅನ ಕೊಳ್ಜೇಥಿ ಮರೈನ್, ಮ್ಹೆಂದೆವುಸ್” ಕರಿ ಇವ್ವುನ ಬೋಲ್ಯೊ.

23 ಕತೋಬಿ, ಇವ್ವೆ ಬಿಜ್ಜೂಬಿ ಜೋರೇಥಿ ಬಳೇಳುತುಹುಯಿನ್, ಯೇಸುನ ಶಿಲ್‌ಬೆಪರ್ ನಖಾವ್ಲು ಕರಿ ಬೋಲ್ಯು. ಖ್ವರ್ತಿಮ ಇವ್ವಿ ಚಿಕ್ರಾಣಸ್ ಜೂತಿಗೈ.

24 ತದೆ ಪಿಲಾತನೆ ಇವ್ವೆ ಬೋಲಿಲಿದುತೆ ಇಮ್ಮುಸ್ ಹುವಾದೆ ಕರಿ ತೀರ್ಮಾನ್ ಕರೀನ್,

25 ಕಲ್ಹಾಗಟ್ ಅಜ್ಜು ಅದ್ಮಿನ ಮರ್‌ನಾಖ್ಯುತೆ ಇನಾಟೇಕೆ, ಜೇಲ್‌ಮ ಕೋಂಡೆ ಘಲ್ಟಿರೊಡ್ಲೂತೆ ಬರಬ್ಬನ ಮ್ಹೇಲಿದಿನ್, ಅದ್ಮಿನಿ ಮರ್ಜಿನಿಘೋಣಿ, ಯೇಸುನ ಇವ್ವ ಹಾತ್‌ಮ ದಿನಾಖ್ಯೊ.

ಯೇಸುನ ಶಿಲ್‌ಬೆಪರ್ ನಾಖ್ಯುತೆ

(ಮತ್ತಾಯ 27:32-44; ಮಾರ್ಕ 15:21-32; ಯೋಹಾನ 19:17-27)

26 ಸಿಪಾಯಿಖ್ವಾರು ಯೇಸುನ ಬುಲೈಲಿನ್ ವಳ್ಳುಜ್ಜಾತುಡ್ಲೂತೆ ವಖ್ವುತ್‌ಮ, ಖೇತರ್‌ಥು ವಳ್ಳಾವ್‌ತೊಥೋತೆ ಸಿರೇನ್ ಖ್ವಯೇರಾನ್ ಸೀಮೋನ್ನ ಧರೀನ್, ಇನಾಪರ್ ಶಿಲ್‌ಬೇನ ನಾಖಿನ್, ಇನ ಪಳ್ಳಿನ್, ಯೇಸುನ ಪೀರೆ ಆವಾನಿಘೋಣಿ ಕರ್ಯ್.

27 ಅದ್ವಿನಿ ಮೋಟಿ ಭೀಡ್ ಇನ ಪೀರೆಆಯಿ; ಇವ್ವಾಮ ಥೋಡಿ ತಯೇಡಾಬಿ ಥಿಯೆ, ಇವ್ವೆ ಯೇಸುನಖ್ವಾಜೆ ಛಾತಿ ಕೂಟ್‌ತುಹುಯಿನ್, ರೋವ್‌ತಿ ಐಯ್ಕೆ.

28 ತದೆ ಯೇಸುನೆ ಪೀರೆ ಫರೀನ್ ಇವ್ವುನ, “ಯೆರೂಸಲೇಮ್‌ನಿ ತಿರಿಯಾವೊ! ಮಾರಖ್ವಾಜೆ ನಕೊ ರೋವೊ, ಕತೋಬಿ ತುಮಾರಖ್ವಾಜೆ ಅಜ್ಜು ತುಮಾರ ಲಡ್ವಾವ್‌ನಖ್ವಾಜೆ ರೋವೊ.

29 ಶನಕತೊ ಅಮ್ಮದನ್ ಖ್ವಾರ ವಳ್ಳಾವಾಸ್ಕಿ, ಯೋ ದನ್ಮ ಅದ್ವಿಖ್ವಾರು, ‘ವಾಂಝ್‌ಣಿ ಅಜ್ಜು ಬೇಜೂನಿ ಹುಯಿಕೊಂತೆ ಅಜ್ಜು ದೂದ್ ಪಿಡ್ಡೆಕೊಂತೆ ತಯೇಡಾಸ್ ಧನ್ಯ’ ಕರಿ ಬೋಲಾಶೆ.

30 ಯೋ ದನ್ಮ ಅದ್ವಿ, ‘ಪರ್ಭತ್ ಹಮಾರಪರ್ ಪಡ್! ಪಹಾಡ್ ಹಮೂನ ಡಾಪಿಲೆ!’ ಕರಿ ಬೋಲಾಶೆ.

31 ಝಾಡು ಹರೈ ರ್ವಾವಾನಿ ವಖ್ವಿತ್‌ಮಾಸ್, ಅಮ್ಮು ಖ್ವಾರು ಹುಯೂತೊ, ಖ್ವುಕ್ಲೆ ಭಾಶೇತೆ ವಖ್ವಿತ್‌ಮ ಶಾತ್ ಉಶೆ?” ಕರಿ ಬೋಲೊ.

32 ಯೇಸುನ ಜೋಡೆಸ್ ಬಿಜ್ಜ ಬೇ ಜ್ಞಾನಾಬಿ ಮಾರ್ನ್ ಕರಿ ಲೀವಳ್ಳುಜಾತುಥು, ಇವ್ವೆ ಬೇ ಜ್ಞಾನಾಬಿ ಅಪರಾದಿ ಹುಯಿರ್ದಾಥ.

33 ಇವ್ವೆ ‘ಖೋಪ್ರಿ’ ಕರಿ ಬೋಲಾನಿ ಝುಗೋಕನ ಐನ್, ಹಿಜ್ಜಾ ಯೇಸುನ ಶಿಲ್‌ಬೆಪರ್ ಮಾರ್ನ್, ಅಜ್ಜು ಯೋ ಬೇ ಅಪರಾದಿಮ ಏಕ್ ಜ್ಞಾನ ಖಾವಿ ಬಾಜೂಮ ಅಜ್ಜು ಬಿಜೇಕ್ ಜ್ಞಾನ ಡಾವಿ ಬಾಜೂಮ ಶಿಲ್‌ಬೆಪರ್ ಮಾರ್ನ್.

34 ತದೆ ಯೇಸುನೆ, “ಬಾ, ಅವ್ವುನ ಮಾಪ್‌ಕರ್! ಅವ್ವೆ ಶಾತ್ ಕರುಕರಸ್ ಕರಿ ಅವ್ವುನಾಸ್ ಮಾಲುಮ್ ಕೊಯ್ತಿ” ಕರಿ ಬೋಲೊ.

ಸಿಪಾಯಿಖ್ವಾರು ಚೀಟಿ ನಾಖಿನ್, ಯೇಸುನ ಲುಂಗ್ವಾವ್‌ನ ಇವ್ವ-ಇವ್ವಾಮ್ ವಾಟ ಪಾಡಿಲಿದು.

35 ಅದ್ವಿಖ್ವಾರು ಭೀರಿನ್, ಯೆಹೂದ್ಯರ್‌ನ ಅದಿಕಾರಿಖ್ವಾರು ಯೇಸುನಿ ನಕ್ಲೆ ಕಾಡುಕರ್ತುಥೂತೆ ಇನ ದೇಖುಕರ್ತುಥು. ಇವ್ವೆ “ಅನೆ ಬಿಜ್ಜಾನ ಬಫಾಡ್ಯೊ ಯೋ ದೇವ್ವೆ ಚೂಣ್ಯೊತೆ ಕ್ರಿಸ್ತ ಉಶೇತೊ, ಇನು ಯೋಸ್

ಬಚ್ಚಾಡಿಲ್ವವಾದೆ! ಕರಿ ಬೋಲ್ಯು.

36 ಶಿವಾಯಿ ಖ್ವಾರುಬಿ ಯೇಸುನಿ ನಕ್ಕೆ ಕಾಡ್ತು; ಇವ್ವೆ ಯೇಸುನ ಖನ್ನೆ ಐನ್, ಕಮ್ ಮೋಲ್ವು ಕಂದಾಯುಹುಯು ದ್ರಾಕ್ಷಿನು ರಖ್ವನ್ ಪಿಯ್ಯಾನ ದೀನ್,

37 “ತೂ ಯೆಹೂದ್ಯರ್‌ನೊ ರಾಜಾ ಉಶೇತೊ, ತಾರು ತೂಸ್ ಬಚ್ಚಾಡಿಲೆ” ಕರಿ ಬೋಲ್ಯು.

38 ಯೇಸುನಿ ಶಿಲ್‌ಬೆನ ಉಪ್ಪರ್, “ಆ ಯೆಹೂದ್ಯರ್‌ನೊ ರಾಜ್” ಕರಿ ಲೀಖ್ತಿರ್ದೊಡ್.

39 ಹಿಜ್ಜಾ ಶಿಲುಬೆಪರ್ ರಂಗೈರಾಖ್ಯೂಡೂತೆ ಅಪರಾದಿಮ ಏಕ್ ಜಣು ಯೇಸುನಿ ನಕ್ಕೆ ಕಾಡ್ತೊಹುಯಿನ್, “ತೂ ಕ್ರಿಸ್ತ ಕಾಹೆಕಿ ಶು? ಇಮ್‌ಕತೊ, ತೂಬಿ ಬಚಿ ಜಾ ಹಮುನಾಬಿ ಬಚ್ಚಾಡ್!” ಕರಿ ಬೋಲ್ಯೊ.

40 ಕತೋಬಿ ಬಿಜೇಕ್ ಜಣಾನೆ ಇನ ಗುರ್‌ಕ್ಯೆನ್, “ತುನ ದೇವ್‌ನೂ ಡರ್ ಕೊಯ್ತಿಕಿ ಶು? ತುನಾಬಿ ಇಮ್ಮಿನ್ ನಿಶತ್ ಮಳಿರ್ದೀಸ್‌ನಿ.

41 ಅಪ್ಪಣ್‌ತೋಬಿ, ನಿಶತ್ ಮಳಿರ್ದೀಸ್ತೆ ಇನಾಮ ನ್ಯಾವ್ ಛಾ; ಶನಕತೊ ಅಪ್ಪೆ ಕರ್ರಾತೆ ಗಲತ್‌ನಖ್ವಾಜೆ, ಅಪ್ಪಣ್‌ನಿಶತ್ ಮಳಿರ್ದೀಸ್. ಕತೋಬಿ ಅನೆ ಶನೀಬಿ ಗಲತ್ ಕೋ ಕರ್ರೊನಿ!”

42 ಅಜ್ಜು ಇನೆ ಯೇಸುನ, “ಯೇಸು, ತೂ ರಾಜ್ಯಲೀನ್ ಆವಾನಿ ವಖ್ತಾಮ, ಮನ ಯಾದ್ ಕರಿಲಿಜೊ!” ಕರಿ ಬೋಲ್ಯೊ.

43 ತದೆ ಯೇಸುನೆ ಇನ, “ಮೇ ತುನ ಖ್ವಾಚ ಬೋಲುಸ್ತಿ, ಹಮ್ಮೇಸ್ ತೂ ಮಾರ ಜೋಡೆ ಸೊರ್ಗಾಮ ರ್ದೀಶ್” ಕರಿ ಬೋಲ್ಯೊ.

ಯೇಸು ಜಾನ್ ಮ್ಹೇಲ್ಯೊತೆ

(ಮತ್ತಾಯ 27:45-56; ಮಾರ್ಕ 15:33-41; ಯೋಹಾನ 19:28-30)

44-45 ತದೆ ಧೊಪಾರ್ ಹುಯಿಗಯುಡು, ಚಾಂದ್ ಉಜಾಳು ದ್ಯವಾನು ಭೀರಿಜ್ವೆನ್, ತೀನ್ ಘಂಟಾಲಗು, ಯೋ ಖ್ವಾರ್ ದೇಖ್ವೊಪರ್ ಅಂಧಾರು ಡಪ್ಪೆಗಯುಡು. ಮಂದಿರ್‌ಮ ರಂಗೈರಾಖ್ಯೂಡೂತೆ ಪಡ್‌ದೊ ಫಾಟಿನ್, ಬೇ ಭಾಗ್ ಹುಯಿಗಯು.

46 ಯೇಸು ಜೋರೆಟ್ಟು ಚಿಕ್ರಿನ್, “ಬಾ, ತಾರ ಹಾತ್‌ಮ ಮಾರು ಆತ್ಮಾನ ದೆವುಕರುಸ್” ಕರಿ ಬೋಲಾನ ಬಾದ್‌ಮ, ಜಾನ್ ಮ್ಹೆಲ್ಯೊ.

47 ತದೆ ಖೋಶಿಪಾಯಿನೊ ಮೋಟಾನೆ ಫಾಲ್ಕುತೆ ಇನ ದೇಖಿನ್, “ಖ್ವಾಚಮಾಬಿ ಆ ಅದ್ಮಿನೀತಿವಾಳೊಸ್ ಹುಯಿರ್ದೊಡೊ!” ಕರಿ ದೇವ್ನ ಖ್ವರಾಯೊ.

48 ಆ ಖ್ವಾರು ದೆಖಾನ ಐರ್ದೊಡೊತೆ ಅದ್ಮಿಖ್ವಾರು, ಫಾಲ್ಕುತೆ ಇನ ದೇಖಿನ್, ದುಖ್‌ಥಿ ಛಾತಿ ಕೂಟ್‌ತುಹುಯಿನ್, ಇವ್ನ್ ಘರೆ ಫಾಲ್ತುಫರಿ ಗಯು.

49 ಯೇಸುನು ವಳ್‌ಖಿನು ಅದ್ಮಿಖ್ವಾರು ಅಜ್ಜು ಗಲಿಲಾಯಾಥು ಇನ ಭೀಡೆ ಆಯುಹುಯಿ ತಯೇಡ ಖ್ವಾರಿ ದೂರ್ ಭೀರಿನ್, ಫಾಲ್ಕುತೆ ಯೋ ಖ್ವಾರಾನ ದೇಖಿಯೆ.

ಯೇಸುನ ಮುದರ್‌ನ ಫಾವಿಮ ಫಾಲ್ಕುತೆ

(ಮತ್ತಾಯ 27:57-61; ಮಾರ್ಕ 15:42-47; ಯೋಹಾನ 19:38-42)

50-51 ಯುದಾಯ ತಬರ್‌ಖಾನು, ಅರಿಮಥಾಯ ಕರಿ ಗಾಮ್ನ ಯೋಸೇಫ ಕರಿ ಏಕ್ಲಣೊ ಥೊ. ಯೋ ಏಕ್ ಅಲ್ಫು ಅಜ್ಜು ನೀತಿವಾಳೊ ಅದ್ಮಿ ಹುಯಿರ್ದೊಡೊ, ದೇವ್ನಿ ರಾಜ್ಯ ಕದೆ ಆವ್‌ಶೆಕರಿ ಬೋಲಿನ್ ಟಿವವ್‌ಕರ್ತೊಡೊ. ಶಾಣಾವ್‌ನಿ ಸಭೆಮಾನು ಅದ್ಮಿಮ ಆಬಿ ಏಕ್ ಜಣೊ ಹುಯಿರ್ದೊಡೊ, ಕರ್ತೋಬಿ ಯೆಹೂದ್ಯರ್‌ನು ಶಾಣುಖ್ವಾರು ಯೇಸುನ ಮಾರ್ನ್ ಕರಿ ಕರೈತೆ ಇನ, ಅನೆ ಮಾನ್ಯೊಡೊ ಕೊಯ್ನಿ.

52 ಯೋ ಪಿಲಾತಕನ ಜೈನ್, ಯೇಸುನು ಶರೀರ್ ಮನ ದೇ ಕರಿ ಬೋಲಿಲಿದೊ.

53 ಇನೆ ಯೇಸುನು ಶರೀರ್‌ನ ಶಿಲ್‌ಬೆಪರ್‌ಥು ಉತಾರಿನ್, ಘಣ ಮೋಲ್ನು ಲುಂಗ್ಡಾಥಿ ಲಪೇಟಿನ್, ಬಂಡಾಮ ಖೋಂದಿ ರಾಖ್ಯೊಡೊತೆ ಫಾವಿಮ ಮ್ಹೆಲ್ಯೊ. ಅನೇಥಿ ಪಹಿಲೆ ಇನಾಮ ಕಿನೂಬಿ ಮಖ್ವಾಣ್ಣು ಮ್ಹೆಲ್ಯೊಡೊ ಕೊಯ್ನಿ.

54 ಯೋ ದನ್ ಖ್ವಾರಾನೊ ದನ್ ಹುಯಿರ್ದೊಡೊ, ಅಜ್ಜು ಜರ ಘಡಿಮಾಸ್ ಸಬ್ಬತ್ ದನ್ ಶುರು ಹುವಾಳು ಥು.

55 ಗಲಿಲಾಯಥು ಯೇಸುನ ಭೀಡೆ ಆಯಿಹುಯಿ ತಯೇಡಾನೆ, ಯೋಸೇಫ್‌ನ ಜೋಡೆ ಜೈನ್, ಘವಿನಾಬಿ ಅಜ್ಜು ಯೇಸುನು ಶರೀರ್‌ನ ಮ್ಹೇಲ್ಯೆರೂತೆ ತರಿಕಾನ ದೇಮ್ನು.

56 ತದೆ ಇವ್ಣೆ ಪಾಲ್ಟುಫರಿ ಘರೆಐನ್, ಅಲ್ಟು ವಾನು ಜುಡಿಬೂರಿ ಅಜ್ಜು ವಾನುತೇಲ್‌ನ, ಯೇಸುನ ಶರೀರ್‌ಪರ್ ಲಗಾಡನಖ್ವಾಜೆ ಖ್ವವಾರಿಯೆ, ಮೋಶೇನು ಧರ್ಮಶಾಸ್ತ್ರಮ ಹುಕುಮ್ ದೀರಾಮ್ನುತೆ ಇಮ್ಮಸ್ ಇವ್ಣೆ ಸಬ್ಬತ್ ದನ್ತ ಅರಾಮ್‌ಕರಿಯೆ.

24

ಯೇಸು ಪಾಲ್ಟೊ ಜಿವ್ಣೊಹುಯಿನ್ ಉಲ್ಯೊತೆ

(ಮತ್ತಾಯ 28:1-10; ಮಾರ್ಕ 16:1-8; ಯೋಹಾನ 20:1-10)

1 ವಾರಾನು ಪಹಿಲದನ್ವೆ,* ಅಧಿರ್ದೀಣೆಸ್ ಯೋ ತಯೇಡ ಖ್ವಾರಿ, ಇವ್ಣೆ ಖ್ವವಾರಿಯೆಥೀತೆ ಅಲ್ಟು ವಾನುತೇಲ್‌ನ ಪಳ್ಳಿನ್, ಘವಿಕನ ಗಯ್ಣೆ.

2 ಘವಿನ ಮೂಚಿರಾಮ್ನುಧೂತೆ ಬಂಡೊ ನಿಕ್‌ಳ್ಳಿರ್ದೂಧೂತೆ ಇವ್ಣೆ ದೇಖಿನ್,

3 ಘವಿನ ಮಹಿ ಗಯ್ಣೆ ಕತೋಬಿ ಹಿಜ್ಜಾ ಯೇಸು ಪ್ರಭುನು ಶರೀರ್ ಇವ್ಣುನ ಮಳ್ಳುಕೊಯ್ಣಿ.

4 ಇವ್ಣೆ ಭೀರಿನ್, ಅನಿ ಬಾರೇಮ ಘಬ್ರಾವ್‌ಕರಾನಿ ವಖ್ವತ್‌ಮ, ಚಮಕ್‌ತು ಲುಂಗ್ಡು ಫೇರಿರಾಮ್ನುಧೂತೆ ಬೇ ಪರ್ಖ್ವಾ ಐನ್, ಇವ್ಣಾಕನ ಭೀರ್ದು.

5 ಯೋ ತಯೇಡ ಖ್ವಾರಿ ಡರಿಗಯೇಥಿ. ಜಮೀನ್‌ತರಬ್ ಮುಡ್‌ಕ್ಯು ಝುಕ್ಯೆನ್, ಭೀರಿಗಯ್ಣೆ. ತದೆ ಇವ್ಣೆ ಇನ, “ಜಿವ್ಣೊ ಹುಯಿನ್ ಉರಿರ್ದೊಸ್ತೆ ಇನ, ಮರ್ದಾಹುಯಾಮ ಶನ ಡೂಂಡುಕರಾಸ್ತೆ?

6 ಯೋ ಹಜ್ಜಾ ಕೊಯ್ಣಿ ಉರಿರ್ದೊಸ್. ಯೋ ಗಲಿಲಾಯಮ ತುಮಾರ ಜೋಡೆ ಥೋತೆ ತದೆ, ಬೋಲ್ಯೊಥೋತೆ ಇನ ಯಾದ್ ಕರಿಲೆವೊ.

* 24:1 24:1 ಯೆಹುದ್ಯರ್ ಲೋಗ್‌ನಿ ಇಶಾಬ್‌ಮ ವಾರಾನೊ ಪಹಿಲೊ ದನ್ ಕತೊ, ಐತ್‌ವಾರ್ ನತರ್‌ಕಿ ಐತ್‌ವಾರ್ ಕರಿ.

7 ಅದ್ದಿನೊ ಛಿಯೊ ಪಾಪಿ ಅದ್ದಿನ ಹಾತ್‌ಮ ದೆವೈನ್, ಶಿಲ್‌ಬೆಪರ್ ನಪೈನ್, ತೀನ್ನ್ ದನ್ಮ ಪಾಛೊ ಉರಿ ಆವ್‌ಶೆಕರಿ ಬೋಲ್ಯೊಧೋನಿ” ಕರಿ ಬೋಲ್ಯು.

8 ತದೆ ಯೋ ತಯೇಡ ಖ್ವಾರಿ ಯೇಸುನಿ ವಾತೆನ ಯಾದ್ ಕರಿಲೀನ್,

9 ಮಖ್ವಾಣ್ಯನಿ ಘವಿಕಂಡು ಪಾಞುಫರಿ ಜೈನ್, ಗ್ಯಾರ್ಜ್ವಣ ಶಿಷ್ಯರಾನ್ ಅಜ್ಜು ಬಿಜ್ಜ ಖ್ವಾರಾನ ಅನಿ ಬಾರೇಮ ಬೋಲಿಯೆ.

10 ಯೋ ಖ್ವಾರಿ ತಯೇಡ ಕೋಣ್-ಕೋಣ್ ಕತೊ, ಮಗ್ಗಲನಿ ಮರಿಯ, ಯೋಹಾನ್ನ್ ಯಾಕೋಬ್‌ನಿ ಆಯ ಮರಿಯ; ಅವ್ಣೆ ಅಜ್ಜು ಅವ್ಣ ಜೋಡೆ ಥೀತೆ ಬಿಜಿ ತಯೇಡ ಖ್ವಾರಿ ಅನಿ ಬಾರೇಮ, ಅಪೊಸ್ತಲರ್ ಬೋಲಿಯೆ.

11 ಕತೋಬಿ, ಅಪೊಸ್ತಲರ್ ಖ್ವಾರು ಅವ್ಣಿ ವಾತೇನ ವಿಶ್ವಾಸ್ ಕರ್ಯ್ಕೊಯ್ನಿ. ಆ ಖ್ವಾರಿ ವಾತೆ ಚುಪ್‌ಕೇನಿಸ್ ಕರಿ ಸೋಚ್ಚು.

12 ಕತೋಬಿ ಪೇತ್ರನೆ ಉರೀನ್, ಘವಿಕನ ನಾಶಿಜೈನ್, ಮಹಿ ಝುಕಿ ದೇಖಿನ್, ಲಪೇಟೆಧೂತೆ ಘಣ ಮೋಲ್ವು ಲುಂಗ್ಡಾನಸ್ ಪಣ್ಣಿ ಬಿಜ್ಜು ಶಾಶ್ವಿ ದೇಖ್ಚೊ ಕೊಯ್ನಿ. ತದೆ ಪೇತ್ರನೆ ಚಾಲ್ಯುತೆ ಇನಿ ಬಾರೇಮ ಆಶ್ಚರ್ಯ ಖಾತೊಹುಯಿನ್, ಘರೆ ಚಲೆಗಯೊ.

ಎಮ್ಮಾಹು ಕರಿ ಗಾಮ್‌ನ ಚಾಲಿಗಯೂತೆ ಬಾರೇಮ

(ಮಾರ್ಕ 16:12-13)

13 ಯೋಸ್ ದನ್ನೆ ಯೇಸುನು ಶಿಷ್ಯರಾಮ ಬೇ ಜಣ, ಯೆರೂಸಲೇಮ್‌ಡು ಗ್ಯಾರ್ಜ್ವ ಕಿಲೊ ಮೀಟರ್ ಥೂತೆ, ಎಮ್ಮಾಹು ಕರಿ ನಾಮ್ ಗಾಮೆ ವಳ್ಳಜಾತಾಥ.

14 ಚಾಲ್ಯುತೆ ಯೋ ಖ್ವಾರಿಸ್ ಬಾರೇಮ, ಇವ್ಣೆ ವಾತೆ ಬೋಲ್ತಾಹುಯಿನ್, ಒಳೆಜಾತಾಥ.

15 ಇವ್ಣೆ ಏಕ್‌ಥಿ-ಏಕ್ ವಾತೆ ಬೋಲುಕರಾನಿ ವಖ್ವತ್‌ಮ, ಯೇಸುಸ್ ಖ್ವುಡ್ ಇವ್ಣೆ ಖನ್ನೆ ಆಯಿನ್, ಇವ್ಣೆ ಜೋಡೆ ಚಾಲ್ಚೊ ಗಯೊ.

16 ಇವ್ಣೆ ಇನದೇಮ್ಮು ಕತೋಬಿ ಇನಿ ಖ್ವಣೇದ್ ಧರ್ಯ್ಕೊಯ್ನಿ.

17 ತದೆ ಯೇಸುನೆ ಇವ್ವುನ, “ತುಮೆ ತುಮಾರ-ತುಮಾರಸ್‌ಮ ಶಾತ್ ಬೋಲ್ಲಾಹುಯಿನ್, ಚಾಲ್ತ ವಳೆಜ್ಜಾಸ್ತೆ?” ಕರಿ ಪುಲ್ಲಾಯೊ.

ತದೆ ಇವ್ವೆ ಮ್ಹೋಡು ಮುರ್‌ಝ್ಝಲೀನ್, ಭೇರಿಗಯು,

18 ಇವ್ವಾಮ, ಕ್ಲಿಯೋಫಸ್ ಕರಿ ನಾಮ್ನೊ ಏಕ್ ಜಣಾನೆ, “ಯೆರೂಸಲೇಮ್ ಬಹಾರ್‌ಥು ಆಯೂತೆ ಹರೇಕ್ಕ್ ಆ ದನೂಮ ಹಾ ಚಾಲಿರ್ದೀಸ್ತೆ ವಾತೆನಿ ಬಾರೇಮ, ಮಾಲುಮ್ ರ್ಹವಾಪರ್ ತುನ ಮಾಲುಮ್ ಕೊಯ್ತಿಕಿ ಶು?” ಕರಿ ಪುಲ್ಲಾಯೊ.

19 ತದೆ ಯೇಸುನೆ, “ಖೆವಿ ವಾತೆ?” ಕರಿ ಪುಲ್ಲಾಯೊ.

ಇನ ಇವ್ವೆ, “ನಜರೇತ್‌ನೊ ಯೇಸುನಿ ಬಾರೇಮ, ಯೊ ದೇವ್ವ ಅಜ್ಜು ಅದ್ವಿನ ಡೋಳಾಮ ಪ್ರವಾದಿ ಹುಯಿರ್ದೋಡೊ, ಕಾಮ್ಬಿ ಅಜ್ಜು ವಾತೇಮಾಬಿ ಮೋಟೊ ಪ್ರವಾದಿಹುಯಿರ್ದೋಡೊ.

20 ಹಮಾರ ಮಹಾಯಾಜಕ ಅಜ್ಜು ಅದಿಕಾರಿಖ್ವಾರು ಇನ ಮರಣ್ ದಂಡನೆ ದೀನ್, ಶಿಲ್‌ಬೆಪರ್ ಲ್ಲಡಾಯು.

21 ಹಮೇತೊ, ಇಸ್ರಾಯೇಲ್ ಅದ್ವಿವೋನ ಛೋಡಾವವಾಳೊ ಯೋಸ್ ಕರಿ ಭರೋಖೊ ಕರಿರಾಖ್ಯಥ! ಯೋ ಖ್ವಾರು ಚಾಲಿನ್, ಹಮ್ಮೆ ತೀನ್ ರೋಜ್ ಹುಯ.

22 ತೋಬಿ ಹಮಾರಮ ಥೋಡಿ ತಯೇಡ ಖ್ವಾರಿ, ಆಶ್ಚರ್ಯನು ವಾತೆನ ಬೋಲಿಯೆ; ಇವ್ವೆ ವ್ಹಾಣೇಸ್ ವೇಳಿ ಘವಿಕನ ಜೈನ್,

23 ಯೇಸುನು ಶರೀರ್ ಹಿಜ್ಜಾಕೊಂತೆ ದೇಖಿನ್, ಪಾಲ್ತುಫರಿ ಐನ್, ಇವ್ವೆ ದೇವ್‌ನು ದೂತರ್‌ನ ದೇಖಿಯೆ ಅಜ್ಜು ಯೋ ಜಿವ್ವೊ ಹುಯಿರ್ದೋಸ್ ಕರಿ ಬೋಲಿಯೆ.

24 ಹಮಾರ ಜೋಡೆ ಥೂತೆ ಇವ್ವಾಮ ಥೋಡುಜಣು ಮಖ್ವಾಣ್ಯಕನ ಜೈನ್ ಯೋ ಖ್ವಾರಿ ತಯೇಡ ಬೋಲಿತೆ ಇಮ್ಮಸ್ ದೇಖ್ಯ ಕತೋಬಿ ಯೇಸುನ ಕೋ ದೇಖ್ಯೊನಿ” ಕರಿಬೋಲ್ಯಾ.

25 ತದೆ ಯೇಸುನೆ ಇವ್ವುನ, “ಅಲ ಬಿಣ್‌ಖ್ವೊಲಾ, ಪ್ರವಾದಿಯೇನೆ ಬೋಲ್ಯಾತೆ ಇನ ವಿಶ್ವಾಸ್ ಕರಾಕೊಂತೆ ಮಂದ್ ದಿಲ್‌ವಾಳಾವೊ,

26 ಕ್ರಿಸ್ತ ಅಮ್ಮಿಖ್ವಾರಿ ಖ್ವತಾಪ್ಪಿ ಖೈನ್, ಇನಿ ಮಹಿಮೆಮ ಜ್ಞಾವಾನು, ಜರೂರತ್ ಛಾನಿ ಕರಿ ಬೋಲಿನ್,

27 ಮೋಶೆಧು ಧರೀನ್, ಖ್ವಾರ ಪ್ರವಾದಿಯೇನು ಅಖ್ವ ಪವಿತ್ರ ದಪ್ತರಮ, ಇವ್ವಿ ಬಾರೇಮ ಲೀಖೈರಂತ್ತೆ ಖ್ವಾರನ ಇವ್ವುನ ಬೋಲಿವತಾಳ್ಕೊ.

28 ಇವ್ವೆ ಜಾವ್ವುಧೂತೆ ಗಾಮನ್ ಖನ್ನೆ ಇವ್ವೆ ಆವಾದಿನ್, ಯೇಸು ಬಿಙ್ಗೂಬಿ ಖ್ವಾವ್ವೆ ಜಾವಾನಿ ಘೋಣಿ ದೆಖಾಯು.

29 ಕತೋಬಿ ಇವ್ವೆ ಇನ, “ಹಮ್ಮೆ ಖ್ವಾಂಜ್ ಹುಯಿಗೈ, ರಾತ್ ಹೋತು ಉಳ್ಳುಜಾಸ್, ಹಮಾರ ಜೋಡೆ ರ್ಡ್ಡೆ” ಕರಿ ಘಣು ಬೋಲಿಲಿದು.

30 ತದೆ ಯೋ ಖಾಣಾನಖ್ವಾಜೆ ಇವ್ವ ಜೋಡೆ ಬೇಶಿನ್, ರೋಟಾನ ಪಾಡಿನ್, ದೇವ್ವ ಧನ್ಯವಾದ್ ಕರೀನ್, ತೋಡಿನ್ ಇವ್ವುನ ದಿದೊ.

31 ತದೆ ಇವ್ವ ಡೋಳ ಉಖ್ವಾಯ ಅಜ್ಜು ಇವ್ವೆ ಯೇಸುನಿ ಖ್ವಣೇದ್ ಧರಂತ್, ಕತೋಬಿ ಯೇಸು ಇವ್ವ ಡೋಳಾನ ಖ್ವಾಮ್ವೇಥೊ ಮ್ಹಾಯ ಹುಯಿಗಯೊ.

32 ತದೆ ಇವ್ವೆ ಏಕ್‌ಥಿ-ಏಕ್, “ಯೇಸು ವಾಟ್‌ಪರ್ ಅಪ್ಪ ಜೋಡೆ ವಾತೆ ಬೋಲೊಹುಯಿನ್, ವಚನ್‌ಮ ಲೀಖೈರಂತ್ತೆ ಇನ ಬೋಲಿವತಾಳ್ಕೊತೆ ತದೆ, ಅಪ್ಪ ದಿಲ್ವಮಹಿ ಆಗ್ ಬಳಾನಿಘೋಣಿ ಹುಯುಕೊಯ್ತಿಕಿ ಶು?” ಕರಿ ಬೋಲ್ಯು.

33 ತದ್‌ನು ತದ್ದೇಸ್ ಇವ್ವೆ ಉರೀನ್, ಯೆರೂಸಲೇಮ್‌ನ ಗಯ. ಹಿಙ್ಗಾ ಗ್ಯಾರ್ಡ್ ಶಿಷ್ಯರ್ ಅಜ್ಜು ಬಿಙ್ಗ ಖ್ವಾರಾನ ಜೋಡೆ ಎಕ್ವು ಹುಯಿನ್,

34 ಪ್ರಭು ಉರಿರಂತ್ತೆ ಖ್ವಾಚಸ್! ಸೀಮೋನ್ನ ಯೋ ದೆಖಾಯೊ!” ಕರಿ ಬೋಲುಕರ್ತೂಧು.

35 ಅನ ದೇಖಿನ್, ಯೋ ಬೇ ಜಣಾನೇಬಿ ವಾಟ್‌ಪರ್ ಚಾಲ್ಯುತೆ ಇನ ಅಜ್ಜು ರೋಟೊ ತೋಡಾನಿ ವಖ್ವತ್‌ಮ, ಇವ್ವೆ ಇನಿ ಖ್ವಣೇದ್ ಧರಂತ್ ಇನ ಇವ್ವುನ ಬೋಲಿವತಾಳ್ಕು.

ಯೇಸು ಇನ ಶಿಷ್ಯರ್‌ನ ದೆಖಾಯೊತೆ

(ಮತ್ತಾಯ 28:16-20; ಮಾರ್ಕ 16:14-18; ಯೋಹಾನ 20:19-23; ಅಪೊ 1:6-8)

36 ಇವ್ವೆ ಭೇ ಜಣ ಆ ಬಾರೇಮ ಬೋಲುಕರಾನಿ ವಖ್ವತ್‌ಮ, ಯೇಸು ಪ್ರಭುಸ್ ಇವ್ವೆ ಇಚ್‌ಮ ಆಯಿ ಭೀರಿನ್, “ತುಮೂನ ಸಮಾಧಾನ್ ಹುವಾದೆ” ಕರಿ ಬೋಲ್ಯೊ.

37 ತದೆ ಇವ್ವೆ ಡರ್ನ್ ಮಾರನ್ ಮನ್‌ಮ ಘಬ್‌ರೈಜೈನ್, ಇವ್ವೆ ದೇಖ್ಯತೆ ಭೂತ್ ಕರಿ ಸೋಚ್ಚು.

38 ಕತೋಬಿ ಯೇಸುನೆ ಇವ್ವುನ, “ತುಮೆ ಶನ ಘಬ್ರಾವೋಸ್ತೆ? ಶನ ತುಮಾರ ಮನ್‌ಮ ಗುಮಾನಿ ಹುಂಕರಾಸ್ತೆ?

39 ಮಾರ ಹಾತ್ವ ಅಜ್ಜು ಗೋಡಾನ ದೇಖೊ, ಆ ಮೇಸ್ತಿ! ಮನ ಭೀಮಿ ದೇಖೊ, ತುಮೆ ದೇಖುಕರಾತೆ ಇಮ್ ಮನ ಬೋಟಿ ಅಜ್ಜು ಹಡ್‌ಕ್ಯಾ ಛಾ, ಕತೋಬಿ ಭೂತ್‌ನ ಆ ಖ್ಹಾರು ಕೋ ರ್‌ಡ್ವೆಯ್ನಿ.

40 ಆ ಖ್ಹಾರು ಬೋಲಾನ ಬಾದ್‌ಮ, ಯೇಸುನೆ ಇನೊ ಹಾತ್ ಅಜ್ಜು ಗೋಡಾನ ಇವ್ವುನ ವತಾಳ್ಚೊ.†

41 ಕತೋಬಿ, ಇವ್ವೆ ಬಿಜೂಬಿ ವಿಶ್ವಾಸ್‌ಕರೈಕೊಂತೆ, ಖ್ಹಿಶಿಥಿ ಆಶ್ಚರ್ಯ ಖಾತಾನ ದೇಖಿನ್, ಯೇಸುನೆ ಇವ್ವುನ, “ಹಜ್ಜಾ ತುಮಾರಕನ ಶಾತ್‌ತೋಬಿ ಖಾವಾನು ರಾಛು ಛಾಕಿ ಶು?” ಕರಿ ಪುಲ್ಲಾಯೊ.

42 ಇವ್ವೆ ಭೂಂಜಿಹುಯು ಮಾಳ್ಲಾಲಾನು ಏಕ್ ಟುಕ್ಕಾನ ಯೇಸುನ ದಿದು.

43 ಯೇಸುನೆ ಇನಲೀನ್, ಇವ್ವೆ ಖ್ಹಾಮ್ವೇಸ್ ಖಾದೊ.

44 ಅಜ್ಜು ಯೇಸುನೆ ಇವ್ವುನ, “ಮೇ ತುಮಾರ ಜೋಡೆಸ್ ಥೋತೆ ತದ್ವೇಸ್, ಆ ಖ್ಹಾರು ತುಮೂನ ಬೋಲ್ಯೊಥೋನಿ. ಮೋಶೇನು ಧರ್ಮಶಾಸ್ತ್ರ, ಪ್ರವಾದಿಯೇನು ಪುಸ್ತಕ್‌ಮ ಅಜ್ಜು ಕೀರ್ತನೇಮ ಮಾರಿ ಬಾರೇಮ ಲೀಖ್ಪಿರೊತ್ತೆ ಅಖ್ವು ಪೂರಹುವಾನು ಜರೂರತ್ ಛಾ ಕರಿ ಮೇ ತುಮೂನ ಬೋಲ್ಯೊಥೊ ಕೊಯ್ನಿಕಿ ಶು?” ಕರಿ ಬೋಲ್ಯೊ.

45 ಅನ ಬಾದ್‌ಮ ಇವ್ವೆ ವಚನ್‌ಮ ಲೀಖ್ಪಿರೊತ್ತೆ ಇನ ಪರ್ವಿಲವಾನಿಮತ್, ಯೇಸುನೆ ಇವ್ವಿ ಅಕ್ಕಲನ್ ಛೋಡ್ಲೊ.

† 24:40 24:40 ಗ್ರೀಕ್‌ನು ಥೋಡು ದಪ್ಪರಮ 40ನು ವಚನ್ ಕೊಯ್ನಿ.

46 ಅಜ್ಜು ಇವ್ವುನ, ಕ್ರಿಸ್ತ ಖ್ವತಾಪ್ಪಿ ಖೈನ್, ಮರಿನ್, ತೀನ್ನೊ ದನ್ಮ ಉರಿ ಆವ್ವು

47 ಅಜ್ಜು ಪಾಪ್ಪ ಮಾಪಿ ಮಳ್ಣುಕತೊ, ದೇವ್ ಭಣಿ ಫರೊಕರಿ ಬೋಲಾನು, ಯೆರೂಸಲೇಮ್ ಧರೀನ್, ತಮಾಮ್ ದೇಖ್ವೊಮ ಇನ ನಾಮ್ ಪರ್ ಬೋಲಾವ್ವು ಕರಿ ಲೀಖೈರ್ದೊಸ್ನಿ,

48 ಆ ಖ್ವಾರಿ ಬಾರೇಮ, ತುಮೇಸ್ ಸಾಕ್ಷಿ ಹುಯಿರ್ದೊಸ್.

49 ಹಂದೇಖೊ! ಮಾರೊ ಬಾ ಜಿಭಾನ್ ದಿದೋತೆ ಇನ, ಮೇ ತುಮಾರಾಪರ್ ಬೋಲಿ ಮೋಕ್ಲಿಶ್. ಉಪ್ಪರ್ ಧು ತುಮಾರಪರ್ ಶಕತ್ ಆವಾತೋಡಿ, ಆಸ್ ಖ್ವಯೇರ್ ಮ ತುಮೆ ಇಪಿರ್ದೇಣು ಕರಿ ಬೋಲ್ಯೊ.

ಯೇಸು ಸೊರ್ಗಮ ಪಡೈಲಿದೋತೆ

(ಮಾರ್ಕ 16:19-20; ಅಪೊ 1:9-11)

50 ಅನ ಬಾದ್ ಮ ಯೇಸುನೆ ಇವ್ವುನ ಬೇಥಾನೈತೋಡಿ ಬುಲೈಲಿ ಜೈನ್, ಇನೊ ಹಾತ್ ಪಾಡೀನ್, ಇವ್ವುನ ಆಶೀರ್ವಾದ್ ಕರೈಲ್ಯೊ.

51 ಆಶೀರ್ವಾದ್ ಕರುಕರಾನಿ ವಖ್ವತ್ ಮ, ಯೋ ಇವ್ವುನ ಮ್ಹಂದಿನ್, ಸೊರ್ಗಮ ಪಡೈಗಯೊ.

52 ಇವ್ವೆ ಯೇಸುನಿ ಆರಾದನೆ ಕರೈಲ್ಯೊ ಅಜ್ಜು ಘಣಿ ಖ್ವತಿಥಿ ಯೆರೂಸಲೇಮ್ ನ ಪಾಲ್ತುಫರಿ ಗಯು.

53 ಅಜ್ಜು ಇವ್ವೆ ಕದೇಬಿ ಮಂದಿರ್ ಮಾಸ್ ರಕ್ಷೀನ್, ದೇವ್ನಿ ಸ್ತುತಿ ಕರೈಲ್ಯೊ.

ದೇವ್ವಿ ಖಾಜಿ ವಚನ್
The New Testament in the Vaagri Booli language of
India: ದೇವ್ವಿ ಖಾಜಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವ್ವಿ ಖಾಜಿ ವಚನ್
ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06